



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines


Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.


We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>











COLLECTIO

SELECTA

SS. ECCLESIAE PATRUM.



PATRES QUARTI ECCLESIAE SAECULI.

S. GREGORIUS THEOLOGUS.

II.

PROSTAT INSUPER VENALE

MONTES PESSULANI.

APUD VIRENQUE, BIBLIOPOLAM,

PARISIIS,

APUD BIBLIOPOLAM, CUI NOMEN GALLICE;

SOCIÉTÉ POUR LA PUBLICATION DES BONS LIVRES,

Rue des Saints-Pères, 16.

PARISIIS, E TYPOGRAPHEO BURGOGNE ET MARTINET,

VIA VULGO DICTA DU COLOMBIER, N° 30.

L3

COLLECTIO

SELECTA

SS. ECCLESIAE PATRUM,

COMPLECTENS

EXQUISITISSIMA OPERA

TUM DOGMATICA ET MORALIA, TUM APOLOGETICA ET ORATORIA;

ACCURANTIBUS

D. A. B. CAILLAU,

CANONICO HONORARIO GENOMANENSIS ET CADURCENSIS,

NONNULLISQUE CLERI GALLICANI PRESBYTERIS,

UNA CUM

D. M. N. S. GUILLON,

EPISCOPO MAROCHINENSIS, IN FACULTATE THEOLOGIAE PARISIENSIS ELOQUENTIAE

SACRAE PROFESSORE, AUCTORE LIBRI CUI TITULUS GALLICE:

BIBLIOTHEQUE CHOISIE DES PERES GRECS ET LATINS.

OPUS REGI DICATUM.

TOMUS QUINQUAGESIMUS.



PARISIIS,

APUD PARENT-DESBARRES, EDITOREM,

VIA VULGO DICTA DE SEINE, 48.

M. DCCC. XXXVI.

S. P. N. GREGORII

THEOLOGI

ARCHIEPISCOPI CONSTANTINOPOLITANI,

OPERUM

PARS I.

ORATIONES.

S. P. N. GREGORII

THEOLOGI

ARCHIEPISCOPI CONSTANTINOPOLITANI.

ORATIONES.

ORATIO XXV¹.

In laudem Heronis philosophi.

ARGUMENTUM.

I. *Philosophiæ laus. — Philosophiæ munus, de vita humana præclare mereri.* II. *Præsentem maximum honorificentissime compellat.* III. *Maximus Christi athleta. — Christiana nobilitate decoratus. — Martyr ipse, parentes martyres habuit.* IV. *Vitæ genus, quo nihil est maximi momenti, sibi proponendum instituit. — Christianam philosophiam amplectitur. — Duplex Christianorum vivendi genus.* V. *Vita solitaria. — Vita communis. — Maximus philosophi habitum, Christiani veritatem profitetur.* VI. *Philosophorum impietatem habitu, quorundam Christianorum ineptiam vestis novitate confutat. — Viri sapientis est, inter malos vivere, et ipsorum vitiis non infici.* VII. *Primarium*

¹ Alias xxii, quæ autem xxy erat, nunc est xxxiii. Habita Constantinopoli, exeunte anno 3, 9.

Maximi studium. — Vitæ humanæ nihil prodest ethnicorum philosophia. VIII. Antiquæ hæreses. — Graphica Arii imago. — Ariana hæresis magnam orbis partem invadit. IX. Hæresi favet Constantius. — Juliani persecutio. — Cruciantur episcopi, monachi, viri et mulieres. X. Valentis persecutio acerbior Juliani persecutione. — Presbyteri cujusdam martyrium describitur. XI. Maximus laudatur ob sua pro fide certamina. — Athanasii laus. — Lucius Alexandrinam sedem flagitiis invadit. XII. Palladii in Orthodoxos immanitas. — Lucius, Alexandrinæ sedis usurpator, impia perpetrat. — Mulieres et virgines miserabiliter cruciantur. — Sacra profanis pèdibus conculcata. — Altaria fœdata. XIII. Orientis calamitatem deslet Occidens. — Hujus calamitatis particeps ipse Maximus. — Virgis laceratur. XIV. In exilium mittitur. — Maximus post quadriennium ab exilio redux. XV. Gregorius Maximum hortatur, ut gentilium superstitionem, et hæreticorum impietatem confutet. — Insurgentes hæreses frangat. — Veram circa Trinitatem doctrinam astruat. — doceat Patrem principii expertem, Filium et Spiritum sanctum ad Patrem, tanquam ad causam, referendos. XVI. Tria principia non sunt in Deo constituenda. — Unus est Ingénitus, unus Unigenitus, unus Procedens. — Pater vere pater. — Filius vere filius. — Spiritus sanctus vere sanctus. XVII. Trinitas in Unitate, et unitas in Trinitate adoranda. XVIII. Nec tres, nec duo Dii, sed unus Deus agnoscendus. XIX. Maximi auxilium pro grege efflagitat Gregorius.

I. PHILOSOPHUM laudabo ¹, tametsi corpore æger : id enim philosophicum est ; laudabo autem admodum merito.

¹ Vide D. Guillon, tom. vi, p. 390-396.

Ille enim philosophus est, ego vero sapientiæ cultor. Ac proinde non incongrue hoc laudis munus suscipio, ut, si nihil aliud, hoc certe nomine philosopher, quod philosophum laudem atque admirer. Aut enim philosophiæ operam dare oportet, ut ego censeo, aut philosophiam honore complecti; ne alioqui a recto atque honesto prorsus excidamus, ac brutæ cujusdam vecordiæ damnemur, qui rationis participes creati sumus, ac per rationem ad Verbum properamus. Philosophice quoque, ut alia, vir hic ferat se laudari, ac virtutum suarum prædicationem æquo animo accipiat. Non enim ut ab ipso gratiam ineamus, eum laudabimus; (neque nos fugit, quam ab honoris cupiditate philosophi hujus animus abhorreat, ac præterea ne cumulum quidem ullum rebus oratio afferet, imo etiam, ob imbecillitatem suam aliquid de dignitate detrahet;) verum ut nobis ipsis prosimus. Hoc enim philosophia non jam contemnet, ac pro nihilo putabit, quippe cujus hoc munus et studium sit, ut de vita humana præclare mereatur. Prima porro bene merendi ratio est, rerum honestarum commendatio. Laus enim zelum parit: zelus autem virtutem: virtus porro beatitudinem: hæc vero rerum expetendarum culmen est, ad quod omnis probi viri agitatio tendit.

II. Adesdum igitur, philosophorum, addam etiam, veritatis Martyrum, optime ac præstantissime. Adesdum confutator adulterinæ illius sapientiæ, quæ in verbis sita est, ac per linguæ lenocinia velut præstigias offundit, supra hoc autem attolli, nec vult, nec potest. Adesdum virtute dexter, tam quæ in contemplatione, quam quæ in actione versatur, qui in alieno habitu nostra profiteris; ac ne in alieno quidem fortasse, siquidem angelicum est, vestitus candor et splendor, cum corporea forma pinguntur; ad designandam, ni fallor, naturalem ipsorum pu-

ritatem: Adesdum philosopho et sapiens: quousque enim ille sapientiæ amor jactabitur, si nusquam sit sapientia? Adesdum canis, non impudentia, sed oris libertate: non ingluvie, sed quia in diem vivis; non latratu, sed boni custodia, ac vigiliis pro animarum salute susceptis, atque etiam, quia virtutis quidem familiares ac domesticos mulces, alienis autem oblatras. Adesdum, ad sacra hæc, et mensam hanc mysticam, atque ad me, qui per hæc sacrum deificationis munus obco, propius accedo, ad quas sermo, et vita, et purgatio ea, quæ per cruciatus comparatur, te adducunt. Adesdum, te corenis nostris deviniam, ac clara voce, non in media Olympia, nec in exiguo Græciæ theatro, sed coram Deo, et Angelis, et universo Ecclesiæ cœtu victorum proclamabo; ut qui, non pancratio, aut cœstu, aut cursu, aut alio quodam parvo, atque ob parva præmia inito, certaminis genere dimicaris, nec ad heroum cuiuspiam aut dæmonum honorem, quibus calamitates tantum et fabulæ nominis celebritatem pepererunt; (hujusmodi enim sunt, quæ de illis honorifice prædicantur, posteaquam in stultitiæ patrocinium, tempus, et pro re legitima consuetudinem assumpserunt;) verum hærosu mendacium deviceris, in honorem Dei viventis, qui nos quoque per suos cruciatus ad subeundos cruciatus erudit, quorum etiam certaminum præmium, cœli regnum est, ac Deum effici, omni doloris sensu sublimiorem.

III. Quodnam autem hoc præconium est? Siquidem brevius et notius quæritis, erit hujusmodi: Hic est veritatis athleta verissimus, et Trinitatis ad sanguinem usque propugnator, atque eorum, qui ipsum, injuriæ inferendæ causa, persequabantur, per patiendi alacritatem persecutores. Nihil enim persecutorem ita superat, ut patientis alacritas. Si vero perfectius et latius postulatis, tale erit:

Hic ex optimis optimus, et ex nobilibus nobilissimus. Nobilitatem autem dico, non quam plerique existimant: absit. Non enim nostrum est, nec philosophicum, eam admirari, quæ a fabulis et sepulcris, ac supercilio jampridem putrefacto manat: nec eam, quæ ex sanguinibus et litteris oritur, quam noctes largiuntur, ac regum ignobilium quoque fortasse manus, nobilitatem, velut quiddam aliud, jubentium: sed quæ pietas et mores notant atque indicant, et ad primum illud bonum, ex quo originem traximus, ascensus. Hujus nobilitatis hoc unum argumentum est. Etenim non tantum Martyr ipso generosus extitit, sed etiam ex Martyribus. Itaque virtutis exemplum ipso domi habuit. Jam, quod ad civitatem attinet, siquidem sapientiæ ratio habeatur, totius orbis terrarum est civis: nec enim Cynicismus exiguis finibus circumscribi sustinet; si vero corpus spectemus, Alexandria ortus est, ex ea nimirum civitate, quæ vel cum vestra, vel certe statim post eam numeratur: quæ, cum omnibus rebus urbes omnes antecellat, nihil tamen tam proprium habet, quam animorum fervorem, et, quod in eo præclarissimum est, acerrimum erga christianam religionem studium, a voluntate quidem atque animi proposito principium duccens, cæterum a natura postea confirmatum. Animi enim fervor, cum ad pietatem accesserit, zelum parit: zelus autem fidei præsidium est.

IV. Enimvero cum ita, ut eam decebat, qui talibus ortus, ac talis futurus erat, educatus institutusque fuisset, jamque tempus postulare videretur, ut certum sibi vitæ genus constitueret, (quod ego tanti momenti esse duco, ut totius vitæ, vel recte, vel male traducendæ fundamentum in eo positum esse putem,) majus quiddam atque excelsius, quam vulgus soleat, animo agitare cœpit. Delicias enim, et opes, et potentiam magis aspernatur, quam alios

aspernari solent ii, qui his rebus excellunt. Ac delicias quidem, ut primam ærumnam et afflictionem, opes autem, ut extremam paupertatem, potentiam vero, ut summam imbecillitatem despicit, atque amolitur. Neque enim quidquam boni nomen obtinere posse statuebat, quod dominos suos haudquaquam meliores, imo etiam persæpe deteriores efficeret, nec constanter cum his, a quibus possidetur, maneret. Philosophiam autem perturbationum animi dominam sibi præficit, strenueque ad virtutem contendit, atque, antequam a corporis mole disjungatur, a corporis mole sese abscindit, ac supra ea, quæ oculis cernuntur, assurgit, totum sese, indolis magnitudine, ac voluntatis generositate, rebus firmis et stabilibus addicens. Posteaquam ita animo constituit, id ne quidem in deliberationem admisit, utram potius philosophiam sequeretur, externam-ne ac profanam, atque in philosophiæ habitu et obtentu veritatis umbras assimulantem, an vero nostram, humilem illam quidem in specie et abjectam, cæterum in occulto sublimem, atque ad Deum ducentem; verum nostram omnibus, ut ita dicam, suffragiis statim eligit, nequaquam passus mentem suam ad deteriora transversam agi, aut comptæ orationis elegantia distrahi, ob quam ii, qui gentilium placita profitentur, animos attollunt. Hoc autem primum philosophatur, ut, ex duobus nostris vitæ generibus, utrum præstantius sit, atque, et sibi, et omnibus Christianis fructuosius, intelligat. Etenim perfectissimi ac sapientissimi animi esse judicabat, privatæ utilitatis cum publicis commodis conjunctam habere rationem. Neque enim quemquam nostrum sibi soli natum esse, sed omnibus etiam, qui ejusdem naturæ participes sunt, atque ab eodem, et ad eadem procreati sunt.

V. Cum autem privatam vitam et solitariam, atque a vulgi commercio semotam et alienam, magnam quidem et

præclaram, atque humanis rebus sublimiorem esse videret, cæterum intra eos, qui hoc vitæ genere cum laude fungerentur, defixam esse, atque charitatis communionem et humanitatem repudiare, quam in præstantissimarum virtutum numero esse sciebat; idque præterea incommodi habere, quod eorum virtus, qui sic viverent, explorari non posset, quippe quæ nec in rebus gerendis exerceretur, nec cum aliis in comparisonem veniret: eam contra, quæ hominum societate et frequentia gaudet, præterquam quod multa quotidie occurrunt, in quibus virtutis suæ periculum facere queat, ad multorum utilitatem etiam esse diffusam, atque ad divinam dispensationem prope accedere, quæ universam rerum molem condidit, amicitiaque vinculis constrinxit, genusque nostrum propter vitii accessum a bono deturbatum atque dejectum, per familiaritatem illam vitæque consuetudinem, quam nobiscum habuit, ad pristinam dignitatem revocavit: hæc, inquam, cum animo volveret ac perpenderet, simulque Græcorum, qui pallio et promissa barba, gravitatis speciem præ se ferunt, fastum atque insolentiam reprimere operæpretium esse censeret: quidnam facit, et quonam pacto philosophiam tractat? Medius quodammodo inter illorum vanitatem, et nostram sapientiam incedit, atque illorum quidem habitum et larvam, nostrorum autem veritatem et sublimitatem profitetur.

VI. Quamobrem Peripateticorum scholas, et Academias, et venerandam Stoam, et Epicuri casum ac temeritatem una cum atomis et voluptate, corona lanea cingens, (quemadmodum quidam ipsorum poëtam ornavit,) quam longissime ablegat et repellit. Cynicæ autem sectæ, impietatem quidem et Numinis contemptum execratus, frugalitatem autem laudibus prosecutus, hoc est quod cernitis, canis adversus veros canes, et philosophus adversus insipientes,

et Christianus ad bene de omnibus merendum paratus, atque illorum quidem arrogantiam per habitus similitudinem, nonnullorum autem ex nostris ineptiam per vestis novitatem refutans: illud scilicet ostendens, nec pietatem in exiguis rebus, nec philosophiam in vultus tristitia, verum in animi firmitate ac mentis puritate, sinceraque ad bonum propensione consistere: nihil referre, quo habitu simus, et cum quibus consuetudinem habeamus, modo nos ita comparemus, ut sivo soli simus, mentem a sensibus contrahamus, sivo cum aliis versemur, in communi hominum cœtu tanquam in secreto vivamus, atque inter eos, qui minime philosophantur, philosophiæ studia colamus. Et quemadmodum « Arca illa Noë¹, » quæ in diluvio vim diluvii evasit; atque ingens illud Moysis spectaculum, hoc est, ille « Montis rubus², » quem ignis urens non perurebat, eodem modo nos quoque, nec ex vulgi contagione detrimentum ullum contrahamus, quemadmodum nec adamas ab iis, a quibus percutitur, et pro virili nostra curemus, ut alii per nos meliores efficiantur. Hujus philosophiæ fructus, non sermone fictæ civitates (scindapsi quidam, ut ipsi aiunt, et tragelaphi, quæ lingua sola construit,) nec categoriæ quædam et analyses, ac mixtionæ, nec symbamata et parasymbamata, et argutatrix sapientia, nec lineæ quædam nusquam existentes, nec siderum nexus et figuræ adversus Dei providentiam excogitatæ. Hæc enim ille secundo loco semper habuit, obiterquo ac velut per ludum attingit, hactenusque duntaxat, ne ab illis, qui se earum rerum scientiam tenere profitentur, illudi atque exagitari posset.

VII. Quodnam autem fuit primarium et antiquissimum ipsius studium? Pro jure et æquo cum ipsis studium? Pro jure et æquo cum præsidiis expostulare, apud reges

¹ Gen. vii, 14. — ² Exod. iii, 2.

sermonis libertatem adhibere quemadmodum eximius ille David, qui « Loquebatur in conspectu regum, et non confundebatur¹, » popularis turbæ fluctuum instar agitatæ stoliditatem compescere, ferocientium procerum licentiam, domorum inter se dissidentium morbum, indoctorum rusticitatem, doctorum arrogantiam, divitias insolenter sese efferentes, saturitatem petulanter et contumeliose se gorentem, paupertatem ad maleficia proclivem, iracundiam præcipientem, ac rationem secum efferentem, voluptatem modum excedentem, risum petulantem, mæroris anxietatem coercere, juventutis inconstantiam, senectutis ignaviam animique imbecillitatem, viduitatis solitudinem, orbitatis desperationem comprimere. Hæc vero nonne syllogismis, et lineis, et hianti in stellis obtutui multum anteponet, quisquis mente sana fuerit? Illud secum reputans, quod si ad syllogismorum conclusionem, vel ad geometriam, aut astronomiam, omnes studium suum atque operam contulerint, nihil ea res vite humanæ profutura sit, quin potius omnia dissolvi ac labefactari necesse erit: contra si ea officia, quæ a me commemorata sunt, de medio sublata fuerint, summa omnium rerum perturbatio et confusio sit. Hæc quanto Anthisthenis vanitate, et Diogenis ingluvie, et communi Cratetis matrimonio, sublimiora et præstantiora sint, quid dicere attinet? Verum ob nominis eorum reverentiam his quoque parcamus, ut nonnullum ipsi quoque fructum ex hujus viri philosophia capiant. Nos autem, ut media incidamus, pudicitiam nempe, continentiam, modestiam, morum suavitatem, affabilitatem, humanitatem, cæterasque virtutes, quibus ipse mortales omnes superat, ad id, quod ordine quidem postremum, dignitate autem et facultate principum locum obtinet, orationem convertamus.

¹ Psal. cxviii, 46.

VIII. Fuit quondam illud tempus, cum ab hæresum procellis tranquilla omnia habebamus, cum videlicet Simones, et Marciones, et Valentiniani, et Basilidæ, et Cerdones, Cerinthus etiam, et Carpocrates, atque omnes illorum nugæ ac præstigiæ, posteaquam rerum omnium Deum per diuturno tempore secuissent, bellumque pro Bono adversus Creatorem gessissent, suomet tandem, ut æquum erat, profundo absorptæ, ac silentio traditæ fuerunt. Nam Montani quoque malus spiritus, et Manis tenebræ, et Novati temeritas, aut puritas, et Sabellii mala monarchiæ assertio, cesserant, seseque subdlexerant, altera nimirum in contrariam partem secreta, altera prorsus etiam ob ipsius imbecillitatem contempta atque projecta. Nec vero quidquam aliud Ecclesiæ molestiam exhibebat. Nam persecutiones illustriorem quoque ipsam splendidioremque per supplicia reddebant. Non multum autem temporis intercessit, cum altera tempestas adversus Ecclesiam excitatur, id est, ille injustitiæ turbo, illud impietatis complementum, illa « Spirituum legio ¹, » illa Christi adversaria lingua, illa « Iniquitatem in excelsum locuta ² » mens, ille Divinitatis sector, cujus gravis quidem et horrendus conatus, gravior autem magisque horrenda mors, et Judæ proditione digna, quam ille adversus nostræ salutis auctorem moliri ac perpetrare non dubitavit, Arius, inquam, a furore pulchre nomen habens. His cum ab Alexandrina civitate initium duxisset, illicque pestiferum dogma in se concepisset, ac deinde, immitis cujusdam et rapidæ flammæ instar, ab exigua scintilla magnam orbis terrarum partem percurrisset, tandem a Patribus nostris, pioque illo numero, qui tum Nicæam se contulit, certisque finibus ac verbis Divinitatis doctrinam circumscripsit, oppressus et extinctus est.

IX. Rursus malum imperium, et rursus malum rovi.

¹ Luc. viii, 30. — ² Psal. lxxii, 8.

viscit, ac velut subputridum maleque obductum vulnus aperitur, et erumpit: gravesque lupi, alii aliunde nos intercipientes, Ecclesiam discerpunt. Armantur sacerdotes adversus sacerdotes, plebs adversus plebem furibundo impetu fertur; Imperator ipse impietati auctoritatem præbet, atque adversus orthodoxam doctrinam leges instituit; iique præterea, qui nec in virorum, nec in mulierum numero censendi sunt, quorum magna erat apud eum potentia. Quis vero temporis illius mala pro dignitate deplorare queat? Exilia, bonorum proscriptiones, ignominiae notas, infinitam hominum multitudinem, atque adeo integras civitates, quæ in desertis locis conventus habebant, et sub dio ærumnis premebantur, ac pluviis et frigore conflictabantur, atque etiam illinc pedem efferre cogebantur? Nam ne solitudo quidem eos a periculi metu vindicabat. Quis, ut graviora proferam, cruciatus, mortes, actos de episcopis, monachis, viris, mulieribus, adolescentibus, ac senibus triumphos? Nam quid de proceribus illis dicam, qui modo nova tormenta excogitabant, modo ad ea, quæ excogitata fuerant, acerbitatis aliquid addebant, seseque impietatis administros præbebant, quibus hoc unum plerumque ad gloriam nominisque splendorem abunde fuit, quod Imperatoris voluntatem sua crudelitate superassent?

X. Sed jam interim splendida persecutio finem accepit, recteque Persia causam nostram disceptavit, oppresso nimirum et extincto impio illo et execrando, ac multorum sanguinum pœnis ab uno sanguine repetitis. Nunc autem turpis et indecora persecutio cooritur, quæ, Christianorum patrociniū ad defensionem impietatis suæ prætexens, viros christianos aggreditur: hoc utique nomine superiore persecutione acerbior, quod tum quidem minime dubia et obscura erat Martyrum decertatio, nunc vero res eo rediit, ut cruciatus quoque ipsi laude careant, saltem

apud iniquos cruciatuum iudices. Vultis omnibus qui ad-
sunt, atque huic etiam fortasse, quamlibet insigni animi
robore ac tolerantia prædito, perturbationibusque animi
sublimiori, unius duntaxat ex his, quæ tum perpetrata
sunt, narratione, lacrymas extundam? Testes autem hujus
sermonis permultos habeo. Nam ad multos hujus supplicii
tragedia dimanavit: illiusque etiam temporis historiam,
nisi me opinio fallit, omnium sæculorum posteritas excep-
tura est. Navis, presbyterum unum portans, eumque non
sceleris ullius, sed fidei causa periclitantem, mari com-
mittitur, non ut vectorem servet, sed ut perdat. Atque is
quidem qui vehebatur, utpote vir pietate præstans, animo
erat prompto et alacri. Comes autem illi ignis adjungitur:
ac novitate pœnæ majorem in modum lætatur persecutor.
Proh spectaculum grave! Proh gravem tragediam! Navis
mari fertur: spectantium multitudo ad littus effunditur;
alii quidem lætantur, alii autem lugent. Quonam pacto rem
tantam paucis exprimam atque in aspectu collocabo? Ignis
accenditur, navis una cum onere suo absumitur, ignis
aquæ miscetur, resque inter se contrariæ ad pii viri sup-
plicium concurrunt, duoque elementa corpus unum par-
tiuntur, et novo atque inaudito more fax super mare at-
tollitur: ad quam, ut benignam et humanam, fortasse
quispiam accessit; propior autem factus, miscrandum atque
incredibile spectaculum reperit, navigationem sine guber-
natore, naufragium sine tempestate. Sic presbyter cinis
efficitur, imo ne cinis quidem, utpote in aquis sparsus. Nee
vero sacerdotii dignitas tanti fuit, ut honestiorem saltem
mortem consequeretur; aut si non mortem, at corte sepul-
turam, quæ impiis etiam et sacrilegis hominibus debetur.
Hæc impii hominis marina expeditio fuit: hic pii viri finis.
Nec usquam de cœlo descendit sacer ignis, nec ab eo,

qui huiusmodi facem navigantibus præferebat, pœnas sumpsit !

XI. Sed quid externa colligo ? Ad dimicationem tuam jam accedendum est, atque ad tua pietatis causa tolerata certamina, quæ pristinis tuis virtutibus, tanquam præclarum quoddam sigillum, imposuisti. Vigebat hæresis malum in tua civitate, a qua etiam ortum duxerat. Postquam autem sanctissimum illum orbis oculum, et sacerdotum antistitem, illum tuæ confessionis, per ea pericula, quæ pro fidei orthodoxæ defensione suscepit, ducem et magistrum, illam sublimem vocem, illud fidei columen, secundam illam Christi lucernam, et præcursores, si ita loqui fas est, in bona senectute mortuum, ac dierum eorum, qui secundum Deum sunt, plenum, post calumnias, post certamina, post illam omnium ore celebratam manum, post viventes mortuos, Trinitas, quam per omne vitæ tempus coluerat, et pro qua periculis sese objecerat, ad se transtulit : (non est apud me dubium, quin ex his verbis Athanasium agnoscatis ;) tum secunda quædam Ægypti plaga et flagellum, ille, inquam, veritatis proditor, ille luporum pastor, ille per caulam transcendens latro, secundus ille Arius, turbida illa et amara eversio, ille impio fonte uberius fluvius, se ipsum in Ecclesiam introduxit. Piget equidem flagitia ea, quæ tunc designata sunt, et nefarias cædes, cum quibus fera illa sacro-sanctum solium invasit, ac pestiferi ingressus præludia referro : ex multis tamen pauca deploro, quæ vos quoque mecum deploratis, et jam ante deplorastis, divini Davidis verbis utens : « Deus, » venerunt gentes in hæreditatem tuam : polluerunt templum sanctum tuum, » et quæ sequuntur : « Posuerunt » mortificia servorum tuorum escam volatilibus, et feris » in lacerationem ¹. » Quin illud insuper adjiciam, quod

¹ Psal. LXXVIII, 1, 2.

idem Propheta in altera lamentatione, alioque Psalmo cecinit: « Quanta malignatus est inimicus in sancto tuo, et » gloriati sunt qui oderunt te, in medio solemnitatis tuæ¹. » Quid enim? Annon gloriati sunt? Quid autem? Annon sanctum templum tuum variis calamitatibus, atque omni malorum genere contaminarunt?

XII. Ducis munere fungebatur vir impius et consceleratus, ne Christiani quidem nomen gerens, (hoc enim totius contumeliæ indignissimum est,) verum ab idolis ad Dei templum, ab impuris cruoribus ad execrabiliores et detestabiliores properans; ac fortasse huiusmodi adversus nos contumelia, quasi victima quadam, dæmonibus litans. Prodebant in aciem copiæ, furore ardentes, immanis et ferus exercitus adversus inermes homines, ac rei bellicæ ignaros. Expellebatur sacerdos, viri sancti successor, legitime, atque, ut Spiritus ordo postulabat, inunctus, ac canitie et prudentia ornatus. Regnabat autem Tabeel, alienæ sedis hæres. Adversus sanctos arma, adversus res eas, quas diripi nefas erat, impuræ manus, adversus Psalmos tubarum clangor. Jam quæ sequuntur considera, cadentes viros in locis sanctis, pedibus protritras mulieres, nonnullas etiam cum naturæ onere, præmaturos partus, vel, ut aptius dicam, non partus; virgines miserabilem in modum distractas, fœdus etiam cruciatas; (nam et ob fœminas, et ob viros, pudore impediatur, quominus crudelitatis modum exponam, atque occulta dedecoris sermone denudem, utpote ob quas etiam tum donudatas erubescam;) alias in interiores templi puteos sese dejicientes, alias ex editiore loco se in præceps dantes, propter carum rerum, quas cernebant, indignitatem, alias denique super eas, quæ jacebant, acervatim collabentes; adde cædes cædibus, casus casibus succedentes, sancta profanis

¹ Psal. lxxiii, 3, 4.

pedibus calcata, altaria probro habita per obscenos gestus et impudicas cantiones, atque, ut audio, (hoccine lingua audax proferet?) super ea saltationes et tripudia; adde blasphemias linguas in sacro-sanctis thronis concionantes, mysteria sugillata, psalmodias silentio compressas, gemitus in earum locum excitatos, fluentes sanguinis rivos, lacrymarum fontes, sacerdotes per vim obductos, monachos laceratos, expressam denique incursionis illius imaginem, qua quondam Assyrii sanctam Jerosolymam populati sunt; quam nec oratio, ut dignum est, exprimere, nec auris capere potest; ita ut alter Jeremias ad eam calamitatem pro dignitate complorandam adhibendus sit; qui etiam lacrymarum fontes exposcit, atque ex urbis mœnibus ob easdem calamitates ad luctum homines hortatur, viisque Sion luctum indicit, eo quod nullos, a quibus festa celebrentur, adducant.

XIII. Hanc tragœdiam Oriens quidem vidit, at Occidens quoque deslevit, cui immanitatis hujusce signa fugitivus Antistes publice spectanda proposuit. Quo pacto? Pro cadaveribus cruentas vestes Ecclesiæ romanæ protulit, ac per tacitam accusationem omnibus lacrymas movit, ut calamitatis magnitudinem in oculis et aspectu defigeret, atque auxilium nancisceretur, quemadmodum etiam nactum esse scimus. Fit enim fere, ut qui opibus ac potentia præcellit, ad infirmi afflictique miseriam sublevandam maxime inflectatur, ac spontaneo benevolentiae affectu, ad eum, qui dignitate imminutus est, se adjungat. Hoc quidem omnes pii viri gravissime tulerunt; tu vero, tanto magis commotus es, quanto et dicendi facultate atque doctrina, et zeli fervore cæteris antecellebas. Quocirca ut pro Verbo bellum geris, ita etiam ab impietate bellum tibi infertur: ac præter alia multa certamina, quæ honesti causa, opere et sermone subiisti, dum privatos et

principes, priyatim et publice, quovis denique tempore et loco doces, admones, arguis, increpas, confundis; ad extremum impiæ potestatis furore comprehensus, o nobilem calamitatem! o sacra tua vulnera! virgis quidem eleganti ac decoro corpore laceraris, sed ita, ac si vapulantem alterum spectares: et quanquam ea tui parte, quæ in aspectum cadit, inflectaris, ea tamen, quæ mente percipitur, haudquaquam dejiceris: quin potius fortitudinem ob omnium oculos tanquam in columna sculpis; atque etiam tacens, (neque enim munus jam suum exequi lingua poterat,) constantiæ magistrum te præbes.

XIV. Quid postea? E patriæ finibus exterminaris, qui nec propriam ullam, nec alienam agnoscis, ut alii, mea quidem sententia, per te ad pietatis studium erudiantur. Oasis, inhumana, inquam, illa solitudo, sed jam propter te sancta sedes, ad exulandum tibi decernitur. Age igitur, quando reditus tui bona erogasti, fac exilii quoque tui bona nobis impertiaris. Reditum tuum in theatrum nobis converte. Quosnam illic philosophari docuisti? Quosnam ab impiis opinionibus repurgasti? Quosnam ad pietatem adduxisti? Videre mihi equidem videor scholam illam, et cæremoniam, maximamque circa te hominum frequentiam. Illud etiam dicas mihi velim: præsto-ne tibi erant, qui corporis tui reliquiis solatii aliquid afferrent? An etiam paupertatem colebas? Utrum certaminis socios habebas? An hujus quoque rei penuriam æquo animo ferebas? Utrum sororum, quas, et castitatis et fortitudinis atque constantiæ socias habebas, desiderio tenebaris? An contra sublimiore animo eras, quam ut earum consuetudinem atque convictum requireres? Utrum te matris ætate confectæ solitudo flectebat? An potius firmum ac præfidentem animum gerebas, ut qui pietatem, tanquam maximum vitæ præsidium, illi reliquisses? Enimvero, quando

te, ut par erat, ad nos recepisti, atque ille, qui « Glorificantes se glorificat¹, » et « Irritantes se irritat², » et « Voluntatem timentium se facit³, » et mortuis rursus vitam inspirat; qui, ut Lazarum, « Quatriduo postquam e vita migraverat⁴ » sic te post quadriennium præter omnium spem ad vitam revocavit, qui, juxta Ezechielis, Prophetarum omnium maxime admirabilis et excelsi, visionem, « Ossa cum ossibus⁵, » et compagem cum compage connectit, desiderantibus nobis desiderantem te reddidit: fac in iisdem vitæ studiis, et eadem oris libertate perseveres, ne alioqui calamitatibus fractus ac debilitatus esse, ac philosophiam ob ignaviam prodidisse videaris.

XV. Gentilium superstitionem, et eorum, qui plures Deos colunt, impietatem, ut prius, confuta, et veteres ac novos Deos, et obscœnas fabulas, et obscœniora sacrificia eorum, qui luto lutum purgant, ut ex quodam illorum audiavi, brutorum instar animantium corporibus corpora sua purgantium, et veneranda figmenta, et indecoras præstigias; quibus, si Divinitatem definiunt, o miseros et perditos homines! si autem eam designant, o infelicitatis cumulum! si autem indicant, o singularem stultitiam! Doceant enim, quæ ratio, quod turpitudinis illius, quæ in hujusmodi rebus utuntur, arcanum? Debent enim ipsæ quoque rerum honestarum significationes et species turpitudine vacare. Quod si aliud quiddam præterea esse contendunt, quid hoc sit probent, quibusque ex libris et theologis hauserint, ostendant? Jam insurgentium etiam hæresum impetus frange, idque eo etiam acrius, quod jam antehac in cruciatibus versatus es. Philosophicus enim animus ex eo, quod passus sit, generosior redditur, atque, ut candens ferrum aqua frigida, ita periculis ob-

¹ 1 Reg. xi, 30. — ² Deut. xxxii, 21. — ³ Psal. cxlii, 19. — ⁴ Joann. et; 39. — ⁵ Ezech. xxxvii, 4.

durescit. Quin pietatis nostræ doctrinam præscribere, sic nos instituens, ut Deum unum ingenitum agnoscamus, hoc est, Patrem : unum item genitum Dominum, Filium videlicet, qui Deus quidem appellatur, cum de eo separatim sermo est, Dominus autem, quando cum Patre nominatur; illud propter naturam, hoc propter unicum Divinitatis principatum : unum denique Spiritum sanctum, a Patre procedentem, aut etiam prodeuntem, Deum quoque ipsum, apud eos, qui ea, quæ propinqua sunt, apprimè intelligunt, qui ab impiis quidem etiam oppugnantur, ab iis autem, qui supra eos assurgunt, animo et mente concipitur, ab iis vero, qui magis spiritales sunt, etiam prædicatur. Illud item præscribere, ut nec Patri principium tribuamus, ne quid primo prius inducamus, ex quo etiam id, quod primum est, perire necesse sit; nec Filium et Spiritum sanctum principii expertes esse astruamus, ne Patri, id quod ipsi proprium est, adimamus. Illi quippe et principio minime carent, et quodam modo carent : quod sane dictu mirum est. Non enim, quantum ad causam, principio carent, ex Deo enim sunt, licet non post ipsum, quemadmodum ex sole lumen : sed quantum apud tempus, principii sunt expertes. Nec enim temporis subjecti sunt, ne quod fluxum est, iis, quæ stabilia sunt, et quod non est, iis, quæ sunt, prius atque antiquius sit.

XVI. Nec item tria principia constituamus, ne in gentilem deorum multitudinem incidamus : nec rursus unum quidem, sed judaicum quoddam, et angustum, atque invidum et imbecillum; nempe vel deitatem in se ipsam absumendo, quemadmodum iis placuit, qui Filium quidem ex Patre producant, eundem autem rursus in Patrem resolvunt; vel naturas dejiciendo, atque a Divinitate alienando, ut sapientibus hujus temporis videtur, perinde atque ipsa hoc metuat, ne ipsæ adversum se insurgant,

aut supra res conditas nihil possit. Nec rursum ingenitum Filium, unus enim Pater ingenitus : nec Spiritum sanctum Filium, unus enim est Unigenitus; ut hoc quoque divinum habeant, singularitatem nimirum, ille filiationis, hic processionis, non autem filiationis. Patrem vere patrem, ac multo quidem verius, quam qui apud nos id nomen obtinent, tum quia proprio et singulari modo pater est, non autem sicut corpora; tum quia solus, non enim ex conjunctione; tum quia solius, nempe Unigeniti; tum quia solum, nec enim ipse prius quam pater esset, filius fuit; tum quia in totum et totius pater, quod de nobis certo affirmari nequit; tum quia ab initio, nec enim posterius Pater esse cœpit. Filium vere filium, quod et solus sit, et solius, ac singulari modo, et solum; non enim Pater quoque simul est, et in totum Filius, et totius, et a principio, hanc scilicet rationem habens, ut nunquam Filius esse cœperit; non enim ex consilii mutatione est deitas, neque ex progressu deificatio, ut ille aliquando Pater, hic aliquando Filius esse desinât. Spiritum sanctum vere sanctum : neque enim alius talis est, nec eodem modo, neque ex accessione sanctitatem habet, sed est ipsamet sanctitas, nec magis et minus, nec, quoad tempus, originem unquam habuit, nec finem habiturus est. Hoc enim Patri et Filio et Spiritui sancto commune est, quod minime creati sunt, atque ipsa Divinitas. Hoc autem Filio et Spiritui sancto, quod uterque eorum ex Patre est. At vero Patris proprietas hæc est, quod ingenitus sit : Filii, quod genitus : Spiritus sancti, quod procedat. Quod si modum quæris, quid iis relicturus es, quos solos mutuo se « Cognoscere, atque a se mutuo cognosci¹ » Scriptura testatur; « Aut iis etiam nostrum², » qui postea divinitus illuminabuntur?

¹ Joan. xvii, 25. — ² 1 Cor. xiii, 12.

XVII. Fac sic prius quiddam eorum, quæ commoravimus, aut certe talis : ac tum tantum cognosces, quantum hæc mutuo a se ipsis cognoscuntur. Nunc vero doce, ut hoc duntaxat sciamus, nempe Trinitatem in unitate, et unitatem in Trinitate adorandam, cujus et divisio, et conjunctio, plane admirabilis sit. Ne passiones metuas, dum generationem confiteris. Deus enim ab omni passione liber est, etiamsi genuit. Hoc tibi spondeo, eum divino, non autem humano modo genuisse : nec mirum, cum etiam ipsius esse minime humanum sit. Verum illud deum metue, ne tempus illi tribuas, eumque creatum contendas. Non enim profecto Deus erit, si creatus fuerit, ac ne Dei patrocinium incassum suscipiens, Deum tollas, conservum tuum eum faciens. qui simul Deus est, et qui te quoque ex servitute in libertatem vindicat, si modo vere et sincere dominium confitearis. Processionem ne timeas ; nec enim Deo necesse est non producere, aut simili ratione producere, utpote qui in omnibus dives est ; verum alienationem metue, ac comminationem eam, quæ eos manet, non qui Spiritum sanctum Deum esse profitentur, sed qui eum contumeliis afficiunt.

XVIII. Cave, ne unius imperium male colas, divinitatem contrahens, aut circumcidens ; nec tritheie crimen tibi pudorem moveat, quandiu alius quoque eadem ratione in ditheie periculo versatur. Aut enim cum illo crimen objectum dilues : aut cum illo hærebis : aut ille quidem simul cum rationibus suis Divinitatis naufragium faciet, tibi vero incolumis Divinitas permanebit. Ac si ratio ipsa imbecillitate laborarit, satius est in rationibus laborare, dum Spiritum ducem sequamur, quam impiis dogmatibus facile assentiri, dum otio nostro et desidie consulimus. Instantias et oppositiones, novamque pietatem, et jejuna ac minutam sapientiam contemne, et quidem magis,

quam aranearum telas, quæ muscas quidem retinent, a vespis autem perrumpuntur, ne dicam a digitis, aut alio quopiam graviore corpore. Hoc unum nos timere doce, nimirum ne in argutiis et captionibus fidem solvamus. Sermonem victum esse minime grave atque acerbum est, non enim omnium est sermo: at vero grave et acerbum est Deitatis jacturam fecisse, omnium enim est spes. Verum hæc ipse per te, sat scio, promptius et perfectius philosophaberis; id mihi vulnera tua spondent, corpusque istud, quod pro pietate permultos labores exantlavit; nosque etiam una tecum pro virili nostra philosophabimur.

XIX. At tu, cum egregiam peregrinationem obieris, Trinitatis, in tabernaculis habitantis, si tamen Deus omnino in manufactis habitat, memor esto, messisque hujus exiguae, non ex parvis quidem pietatis seminibus, parvæ tamen adhuc et exilis, et quæ paulatim colligatur. « Facti » enim sumus sicut qui stipulam in messe colligunt, ut » cum Propheta opportune loquar, et racemulos in vindemia, cum nulli sint botri¹. » Vides quanta sit hæc collectio: ac proinde in eam curam incumbe, ut area nobis copiosior fiat, torcularque plenius. Narra, tum vocationem nostram, tum incredibilem nostram peregrinationem, quam, non ut luxus et deliciarum, sed ut ærumnarum socii essemus, inivimus; ut periculorum et acerbis participes facti, in gloriæ quoque partem aliquando veniamus. Hanc plebem habes votis faventem, hanc peregrinationis comitem; hunc, inquam, gregem, numero quidem angustum, at pietate nequaquam angustum: cujus ipse angustiam magis, quam aliorum amplitudinem et latitudinem, revereor. Hæc dicit Spiritus sanctus: cum hoc, et « Ignem » pertransibis², » et « Ferarum rabiem³, » consopies et procères mites ac mansuetos reddes. Ita excede, ita na-

¹ Mich. vii, 1. — ² Psal. lxxv, 12. — ³ Luc. x, 19.

viga, atque ad nos rursum redi, eximie dives, secundo laureatus, ac nobiscum triumphale carmen cantaturus, et nunc, et in posterum in Christo Jesu Domino nostro, cui gloria in sæcula. Amen.

ORATIO XXVI¹.

In se ipsum, cum rure rediisset, post ea quæ a Maximo perpetrata fuerant.

ARGUMENTUM.

I. Quorum communis est Spiritus, bonorum affectus communis. — Qui mutuos affectus experiuntur, ii ad assentiendum faciliores se præbent. II. Absens Gregorius, alacri animo ad gregem redit. — Ea, quibus facile frui licet, segnius appetuntur. III. Luporum voracitatem, furum insidias et canum rabiem metuit. — Disperdere, quam servare, facilius est. IV. Gregorius pastor timidus ac circumspectus. — Non gregis opes, sed ipsum gregem quærit. V. A grege de fide et doctrina rationem exigit. — Cavendum ne quis inanibus verbis seducatur. VI. Abundantes fructus a grege postulat. — Evangelii munus gratis obeundum. VII. Gregorius ipse rationem reddit de iis, quæ absens secum philosophatus est. VIII. Elegans ac perutilis descriptio maris. — Maris fluctus vento valido excitati et infremescentes. IX. Maris turgidi spectaculum multum utilitatis ad doctrinam confert. —

¹ Alias xxviii, quæ autem xxvi erat, nunc est xxxii. Habita circa medium annum 380.

Res humanæ mari turgido comparatæ. — Turpe philosopho, adversa, cum absunt, contemnere, et cum adsunt, succumbere. X. Fabula arboris, quæ secta floret, et morte vivit. — Imago veri philosophi. — Ærumnis clarescit. — Rebus adversis ornatur. — Prosperis non extollitur. — Generis splendorem vincit morum nobilitate. — Triplex nobilitatis genus. — Nobilitas a Deo. — A sanguine. — A virtute aut vitio. — Nobilitas ab edictis aut diplomatibus principum. XI. Vitiosi animi affectus a philosopho juvene refrenantur. — Philosophus animo nunquam senescit. — Illius animæ pulchritudo, corporis pulchritudine præstantior. — Sanus, ad optima quæque valetudine utetur. — Morbo laborans, pugnabit. — Dives, egentes ditabit. XII. Fame vexatus, Providentiæ adhærebit. — Sitiens, aquam bibet. — Nudus, petra induetur. — Maledictis, calumniis, probis lacescit, Christum imitabitur. XIII. Nihil philosophia fortius. — Tria vinci nequeunt; Deus, Angelus et philosophus. XIV. Gregorius omni ex parte ab adversariis tentatus. — In Dei timore perseverans. — In paupertate dives. — In exilio totius terræ civis. — In senectute et infirmitate potens. XV. Ab episcopali sede alienus. — Ambitio, omnium malorum origo. XVI. Parum curat Gregorius ab altaribus arceri. — E civitate ejici. — Pecuniis spoliari. XVII. Domo excludi et amicis privari. XVIII. Gregorius adversa constanter tolerat. — Christi ac veritatis proditores luget, et ad unitatem revocat. XIX. Pro dissidentibus adorandam Trinitatem invocat.

1. DESIDERABAM VOS¹, filii, et pari a vobis desiderio expetebam. Persuasum enim id habeo; ac si ad eam rem

¹ Vide D. Guillon, tom. vi, p. 291, 306.

jusjurandum interponendum est, « Juro, fratres, per vestram gloriationem, quam habeo in Christo Jesu Domino nostro ¹. » Hanc enim jusjurandi formam mihi condidit Spiritus sanctus, cujus numine atque afflatu ad vos venimus, ut Domino « Populum eximium et peculiarem ² » comparemus. Ac fidei magnitudinem, quæso, perspicite. Nam et animi mei affectum vobis persuasum reddo, et de vestro erga me animo affirmo et assevero. Nec id sane mirum videri debet. Quorum enim communis est Spiritus, horum affectus quoque communis : quibus autem idem affectus est, idem etiam ad credendum æque propensi sunt. Nam quod in se ipso aliquis minime sensit, is nec alteri id de se affirmanti unquam crediderit : qui autem ita aliquando se affectum sensit, is profecto ad assentiendum faciliorem se præbebit, utpote invisibilis affectionis invisibilis testis, formæque alienæ proprium speculum. Quamobrem a vobis diutius abesse minime sustinui, quam alioqui res hasce ægre ac molesto animo ferens ; non solum quas civitates ferunt, (popularem scilicet multitudinem, tumultus, forum, spectacula, saturitates, contumelias, eos qui ducunt, et qui ducuntur, eos quidam, num inferunt, et qui patiuntur, eos qui lugent, et qui lugentur, eos qui plorant, gaudent, matrimonium ineunt, sepeliunt, laudantur, vituperantur, hanc, inquam, vitii sylvam, mundi fervorem, subitas et repentinas, velut in Euripo et ventorum agitatione, mutationes ; (verum etiam venerabiliora hæc et præstantiora, sacrarium nempe et sacram mensam ; quorum cum ipsi principatum tenere videamur, et in eorum, qui ad Deum appropinquant, numero simus, vereor ne male appropinquemus, et, tanquam stipula ad ignem, ignis vim ferre nequeamus.

¹ 1 Cor. xv, 31. — ² Deut. vii, 6.

II. Cæterum ad vos redii, et qui a vobis invitus disceseram, idem non invitus, sed animo perquam alacri, spontaneisque, ut dici solet, pedibus accurri, Spiritu scilicet me, fluvii cujusdam in modum, agente, qui per acclivia quidem nonnisi coactus fertur, per prona autem et declivia celerrime labitur. Ac profecto vel unicus dies totius vitæ humanæ instar est desiderio laborantibus. Nam illud patriarchæ Jacob mihi alio modo se habere videtur, qui pro duabus virginibus quatuordecim annis Laban Syro serviens, haudquaquam labore frangebatur. « Erant enim, » inquit, omnes illi dies, quasi dies unus, quod earum » amore flagraret ¹. » Cujus rei hæc fortasse causa erat, quia rei expetitæ conspectu fruebatur : vel etiam, quia levis est amoris labor, tametsi dilatio ipsa molestiam afferat. Sic videlicet natura comparatum est, ut ea segnius appetamus, quibus facile libereque frui licet, quemadmodum veterum quidam affirmavit. Equidem ipse, qui, cum adessem, vim hujus affectus parum admodum sentiebam, posteaquam a vobis disjunctus sum, cupiditatem, amoremque, dulcem tyrannum, agnoscere cœpi; quod quidem non est cur novum videatur. Etenim si vel bubulcus ob vitulum unquam ab armento aberrantem, vel pastor ob pecudem ex denario numero deficientem, vel avis ob nidulum, quem ad breve tempus reliquit, usque adeo discruciarī solent, ut et illi, arreptis fistulis, in speculam quamdam cvecli, mæstos insilent calamos, et palantia animalia, quasi ratione prædita, evocent; ac si paruerint, majorem ex illis, quam ex reliquis universis de quibus solliciti non fuerant, delectationem percipiant; hæc vero stridens ad nidum convolet, pullisque stridentibus allabatur, eosque pennis foveat. Quanto tandem chariores esse par est apud bonum ac pervigilem pastorem oves ratione præditas, et

¹ Gen. xxvii, 26.

pro quarum salute nonnihil periculi subiit, cum hoc quoque acriores amoris flammās excitet?

III. Equidem ipse graves et atroces lupos timeo, ne, caligine nostra observata, rapaci ac violenta doctrina gregem dilacerent. Intempestam enim noctem captant, quod palam aperteque nihil efficere possint. Fures etiam ac latrones metuo, ne per caulam transilientes, aut impudenti atque aperto impetu oves diripiant, aut furtim intercipient, « Ut mactent, et jugulent, ac perdant, rapientes rapinas, » et animas comedentes ¹, » ut Propheta quispiam cecinit. Quinetiam illud vereor, ne quis eorum, qui heri et nudius tertius a nobis stabant, angustius ostium haud clausum nactus, ac per familiaritatis speciem ingressus, jam ut alienus insidias moliatur. Multæ enim variæque ejus, qui hujusmodi res in hominum animos immittit, artes et insidiæ sunt: nec quisquam tam solers est rerum variarum architectus, quam peritus vitii artifex est noster adversarius. Jam mihi quoque timorem injiciunt canes, per vim in pastorum classem irrumpentes, idque, quod absurdum valde est, cum ad pastoralis muneris administrationem nihil omnino aliud contulerint, quam quod comam, cui ornandæ et alendæ turpiter studuerant, raserunt; qui nec in canum ordine manserunt, nec pastores facti sunt, nisi ut lanient et dispergant, atque aliorum labores infringant. Quandoquidem facilius semper est labefactare ac perdere, quam conservare: « Et labori quidem homo nascitur », quemadmodum ait Job, et navis extruitur, et domus ædificatur; interficere autem, aut evertere, aut incendere quivis facile potest. Ac proinde ne nunc quidem insolentius sese efferant, qui canes adversus gregem concitarunt, qui ne oviculam quidem unam proferre possunt, quam adduxerint, vel conservarint. Nec enim recte facere didice-

¹ Joan. x, 10, et Ezech xxi, 25. — Job. v, 7.

runt, cum improbitatem studiose coluerunt. Quod si gregem perturbant, idem et parva tempestas efficere potest, idem et exiguus morbus, idem et bestia una repente irruens. Cohibeant ergo se, qui ex ignominia sua gloriandi ansam arripiunt; atque improbitati suæ, siquidem possint, finem imponentes, « Adorent, et procidant, et plorent coram Domino qui fecit eos ¹, » gregique adjungantur, quotquot non sunt omnino insanabiles.

IV. Hoc ego ille timidus pastor et circumspectus, camque ob causam cautionis tanquam ignaviæ, notam subiens. Non enim pastor sum ex eorum numero quispiam, qui » lac comedunt, et lanis operiuntur, et quod crassum est » jugulant ², » ac labore conficiunt, aut vendunt, et dicunt : » Benedictus Dominus, quia divites facti sumus ³; » qui se ipsos pascunt, et non oves, si Prophetarum voces recordamini, quibus illi in malos pastores invehuntur; verum ex illis potius, qui cum Paulo dicere possunt : « Quis infirmatur, et ego non infirmor? Quis scandalizatur, et ego » non uror, et cura discrucior ⁴? Non enim, quæ vestra » sunt, quæro, sed vos ⁵. Et perustus sum æstu diei, et » nocturna glacie vexatus ⁶, inquit Patriarcha Jacob, cu- » jus sunt oves illæ signatæ ⁷, » et quæ in cœlestibus canalibus concipere didicerunt. Sic igitur, atque his de causis, ad vos, ad hunc modum affectos, accessi. Posteaquam autem accessi, age, inter nos ea subducamus, quæ interea recte et cum virtute gessimus. Præclarum enim est nos in hac opinione versari, ut non modo sermonis, aut actionis, sed totius etiam temporis, atque adeo tenuissimi et brevissimi cujusque horæ momenti rationem a nobis reposci existimemus. Facite igitur, ut mihi operam vestram et

¹ Psal. xciv, 6. — ² Ezech. xxxiv, 3. — ³ Zach. xi, 5. — ⁴ 2 Cor. xi, 29, — ⁵ Id. xii, 14. — ⁶ Gen. xxxi, 40. — ⁷ Id. xxxii, et seqq.

studium exponatis : et ipse vicissim in medium asseram ; quæ mecum ipse, cum solus essem, philosophatus sum.

V. Ecquam rerum sublimium contemplationem, aut a me acceptam animis vestris retinuistis, aut a vobis ipsis contulistis, vel de Divinitatis doctrina, vel de aliis fidei capitibus, quæ ego permulta et persæpe vobis apposui ? Neque enim « mutuum » duntaxat quæro ; verumetiam « sœnus : » nec « talentum solum, » sed et « talenti quæstum »¹ : » ne quis forte, cum in terrâ id, quod ipsi commissum est, occultarit, et defoderit, creditorem insuper falso, ut durum et acerbum, atque alienarum rerum cupiditate flagrantem criminetur. Quam honestam et laudabilem actionem protulistis, vel ita occulte, « Ut ne sinistra quidem manus » sciat², vel etiam aperte, ut lux vestra coram hominibus luceat³, et arbor ex fructu agnoscatur⁴, » et magister per discipulos innotescat, ac dicat quispiam eorum, qui vitæ nostræ rationes inspectant, (id quod multi faciunt, alii benigna voluntate ducti, alii curiositate impulsii,) « Quod vere Deus in vobis sit »⁵, » non modo sane ac sincere prædicatus, sed etiam cultus et adoratus. Ut enim actio sine fide non est accepta, (quandoquidem multi gloriæ studio, atque etiam a natura ita informati, virtutem colunt,) ita « Fides sine operibus mortua est »⁶. » Ac videte, ne quis eorum vos inanibus verbis decipiat, qui omnia omnibus hac una de causa facile concedunt, ut impia dogmata homines complexentur, malamque rei malæ mercedem persolvunt. Ex operibus ergo fidem, terræque vestræ sæcunditatem ostendite, ut perspicuum fiat, an frustra sementem fecerimus, an manipulus quidam in vobis reperiat, ex quo confici farina queat, dignusque qui in horreum inferatur, quo alacrioribus animis vos in pos-

¹ Matth. xiv, 18, et seqq. — ² Matth. vi, 3. — ³ Id. v, 16. — ⁴ Id. vii, 16. — ⁵ 1 Cor. xiv, 25. — ⁶ Jacob. xi, 20.

terum excolamus. « Quis centesimum fructum edit? »
 « Quis sexagesimum? Quis postremo trigesimum? » Aut
 converso ordine, quis a trigesimo ad sexagesimum pro-
 gressus, (hunc quoque in Evangeliiis ordinem habemus), in
 centesimum desiit, ut novos subinde progressus faciens,
 « velut Isaac, » magnus tandem fiat, « de virtute in virtu-
 » tem ambulans ², » et cantica graduum canens, atque « as-
 » censiones in corde suo ponens ³? »

VI Quæro enim fructum abundantem in rationem ves-
 tram. Vestrum enim lucrum est, non meum : quanquam
 meum quoque, quoniam vestrum, cum utilitas a vobis ad
 nos, ut in radiorum solarium reflexione accidere videmus,
 sese reflectat. Num pauperes aluistis? « Num hospitio ex-
 » cepistis? Num sanctorum pedes abluistis ⁴? Num ven-
 » tris, qui destruitur, voluptatibus indulgentes ⁵, » (detur
 hoc enim,) id etiam egistis, ut in mandatis divinis deli-
 cias positas haberetis? Nam profecto nec deliciæ ullæ his
 meliores sunt, nec diuturniores et stabiliores iis, qui in
 deliciis vitam transigere volunt. Num quosdam ex his, qui
 altari ministrant, et pulchre inopes sunt, (liceat enim mihi
 hoc dicere,) pro viribus recreastis, ut, animis minus dis-
 tractis, altari magis assideant, ac bonorum vestrorum par-
 ticipes facti, sua quoque vicissim vobis conferant? Turpe
 sane est, hæc, et nos exposcere, et vos non elargiri. Nec
 vero ideo hanc admonitionem habui, ut ita in me fiat;
 « (Melius enim est mihi mori, quam ut gloriatio mea eva-
 » cuetur ⁶, » ac mihi prædicati Evangelii merces pereat, si
 hic laborum messem fecero. Evangelii enim prædicatio
 necessitatis est : municentia autem et laus in eo sita est,
 « Ut gratis hoc munus obeamus ⁷; » verum eo hæc oratio
 spectat, ut de Christo bene mereri discatis : quod quidem

¹ Matth. XIII, 8. — ² Gen. XXVI, 13. — ³ Psal. LXXXIII, 6 et 8. — ⁴ 1 Tim.
 V, 10. — ⁵ 1 Cor. VI, 13. — ⁶ Id. IX, 15. — ⁷ Ibid. 18.

vobis continget, si vel in « unum ex parvis ¹, » et abjectis hominibus benignitatis aliquid conferatis. Quemadmodum enim ille salutis meæ causa, omnia, quæcumque sum ego, peccato excepto, factus est, ita vel minima mea officia in se recipit; sive tecto pauperem donaveris, sive in vincula coniectum inviseris, sive ægrotantem adieris; sive denique, quod vilissimum est, hominis siti oppressi linguam solo frigida poculo refrigeraveris, quod a « paupere » Lazaro ² exposcebat dives ille, qui in flamma torquebatur, ac pro hujus vitæ voluptatibus et deliciis, Lazarique esurientis et ulcerosi contemptu, hanc mercedem referebat, ut illic Lazarum rogaret, nec tamen ejus opem impetraret.

VII. Hæc quidem sunt, quæ a vobis exigimus; ac pro certo habeo minime id vobis pudori esse, quod vitæ rationes a vobis reposcamus, nec etiam fore, cum eas extremo illo die referendas habebitis, ad quem omnia nostra colliguntur, quemadmodum his verbis Scriptura testatur: « Et ego venio, ut consilia vestra et actiones congregem. » Et ecce homo, et opus ejus, et merces ejus cum eo ³. » Jam nostra exponamus, atque ea, quæ a solitudine vobis afferimus. Nam et Elias libenter in Carmelo philosophatur ⁴, et Joannes in deserto ⁵, et Jesus ipse ⁶, » ut actiones multitudini hominumque frequentia, ita preces quieti locisque ab hominum commercio semotis fere tribuebat. Quid hinc, velut lata lege, statuit? Nempe nobis quoque, ut opinor, nonnihil quiescendum esse, ut animo minime turbido cum Deo versemur, mentemque ab erroribus hisce rebus paululum reducamus. Neque enim ipsi secessionem opus erat, (non enim habebat quo se contraheret, cum Deus esset, et omnia impleret;) verum ut, et

¹ Matth. xxv, 40. — ² Luc. xvi, 24. — ³ Isai. lxvi, 18, et xl, 10. — ⁴ 3 Reg. xviii, 19. — ⁵ Luc. i, 80. — ⁶ Id. vii, 16.

actionis, et sublimioris occupationis tempus esso disceremus. Quis ergo solitudinis nostræ fructus extitit? Libet enim, instar boni negotiatoris et quæstum undecumque facitantis, ut hinc quoque vobis nonnihil mercium offeram.

VIII. Inambulabam ego solus, vergente jam in occasum sole. Locus porro in quo spatiabar, maris ripa erat. Semper enim soleo hujusmodi oblectamentis labores dissolvere et relaxare; quandoquidem nec perpetuam contentionem nervus ferre potest, sed laxari nonnunquam arcus cornua oportet, siquidem rursus intendendus sit, ac non sagittario inutilis tum futurus, cum eo utendum erit. Inambulabam igitur, atque ita pedibus ferebar, ut oculi maris aspectu fruerentur. Nec vero spectaculum illud lætum ac jucundum erat, quanquam alioqui jucundissimum esse soleat, cum tranquillitate purpurascit, ac littoribus blandum quiddam et suave alludit. Sed quid tum? « Mare, (li-
» henter enim utor Scripturæ verbis,) vento magno flante,
» excitabatur¹ » et infremebat; fluctus autem, ut in talibus rebus fieri consuevit, modo procul exurgentes, seseque paulatim in summam altitudinem efferentes, ac postea decrescentes ad ripam solvebantur; modo in propinquas petras incidentes, atque inde repulsi, in spumosas ac tenuem asperginem dilabebantur. Hic et lapilli, et algæ, et murices, et levissima ostrea extrudebantur et quasi expuebantur; nonnulla etiam unde recedente rursus abripiebantur, Petræ autem interim non minus immotæ et inconcussæ remanebant, quam si nulla omnino vis ipsis admoveretur, nisi quod fluctuum ictibus verberabantur.

IX. Ex hoc spectaculo nonnihil utilitatis ad philosophiam percepisse me sensi, et, (ut omnia ad me ipsum referre atque dirigere soleo, ac potissimum si ad aliquem

¹ Joan. vi, 18.

rerum eventum animus meus æstuet, et tanquam vertigine afficiatur, ut mihi nunc accidit,) non obiter et negligenter id, quod oculis observabatur, accepi; et in doctrinam mihi hoc spectaculum cessit. Annon enim, inquebam, mare, vita hæc nostra est, et res humanæ? Nam hic quoque multum est amaritudinis et instabilitatis. Annon venti, tentationes ingruentes, et inopinati rerum eventus? Quod mihi animadvertisse videtur David, cum diceret: « Salvum » me fac, Domine, quoniam intraverunt aquæ usque ad animam meam ¹. » Et, « Libera me de profundis aquarum ². » Et rursus, « Veni in altitudinem maris, et tempestas demersit me ³. » Porro eorum, qui tentantur, alii mihi, velut levissima quædam corpora et spiritus expertia, abripi distrahique videbantur, ac ne tantillum quidem adversarum rerum impetum sustinere; nec enim robur et firmitatem habent, neque pondus prudentis et cordatæ rationis, quæ fortuitis casibus obluctetur: alii autem petrae instar esse, ac « Petra illa ⁴, » supra quam stamus, et quam colimus, digni, quicumque nimirum philosophica ratione utuntur, ac supra vulgi humilitatem evecti, humana omnia immoto et firmo animo ferunt, atque eos quidem, qui talibus rebus quatiuntur, irident, vel miserantur; (illud ob philosophi animi generositatem, hoc propter humanitatem et commiserationem;) ipsi autem turpe esse statuunt, res graves et acerbæ, cum absunt, contemnere, ac ne graves quidem illas existimare, cum autem adsunt, succumbere, perinde scilicet atque eæ, non fluxæ, sed firmæ ac stabiles sint; atque extra tempus quidem philosophari, cum autem opus est, philosophiæ expertes apparere: quemadmodum si quis athletarum omnium præstantissimum se esse censeret, ne in arenam quidem descendens; aut probum et nobilem gubernatorem, in tranquillitate

¹ Psal. LXXIII, 2. — ² Ibid. 15. — ³ Ibid. 3. — ⁴ 1 Cor. x, 4.

quidem artem suam magnifice jactans, coorta autem tempestate gubernacula de manibus ponens.

X. Quoniam porro in hos sermones semel incidi, alteram mihi quoque imaginem, præsentibus rebus admodum congruentem, proposui. Forsan me, velut delirantem senem ac fabulatorem habebitis, si hanc etiam vobis exposuero: exponam tamen, quandoquidem et Scriptura plerumque ad res dilucidius explicandas hujusmodi exemplis uti consuevit. Est quædam in fabulis arbor¹, quæ cum cæditur, viret, et adversus ferrum certat; ac, si de re nova novo more loquendum est, morte vivit, et sectione pullulat, atque, cum absumitur, crescit. Habetis fabulam, jure suo quidvis libere confingentem. Mihi vero hujusmodi quiddam plane esse vir philosophus videtur. Floret enim inter cruciatus, ac vitæ molestias velut virtutis segetem existimat, atque in adversis gestit et gloriatur: nec ob dextra justitiæ arma effertur, nec ob sinistra inflectitur; sed in diversis rebus idem semper sui que similis permanet, atque adeo probator, tanquam aurum in fornace, reperitur. Quod ut perspicuum fiat, ita rem expendamus: Nobili loco natus est? Probitatem morum generis splendori opponet, atque ex adverso spectandam producet. Ita duplici nomine clarus erit; nempe, et majorum imaginibus, et propria virtute inspectus. Obscuro et ignobili genere ortus est, quantum ad statum et lutum attinet? (Si quid tamen magni inter lutum ac lutum interest.) At spiritualement nobilitatem illius loco afferet, et quam sibi quisque, vel in melius, vel in deterius effingit: reliquas autem nobilitates, quæ vel seruntur, vel principum diplomatibus comparantur, ut viles et adulterinas, nulloque in pretio habendas, procul submovebit. Est enim triplex genus. Unum, quod superne originem trahit, quod quidem si consideremus, omnes peræque no-

¹ Horat. lib. iv. ode. 3.

hiles sumus, quippe « Ad imaginem Dei creati¹. » Alterum, quod a sanguine proficiscitur; cujus ratione haud quidem scio, an quisquam nobilis dici possit, cum corruptione constet. Tertium a virtute aut vitio agnoscitur, cujus vel uberius vel exilius participes efficiamur, prout, opinor, divinam imaginem vel integram servaverimus, vel corrumperimus. Atque hanc demum nobilitatem amplectetur, quisquis vere sapiens ac philosophus fuerit. Nam quantum illud nobilitatis genus, quod in principum diplomatibus et edictis consistit, tum pullo loco ac pretio habeo, cum sitam in coloribus pulchritudinem amplexus fuero, simiamque ob id venerari cœpero, quod leo esse iussa sit.

XI. Juvenis est? Adversus vitiosos animi motus viriliter se geret, atque hoc commodi ex juvenili ætate percipiet, ut iis affectibus, quibus hæc ætas obnoxia est, non indulgeat, sed in vigenti corpore senilem prudentiam exhibeat, majoremque ex hac victoria voluptatis sensum capiet, quam qui coronam in Olympiis adipiscuntur. Victoriam enim feret in communi orbis terræ theatro, et quidem victoriam minime venalem. Ad senectutem vergit? At non animo quoque senescet: dissolutionem, ut præstitutum necessariæ libertatis tempus, accipiet: libens ad ea, quæ hanc vitam sequuntur, migrabit, ubi nemo est immaturus, nemo senex, sed omnes in spirituali ætate perfecti. Pulcher est? Id agat, ut pulchritudo animæ corporis pulchritudini ex adverso refulgeat. Inoffensus flos præterit? In se ipsum vergit, ac ne spectari quidem se novit. Deformis est quantum ad id quod in aspectum cadit? At ea parte formosus et elegans, quæ oculorum aciem fugit; resæ non absimilis quæ in hacca nec florida, nec odore grata, florida tamen ipsa est, suavissimumque odorem efflat. « Speciosus forma præ filiis hominum? » Ne spatium quidem,

¹ Gen. 1, 27. — ² Psal. xlv, 3.

id, quod externum est, aspiciendi concedit, quippe qui spectatorem ad internum hominem convertit. Proba valitudine est? Ad optima quæque sanitate utetur: admonabit, increpabit, verborum aculeis punget, insomnes noctes ducet, in nuda humo domiet, corporis molem extenuabit, terrena et cœlestia speculabitur, summo studio mortem meditabitur. Morbo laborat? Pugnabit. Quod si victus fuerit, vincet, hoc scilicet assecutus, ut non jam amplius pugnet. Dives est? Id studio habebit, ut opibus minuatur: pauperem honorum suorum participem faciet, tanquam alienorum dispensator, ut, et ille hac perceptione juvetur, et ipse ad Deum colligatur, nihil præter crucem et corpus habens. Pauper est? Pro divitiis Deum habebit, et divite irridebit, ut qui, licet facultates suas quotidie augeant semper tamen pauperes sint, quia pluribus indigent, bibuntque, ut majori siti inflammentur.

XII. Fame vexatur? Cum avibus aletur, quibus victus sationis et arationis expers est: cum Elia apud Sarephtham vivet: « Locythus olei non deficiet, et hydria farinae non minuetur¹. » Ille, fontis instar, semper scaturiet; hæc fructum copiose proferet, ut vidua hospitum studiosa honoretur, ac nutrix nutriatur. Siti angitur? Fontes ei et flumina potum suppediabant, et quidem potum non iuebriantem, nec dimensum. Quod si omnia propter nimiam siccitatem deficient, torrentis aqua fortasse sitim sedabit. Algebit? Idem quoque Paulo accidit²: sed quandiu? Est et quoddam petrae indumentum; fidem tibi Job faciat, his verbis utens: « Eo quod veste carerent, petra induti sunt³. » Jam, quæ perfectiora sunt, considera. Maledictis lacerabitur? Vincet non regerendo maledicta. Persecutionem patietur? Sustinebit. Blasphemabitur? Obsecrabit. Gallinæ premetur? Orabit. Percutietur in dextram maxil

¹ 3 Reg. xvii, 9 et 14. — ² 2 Cor. xi, 27. — ³ Job. xxiv, 8.

lam? Præbebit et alteram; tertiam etiam, si haberet, ob-
jecturus, quo magis ad lenitatem percussorem erudiat,
operé docens, quæ sermone non potest. Probris impetetur?
Et Christus quoque: afflictionis societate ornabitur. Quam-
vis etiam Samaritanus vocetur¹, quamvis ei objiciatur,
quod « Dæmonium habeat, » cum Deo omnia suscipiet.
Et licet multa toleraverit, multa adhuc ipsi supererunt,
quæ perferat, acetum nempe, fel, corona spinea, scep-
trum arundineum, chlamys coccinea, crux, clavi, la-
trones simul cruci affixi, prætereuntium contumeliæ².
Primas enim Deum habere par est, quod plus ignominia
pertulerit.

XIII. Nihil philosophia fortius est, inexpugnabilius
nihil. Omnia prius cedent, quam ut manus det philoso-
phus. « Onager est in deserto, ut cum Job loquar, solutus
» et liber, urbis tumultus ridens, exactoris clamorem non
» audiens. Unicornis est, animal suis legibus vivens. Num
» tibi servire volet? Num ligabis eum ad præsepe? Num
» sub jugum ducetur³? » Si omnibus terræ commodis prohi-
beatur, paratæ sunt ipsi alæ sicut aquilæ; ad patroni sui
domum se conferet; ad Deum convolabit. Ut in summa
dicam, duo hæc superari nequeunt, Deus et Angelus;
tertium est philosophus, in materia materiæ expers, in
corpore incircumscriptus, in terra cœlestis, in passionibus
impatibilis, omnibus rebus vinci se facile ferens, præter-
quam animi magnitudine, eo ipso quod vinci se patitur,
devincens eos, qui superiores sibi esse videntur. Quoniam
autem philosophum nobis depinxit oratio, unde dixi,
exorsa, age jam ad ejus normam res nostras expendamus;
(nam « Ipse quoque Spiritum Dei habere videor⁴, » etsi
me cuipiam eorum, quæ dixi, ad vulnus patere, ab eoque

¹ Joan. viii, 48. — ² Matth. xxvi et xxvii. — ³ Job. xxxix, 5, et seqq.
— ⁴ 1 Cor. vii, 40.

superari non diffitear;) ut si me quidem inferiorem inveniant, qui mihi infesti sunt, ac bellum inferunt, etsi non pravæ voluntatis, at certe conatus sui veniam consequantur: sin autem iis, qui me bello lacessendum duxerunt, præstantiorem ac sublimiorem; aut ab improbitate sua discedant, aut novam certe, (nam præsentem contemnimus,) lædendi viam excogitent, ne alioqui præter improbitatem, amentię etiam et stoliditatis notam subeant, velut iniquitatem frustra perpetrantes, ac ne injuriam quidem inferre scientes, cum in id summo studio incumbant.

XIV. Quid enim me, obsecro, lædere queant, cum omnia tentarint? Singula, in quibus homo ab hominibus injuriam accipere potest, inspiciamus. Indoctum nominabunt? Unam hanc sapientiam scio, quæ in timore Dei sita est. Nam et « Principium sapientiæ, timor Domini: et finis sermonis, omnia audi, Deum time ». » Hæc sapientissimi illius Salomonis verba sunt. Probent me timoris expertem esse, et vicerint. Reliquam autem sapientiam atque doctrinam, partim præterii, partim assumere opto, atque etiam, Spiritus sancti ope fretus, in spe habeo. Paupertatem objicient, meas scilicet opes, et copias? Atque utinam et pannos hosce exuere possem, ut hujus vitæ spinas nudus percurrerem: utinam et gravem hanc tunicam quam celerrime abjicerem, vel leviores acciperem. Exulem vocabunt? Quam demisse de nobis sentiunt homines vere cotumeliosi, et peregrinorum inimici. Est-ne enim mihi, o viri, circumscripta patria, eui et omnis terra, et nulla terra patria est? Tu vero annon hospes es, et advena? Equidem habitationem tuam haud laudo, si ita animo afficeris, ne a vera patria excidas, ad quam omnis vitæ conversatio referenda est. Nonne senectutem et valetudinis infirmitatem mihi ut probrum objicies? Ut autem arcano-

¹ Prov. 1, 7, et Eccle. xii, 13.

rum meorum quidpiam intelligas, non est hoc totum carneæ hujus molis et naturæ opus; quiddam etiam ratio absumpsit, libet enim paululum aliquid gloriari. Ne tu quidem mihi jucundum spectaculum præbes, ita vegetus et corpulentus. Atque utinam tibi quoque canitie et paloris quidpiam affusum esset, ut fidem saltem et existimationem prudentiæ ac philosophiæ colligeres.

XV. Quid præterea? Episcopatum abrogabunt, ac thronis deficient? Et quos tandem, aut nunc, aut antea, prompto atque hilari animo conscendi? An vero eos, qui ascendunt, beatos prædicare soleo? Tu-ne mihi eos suaves et jucundos reddis, ita indigne conscendens? Quid? Ne hæc quidem quæ nuper acciderunt, animi mei sententiam vobis declararunt? An illa quoque deliciæ quædam et jocus erant, atque vestri erga me amoris et desiderii exploratio? Vastri homines facile adducuntur, ut vitia sua de aliis, partim suspicentur, partim loquantur. Quid vero illa oppressio? Quid illæ imprecationes, quas adversus nos ipsos publice concepimus? Quid illæ lacrymæ, quæ vos etiam ad misericordiam moverunt, quamvis alioqui propter oblationem odio pene essemus? Primariæ sedis dignitatem nobis eripient? Quis unquam mente præditus hanc admiratus est? Nunc autem otiam, ut mihi quidem videtur, prudentissimus est, quisquis eam fugit. Propter hanc enim, res omnes nostræ jactantur ac concutiuntur: propter hanc, sine orbis terræ suspitione et bello flagrant, eoque obscuro et ignobili: propter hanc, periculum est, ne, qui a Deo creati sumus, hominibus subiciamur, ac magnum illud, et novum nomen amittamus. Utinam potius ne ullus quidem sedis principatus esset, nec ulla loci prælatio, et tyrannica prærogativa, ut ex sola virtute cognosceremur. Nunc autem dextrum hoc, et sinistrum, ac medium latus, et sublimior atque inferior gradus, et præcedere, et simul

Incedere, multas nobis collisiones incassum pepererunt, ac multos in foveam impulerunt, atque ad hircorum regionem abduxerunt; non plebeiorum tantum, sed etiam pastorum, qui « Cum magistri Israël essent ¹, » hæc ignoraverunt.

XVI. Quid postea? Ab altaribus arcebunt? At altare aliud scio, cujus figuræ sunt ea, quæ nunc oculis cernimus: « Super quod nec ascia ², » nec manus ascendit, nec ferrum, nec ullum artificum instrumentum auditum est, sed mentis totum hoc opus est, eoque per contemplationem subvehimur. Huic astabo, super illud grata immolabo, sacrificium nempe, et oblationem, et holocausta, tanto iis, quæ nunc offeruntur, excellentiora, quanto veritas umbræ antecellit. De quo mihi quoque David philosophari videtur, cum ait: « Et introibo ad altare Dei, qui » spiritualem meam juventutem lætificat ³. » Ab hoc altari me non abstrahet, quisquis volet. E civitate ejicient? Verum non ita ex ea, quæ in cælo sita est. Hoc si efficere possent ii, qui nos invisos habent, vere bellum inferrent. Quandiu autem minime potuerint, guttulis aquæ me petunt, aut ventis feriunt, aut in somnis ludunt. Sic enim eorum bellum interpretor. Pecunias eripient? Quas tandem? Si meas quidem, ipsi eadem opera pennas etiam, quibus minime indutus sum, abscindant. Si autem Ecclesiæ; Illud quippe est, pro quo bellum omne geritur. Ob pecunias « Fur ille zelotypia erga crumenam æstuat, ac » Deum prodit, » et, quod gravissimum est, « Triginta ar- » genteis vendit ⁴. » Hoc enim pretio dignus erat, non qui prodebatur, sed qui prodebat.

XVII. At domo excludent? Delicias resecahunt? Amicorum animos a nobis averlent? Permultos videlicet gravavimus, quamvis ab ipsis invitati, (non enim ingrati

¹ Joan. III, 10. — ² 3 Reg. VI, 7. — ³ Psal. XLII, 4. — ⁴ Joan. XII, 5, 6.

animi vitio laborabimus.) Quod si gravavimus, id parcendo potius, quam accipiendo fuit. Hujus rei si causam quæritis, domus quædam pia Deique amore flagrans, non secus atque « Elisæum Sunamitidis domus ¹, » nos refocillavit, domus, inquam, hominum, qui tum corporis, tum spiritus cognatione mecum conjuncti sunt, ac singulari liberalitate præditi, apud quos hic quoque populus compactus est, cum exagitata et vexata fidei pietatem adhuc surriperet, nequaquam libere, nec sine periculo. Rependat illi Dominus in die retributionis. Delicias autem si consecramur, efferantur adversum nos, qui nobis inimicitias indixerunt: nec enim gravius aliud quidquam mihi imprecor. Quod autem ad amicos attinet, alii, sat scio, ne læsi quidem, nos fugient; (nam ii domum doloris socios se præbent, qui injuria simul afficiuntur:) aliorum autem arrogantiam nostrique contemptum æquo animo ferre diuturno jam usu didicimus. Ex amicis enim et proximis meis, alii haud obscure « Adversum me appropinquaverunt et steterunt ²: » alii, et quidem ii, qui humanissime mecum egerunt, « A longe steterunt, et in nocte hac » omnes scandalum passi sunt ³. » Nihil propius factum est, quam ut Petrus etiam me abjuraret: ac nequaquam fortasse flet amare, ut peccato medeatur.

XVIII. Unus ego audax, ut apparet, ac temeritatis plenus, unus in rebus horrendis spe bona subnixus, unus constanter adversa tolerans, et publice propositus, et privatim contemptus, et ex bellis, quæ mihi inferuntur, Orienti et Occidenti notus. O insignem audaciam! « Si » consistent adversum me castra, non timebit cor meum. » Si exurgat adversum me prælium, in hoc ego sperabo ⁴. » Ac tantum abest, ut quidquam humanarum et præsentium

¹ 4 Reg. iv, 8. — ² Psal. xxxvii, 12. — ³ Matth. xxvi, 31. — ⁴ Psal. xxvi, 2, et seqq.

rerum acerbum et formidolosum existimem, ut me ipsum missum faciens, eos lugam, qui mihi molestiam exhibuerunt. O membra olim Christi, membra mihi chara, etsi nunc corrupta, membra hujus gregis, quem prius etiam fere, quam collecti essetis, prodidistis. Quomodo distracti estis, ac distraxistis, quasi tenelli boves vinculis soluti? Quomodo altare adversus altare erexistis? Quomodo repente « In » desolationem ac vastitatem facti estis¹? » Quomodo et ipsi per hanc sectionem morte affecti estis, et nobis dolorem inussistis? Quomodo pastorum simplicitate ad gregis dissolutionem et exitium abusi estis? Non enim eos ob imperitiam reprehendam, sed vestram improbitatem accusabo. « Corruptelæ tuæ, Israël, quis succurret²? » Quod medicamentum nanciscar, cicatricis obducendæ vim habens? Qua fascia vulnus obligabo? Quomodo disjuncta connectam? Quibus lacrymis, quibus verbis, quibus precibus huic calamitati medebor? An hoc fortasse modo?

XIX. Trinitas sancta, et adoranda, et perfecta, et quæ recte a nobis conjungeris atque religiose coleris, tuum hoc opus est, tua conficiendi hujus negotii laus. Utinam tu hos nobis restituas, hactenus a nobis diremptos, ut per ipsam disjunctionem ad concordiam et pacis studium erudiantur: ac nobis pro hujus vitæ laboribus et ærumnis cœlestia bona, et ab omni dissidio immunia, rependas. Horum autem primum illud est, et maximum, ut purius pleniusque a te illuminati, sciamus, quomodo eadem, et unitas intelligeris, et Trinitas reperiris; quomodo Ingenitus, Genitus, et Procedens, una sit natura, tres proprietates, « Unus Deus, qui es super omnia, et per omnia, et in » omnibus³: » qui nec superiori nec inferiori gradu collocaris, nec decrescis, nec sectionem admittis; ac partim quidem jam comprehenderis, partim inquireris, aliquando

¹ Psal. lxxii, 19. — ² Osee. xiii, 9. — ³ Ephes. iv, 6.

autem fortasse, quantus es, percipieris, nimirum ab iis, qui per vitæ probitatem et contemplationem te in hoc sæculo recte quæsierint: cui omnis gloria, honor et imperium in sæcula. Amen.

ORATIO XXVII¹. THEOLOGICA I.

Adversus Eunomianos prævia dissertatio.

ARGUMENTUM.

I. In orate dicendi cupidos invehitur Gregorius. II. Hæretici circulatoribus comparati. III. De Deo disserere, opus diffieillimum. — Quando de Deo disserendum. — Apud quos. — De quibus, et quousque. IV. Deus perpetua memoria colendus est. — Non intempestive de Deo disputandum. V. Non apud quosvis homines de Deo loquendum. — Hæretici dogmatum suorum robur in nostra imbecillitate quærunt. VI. De fide non disputandum coram ethnicis. VII. Qualis debeat esse rei theologice magister. VIII. In cælo mansiones multæ, omnesque implebuntur. — Nihil frustra Deus facit. — Via ad vitam ducens, una est et angusta. IX. Vehemens in hæreticos objurgatio. X. Christianus ethnicorum fabulas refellere debet.

I. An eos, qui orate dicendi cupiditate flagrant¹, mihi sermo crit. Et ut Scripturæ verbis exordiar: «Ecce ego

¹ Alias xxxiii. quæ autem xxvii erat, nunc est xxxvi. Habita annis 380.

— Vide D. Guillon, tom. vi, p. 517-522.

» adversum te contumeliosam¹, » tam in docendo, quam in audiendo, et cogitando. Sunt enim, sunt quidam, quibus non « Aures² » duntaxat, sed etiam lingua, atque adeo manus quoque ipsæ, ut video, ad sermones nostros « Pruriunt, quique inanibus verbis, et contemptionibus » falso nominatæ scientiæ, ac « Disputationum pugnis³, » quæ nullam utilitatem afferunt, oblectantur. Sic enim, quidquid in verbis, vel supervacaneum, vel curiosum est, vocat Paulus, ille « Breviati Verbi⁴, » præco et assertor, ille piscatorum discipulus, ac præceptor. Hi verò de quibus orationem habemus, utinam, quemadmodum linguam volubilem habent, atque nobilioribus et probatoribus verbis insectandis acrem et vehementem, sic etiam in agende eandem operam collocarent. Parum igitur, et minus fortasse cavillatores essent, si id facerent, nec tam absurde atque insolenter in verbis, perinde atque in aleæ ludo, versarentur, ut ridicule de re ridicula loquar.

II. Quoniam autem, omni pietatis via sublata et deleta, hoc unum sibi proponunt, ut quæstiones vel stringant, vel solvant; (quemadmodum, qui in theatris vulgi oculis certamina ostendant, et quidem ejusmodi certaminum genera, quæ non juxta palæstræ leges victoriæ comparant, sed imperitorum duntaxat oculos perstringunt, ac laudem a spectatoribus captant;) et res huc redit, ut horum disputationibus, et forum omne circumstrepat, et convivia omnia hujusmodi nugarum tædio obtundantur, et festum omne infestivum sit ac mœstitiæ plenum, et luctus omnia majori calamitate, hoc est, quæstionum argutiis, mitigetur, ac denique gynæcea omnia, simplicitatis alumna, turbentur, et pudoris flos præcipiti hac contendendi libidine compiletur; quoniam, inquam, hæc ita se habent, adeoque intoleranda est vis hujus mali, ut periculum sit, ne magis

¹ Jerem. li, 31; — ² 2 Tim. iv, 3. — ³ Id, v, 4. — ⁴ Rom ix, 28.

num fidei nostræ mysterium exigua quædam articula esse videatur : age, nos paternis visceribus incitatos, atque, ut Jeremiæ verbis utar, « Sensoriis distortos¹ » et laniatos, exploratores isti hactenus perferant, ut, quæ de his rebus dicturi sumus, æquo animo excipiant; ac lingua, si modo queant, aliquandiu frenata, nobis aures præbeant. In qua re nihil profecto est, cur damni quidquid metuatis. Aut enim ego « In aures audientium loquar², » atque ita fructum aliquem, hoc est, utilitatem vestram, oratio allatura est; (quanquam enim is qui « Verbum Dei seminat³, » in animos omnes seminat, tamen prohi duntaxat atque fœcundi fructum ferunt;) aut ita discesseritis, ut hunc quoque sermonem nostrum explodatis, uberiolemque contradicendi, nobisque conviciandi materiam nanciscamini, quo plenius etiam animos vestros pascatis. Nec vero mirum vobis videatur, si quid a vestra opinione, ac lege vestra alienum dixerò, qui scire vos omnia et docere profiteamini, perquam fortiter ac generose, non enim dicam stulte et temere, ne quid animos vestros offendam.

III. Non cujusvis est, o viri, de Deo disserere, non, inquam, cujusvis; non adeo vilis ac protrita hæc res est, et eorum, qui humi adhuc reptant. Addam etiam non cujusvis temporis, nec apud quosvis, nec de quibusvis; sed certo tempore, et apud certos homines, et aliquosque hoc faciendum est. Non cujuslibet quidem, quoniam hoc munus his duntaxat incumbit, qui exactissime explorati sunt, ac contemplando longe processerunt, priusque etiam, et corpus, et animum a vitiorum sordibus purgarunt, aut, ut parcissime loquar, jam hoc agunt, ut se a vitiorum labe purgent. Impuro enim rem puram attingere, ne periculo quidem fortasse caret, quemadmodum nec ægris oculis solis radios intueri. Quando autem? Tum videlicet, cum

¹ Jerem. iv, 19. — ² Eccli. xxv, 12. — ³ Matth. xiii, 4.

ab externo luto ac tumultu quietem agimus, nec princeps nostri pars improbis vagisque simulacris confunditur, dum velut deformibus litteris elegantes litteras, cœnoque unguentum admiscemus. Vacare enim haud dubie oportet, et Deum cognoscere : cumque tempus acceperimus, id agendum est, ut divinæ doctrinæ rectitudinem judicemus. Apud quos porro? Nempe apud eos, qui rem hujusmodi studiose ac serio amplectuntur, quique non ut quippiam aliud, sic hoc quoque inepta nugacitate prosequuntur, post circenses ludos et spectacula, post cantiones, post denique quam ventri, et iis, quæ sub ventre sunt, indulserint; qui quidem ita perditæ affecti sunt, ut hoc quoque in oblectamentorum parte numerent, nimirum de divinis rebus nugari, atque arguta disputatione concertare. Jam de quibus, et quousque disputandum? De his solum, quæ ingenii nostri modulum, atque auditoris captum non excedunt : ne alioqui; ut nimia vocis intentio atque immodicus cibus, aures et corpora labefactat; aut, si mavis, sarcinæ viribus graviores bajulorum humeros, ac crebiores pluviae terram opprimunt; ita etiam auditores quæstionibus gravioribus ac durioribus oppressi atque confecti, pristinas quoque vires amittant.

IV. Neque vero hæc quisquam ita accipiat, quasi Deum perpetua memoria colendum esse negem, ne rursus adversum nos irruant, qui omnia facile ac statim in calumniam trahunt. Nec enim tam sæpe spiritum ducere, quam Dei meminisse debemus : imo, si hoc etiam dici potest, nihil aliud quam hoc faciendum. Nam et ego inter eos nomen meum profiteor, qui verbum illud probant, quod nos « Die ac nocte jubet meditari¹, vespere, et mane, et » meridie narrare², » ac denique « Benedicere Dominum in » omni tempore³; » sive, ut verbis Moysis utar, « Dor-

¹ Psal. 1, 1. — ² Id. 117, 18. — ³ Id. XXXIII, 2.

» miamus, sive consurgamus, sive ip̃er faciamus¹, » sive quid aliud agamus, atque hac ipsa recordatione ad puritatem informari. Quocirca, ne quis perpetuo Deum memoria teneat, haud veto, sed ne de Deo disputet; imo nec hoc prohibeo, ne de Deo disputet, velut quid impium, sed ne intempestive: nec hoc ago, ut docendi munus explo- dam, sed ne mediocritatis fines transiliat. An vero, cum « Mellis² » quoque ipsius, quantumvis dulcis, satietas vomitum moveat, suumque « Cuique negotio destinatum sit » tempus³, » ut ego cum Salomone censeo; cumque ea, quæ per se bona sunt, nisi bene tractentur, boni gratiam perdant, (non aliter atque hyeme intempestivi sunt flores, nec mulieribus virilis, nec viris muliebris ornatus convenit, nec luctui geometria (1), nec convivio lærymæ,) hic solum nullam temporis rationem habebimus, ubi maxima ejus ratio habenda est?

V. Absit, o amici ac fratres; fratres enim adhuc vos appello, tametsi parum fraterno erga nos animo sitis; absit ut ita sentiamus, ac velut equi feroces et indomiti, ratione, quasi sessore, excussa, religiosaque gravitate, qua præclare compescimur, repudiata, procul extra metam curramus; verum finibus nostris disputationes nostras cõp̃rceamus, nec in Ægyptum præcipites feramur, nec ad Assyrios pertrahamur, nec « Canticum Domini in terra aliena cantemus⁴, » hoc est, apud quosvis auditores, tam nostrates quam extraneos, tam hostes quam amicos, tam benignos quam malignos ac præposteros, qui summo studio res nostras explorant, nihilque avidius expetunt, quam ut malorum nostrorum scintilla in flammam surgat, quam etiam furtim exsuscitant, atque accendunt, auræque suæ afflatu in cælum attollunt, et « Babylońska flamma⁵, » in orbem

¹ Deut. vi, 7. — ² Prov. xxv, 27. — ³ Eccle. iii, 1. — ⁴ Psal. cxxxvi, 4.

— ⁵ Dan. iii, 22.

omnia populante, sublimiorem reddunt. Quoniam enim in suis dogmatibus nihil sibi præsidii roborisque constitutum vident, hoc in nostrarum rerum imbecillitate venantur. Ac proinde, quemadmodum muscæ vulneribus, ita nostris calamitatibus, aut, si mavis, erratis imminent. At nos quidem nosmetipsos diutius ne ignoremus, nec moderationem, quæ in his rebus tenenda est, aspernemur. Quod si inimicitias atque odia extinguere non possumus, illud saltem inter nos conveniat, ut mystica mystice, et sancta sancto proloquamur, nec in profanas aures, quæ in vulgus efferrī nefas est, projiciamus, nec patiamur religiosiores quam nos videri eos, qui dæmones adorant, et turpium fabularum ac rerum cultum profitentur; quippe qui iis, qui non iisdem sacris initiati sunt, cruorem potius suum impertirentur, quam sermones, quibus mysteria sua detegerent. Agnoscamus, ut in vestitu, victu, risu, atque incessu, sic in sermone ac silentio modum quemdam ac decorum tenendum esse, præsertim cum inter tot Dei virtutes ac nomina *Αβυσσος* quoque, hoc est, Verbum colamus; atque contingat, ut ipsa etiam contentio nostra legitima sit.

VI. Cur Dei generationem et creationem (2), atque Deum ex nihilo ortum, cur sectiones, et divisiones, ac resolutiones ille audit, qui sævo atque infenso animo hujusmodi sermones expendit? Cur accusatores ipsos iudices constituimus? Cur hostibus in perniciem nostram gladios porrigimus? Quo pacto, quove animo, eos hujusmodi sermonem accepturos censes, qui adulteria, et puerorum stupra laudibus efferunt, qui vitia adorant, nec quidquam supra corpus cogitare possunt, qui heri et nudius tertius deos sibi condiderunt, eosque turpissimis facinoribus claros et nobiles? Annon crasse? Non sæde? Non inepte? Non suo denique more? Nonne deorum subrum ac vitiorum patrociniū a theologia tua haurient? Nam cum his

voçibus ipsi per summam calumniam utamur, quo tandem modo illos adducere queamus, ut philosophiam nostram amplectantur? Cumque per se ipsi in commiscendis malis solertes sint, quando tandem ab oblatiis abstinebunt? Hæc nobis bellum civile atque intestinum attulit. Hæc illi, qui pro Verbo acrius, quam Verbo ipsi gratum sit, depugnant: nec hominibus furore correptis dissimiles sunt, qui suas domos incendunt, vel liberos dilacerant, vel parentes protrudunt, utpote qui pro alienis eos habeant.

VII. Jamvero posteaquam eos, qui a nobis alieni sunt, a divinarum rerum auscultatione submovimus, atque in porcorum gregem numerosam legionem in profundum ruentem¹ ablegavimus, sequitur jam ut nosmetipsos inspiciamus, ac, status cujusdam instar, theologum ad omnem elegantiam expoliamus. Illud vero prius expendendum est, quæ hæc tanta disputandi cupiditas, ac linguae prurigo? Quis novus hic morbus, aviditasque inexplabilis? Cur manibus vinctis linguam armavimus? Non hospitalitatem, non fraternam charitatem, non mutuum conjugii amorem, non virginitatem laudamus? Non pauperum alendorum curam, non Psalmorum cantum, non nocturnam stationem, non lacrymas admiramur? Non corpus jejuniis premimus? Non per orationem ad Deum peregrinamur? Non, ut eos facere par est, qui justos se humano temperamento iudices præbent, deteriorem partem præstantiori, hoc est, pulverem spiritui subjicimus? Non præsentem hanc vitam mortis meditationem facimus? Non, nobilitatis divinitus inditis memores, imperium in animi perturbationes arripimus? Non iram intumescentem ac sævientem cicuramus, non dejicientem superbiam, non mœrorem inconsideratum, non stolidam voluptatem, non procacem et meretricium risum, non præcipitem aspectum, non inexplabilem

¹ Luc. viii, 30, et seqq.

audiendi, non immodicam loquendi libidinem, non absurdas cogitationes, non denique quidquam eorum quæ a nobis contra nos perversus ille hostis accipit, « Per fenestras¹, » ut Scriptura loquitur, hoc est, per sensuum organa, mortem introducens? Imo contra omnino facimus, atque aliorum vitiis libertatem damus, (non æcus ac pars victoria reges militibus suis vacationes concedunt,) hæc duntaxat lege et conditione, ut in nostras partes propendeant, atque adversus Deum majori cum audacia et impietate ruant; ac malam non bonæ rei mercedem ipsis pendimus, pro impietate nimirum peccandi licentiam ipsis persolventes.

VIII. Atqui, o dialectice et loquax, nonnihil « Te in- » terrogabo; tu vero responde², » ut inquebat ille, qui ad Job per turbinem ac nubes oracula edebat, Multæ-ne « Apud Deum mansiones sunt³, » quemadmodum Scriptura docet, an una tantum? Multæ, inquires, non una. Recte. Age vero, eas-ne omnes impleri, an quasdam quidem, cæteras autem minime, ut inanes et frustra paratas? Utique omnes. Neque enim a Deo quidquam temere atque incassum factum est. An porro hoc quoque dicere queas, quid tandem sit hæc mansio? Num requies et gloria, quæ beatis in cælo recondita est, an quid aliud? Nihil aliud, quam hoc, inquires. De hoc igitur quando inter nos constat, illud insuper expendamus: Est-ne aliquid, quod nobis mansiones hæc conciliet, ut mea est sententia, an omnino nihil? Est sane, inquis. Quidnam hoc? Hoc nimirum, quod diversa sint vivendi genera et instituta, ita tamen ut omnia sint fidei consentanea, quodque nos « Vias » appellamus. Quid ergo? His-ne omnibus incedere necesse est, an quibusdam solum? Omnibus, siquidem unus atque idem hoc possit; sin minus, compluribus; aut certe

¹ Jerem. ix, 21. — ² Job. xxxviii, 3. — ³ Joan. xiv, 2.

quibusdam. Quod si ne hoc quidem concedatur, amplum tamen, ut mihi videtur, fuerit, vel unica duntaxat eximie incedere. Recte hoc existimas. Quid igitur? Cum audis « Viam unam esse, eamque perangustam¹, » quid iis verbis significari putas? Unam sane esse, si virtutem spectes; hæc enim unica est, licet in multas partes secetur; verum angustam propter sudores, et quia non a multis teritur, siquidem multitudinem eorum cogites, qui contrario itinere per vitium gradiuntur. Ita mihi quoque videtur. Quid ergo causæ est, vir optime, cum ita se res habeant, quod, cæteras omnes vias repudiantes, tanquam pauperiem, explosa nostra agendi ratione, ferimini ac protrudimini omnes ad hanc unam, quæ per disputationes ac speculationes, ut ipsi putatis, ut autem ego, nugas et præstigias, teritur? Objurget vos Paulus, post gratiarum enumerationem acriter his verbis invehens: « Num omnes Apostoli? » Num omnes Prophetæ²? Et quæ sequuntur.

IX. Esto autem: sis ipse altus et sublimis, et sublimibus sublimior, atque ipsis etiam nubibus, si ita lubet, altior, rerum, quæ oculorum aspectum superent, spectator, « Et arcanorum » verborum auditor³, » post Eliam « In sublime raptus⁴, » post Moysen « Dei conspectione⁵ » donatus, post Paulum « In cælum evectus⁶: » quid tandem est, quod alios quoque unius diei momento sanctos fingis, et theologos creas, eruditionemque ipsis velut inspiras, et multa imperite doctorum conciliabula facis? Cur aranearum telis infirmiores illaqueas, ex eoque tibi scitum aliquid ac præclarum facere videris? Cur adversus fidem crabrones excitas? Cur dialecticorum agmen nobis ex tempore producis, non aliter ac fabulæ olim, gigantes? Cur levissimos quosque viros, ac virorum nomine indignos, velut colluviem quam-

¹ Matth. vii, 13. — ² 1 Cor. xii, 29. — ³ 2 Cor. xii, 4. — ⁴ 4 Reg. ii, 11. — ⁵ Exod. xxxiii, 22. — ⁶ 2 Cor. xii, 4.

dam, in unam voraginem cogens, ac verborum illecebris magis ac magis effœminans, novam ex ipsis impietatis officinam eondidisti, astute interim eorum amentia ad utilitatem tuam abutens, atque ex ea messem faciens? Num his refragaris? Num alia pro nihilo reputas? Num linguam tuam omnino dominari necesse est, nec tu parturientem sermonem reprimere potes? Habes etiam alia multa et honorifica disputationis argumenta. Morbum hunc ad hæc utiliter converte.

X. Pythagoræ silentium, et fabas illas Orphicas insectare, recentemque horum verborum arrogantiam: « Ipse » dixit. » Platonis Ideas impete (3), animorumque nostrorum in alia atque alia corpora migrationes et circuitiones, et reminiscantias, ac denique non pulchros amores per pulchra corpora in animum subeuntes. Epicuri impium numinis contemptum, et atomos, atque alienam philosopho voluptatem exagita; Aristotelis præparcam et angustis finibus circumscriptam Providentiam, et artificium, mortales de anima sermones, atque humana dogmata confuta. Stoicorum supercilium, Cynicorum ingluviem et circumforaneam levitatem incesse. Vacuum item, et plenum, ac quæcumque illi de diis, de sacrificiis, de simulacris, de dæmonibus, tum beneficis, tum maleficis, quæcumque de divinatione, de deorum, et animarum evocatione, ac postremo de vi et facultate siderum vanissime disputant. Quod si tu quidem de his rebus, ut parvis, ac sæpe confutatis, disputationem instituere recusas, in tuis vero versari gestis, iisque gloriam ac nominis celebritatem affectas; hic ego quoque latissimum tibi campum aperiam. De mundo, vel mundis philosophare, de materia, de anima, de naturis ratione præditis, tam bonis, quam malis, de resurrectione, de iudicio, de præmiis ac penis, de Christi cruciatibus. In his enim argumentis, et scopum assequi

utile est, et aberrare minime periculosum(4). At vero cum Deo, in hac quidem vita parcius, aliquanto post autem fortasse plenius, commercium habebimus, in ipso Christo Jesu Domino nostro, cui sit gloria in sæcula. Amen.

ORATIO XXVIII¹. THEOLOGICA II.

De Theologia.

ARGUMENTUM.

I. Qui purus est, de Deo disserat. — Trinitatis invocatio. II. Allegoria ascensus Moysis ac seniorum in montem. — Moyses in montem ascendit. — Aaron in propinqua erat. — Seniores procul insistent. — Fulgur purgatum infra subsistit, et fumo circumfusum montem cernit. — Mala bestia a monte recedit, aut lapidibus obruitur. — Hæreticorum balluis comparati. III. Gregorius, ut Moyses, Dei posteriora vidit. — Quid per Dei posteriora intelligatur. — Theologus, quamlibet perspicax et eruditus, Deum obscure cognoscit. IV. Dei natura, nec verbis explicari, nec mente comprehendere potest. — Angeli uberius quam nos Deum cognoscunt. V. Deus cognosci non potest, sicuti est. — Quod sit Deus, percipi potest; quid et quale sit, non percipi potest. VI. Oculi et lex naturalis Deum esse docent. — Deus per effectus agnoscitur. — Nemo, ne quidem cogitatione, Deum comprehendit. VII. Deus corpus non est. — Non circum-

¹ Alf. xxxiv, quæ autem xxviii erat, nunc est xxvi. Habita anno 330.

tribitur. VIII. *Quomodo Deus omnia penetrat et implet.* — *Deus, rerum creatarum more, non movetur.* IX. *Deus incorporeus est.* — *Quæ de Deo, vel circa Deum dicantur, ipsius essentiam non indicant.* — *Exponendum quid sit Deus, ut ejus natura dignoscatur.* X. *Deus loco non continetur.* — *Ubi Deus ante mundum conditum.* XI. *Cur Deus nequit intellectu humano comprehendere.* XII. *Varie causæ, cur Deus humano intellectu comprehendere nequeat.* — *Prima causa.* — *Secunda causa.* — *Tertia causa.* — *Sensibilibus rebus, mens ad intellectuales evehitur.* XIII. *Allegorica Dei nomina.* — *Languet humana mens, cum ad incorporea absque adminiculo sese efferre studet.* — *Natura omnis ratione prædita Deum appetit.* — *Idololatriæ origo.* XIV. *Alii coluerunt solem, lunam, stellas, cælum ipsum.* — *Alii, terram, aquam, aërem, ignem.* — *Alii, pulcherrima quæque.* — *Alii, imagines propinquorum, aut etiam alienorum.* — *Alii, summam potestatem, corporis robur, ac formæ venustatem.* XV. *Vitia ipsa pro diis habita.* — *Fæda gentiliū sacrificia.* XVI. *Deus, per ea quæ facta sunt, cognosci potest.* — *Deus cunctarum rerum artifex.* XVII. *Dei naturam et essentiam nemo novit.* — *Modus quo Patriarchæ Deum cognoverunt.* XVIII. *Enos. Enoch. Noë. Abraham. Jacob.* XIX. *Elias.* — *Manuë judex, Petrus apostolus.* — *Isaias et Ezechiel.* XX. *Paulus.* XXI. *Dei natura, abyssus.* — *Quo perfectior de Deo disputatio, eo difficiolior.* — *Inscrutabilia Dei judicia.* XXII. *Humana natura incomprehensibilis.* — *Quis novit corporis cum anima copulationem?* — *Varias mentis ac sensuum operationes et proprietates.* — *Species stabiles et notis inter se distinctas.* — *Membrorum functiones.* — *Vocis, auditus et oculorum proprietates.* XXIII. *Admirabilis animantium varietas.* XXIV. *Pisces. Abes.*

Cicadae. Cygni cantus. Pavonis elegantia. XXV. Avium in elaborandis nidis solertia. — Apum et aranearum labor et industria. — Euolides. Palamedes. Phidias. Zeuxis. Dædali chorus. Labyrinthus, formica. XXVI. Varia plantarum genera, utilitas, et pulchritudo. Fructus. Flores. — Deus beneficiis agnoscendus. — Terra, mare, fluvii, fontes, nemora. — Aquæ calidæ. — Terra, sola Dei voluntate, firma et immota. XXVII. Admiranda maris magnitudo. — Mare pro termino arenam habet. — Homo exiguo ligno ac vento mare peragrat. — Mare nunquam regurgitat. XXVIII. Aer. Venti, nix, ros, pluvia. — Fulgura et tonitrua. — Fides potius quam ratio sequenda. XXIX. Cælum et stellæ. — Unde et quomodo nata astronomia. — Luna. — Sol aliis sideribus præstantior. XXX. Sicut oculis sol, ita Deus menti lucem largitur. — Unde dierum et noctium incrementum, diminutio et æqualitas. — Luna nocti præsidet, ut sol diei. XXXI. Tabernaculum Moysis figura mundi. — De Angelis dissertatio. — Varia Angelorum ministeria. — Quidquid in hac oratione bonum est, id totum ad Trinitatem refertur.

I. QUONIAM sermone theologum repurgavimus¹, cum illud exposuimus, et qualem eum esse, et apud quos, et quando, et quatenus philosophari oporteat; nam et eum quam maxime purum esse necesse est, ut luce lucem percipiat, et apud studiosos, et diligentes auditores orationem habere, ne alioqui « In sterilem terram sermo incidens², » sterilis quoque ipse sit; et tum demum, cum ab externarum rerum jactatione tranquillum animum habuerimus, ne, quod singultientibus accidere solet, spiritus

¹ Vide D. Guillon, tom. vi, p. 302-321. — ² Matth. XIII, 5, et seqq.

nobis interrumpatur; ac denique hactenus disserendum, quatenus vel ipsi concepimus, vel ab alienis concipimur. Quoniam, inquam, hæc ita se habent, ac, ne « Super » spinas seramus¹, nobis divina novalia novavimus², ter- » ræque superficiem complanavimus³, » Scriptura videlicet sacra, tum ipsi informati, tum alios informantes: age, jam ad theologiæ sermones accedamus, Patrem, et Filium, et Spiritum sanctum, de quibus dicere instituimus, orationi nostræ præficientes; ut et Pater propensa erga nos voluntate sit, et Filius adjutricem manum porrigat, et Spiritus vim suam afflet; vel, ut rectius loquar, unus ab una eademque Divinitate ortus fulgor nos illustret, conjunctim distinctus, ac distinctim conjunctus, id quod valde mirandum est.

II. Mihi porro « In montem alacriter ascendent⁴, » ant, ut verius dicam, ascendere proponenti simul ac trepidanti, illud propter spem, hoc propter imbecillitatem, ut nubem penetrem, ac cum Deo commercium habeam; Deus enim ita jubet: si quis Aaron est, comitem se ascensus præbeat, atque in propinquo stet, etiamsi extra nubem sibi manendum sit, æqui bonique consulens. Si autem Nadab quispiam, aut Abiud, aut ex seniorum ordine, ascendat ille quidem, verum procul insistat, pro purgationis suæ merito ac dignitate. Si vero quispiam e vulgo, atque hujusmodi sublimitate ac speculatione indignus, siquidem omnino impurus ac profanus sit, nullo modo accedat, neque enim ea res periculi expers est: si autem saltem ad horæ tempus purgatus, infra subsistat, ac solum vocem et buccinam, hoc est, nuda pietatis verba audiat. Montem etiam fumo circumfusus ac corruscantem cernat, terrore simul eos et admiratione afficientem, qui-

¹ Matth. xiii, 7. — ² Jerem. iv, 3. — ³ Isai. xxviii, 25. — ⁴ Euseb. xix, 24.

bus ascendere minime licet. Quod si quis mala et sava bestia est, nec speculationis et theologiæ ullo modo capax, ne, velut in sylvis, versute ac malitiose latitet, ut impetu repente facto verbum aliquod, vel dogma rapiat, atque obtreactionibus et calumniis saluberrimam doctrinam discerpat, verum longius adhuc consistat, atque a monte recedat: alioqui lapidibus opprimetur, et obteretur, «*Mac*» hæcque male perdetur¹. » (Lapides enim sunt belluini hominibus veri ac solidi sermones). Sive «*Pardus* sit, » simul cum variis suis notis et maculis² » moriatur: sive «*Leo* rapiens et rugiens³, » ac quærens quàmnam animarum aut dictionum nostrarum devoret: sive: «*Porcus*, » egregias et pellucidas veritatis margaritas conculcans⁴; » sive «*Lupus arabeus*⁵ » et peregrinus, aut etiam his, quoad sophismata et captiosas disputationes, acutior; sive «*Vulpes*⁶, » hoc est, versuta quædam anima, fideque ancipiti prædita, et pro temporum varietate alia atque alia, novamque subinde, ut id rebus suis conducere arbitratur, formam assumens, quam mortua et foetida corpora nutriunt, aut humiles vineæ, cum ad altas aspirare nequeat; sive denique aliud quoddam crudivorum animal; legisque edicto rejectaneum, nec purum, ut iis et vesci et frui liceat. Vult enim nostra doctrina ab his abscedere, atque ita solidis et lapideis tabulis inscribi, idque utrinque, quod nimirum lex partim perspicua sit, partim abdita et abstrusa: illud quidem plerisque ad radices montis subsistentibus, hoc autem paucis in montem ascendentibus.

III. Verum quid mihi accidit, o amici, ac iisdem sacris initiati, ejusdemque veritatis studiosi? Currebam hoc animo, quasi Deum percepturus, sicque in montem as-

¹ Matth. XXI, 41. — ² Jerem. XIII, 23. — ³ 1 Petr. v, 8. — ⁴ Matth. VII, 6. — ⁵ Habac. 1, 8. — ⁶ Cant. XI, 15.

constantibus reductus, atque in me ipsum, quoad ejus fieri poterat, collectus. Ut autem oculorum aciem adjeci, vix hoc etiam sum consecutus, ut Dei posteriora cerne-rem¹, idque petra, hoc est, Verbo nostræ salutis causa incarnato, contactus. Atque aliquantam prospiciens, non primam illam et purissimam naturam, sibi quæ ipsi, id est, Trinitati, notam, quæque primo velo oblecta manet, et a Cherubim obtegatur, conspicatus sum, verum postremam atque ad nos pertingentem. Ea autem est, ut quidem ipse cognitione assequor, majestas illa, vel, ut David appellat, « Magnificencia², » quæ in rebus ab eo creatis productisque et gubernatis elucet. Dei quippe posteriora sunt ea, quæ post eum extiterant, nobisque ipsius Numen declarant, non secus videlicet ac solis in aquis umbræ atque simulacra infirmis oculis solem representant, quandoquidem eum obtineri non possumus, utpote qui lucis puritate sensum omnem superat. Ad hunc itaque modum theologi munus obibis, quamvis etiam Moyses sis, Deusque Pharaonis³, quamvis ad tertium usque cælum, instar Pauli⁴, abreptus fueris, atque arcana verba audiveris; quamvis etiam supra illos evectus, angelicam quamdam aut archangelicam sedem et ordinem sis consecutus. Creatum enim omne, sive cæleste sive supercæleste, licet sublimiori quam nos natura præditum, Deoque vicinius, longiori tamen intervallo a Deo, ac plena illa et absoluta cognitione distat, quam quo compositam hanc nostram, et abjectam atque humi vergentem massam superat.

IV. Esto igitur hoc alterum orationis exordium. Deum intellectu percipere difficile est; eloqui autem impossibile, ut, prophanorum theologorum quidam docuit (5), meo quidem judicio, non incallide, nempe ut ex eo quod intellectu difficilem affirmat, opinionem hominibus afferat;

¹ Exod. xxxiii, 23: — ² Psal. viii, 2: — ³ Exod. vii, 1. — ⁴ 2 Cor. xii, 2.

cendi, ac nubem penetravi, a materia rebusque materia se eum cognitione percepisse; ex eo autem quod nullius verbis eum explicari posse ait, hoc agat, ne incitia sua prodi atque convinci queat. Ego vero ita potius dicendum censeo, Dei naturam nullis quidem verbis explicari posse; animo autem atque intellectu comprehendi multo minus posse. Nam quod quis animo et ratione complexus fuerit, id quoque fortasse sermone declarare queat, si ne mediocriter quidem, at saltem obscure, modo auditorem nactus sit non omnino surdum, tardique et stupidi ingenii. At rem tantam animo comprehendere, omnino impossibile est, non modo ignavis et languidis, deorsumque vergentibus, sed magnis etiam et excelsis viris Deique amore præditis, ac mortalibus peræque omnibus, quibus ad veri cognitionem caligo hæc et carnis crassities tenebras offundit. Atque haud scio, an hoc quoque sublimioribus illis et intelligentibus naturis, negatum non sit (6); quæ quia Deo propius junctæ sunt, ac toto illo splendore collucent, cernere utique fortasse queant, si non prorsus, ac certe plenius quam nos et solidius, atque aliæ aliis, pro cujusque ordine, vel uberius, vel parcius.

V. Sed de hac re hic sit finis. Quod autem ad nos attinet, non « Pax tantummodo Dei exuperat omnem mentem et cognitionem ¹, » nec quæcumque iis, qui justitiam coluerint, in divinis pollicitationibus recondita sunt, « Quæ » nec oculis cerni, nec auribus excipi, nec animo cogitari » ac perspicere ², nisi tenuissime, possunt, » nec exacta et absoluta rerum creaturarum cognitio; (nam harum quoque te solas umbras tenere haud dubites, cum Scripturam ad hunc modum loquentem audieris: « Videbo cælos, opera » digitorum tuorum, lunam et stellas ³. » eamque, quæ ipsis inest, firmam et stabilem rationem, perinde scilicet atque

¹ Philip. iv, 7. — ² 1 Cor. xi, 9. — ³ Psal. viii, 4.

in hac vita ea minime videns, sed aliquando perspecturus ;) sed multo magis natura illa his sublimior, et ex qua hæc originem traxerunt, captum omnem et comprehensionem superat. Nec vero hæc verba ita accipi velim, quasi percipi non posse dicam, quod sit Deus, sed quid, et quale sit. « Neque enim inanis est prædicatio nostra, nec vana fides » nostra ¹ ; » nec id est, quod astruimus ; (ne rursus id quod probe, candideque diximus, in impietatis et calumniæ argumentum trahas, ac nobis, ut ignorantiam confitentibus, arroganter insultes.) Plurimum namque interest, certo tibi persuadeas aliquid esse, an, quid tandem illud sit, compertum habeas.

VI. Etenim quod Deus sit, ac princeps quædam causa, quæ res omnes procreavit, atque conservet, tum oculi ipsi, tum lex naturalis docent ; illi, dum rebus in aspectum cadentibus aciem affigunt, easque et pulchre fixas et stabiles esse, et progredi, atque immote, ut ita dicam, moveri volvique perspiciunt ; hæc autem, dum per res oculis subjectas, ac recto ordine collocatas, auctorem earum certo quidem ratiocinando assequitur. Quonam enim modo universa hæc rerum moles vel producta unquam fuisset, vel consisteret, nisi Deus omnia in rerum naturam protulisset, atque conservaret ? Quemadmodum enim quispiam citharam pulcherrime confectam et elaboratam conspiciens, ejusque concinnitatem et constitutionem, aut etiam ipsius citharæ cantum audiens, nihil aliud quam ipsum citharæ conditorem et citharædum mente reputat, atque ad eum cogitatione fertur, etiamsi de facie ignotum : eodem quoque modo nobis, is, qui res effecit, effectasque movet atque conservat, manifestus est, etiamsi mente minime comprehendatur. Acnimis profecto hebes et stolidus est, quisquis non huc usque sponte sua progreditur, natura-

¹ 1 Cor. xv, 14.

liumque demonstrationum vestigiis insistit : atque adeo hoc sibi persuadet, ne id quidem Deum esse, quod vel imagine quadam animi concepimus, vel informavimus, vel orationis penicillo utcumque descripsimus. Quod si quis unquam cogitatione Deum quoquo modo comprehendit, quonam, obsecro, argumento id probabit? Ecquis enim eo sapientiæ pervenit? Ecquis unquam tantam gratiam divinitus consecutus est? Ecquis « Os mentis ita aperuit, » Spiritum attraxit, ut Spiritus, omnia perscrutantis, atque » etiam Dei profunda cognoscentis ¹ » ope atque adjumento, Dei naturam comprehenderit, nec jam ulterius progredi necesse habeat, utpote qui extremum illud appetendum jam habeat, ad quod omnis sublimium virorum, et vita et cogitatio contendit?

VII. Quid enim tandem Deum esse censebis, si argumentis a ratione petitis fidem omnino habes? Aut quo tandem te subvehet hæc disputatio, si accuratius examinetur? Te, inquam, appello, qui philosophiæ ac theologiæ principatum tibi vindicas, atque in immensum gloriaris. An corpus eum esse dices? Quonam ergo modo immensus, infinitus, figuræ expers est, ac denique ejusmodi, ut nec tangi, nec oculis cerni queat? An hæc quoque in corpora cadunt? O licentiam? Non enim hæc corporum natura est. An corpus quidem esse statues, immensum vero, atque infinitum, cæteraque hujus generis esse negabis? O crassitiem! ut nulla re Deus nobis præstet. Quid enim afferri potest, cur colatur atque adoretur, si circumscriptus est? Aut quid causæ esse dicemus, quin ex elementis conflatus sit, atque in eadem denuo redigatur, aut etiam prorsus intereat? Compositio quippe pugnæ initium est, pugna autem dissidii, dissidium solutionis : solutio porro nullo modo in Deum ac primam illam naturam cadit. Quo-

¹ Psal. cxviii, 131. — ² 1 Cor. xi, 10.

circa nullum dissidium admittendum est, ne solutio consequatur : nec pugna, ne dissidium oriatur : nec compositio, ne pugna existat. Ac proinde ne corpus quidem est, ne alioqui compositum quidem eum necesse sit. Sit ab extremis ad prima recurrens oratio insistit.

VIII. Jamvero quomodo illud tueri poterimus, quod ait Scriptura, Deum omnia pervadere atque implere, juxta illud : « Nonne cælum et terram ego impleo, dicit Dominus¹ ? » Et, « Spiritus Domini replevit orbem terrarum² ; » si Deus partim circumscribat, partim circumscribatur ? Aut enim per vacuum Universitatem graasabitur, et res omnes nobis peribunt, ut sic Deus contumelia afficiatur, nimirum et qui corpus sit, et iis, quæ procreavit, careat ; aut corpus in corporibus erit, id quod fieri non potest : aut implicabitur, et opponetur, quemadmodum ea, quæ liquiditate prædita sunt, inter se miscentur ; atque alia secabit, et ab aliis rursus secabitur, quod ipsis etiam Epicuri atomis absurdius et anilius est ; sicque nobis collabatur, nec corpus, nec solidi quidquam habebit hæc disputatio, qua corpus Deo tribuere conamur. Quod si eum corpus materiæ expers esse contenderint, siquidem quintum illud, ut nonnulli censuerunt (7), et in orbem volubile ? Sit sane corpus quoddam quintum, et a materia semotum, atque etiam, si ipsis ita collibuerit, incorporeum ; quandoquidem ita sermone comparati sunt, ut pro arbitrio in omnem partem sese versent, ac quidvis effingant ; nihil enim hac de re in præsentia cum illis altercabor, Cæterum quo tandem in genere erit earum rerum, quæ motu cientur et agitantur, ut interim taceam, quam gravis sit contumeliæ, asserere Creatorem eodem, quo res ab eo creatas, motu incitari, atque eum, cujus vi ac numine res conditæ volvuntur, si tamen hoc etiam daturi sunt, eodem

¹ Jer. xliii, 24. — ² Sap. i, 7.

modo cum iis volvi ac circumferri? Quæro etiam, quidnam sit quod Universum hoc moveat? Quidnam vero quod vicissim illud moveat, ac rursum a quo illud moveatur? Eodemque modo in infinitum progrediar. Qui etiam fieri potest, ut omnino non sit in loco, siquidem fertur, ac motu incitatur? Jam si aliud quoddam corpus, præter quintum illud, Deum esse statuunt, siquidem angelicum, unde probabunt Angelos corpore constare, et quo tandem corpore? Quantum autem, si res ita se habeat, Deus Angelum, quo ministro utitur, antecellet? Si corpus quoddam his sublimius esse dixerint, rursus corporum examen rationis expers inducetur, ac nugarum gurgēs adeo profundus, ut nusquam pes figi possit.

IX. Atque hinc constat Deum corpus non esse. Neque enim adhuc quisquam eorum, qui divinitus afflati sunt, hoc vel dixit, vel ab aliis dictum comprobavit, nec nostri ovilis est hæc doctrina. Superest igitur, ut incorporeum esse Deum existimemus. Verum, utcumque incorporeum dicamus, nondum tamen hoc naturam illius essentiamque complectitur et declarat; quemadmodum nec ingenitum, nec anarchum, id est, « Principii expers, » nec immutabile, nec incorruptibile, cæteraque omnia, quæ de Deo, vel circa Deum prædicantur. Quid enim prodest ad indicandam ipsius naturam et subsistentiam, qua existit, si dicas eum initium non habere, nec a se unquam disciscere, nec ullis terminis includi? Verum totam ejus essentiam edisserendam et inquirendam huic relinquimus, qui vere Dei notitiam habet, atque in contemplando perfectior est. Ut enim non satis est corpus dicere, aut procreatum esse, ad hoc vel illud, cui hæc adjacent, exprimendum et indicandum, sed quid ipsa quoque res subjecta sit, dicendum est, si modo volumus, id quod cogitamus, plene atque abunde repræsentare; (potest enim vel homo, vel

hos, vel equus esse, hoc quod corporum ac procreatum et corruptibile esse pronuntiamus;) ad eundem modum qui Dei naturam curiosius inquirendam duxerit, non hic conquiescet, ut dicat, quid non sit Deus, sed hoc quoque ipsi adjiciendum erit, ut, quid sit, exponat; idque eo magis, quod minus difficile est unum quidpiam animo complecti, quam omnia sigillatim inficiando remove, ut rejectis iis, quæ non est, et constituto eo, quod sit, comprehendatur id quod cogitamus. Qui vero ita, quid res aliqua non sit, pronuntiat, ut interim, quid sit, taceat, non absimilis est ei qui rogatus: Bis quinque quot sint, respondeat quidem ea nec duo esse, nec tria, nec quatuor, nec quinque, nec viginti, nec triginta, nec, ut brevi complectar, ullum numerum citra vel ultra denarium: cæterum quod decem sint, non dicat, nec mentem ejus, a quo interrogatur, ad id quod quæsitum est, affigat. Multo enim facilius et compendiosius est, ex eo, quod, quid sit, dixeris, quidquid non sit declarare, quam ex eorum, quæ non est, ablatione atque inficiatione, quid sit, demonstrare; quemadmodum cuivis perspicuum esse arbitror.

X. Quoniam igitur Deum corpore vacare nobis est exploratum, aliquanto ulterius in inquirendo progrediamur. Nusquam-ne ille est, an alicubi? Si enim nusquam, quæret fortasse aliquis ex iis qui inquirendi ac disputandi subtilitate impensius gaudent, quomodo esse quoque possit. Nam si id quod non est, nusquam est: id quoque quod nusquam est, ne quidem fortasse est. Quod si alicubi esse dixeris, procul dubio, quandoquidem est, vel in Universo est, vel supra Universum. Si in Universo, vel in quadam ejus parte est, vel ubique. Si quadam in parte, ergo a minori hac parte circumscribetur. Sin ubique, ab ampliore alioque multo majore, id est, a continente contine-

bitur. Hæc si dederimus, futurum est, ut Universum Universi complexu teneatur, nec ullus a circumscriptione liber extet locus. In has absurditates incidant necesse est, qui eum in Universo esse dixerint. Ac præterea, ubi-
nam erat, antequam universa hæc rerum machina extitisset? Nam hoc quoque non levem difficultatem affert. Quod si eum supra Universum esse dixerint, quid? Nihilne erat, quod eum ab Universo dirimeret? Ubinam porro erat, quod supra Universum erat? Aut quomodo inter-
nosci poterat id, quod sublimius erat, ab eo, quod inferius, cum nullus limes esset, qui hæc secerneret ac distingueret? Annon omnino necesse est medium quoddam esse, quo, velut termino, dirimatur Universum ab eo, quod supra Universum est? Quid autem aliud hoc fuerit, quam locus, quem jam ante exclusimus? Nondum enim commemoro, fieri omnino non posse, quin circumscrip-
tus sit Deus, si animo et cogitatione comprehendi potest. Unum quippe circumscriptionis genus comprehensio quoque ipsa est.

XI. Quorsum autem hæc disserui, curiosusque fortasse, quam vulgi aures ferant, ac pro ea, quæ hac tempestate viget, disputandi ratione, quæ, simplici atque ingenua rerum divinarum pertractatione contempta et pro nihilo habita, subdolum atque involutum dicendi genus in-
vexit; ut nimirum « Ex fructibus arbor¹, » hoc est, ater ille ac tenebrosus spiritus, huiusmodi dogmatum afflator ex hac disputationis caligine agnoscatur? Non enim hoc eo a me factum est, ut ipse quoque nova et ab hominum sensibus aliena proferre, atque « Eximia quadam et excel-
» lenti sapientia ornatus esse² » videar, nodos nectens, atque astricta dissolvens; quod quidem magnum Danielis miraculum fuit; verum ut illud ostendam, quod orationis

¹ Matth. vii, 10. — ² Dan. vi, 12, et seqq.

principio dicere instituebam, nimirum Deum extra humani ingenii captum esse, nec totum, quantus est, cogitari atque animo informari posse; idque non ob invidiam; longe enim abest a divina natura invidiæ livor, utpote quæ omni perturbatione vacat, solaque bona et dominâ est, ac præsertim erga id, quod ex omnibus rebus a se conditis maximo in pretio habet. Quid enim apud Verbum priore loco ac numero est, quam quæ rationem ac sermonis facultatem acceperunt? Quandoquidem hoc quoque ipsum, quod procreata sunt, summæ cujusdam divinæ bonitatis argumentum est; nec ut inde ipsius, qui plenus est, honori gloriæque quidquam accederet, ut videlicet ex eo quod ad ejus cognitionem mortales pervenire nequeunt, major ad ipsum honor ac veneratio redeat. Sophisticum enim plane, atque alienum est, non dicam a Deo, sed ab homine, mediocri saltem probitate candoreque prædito, atque ingenuæ cujusdam honestatis sibi conscio, prohibendis aliis principatum sibi arrogare.

XII. Verum alias-ne etiam quasdam ob causas, viderint ii, qui Deo propinquiores conjunctioresque sunt, atque « Impervestigabilium ipsius judiciorum¹ » inspectores et contemplatores, si qui tamen sunt ad eam virtutis magnitudinem evecti, atque « In abyssi vestigiis deambulantes², » ut proverbio dici solet. Quantum tamen nos, qui exiguis modulis ea, quæ ad contemplandum difficilia sunt, metimur, conjectura assequi possumus, tres hujus rei causas afferri queant. Prima forsân, ne, ob adipiscendî facilitatem, facilis quoque rei quæsitæ jactura sit. Fit enim fere, ut quod non sine labore atque industria partum est, arctius quoque teneatur: quod autem nullo negotio comparatum est, citissime vilescat, et abjiciatur, utpote quod recuperari possit; atque ita in beneficium cedit non obvia

¹ Rom. xi, 58. — ² Job. xxxviii, 16.

illa beneficentia, apud eos saltem, qui prudentes sunt. Altera, ne idem nobis, quod « Lucifero illi prolapso¹, » accidat; hoc est, ne toto illo fulgore perfusi cervicem adversus Dominum omnipotentem attollamus, atque ob elationem corruamus, casu omnium miserrimo et calamitossissimo. Postrema, ut pro industriæ suæ illustrisque vitæ præmio uberius aliquid habeant, qui hic sese a vitiorum labe perpurgarint, ac rem adamatam et expetitam patientibus animis expectarint. Idcirco media inter nos ac Deum corporea hæc caligo interjecta est, non secus ac « Nubes » illa » olim inter Ægyptios et Hebræos². Ac fortasse huc spectat illud Scripturæ, « Posnit tenebras latibulum sibi³, » hoc est, crassitiem nostram, qua fit, ut pauci omnino, iique parum admodum transpiciant. Sed de hac re accuratius philosophentur, altissimeque consideratione provehantur, quibus id studio et curæ fuerit. Nobis utique, qui « Terræ vinculis astricti tenemur⁴, » ut Jeremiæ verbis utar, crassaque hac carne obtegimur, hoc perspicuum est, quod quemadmodum nulla ratione fieri potest, ut quispiam, quamlibet gressum urgeat, umbram suam prætereat, (quantum enim eam assequeris, tantum etiam illa semper antevertit;) aut oculus rebus in aspectum cadentibus citra intermediam lucem et aërem jungatur, aut pisces extra aquas natent; ita etiam impossibile est iis, qui corporibus inclusi sunt, sine corporearum ac sensibilibus rerum admficulo, rebus iis, quæ animo ac ratione intelliguntur, omnino conjungi. Semper enim obiter sensibile aliquid rerum nostrarum incidit, quantumvis maxime nostra mens ab iis rebus, quæ in aspectum cadunt, abstracta, atque in se ipsam collecta, res cognatas, et oculorum aciem fugientes assequi ac percipere contenderit. Quod quidem ita tibi clarum ac dilucidum erit.

¹ Isai. xiv, 12. — ² Exod. xiv, 20. — ³ Psal. xvi, 12. — ⁴ Thren. iii, 34.

XIII. Nonne Spiritus, et Ignis, et Lux, et Charitas, et Sapientia, et Justitia, et Mens; et Verbum, atque similia, principis illius naturæ sunt nomina? Quid igitur? An spiritum animo concipies, qui motus ac diffusionis expers sit? An ignem, qui materia careat, sursumque non feratur, nec proprio colore ac figura præditus sit? An lucem nullo aëre permixtam, atque a suo quasi parente eamque effundente segregatam? Jam mentem, quam tandem intelliges? Annon eam, quæ in alio est, cujusque motus cogitationes sunt, vel tacitæ, vel sese proferentes? Quod item verbum? Annon illud, quod vel in nobis quiescit, vel diffunditur? Vereor enim dicere, solvitur. Quam porro sapientiam, præter eam, quæ habitus est, atque, vel in divinis, vel in humanis rebus contemplandis versatur? Quam porro justitiam et charitatem? Nonne præclaras et cum laude conjunctas affectiones, (quarum altera injustiæ, altera odio adversetur,) nunc sese intendentes, nunc remittentes, nunc accedentes; nunc decedentes, ac certa omnino qualitate nos afficientes, et immutantes, haud secus ac colores corpora? An potius nobis faciendum est, ut ab his abscedamus, ac Numen ipsum sejunctim, quoad ejus fieri potest, perspiciamus, particularem quamdam speciem ex simulacris colligentes? Quænam igitur est hæc molitio, quæ et ex his volut conflatur, et tamen hæc non sit? Aut quomodo id, quod unum est, ac suapte natura compositionis expers, nec ullis rerum simulacris adumbrari potest, hæc omnia et horum unumquodque perfecte fuerit? Ita mens nostra languet ac fatiscit, dum e corporeis et sensibilibus rebus excedere, atque incorporeis citra ullius rei interventum jungi studet, quandiu cum sua infirmitate, ea, quæ ipsius vires superant, speculatur. Etenim Deum, ac principem illam causam, natura quidem omnis rationis particeps appetit; ut autem eam assequatur, ob eas, quas dixi,

causas, vires deficiunt. Languens autem desiderio, ac male omnino affecta, ægerrimeque hoc damnum ferens, secundam, ut dici solet, navigationem init, ut scilicet, vel ad res eas, quæ sub oculorum sensum cadunt, oculos flectat, ac quampiam earum pro Numine colat, pessimo utique consilio labens; (quid enim in omnibus rebus, quæ oculis cernuntur, eo, a quo cernuntur, excelsius et divinius est, ut illud adoretur, hoc vero adoret?) Vel per aspectabilium rerum pulchritudinem et ordinem, Dei cognitionem assequatur, atque ad ea percipienda, quæ oculorum obtutum fugiunt, ducibus oculis utatur, non autem per earum rerum, quæ oculis subjectæ sunt, magnificentiam, Dei jacturam faciat.

XIV. Hinc alii solem, alii lunam, alii siderum multitudinem, alii cælum quoque ipsum una cum illis, quibus pro motus qualitate vel quantitate mundi gubernationem administrationemque tribuerunt; alii rursus propter necessarium usum, terram, aquam, aërem, ignem, quod his sublati humanæ vitæ incolumitas constare non possit; alii denique quidquid ex rebus aspectabilibus temere ipsis occurrit, coluerunt, pulcherrima quæque eorum, quæ cernebant, pro diis sibi constituentes. Nec defuerunt, qui statuas ac figmenta divinis honoribus affecerint, primum quidem propinquorum et necessariorum, ii videlicet, qui vehementiori luctu afflictabantur, corporeisque rebus adiciores erant, atque homines vita functos monumentorum honore prosequerantur: post autem alienorum quoque, nempe ii, qui multis post eos sæculis extiterunt, ignoratione videlicet primæ illius naturæ, ac serie per manus ipsi a maioribus traditi cultus, quasi justis et necessariis. Consuetudo enim, temporis longinquitate confirmata, pro lege habita est. Nonnullos etiam fuisse arbitror, qui summam alicujus potestatem omni observantia colentes,

et corporis robur laudibus effarentes, ac formæ venustatem admirantes, eum tandem, quem honorabant, in deorum numerum ascripserint, ad hujusmodi imposturæ subsidium et patrocinium, fabulas quasdam assumentes.

XV. Jam vitiosissimi quique vitia ipsa fœdosque affectus deos esse censuerunt, aut certe sub deorum nomine coluerunt, iram nimirum, cædem, libidinem, temulentiam, et cætera ejus generis, non æquam, nec honestam hanc scelerum suorum excusationem nacti. Atque eos partim in terra reliquerunt, partim infra terram occultarunt, hoc unum satis consulte, partim in cælum evexerunt: o ridiculam hæreditatis partitionem! Ac deinde pro erroris libertate et licentia, figmento cuique nomen aliquod, vel deorum, vel dæmonum indiderunt, statuasque insuper erexerunt, easque adeo magnificas et excellentes, ut prætio ipso vulgi animos inescarent. Ad hæc per cruores, et carniū nidores, quidam etiam per actiones imprimis fœdas, hoc est, furores ac cædes, hujusmodi numina rite coli existimarunt. Tales quippe talibus diis honores haberi conveniebat. Eo etiam amentia quidam proruperunt, ut « Colendis avibus, et quadrupedibus, et reptilibus¹, » atque horum turpissimis quibusque maximoque ridiculis, se ipsos contumelia afficerent, illæque Dei gloriam attribuerunt: ut non sit facile constituere, utri magis contemnendi sint, ii-ne qui adorabant, an qui adorabantur. Fortasse vero multo majori contemptu atque ignominia digni erant, qui res hujusmodi adorabant; quoniam, cum natura ratione prædita ornati essent, Dei que gratiam acceperant deterius meliori prætulerunt. Atque hæc fuit pravi illius calliditas et impostura, re bona ad malum abutentis; qualia sunt pleraque illius versuta facinora. Nam cum eorum cupiditatem ad Dei conquestionem oberrantem accepisset,

¹ Rom. 1, 23.

ut principatum ad se transferret, ac desiderium eorum eluderet, quasi cæcum viæ cuiusdam cupiditate flagrantem manuducens, alios alio præcipites egit, atque in unum quoddam mortis exitiique barathrum dispersit.

XVI. Atque hæc quidem illi. Nos autem Dei desiderio flagrantem, atque animis ita comparatos, ut universitatem hanc duce atque gubernatore carere nullo modo admittere queamus, ratio excipiens, ac deinde in res oculis subjectas intuens, atque adeo ea, quæ ab initio condita sunt, considerans, ne hic quidem gradum fixit. Neque enim rationis erat, iis, quæ, quantum ad sensum, pari nobiscum conditione sunt, principatum dare. Quin potius eorum ope atque adjumento nos ad id, quod his superius est, cujusque beneficio hæc sunt, ducit. Quid enim tandem illud est, quod cœlestia et terrestria, quæque, vel per aërem, vel per aquam feruntur, vel potius ea, quæ his priora sunt, cælum, terram, aërem, aquam certo ordine collocavit? Quis hæc miscuit ac sejunxit? Quæ mutua horum societas naturæque cognatio et conspiratio? Hoc enim dictum, licet hominis a religione nostra alieni, mihi magnopere probatus: « Quis motum his attulit, ac perpetuo minimeque impedito cursu ea moderatur? » Annon eorum artifex, et qui rebus omnibus rationem eam indidit; qua Universum fertur et gubernatur? Quis porro horum artifex? Annon is, qui hæc procreavit, atque in rerum naturam produxit? Neque enim procul dubio casui fortunæque hæc vis et facultas ascribenda est. Ut enim hoc demus, casu omnia extitisse, cui tandem eorum constitutio ac dispositio tribuenda erit? Atque ut hoc quoque ipsum, si ita lubet, casui concedamus, cujusnam, quæso, fuerit, hæc, juxta eas rationes, quibus primum creata sunt, tueri atque conservare? Alterius-ne cujuspiam, an

» Hæc ascribuntur Platoni.

casus? Alterius profecto, non casus. Hoc autem quid tandem aliud esse queat, quam Deus? Sic ratio, quæ ex Deo est, et cunctis insita, et prima in pectoribus nostris condita lex, cunctisque mortalibus innexa, nos ab iis rebus, quæ oculis cernuntur, ad Deum subvexit. Ac proinde hoc pacto rursus exordiamur.

XVII. Quid tandem Deus natura sua et essentia sit, nec hominum quisquam unquam invenit, nec invenire potest. An vero aliquando sit inventurus, quærat hoc qui volet, ac perscrutetur. Mea quidem sententia, tum demum hoc inveniet, cum deiforme hoc atque divinum, id est, mens nostra, et ratio cum natura cognata conjuncta fuerit, et imago ad exemplar illud suum, cujus nunc desiderio tangitur, ascenderit. Atque illud mihi esse videtur, quod primum philosophiæ caput est, nempe nos aliquando « Tantum cognituros, quantum cogniti sumus¹. » At in hac mortali vita quidquid ad nos usque pertingit, aliud nihil est, quam exiguus quidam rivulus, ac velut parvus magnæ lucis radius. Quamobrem si quis Deum cognovit, aut, Scriptura teste, cognovisse dicitur, eatenus cognovisse censendus est, quatenus uberioris splendoris particeps sit, quam qui minus luminis divinitus accepit. Ita exuperantia hæc, perfecta cognitio existimata est, non ad rei ipsius veritatem, sed ad aliorum modulum et facultatem perpensa.

XVIII. Quocirca Enos quidem spem habuit fore ut « Dominum invocaret² : » ubi vides spem duntaxat in eo laudari, eamque non cognitionis, sed invocationis. Enoch autem, quamvis « Translatus fuerit³, » nondum tamen constat, an Dei naturam comprehenderit, aut comprehensurus sit. Jam Noë, cui « Orbis universi ab aquarum periculo conservandi cura⁴ » credita est, vel potius orbis

¹ 1 Cor. XIII, 12. — ² Gen. 17, 24. — ³ Id. 7, 24. — ⁴ Id. VI, 8.

semina commissa, exiguò ligno diluvium fugientia, hinc solum laudem consecutus est, quod Deo gratus et acceptus fuisset. Magnus porro ille patriarcha Abraham, « Ex » fide quidem justificatus est¹, » ac novam et inauditam victimam, magnæque illius figuram gerentem, obtulit²; at Deum non ut Deum conspexit, sed ut hominem aluit; ac proinde laudatus est, quod, quantum percepit, tantum quoque veneratus est. Nam quid de Jacob dicam, qui licet « Sublimem quamdam scalam, et ascendentes Angelos » in somnis conspicatus sit³, » ac columnam non sine mysterio quodam unxerit, (fortasse ut lapidem salutis nostræ causa unctum significaret,) atque in ejus, quem conspexerat, honorem, loco cuidam « Domus Dei » cognomentum imposuerit, ac cum Deo quasi cum homine luctam inierit, quæcumque tandem illa Dei cum homine lucta esse queat. His enim verbis fortasse nihil aliud indicatur, quam humanæ virtutis cum divina comparatio, luctæque signa, quæ creatam naturam victam esse ostenderent, in corpore tulerit, ac denique pro pietatis præmio nominis commutationem acceperit, pro Jacob nimirum, magno illo et eximio Israël nomine nuncupatus; hoc tamen nec ipse, nec quisquam eo sublimior, ad hunc usque diem in omnibus duodecim tribubus, quarum pater extitit, gloriari magnificeque prædicare potuit, se totam Dei naturam animo percepisse.

XIX. Nec vero Eliæ, vel « Spiritus vehemens, vel ignis, » vel terræ concussio, » ut historiarum sacrarum monumentis proditum est, sed « Aura quædam tenuis⁴ » Dei præsentiam, non autem naturam ipsam, adumbravit. Ipsum Eliam dico, quem « Igneus quoque currus⁵ » in cælum evehit, significans, ut opinor, singularem quamdam ho-

¹ Gen. xv, 6, et Rom. iv, 3. — ² Gen. xviii, 2, et seqq. — ³ Gen. xxviii, 12. — ⁴ 3 Reg. xix, 11, et seqq. — ⁵ 4 Reg. ii, 11.

minis virtutem, atque humanum fastigium excedentem. Quid? Non te iudex ille Manuë, ac Petrus apostolus, admiratione afficiunt? Quorum alter ne conspectum quidem Dei, per imaginem ipsi observantis, ferre poterat, ac proinde dicebat: « Periiimus, uxor, Deum vidimus¹, » tanquam videlicet homines, ne divini quidem in imagine conspectus, nedum naturæ ipsius, capaces sint: alter conspicuum etiam Christum « In naviculam » admittere recusabat², atque ablegabat. Quod eo quoque mirabilius videri debet, quod idem ad Christi agnitionem animi ardore alios anteibat, eoque nomine « Beatus prædicatus » est³, » resque maximas in fidem accepit. Quid Isaiam, et Ezechielem rerum maximarum spectatorem, reliquosque Prophetas commemorem? Quorum alter « Dominum » sabaoth⁴ in gloriæ throno sedentem vidit, eumque a Seraphim senis alis præditis in orbem cinctum ac laudatum et tectum, seque ipsum carbone perpurgatum, atque ad obeundum prophetiæ munus adornatum. Alter « Vehiculum quoque Dei⁵, » hoc est, Cherubinos describit, thronumque ipsis excelsiorem, eoque sublimius firmamentum, atque insuper eum, qui in firmamento sese utcumque conspicandum præbebat, vocesque etiam quasdam, et impetus, atque actiones; idque, sive diuturnum quoddam hoc spectrum, solis sanctissimis viris spectabile, sive minime fallax noctis visio, sive prævia quædam mentis impressio, futura tanquam præsentia exhibens, sive arcanum quoddam aliud prophetiæ genus, dicere nequeo; novit hoc Prophetarum Deus, et qui huiusmodi affatibus agitantur. Cæterum neque hi, de quibus loquor, neque quisquam alius ejusdem ordinis, « In substantia⁶ » et essentia Domini, ut Scriptura loquitur (8), stetit, nec

¹ Judic. xiii, 22. — ² Luc. v, 8. — ³ Matth. xvi, 17. — ⁴ Isaï. vi, 1. — ⁵ Ezech. 1, 4, et seqq. — ⁶ Jerem. xxiii, 18.

Dei naturam, aut vidit, aut aliis prodidit et patefecit.

XX. Quod si Paulo ea, quæ « Tertium cœlum¹, » atque ad illud usque progressio, vel ascensio, vel assumptio, exhibuit, mortalibus evulgare licuisset, amplius quiddam fortasse de Deo cognovissemus, si modo arcana hæc causa erat, cur in cœlum raperetur. Quoniam autem hæc ei in vulgus efferre nefas erat, faciamus nos quoque, ut ea silentio commendemus. Atque hoc duntaxat Paulum dicentem audiamus: « Ex parte cognoscimus, et ex parte prophetamus². » Hæc, atque ejusmodi fateri non dubitat ille scientia nequaquam imperitus, ille experimentum se daturum minitans loquentis in se Christi, magnus, inquam, ille veritatis propugnator, et doctor. Eoque nomine omnem quoque humanam ac terrenam scientiam nihil supra « Specula et ænigmata³ » esse statuit, utpote quæ ultra exigua veritatis simulacra minime sese porrigat. Quod nisi me quispiam in hujus generis rebus exquirendis nimis curiose et supervacaneæ versari existimet, dicere quoque non verear, nec alia quidem fortasse, quam hæc ea esse, quæ Christus ipse « Portari in hac vita posse » negavit⁴, velut aliquando portanda, et declaranda; et quæ ille Verbi præcursor Joannes, et magna Veritatis vox (9), « Ne a mundo quidem capi posse⁵ » pronuntiavit.

XXI. Verum enim vero cum veritas omnis et disputatio plurimum difficultatis atque obscuritatis habeat; ac nos velut parvo quodam instrumento res magnas efficere moliamur, humanæ videlicet sapientiæ adjumento rerum cognitionem aucupantes, ac res, quæ animi tantum intelligentia comprehenduntur, per sensus cognoscere aggredimur; aut certe non sine sensibus, quibus undique jactamur et in errorem pertrahimur, nec nuda mente cum nudis rebus versari, atque inde ad veritatem propius acce-

¹ 2 Cor. xii, 2. — ² 1 Cor. xiii, 9. — ³ Ibid. 12. — ⁴ Joan. xvi, 12. — ⁵ Id. xxi, 25.

dere, rebusque perceptis ac comprehensis mentem informare possumus. Tum vero disputatio ea, quæ de Deo suscipitur, quo perfectior, eo quoque difficilior est, pluribusque objectionibus patet, in iisque diluendis ac dissolvendis plus negotii facessit. Nihil enim tam levis exiguique ponderis nobis adversari potest, quod non disputationis cursum interrumpat atque comprimant, impediatque quominus ultra progrediamur. Quemadmodum qui equos ad cursum incitatos repente freno retrahunt, ac per inopinatam et repentinam excussionem retrorsum agunt. Sic nimirum Salomon, qui omnibus, cum suæ, tum superioris memoriæ hominibus « Sapientiæ laude¹ » præstitit, et cordis latitudinem Dei beneficio accepit, ac « Tantam contemplationis copiam et ubertatem², » ut arenæ numerum excederet, quo altius in has profunditates penetrat, hoc magis æstuat, ac finem quemdam sapientiæ constituit, nimirum « Quod invenisset, quantum ea a se fugeret³. » Consimili quoque modo Paulus, non dicam Dei naturam, hoc enim prorsus supra humanas vires esse perspectum habebat, sed Dei solum judicia cognitione assequi conatur. Quoniam autem nec exitum ullum, nec quo ascensum figere ac stabilire posset, reperiebat, nec perspicuo ullo fine cūiosa ipsius animi perscrutatio claudatur, quod videlicet subinde semper aliquid reliqui esse perspiceret : o rem miram ac stupendam ! (ut ipse quoque eodem affectu commovear,) orationem admiratione circumscribit, idque « Dei opes ac profundum » appellat, ac Dei judicia⁴ nullius ingenio percipi et comprehendendi posse ingenue fatetur, iisdem propemodum verbis cum Davide utens, qui nunc judicia Dei « Abyssum multum⁵ » tam vocat⁵, » cuius fundum, nec mensura, nec sensu capi

¹ 3 Reg. III, 12. — ² 2 Paral. 1, 12. — ³ Eccle. VII, 24, et VIII, 17. —
⁴ Rom. XI, 33. — ⁵ Psal. XXXV, 7.

queat; nunc «Mirabilem factam esse scientiam» ex se ipso⁴,
suique ipsius constitutione pronuntiat, atque adeo robus-
tam, ut viribus nostris eam capere et complecti nequeamus.

XXII. Ut enim missa alia faciens, inquit, me ipsum
omnemque humanam naturam et compagem intuear, quæ
hæc mixtio nostra est? Quis motus? Quomodo id, quod
immortale est, cum mortali copulatum est? Quomodo
deorsum fluo, et sursum feror? Quomodo anima circum-
scribitur? Quomodo vitam impertitur, et affectuum fit
particeps? Quomodo mens simul et circumscripta est, et
nullis terminis inclusa, in nobis manet, et motus fluxio-
nisque celeritate omnia perlustrat? Quomodo sermonis
opera percipitur vicissim, et communicatur, ac per aërem
grassatur, et cum rebus ipsis ingreditur? Quomodo cum
sensibus consuetudinem habet, ac rursus seorsim a sensi-
bus sese colligit? Atque ut, quæ priora sunt, dicam, quæ
prima nostri effictio et constitutio in naturæ officina? Quæ
etiam postrema formatio ac perfectio? Quæ cibi appetitio
ac distributio? Quis nos sponte ad primos illos fontes ac
vitæ causas duxit? Quomodo corpus cibus, animus contra
sermone ac doctrina pascitur? Quæ est illa naturæ vis
mutuaque inter parentes et liberos affectio, ut quasi quo-
dam philtro contineantur? Quomodo firmæ ac stabiles
sunt species, et interim notis inter se distinctæ, quarum
proprietas, cum tanto numero sint, assequi non possu-
mus? Quomodo idem animal mortale simul et immortale
est; mortale quidem ratione migrationis, immortale autem
ratione procreationis (10)? Ut enim aliud morte subducitur,
ita rursus ipsi aliud subrogatur, non secus atque in
fluminis tractu, quod simul fluxum est et stabile. Multa
de hominis membris et partibus adhuc commemorare pos-
sis, ac de mutua earum concinnitate; quippe quæ naturæ
lege ac ratione, non minus ad elegantiam, quam ad utili-

⁴ Psal. cxxxviii, 6.

tatem, conjungantur simul et distinguantur, præcellant et dignitate inferiores sint, uniantur et distrahantur, contineant et contineantur. Multa etiam de vocibus et auditu: nimirum quomodo illæ per vocalia instrumenta deferantur, hic vero eas excipiat, ac per intermedii aëris percussionem atque impressionem inter se jungantur. Multa item de oculis, qui modo quodam ineffabili cum iis rebus, quas cernimus, commercium habent, ac sola voluntate, simul etiam cum ea moventur, eodemque modo cum mente afficiuntur. Pari enim celeritate, et hæc intellectilibus, et illi visibilibus rebus junguntur. Multa præterea de reliquis sensibus, qui velut admittendis externis rebus destinati sunt, nec ratione percipiuntur. Multa denique de ea, qua in somnis fruimur, quiete atque insomniorum figmentis, de memoria et reminiscentia, de ratione, et ira, et cupiditate, reliquisque, ut uno verbo complectar, quibus parvus hic mundus, id est, homo, gubernatur.

XXIII. Vis-ne aliorum quoque animantium discrimina, quibus, tum a nobis, tum inter se differunt, naturas etiam et ortus, et educationes, et regiones, et mores, ac velut in republica vitæ officia enumerem? Quonam modo alia societate delectantur, alia solivaga sunt? Alia herbis, alia carnibus nutriuntur? Alia sæva et truculenta sunt, alia mansueta? Alia cum hominibus versari atque ali solent, alia indomita et libera sunt? Alia ad rationem et disciplinam propius accedunt, alia a ratione et disciplina prorsus abhorrent? Alia pluribus sensibus, alia paucioribus prædita sunt? Alia motu carent, alia gradiendi facultatem habent? Alia celerrima, alia tardissima sunt? Alia magnitudine, et pulchritudine, aut alterutro horum excellunt, alia autem perexigua sunt, aut deformissimæ, aut etiam utroque vitio laborant? Alia strenua sunt, alia imbecilla? Alia injuriam aperto impetu propulsant, alia suspecta et insi-

diosa sunt? Alia cauta, alia incauta? Alia industriæ reique familiaris administrandæ laude florent, alia prorsus inertia sunt et improvida? Quodque prius dicendum erat, qui sit, ut alia humi serpant, alia corpore recto sint? Alia certa sede acquiescant, alia in utroque elemento degant? Alia elegantiae studiosa sint, alia cultum omnem respuant? Alia conjugata sint, alia a conjugio abhorreant? Alia pudica sint, alia libidini dedita? Alia fecundissima, alia parum fecunda? Alia diuturnæ vitæ, alia brevis? Deficiet me sermo, si sigillatim omnia persequi tentem.

XXIV. Age piscium quoque naturam mihi considera, per aquas labentium, et per liquidum elementum, ut ita dicam, volantium, ac proprium quidem aërem tuto haurientium, in nostro autem periclitantium, quemadmodum nos quoque in aquis solemus: mores etiam eorum, et affectus, et coitus, et generationes, et magnitudines, et pulchritudines, certas item mansiones et oberrationes, congressus ac secessiones et proprietates terrestribus animalibus pene consimiles, nonnullorum etiam societates, et contrarias, tam in formis quam in nominibus, proprietates. Ad hæc greges avium tecum reputa, quamque varia et multiplici figura sint, variisque coloribus: qui fiat ut alia muta sint, alia canora; quæque horum suavissimi cantus sit ratio, et a quo hanc facultatem acceperint? Quis lyram cicadis in pectore dedit, et cantus illos atque garritus, quos, cum meridiano solisæstu ad musicam incitantur, in arborum ramis fundunt, ac nemora sono implent et viatorem vocibus prosequuntur? Quis cantum illum cum cygno contextit, quo tempore pennis in auram expansis ejusmodi sibilum edit, qui carminis instar sit? Mitto enim illas vi expressas voces, et quidquid artes adversus veritatem ingeniose comminiscuntur. Qui sit ut arrogans ille et Medicus payo elegantiam gloriamque adeo affectet, ut quo-

tics aliquem propius accedentem viderit, aut etiam fœminis, ut aiunt, sese ostentare voluerit, (nec enim pulchritudinis suæ ignarus est,) confestim elata cervice, atque alis, quæ aureum quemdam fulgorem referunt, ac siderum splendorem imitantur, in orbem concinnatis, corporis sui pulchritudinem amasiis suis cum superbo quodam incessu, velut in theatro, spectandam proponat? Ac Scriptura quidem sacra mulierum in contexendis telis solertiam his verbis admiratur: « Quis dedit mulieribus texturæ sapientiam, rerumque variandarum scientiam¹? » Est enim hoc animantis ratione præditi, eximiaque sapientia instructi, atque ad cœlestia usque grassantis.

XXV. Tu vero mihi naturalem quoque animantium rationis expertium solertiam suspice, rationesque, si potes, declara. Quomodo volucres in petris, et arboribus, ac tectis, non minus elegantes, quam tutos, et alendis pullis accommodatos nidos elaborant? Unde apibus et araneis tantus laboris atque industriæ amor, ut illæ quidem favos construant, ac sexangularum fistularum, sibi que invicem ex adverso respondentium, adjumento contineant, et per intermedium parietem, atque angulos rectis lateribus alternatim innexos domicilium suum fulciant, idque in tam caliginosis alvearibus obscurisque figmentis: istæ autem rursus per usque adeo tenuia et subtilia stamina multipliciter intensa sinuosas telas contexant, (et quidem ex tam exiguis initiis, ut vix ulla oculorum acie pervideri possint,) quæ ipsis et pro eximio quodam domicilio sint, et venandis alimonix causa imbecillioribus animantibus inserviant? Ecquis Euclides hoc artificium unquam imitando expressit, de lineis pertractans nusquam extantibus, atque in demonstrationibus anxio labore desudans? Ecquis Palamedes, qui etiam aciei instruendæ artem, ac motus et figu-

¹ Job. xxxviii, 36.

ras; nullis aliis præceptoribus quam gruibus, usus didicisse fertur, cum videlicet eas ordine ac multiplici volatus genere moveri perspexisset? Quinam Phidiæ, et Zeuxides, et Polygnoti, Pharrhasii etiam et Aglaophontes, qui incredibili quadam elegantium formarum pingendarum et sculpendarum peritia claruerunt? Quis Gnossitis Dædali chorus ad musicos numeros sese movens, in puellæ gratiam ad omnem artis pulchritudinem confectus et expolitus? Qui Cretensis labyrinthus, ut poetarum more loquar, difficiles exitus et ambages habens, identidemque in sese per artis industriam incurrens? Taceo formicarum penuria, eorumque custodes, et alimenti aggestionem, temporî respondentem, ac cætera ea quæ, et de earum viis ac ducibus; et eo ordine, quem in operibus servant, historiartum monumentis consignata sunt.

XXVI. Quod si horum omnium rationes assequeris; ac prudentiam eam, qua gubernantur, cognitam et exploratam habes, confer jam animum ad varia stirpium gênera; artificiumque etiam illud expende quod foliis ipsis inest; simulque et maximam oculis voluptatem, et fructibus utilitatem affert. Considera, quæso, et fructuum varietatem, et uberrimam copiam, ac præsertim eorum, quæ ad vitam degendam maxime necessaria sunt, summam pulchritudinem. Cogita etiam stirpium et succorum, et florum, atque odorum, non modo suavissimorum, verum etiam ad corporis sanitatem aptissimorum, vires et facultates, colorum etiam elegantiam et qualitates, atque insuper gemmarum eximia pretia et splendores; quandoquidem omnia, tam quæ ad necessariûs vitæ usus, quam quæ ad delicias spectant, velut in communi convivio natura proposuit; ut, si nihil aliud, ex ipsis saltem beneficiis Deum cognoscas, atque ob penuriâ quo laboras, te ipso prudentior efficiaris. Hinc mihi facito, ut terræ, communis

omnium parentis latitudinem longitudinemque percurras, et maris sinus, tum mutuo nexu, tum etiam cum terra velut vinculis quibusdam constrictos, et nemorum pulchritudines, et fluvijs, et fontes uberes ac peregrinos, non modo gelidarum et potabilium aquarum, quæque in terra sunt, sed earum etiam, quæ infra terram fluentes, et specus quosdam subeuntes, ac deinde violento aliquo flatu impulsæ atque repertussæ, postea per conflictus hujusce atque oblationis vehementiam inflammata, quaquâ fors tulerit, paulatim erumpunt, hincque calidorum balnearum usum nobis plerisque terræ locis, et cum contraria facultate, suppeditant, gratuitam scilicet medicinam ac sponte promanantem. Dic obsecro quomodo et unde hæc? Quænam magna hæc atque artis experts textura? Nec enim obmutuam eam affectionem, quam inter se habent, mentis laudis merentur, quam si seorsim unumquodque consideretur. Quo pacto terra firma et immota constitit? Quidnam pro vehiculo habet? Cujus rei adminiculo fulcitur? Quidque rursus sustentam illam sustinet? Neque enim rationi quidquam, cui innitatur, occurrit, si divinam voluntatem exceperis. Quo pacto ea, partim in montium vertices assurgens, partim in campos subsidens, idque variè et multipliciter, ac denique paulatim alternando commutata, tum ad hominum usus uberior, tum varietate ipsa jucundior? Qui sit, ut partim in domicilia divisa sit, partim inculta et inhabitabilis relinquatur, quantum nimirum excelssimi quique montes ab ea abscindunt, atque alia ad alium quemdam orbis finem dissecta porrectaque divini opificii magnificentiam luculentissimo argumento declarat?

XXVII. Jamvero mare, si non magnitudine sua mirabile mihi occurreret, lenitatem utique et placiditatem admirarer, simulque quo pacto fiat, ut, quamvis liberum ac solutum, finibus tamen suis consistat: quod si non le-

nitatem, magnitudinem certe suspicerem. Quoniam autem utraque laude excellit, utramque vim et facultatem prædicabo. Quis tantam aquarum molem conjunxit? Quis quasi vinculis quibusdam astrinxit? Qui sit, ut attollatur, et tamen loco suo se contineat, perinde ac vicinam terram reverita? Qui sit, ut cum fluvios omnes excipiat, ob exuberantes tamen opes et copias, aut quo verbo id appellandum sit, nescio, nullam amplitudinis accessionem faciat, sed eadem semper sui que similis maneat? Qui sit, ut tantum elementum « Arenam pro termino habeat »? Possuntne hoc expedire physici, atque inanis eruditionis laude celebres, ac vere cyatho mare, hoc est, res tantas ingenio suo metientes? An faciam ipse, ut paucissimis verbis hoc ex Scriptura sacra explicem, idque probabilius ac verius, quam ipsi cum prolixis suis disputationibus? « Præceptum » circumdedit super faciem aquæ¹. » Hoc humidæ naturæ vinculum est. Jam quomodo terrestrem nautilum exiguo ligno ac vento ducit? (Hoc tu cum cernis, non admiratione desigeris? Non mens extra se rapitur?) Idque ut mare ac terra commoditatibus et commerciis inter se vinciantur, ac ea, quæ natura adeo inter se dissident, ad hominis usum conjungantur? Qui porro fontium primi fontes, quæras velim, o homo, si quid horum investigare aut invenire potes: tum quis fluvii campos et montes dissecuit, ac liberum cursum eis concessit? Quo etiam pacto ex contrariis rebus miraculum existat, dum nec mare unquam regurgitat, nec fluvii subsistunt? Ad hæc quæ aquarum alimonia, quodque hujus discrimen, quippe res quædam sunt, quæ desuper rignantur, quædam rursus, quibus potus per radices suas suppeditatur, ut ipse quoque delicioso dicendi genere utar, dum Dei delicias oratione complector?

¹ Jerem. v, 22. — « Job. xxvi, 10.

XXVIII. Sed jam missa facta terra rebusque terrenis, indutis animi pennis in aërem convola, ut recto ordine progrediatur oratio : ac deinde te illinc ad cœlestia, cœlumque adeo ipsum, et quæ cœlo superiora sunt, eveham. Quanquam ad ea, quæ deinceps sequuntur, accedere refugit quidem ac reformidat oratio ; sed tamen quantum licebit, accedet. Quis aërem fudit, uberem, inquam, hunc et copiosum thesaurum, non pro cuiusque dignitate atque fortunis varie dimensum, non finibus ullis inclusum ac circumscriptum, non pro ætatum ratione distributum, verum, quod olim « In manu contigit ¹, » quantum cuique sat sit, impertitum, atque æquabilitatis honore decoratum ? Quis, inquam, hoc avium vehiculum, hanc ventorum sedem, hoc elementum, quo et anni partes temperantur, et animantur animantia vel anima potius cum corpore conservatur, in quo corpora, et cujus ope atque adjumento loquimur, in quo lumen, et res lumine perfusæ, atque iose etiam aspectus per eum fluens ? Volve jam animo ea quæ sequuntur : nec enim mihi fas est aëri universum earum rerum imperium largiri, quæ aëris esse censentur. Quæ ventorum promptuaria ? Qui nivis thesauri ? « Quis » roris stillas, ut cum Scriptura loquar, peperit ? E cujus » utero glacies egressa est ² ? Quis aquam in nubibus alligat ³, » eamque, (o rem admirandam !) partim in nubibus figit verbo compressam, tametsi natura sua fluxam et labilem, partim in totius terræ faciem effundit, ac tempestive et æquali modo spargit : ac neque humidam omnem substantiam liberam et solutam relinquit ; (sufficit enim purgatio illa, quæ tempore Noë contigit, « Pactique sui ⁴ » memoriam haudquaquam is abjecit, qui ab omni mendacio est alienissimus ;) nec rursus omnino inhibet, ne ite-

¹ Exod. xvi, 18. — ² Job. xxxviii, 28 et 29. — ³ Psal. cxxxiv, 7. —

⁴ Gen. ix, 12.

mentem, ita ille oculos illustrat: atque ut hic res eas omnes, quæ animo et ratione intelliguntur, pulchritudine vincit, ita etiam ille eas, quæ oculorum sensu percipiuntur. Sed quid tandem illi motum initio dedit? Quid eum perpetuo motu agitat ac circumducit, cum interim ratione stabilis sit et motus expers, vere infatigabilis, vitæ dator, animantium pater, et quibuscumque laudum titulis eum non immerito poëtæ prosequuntur, ac neque motui unquam suo, nec beneficiis finem constituens? Quomodo diem procreat, cum supra terram est, ac noctem, cum sub terra? Quibus verbis utendum sit, nescio, cum solem intueor. Quodnam hoc dierum ac noctium incrementum, et vicissim quæ diminutio? Quæ inæqualitatis æqualitas, ut novum aliquid et insolens dicam? Quomodo anni partes efficit, et ita dividit, ut certis et constitutis vicibus accedant, et recedant, ac veluti in chorea, complexu quodam inter se hæreant, simulque distinguantur, (illud amicitiae lege, hoc ordinis præscripto,) sensimque intermisceantur, ac vicinitate ipsa, perinde atque in diebus ac noctibus fieri videmus, furtim quodam modo irrepant, ac se proripiant. Quod quidem idcirco fit, ne ob insuetudinem molestiam afferant. Sed cursum suum sane sol obeat. Quid? Num lunæ naturam et affectiones, et luminis mensuram ac cursus pernosti? Et quomodo, ut sol diei principatum tenet, sic luna quoque nocti præsideat? Atque, ut hæc seris audaciam affert, ita vicissim ille hominem ad laborem excitet, dum appositissime ad hominum utilitatem vel sese attollit, vel deprimit? An tu « Pleiadis vinculum, aut Orionis maceriam ¹, » inſtar illius, qui numerat multitudinem stellarum, et omnibus eis nomina vocat ², » intelligis, ac cuiusque gloriæ discrimen perspectum habes, motusque diuinum, ut sit causa, cur tibi fidem habeam, qui per

¹ Job. xxxviii, 31. — ² Psal. cxxxvi, 4.

eas humana contexens , creaturam adversus Creatorem
armas ?

XXXI. Quid ais ? Hic dicendi finem faciemus , nec ultra
res eas , quæ materia constant , oculisque corporis cernun-
tur , orationem diffundemus ? An potius , quoniam Mosaï-
cum illud tabernaculum , mundi totius « figuram et ima-
» ginem ¹ » extitisse docet Scriptura , (mundus porro ex
visibilibus et invisibilibus constat,) idcirco penetrato primo
velo , transcensisque rebus illis , quæ sensum movent , in
Sancta prospiciemus , hoc est , in supercœlestem naturam ,
quæque nonnisi ratione atque intelligentia percipitur ?
Sed ne hanc quidem , tametsi corporis expertem , incor-
poreo modo cernere possumus , quippe quæ ignis , et Spi-
ritus appelletur , aut efficiatur . Deus enim , ut Litteris
sacris proditum est , « Angelos suos Spiritus facit , et minis-
» tros suos flammam ignis ² ; » nisi forte hoc loco , « facere , »
nihil aliud significet , quam eadem , qua primum procreati
sunt , ratione tueri et conservare . Spiritus porro atque
ignis Angelus appellatur : illud , quia intellectili natura est
præditus , hoc , quia purgandis animis nostris adhibetur ;
quandoquidem primaria quoque illa essentia iisdem nomi-
nibus in Scriptura nuncupatur . Sed sint sane nobis illi in-
corporei , aut quam proxime ad hoc accedentes . Vides
enim quomodo circa huiusmodi sermonem æstuemus , nec ,
quo progrediamur , habeamus ; aut certe non ultra pro-
gredi possimus , quam quod Angelos quosdam et Archan-
gelos scimus , Thronos , Potestates , Principatus , Domina-
tiones , splendores , ascensus , intelligentes virtutes , vel
mentes potius , puras naturas , minimeque adulterinas , ad
malum immobiles , vel certe non facile mobiles (11) , per-
petuos choros circa principem illam causam agitantes ; aut
(si quid aptius quisquam earum laudibus decantandis af-

¹ Hebr. 12, 24. — ² Psal. ciii, 4.

ferre queat,) purissimo splendore illinc perfusas, apt pro naturæ et ordinis cujusque proportionem, alias alio modo collustratas; quæ a summa illa pulchritudine adeo informantur et imprimuntur, ut ipsæ aliæ quoque lumina efficiantur, ac per primi luminis influxiones et communicationes alios illuminare possint; quæ, cum « Divinæ voluntatis ministræ sint¹, » roboreque non modo naturali, sed etiam adventitio polleant, loca omnia peragrant, omnibus ubique impigre adsunt, tum ob ministerii promptitudinem, tum ob naturæ levitatem; aliæ etiam aliam quamdam orbis partem complectuntur, aut certe aliis quædam pars commissa est, ut novit, qui hæc ordinavit ac distinxit; ad unum rerum omnium Conditoris nutum omnia in unum jungunt; divinæ majestatis laudes canunt, ac sempiternam illam gloriæ sempiternæ intuentur, non ut inde gloriæ Dei aliquid accrescat; (nihil enim est, quod ei, qui plenus est, aliisque bonorum auctor, accrescere queat;) sed ne etiam primæ illæ post Deum naturæ beneficio affici desinant. Hæc si pro rei dignitate a nobis prædicata sunt, Trinitati, atque uni in tribus Personis Divinitati gratia habenda est; sin autem cupiditati minus satis factum est, sic quoque orationi palma parata est. In hoc enim, omni dicendi contentione, incubuimus, ut ostenderemus, ne ipsam quidem secundarum rerum naturam hominis mente atque ingenio comprehendere posse, nedum primam illam ac solam, vereor enim dicere, omnibus rebus excelsiorem.

¹ Hebr. 1, 14.

ORATIO XXIX¹. THEOLOGICA III.*De Filio.*

ARGUMENTUM.

I. *Præceps in sacris disputationibus celeritas, pernicio-
ciosa. — Duplex disputationis genus. II. Quænam fuere
veterum de Deo sententiæ. — Catholica fides unum Deum
credidit et confitetur. — Pater genitor, Filius genitus,
Spiritus procedens. III. Trium personarum in Deo æter-
nitas. — Prima Eunomianorum objectio. IV. Secunda
objectio. V. Tertia objectio. — Quarta objectio. VI. Quinta
objectio, Eunomianorum dilemma. — Gregarii dilemma.
— Alterum Gregarii dilemma. — Objectionis Eunomia-
norum solutio. VII. Urget Eunomianos. VIII. Filii ge-
neratio incomprehensibilis. — Homini generatio ignota,
quantum magis Dei generatio. IX. Sexta objectio. — Gre-
gorii responsio. X. Septima Eunomianorum objectio.
— Gregorii responsio. XI. Quod soli Deo proprie con-
venit, Dei essentia est. — Ingeniti significatio. XII. Oc-
tava objectio. — Ingenitum et genitum apponuntur, ut
habitus et privatio. XIII. Nona objectio. — Rationalis
anima cepit esse, sed nunquam desinet esse. XIV. Fi-
lius, non æquivace, sed realiter et proprie Deus est. —
Eunomianorum fraudes. XV. Eunomianorum parado-
gismus. XVI. alia objectio. — Responsio. — Quid indicat
nomen Patris. XVII. Filii Divinitas Scripturarum tes-
timonio demonstratur. XVIII. Scripturæ testimonia ab*

¹ Alias xxxv, quæ eulem xxix erat, nunc est xx. Habita, anno 380.

Eunomianis adversus Filium Dei prolata. — Filius Patri æqualis. XIX. Filius Dei quod erat permansit, quod non erat assumpsit. — Deus homo effectus est, ut nos dii efficieremur. — Pulsus in Ægyptum Jesus, errores Ægyptiorum fugavit. XX. Jesus baptizatus, tentatus, esuriens, sitiens, fatigatus, somno oppressus. — Samaritanus et dæmoniacus vocatus. — Christus vili pretio venditus, totum mundum magno pretio redemit. XXI. Crucis mysterium disputationibus evacuatur. — Pro Eunomianis orat Gregorius.

I. Hæc quidem sunt ¹, quæ quispiam, ad compescendam eorum disputandi promptitudinem, præcipientemque celebritatem, cum in omnibus rebus, tum maxime in iis disputationibus, quæ de Deo habentur, periculosam, afferre possit. Quoniam autem objurgare haud magnum est; perfacile quippe, et cujuslibet hominis: sententiam vero suam subrogare, pii viri est ac mente præditi; age, Spiritus sancti, quem nos quidem adoramus, illi vero contemnunt ac pro nihilo habent, Numine atque auxilio freti subnixique, nostram de Divinitate fidem, quæcumque tandem illa est, perinde ac generosum quemdam et maturum fœtum in lucem producamus. Non quod alias unquam tacuerimus, (hac enim una duntaxat in re fortes et magnanimi sumus,) sed quod nunc majori quoque libertate ac fiducia veritatem profiteamur: ne alioqui « Ob timiditatem, » ut Scripturæ verbo utar, hac pœna mulctemur, ut Deo » minime placeamus ². » Porro cum omnis sermo duplex sit, alter, quo dogmata nostra confirmamus, alter, quo adversaria subvertimus: nos quoque, posteaquam doctrinam nostram potius exposuerimus, ita demum adversario-

¹ Vide D. Guillon, tom. vi, p. 331-334. — ² Hebr. x, 38.

rum placita, confutare ac profligare conabimur : et quidem utrumque, quam fieri poterit, brevissime, ut, quæ a nobis dicentur, quasi uno quodam obtutu perspicere facile possint, (quemadmodum quem illi isagogicum libellum, ad simpliciorum, vel stolidiorum potius, fraudem excogitarunt,) ac non ob sermonis prolixitatem sensa dilabantur, haud secus atque aqua, quæ non canali coërcetur, sed per campos diffunditur, ac solvitur.

II. Ut igitur ad rem accedamus, tres antiquissimæ de Deo sententiæ sunt, anarchia, polyarchia, et monarchia. Ac duæ quidem priores ab ethnicis lusæ sunt, et sane ludantur. Nam, et quod nullius imperio gubernatur, confusum est ac perturbatum : et quod a pluribus dominis et principibus administratur, factionibus dissidiisque obnoxium est, ac proinde nec a quoquam gubernatur, nec ordine ullò et disciplina continetur. Ambo etiam ista eodem tendunt, nimirum ad ordinis perturbationem, hæc autem ad solutionem ; perturbatio quippe solutionis meditatio est. At nos unius principatum colimus ; unius autem principatum dico, non quem Persona una circumscribit ; (fieri enim potest ut quod unum est, si a se ipso dissideat, secumque discordet, multa fiat,) sed quem æqualis naturæ dignitas constituit, et voluntatis consensio, motusque identitas, atque ad unum, eorum, quæ ex ipso sunt, conspiratio, (id quod in rebus procreatis fieri nequit,) ita ut, etiamsi numero differant, essentia tamen et natura minime distinguantur. Quocirca unitas, principio in binarium mota, in Trinitate constitit. Atque hoc nobis est Pater, et Filius, et Spiritus sanctus ; Pater quidem genitor, et productor, citra tamen ullam passionem, ac tempus, atque incorporeo modo : horum autem, alter soboles, alter processio, aut quibus verbis hæc quispiam vocare queat, nescio, ab iis prorsus abstrahens, quæ sub aspectum ca-

dunt. Neque enim bonitatis superfusionem dicere atdebimus, (tametsi quispiam eorum, qui apud ethnicos philosophiæ laude floruerunt, hoc vocabulo uti non dubitarit, cum de prima et secunda causa dissereret, perspicuis verbis ita loquens : « Velut poculum quoddam superfluxit ¹ ;) ne coactam quamdam generationem, ac velut naturalem quamdam superfluitatem quæ retineri nequeat, minimeque Divinitati congruat, invehamus. Proinde finibus nostris nosmet continentes, Ingenitum et Genitum inducimus, et « ex Patre Procedentem ², » ut quodam loco Deus ipse ac Verbum pronuntiavit.

III. Sed quando hæc, inquier? Nimirum hæc supra quando sunt. Quod si etiam audaciuscule aliquid dicendum est, tum hæc erant, cum Pater erat. Quando autem Pater? Nunquam non fuit. Idem de Filio, idem de Spiritu sancto promptum est dicere. Quod si rursus me interroges, rursus tibi respondebo. Quando Filius genitus est? Cum Pater genitus non est. Quando Spiritus processit? Tum cum Filius non processit, sed citra tempus ullum, ac supra omnem rationis humanæ captum genitus est : etiamsi id quod supra tempus est, declarare cupientes, temporalem speciem ac significationem fugere nequeamus. Etenim hæ vocem, « quando, antehac, posthac, a » principio, » temporis neutiquam expertes sunt, quamcumque vim illis inferamus; nisi forte ævum accipiamus, hoc est, intervallum illud, quod simul cum rebus æternis extenditur, nec ullo motu, aut solis cursu, (quod quidem tempus est,) definitur. Quid ergo, inquier, si Filius et Spiritus sanctus Patri coæterni sunt, quid afferri potest, quin principii quoque, quemadmodum et ille, sint expertes? Quia ab ipso sunt, licet non post ipsum. Quod enim principio caret, æternum quoque est : quod autem æter-

¹ Ista ex Platone desumpta. — ² Joan. xv, 26.

nūm est, non protinus quoque principio vacat, quandiu ad Patrem, velut ad principium et originem, refertur. Ergo illi, quantum ad causam, principio minime carent. Perspicuum autem est, causam non continuo antiquiorem esse illis, quorum causa est; neque enim sol lucem tempore antecedit. Quantum autem ad tempus, principii expertes sunt, licet tu verborum larvis simpliciores animos terres. Nec enim temporis subsunt ea, ex quibus tempus originem sumpsit.

IV. Quomodo ergo a passione immunis est hæc generatio? Quia incorporea. Si enim corporea generatio passionem conjunctam habet, expertis utique passionis erit incorporea generandi ratio. Atque ego ex te vicissim quæram: Quomodo Deus erit, si creatura est? Non enim Deus esse potest, quod creatur; ne dicam, quod hic quoque passio sit, si corporeo modo id accipiatur, hoc est, tempus, cupiditas, informatio, cura, spes, mæror, periculum, spei frustratio, correctio: quæ omnia, atque his plura, circa creaturam accidere nemo est qui non facile perspiciat. Demitor autem, quin tu eo quoque audaciæ prorumpas, ut coitus quosdam, et prægnationis tempora, et abortus pericula cogites, perinde ac non aliter gignere potuerit Pater, si non ita genuerit: aut rursus avium quarundam, aliorumque animalium, quæ vel in terra, vel in aquis degunt, generationes enumeres, ac cuiuslibet harum generationum divinam illam, et ineffabilem subicias, aut etiam Filium per hanc novam hypothesim de medio tollas. Ac ne illud quidem perspicere potes, cujus diversa sit carnalis generatio, (alicubi enim apud homines Deiparam Virginem hosti,) huius diversam quoque atque ab aliis discrepantem esse spirituales generationem: vel, ut rectius dicam, cujus esse ipsi minime idem sit, ejus diversam quoque esse generandi rationem.

V. Quisnam ergo est Pater ille principii expers? Is nempe, cujus ne ulla quidem ipsius essentiae origo reperiri potest. Qui autem aliquando esse cœpit, hic quoque paternitatis suae principium habuit. Non igitur Pater postea extitit, quandoquidem nec esse aliquando cœpit : et Pater proprie est, quia non etiam filius : quemadmodum vicissim Filius proprie filius, quia non etiam Pater. Nam quod ad nos attinet, neutro nomine proprie appellari possumus, quoniam utrumque sumus; neque hoc potius, quam illud; nec ex uno, sed ex utroque parente nascimur, ac proinde dividimur, paulatimque homines efficimur; imo ne homines quidem fortasse, et quales noluimus, tum dimittentes, tum dimissi, adeo ut solae relationes rebus ipsis orbæ relinquantur. At, inquires, ipsum hoc, « Genuit, et genitus » est, » quid aliud quam generationis principium inducit? Ego vero ita respondeo : Quid si ne hoc quidem dixerimus, sed, a principio genitus erat, ut curiosas ipsas ac temporis amicas objectiones nullo negotio fugiamus? An tu crimen nobis inferes, quasi Scripturae ac veritatis aliquid adulteremur? Nonne cuivis perspicuum est, ac praesertim in Scripturae usu positum, ut pleraque ex his, quae temporaliter dicuntur, inversa temporum ratione proferantur, nec ea solum, quae praeteriti temporis sunt, aut praesentis, sed etiam quae futuri significationem habent? Quo in genere illud est : « Quare fremuerunt gentes ¹ »? (Nondum enim fremuerant.) Et, « In flumine pertransiunt pede ², id est, pertransierunt. » Nimis longum foret omnes huiusmodi voces recensere, quae a studiosis observatae sunt.

VI. Atque ad hunc modum se habet haec illorum obiectio. Jam quale illud eorum est, cujusque rixandi libidinis et impudentiae? Vel volens, inquirunt, Filium genuit,

¹ Psal. II, 1. — ² Id. LXV, 6.

vel nolens. Ac deinde nexibus, ut quidem ipsi putant, utrinque adversarios illigant, non tamen firmis, sed perquam etiam imbecillis. Si enim nolens, inquit, vis ergo ei allata est. Et quisnam est qui vim intulit? Et rursus, quomodo, cui vis allata est, Deus esse potest? Si autem volens, ergo Filius voluntatis est Filius. Quo igitur modo ex Patre progenitus est? Ita novam quamdam matrem, voluntatem, patris loco comminiscuntur. In hoc quidem argumento, primum hoc scitum ac lepidum est, quod a passione illa, quam tantopere urgebant, abscedentes, ad voluntatem confugiunt; non enim passio est voluntas. Deinde videamus, obsecro, quam vim habeat quod dicunt. Optimum autem fuerit, prius cum ipsis pedem propius conferre. Dic ergo ipse, quisquis es, qui temere, quidquid libido tua tulerit, effutis. Ex volente patre tuo procreatus es, an nolente? Si ex nolente, vis ergo ei allata est. O indignum facinus! Et quis tandem ei vim attulit? Non enim profecto naturam dixeris. Nam ei quoque sua constat castitas. Si autem ex volente patre, pater tibi propter paucas syllabas periit. Voluntatis siquidem filius, ac non patris extitisti. Sed ad Deum et creaturas transeo, ac tuammet quæstionem sapientiæ tuæ admoveo. Volens-ne Deus universam hanc rerum molem condidit, an nolens et coactus? Si coactus, hic quoque vis adhibita, et quidam qui vim adhibuit. Si autem volens, orbantur Deo, tum aliæ creaturæ, tum tu præ cæteris, qui tales ratiocinationes, talesque verborum captiones excogitas. Intermedia quippe voluntate a Creatore disjungentur. Verum aliud, ni fallor, est volens, aliud voluntas: aliud gignens, aliud generatio: aliud qui loquitur, aliud sermo, nisi forte temulenti simus. Horum enim alterum est, is qui movet, alterum velut motus ipse. Non ergo voluntatis est, volitum; (neque enim hoc prorsus sequitur;) nec generationis, quod genitum est,

nec locutionis, quod auditum est, sed volentis, et gignentis, et loquentis. At quæ in Deo considerantur, supra hæc quoque omnia sunt; utpote cui generatio fortasse sit ipsa gignendi voluntas; verum nihil est intermedium, si modo hoc quoque omnino admittimus, ac non potius statuimus generationem hanc voluntate sublimiorem et præstantiorem esse.

VII. Vis-ne in Patrem quoque ipsum cavillis nonnihil ludam? Tu mihi ansam talia audendi præbes. Pater itaque vel volens Deus est, vel nolens. Ac vide qua tandem ratione scitum illud tuum et acutum argumentum effugies. Si volens, quando velle cœpit? Non enim prius quam esset. Neque enim prius quidquam erat. An partim in eo quiddam fuit quod voluit, partim quiddam quod in voluntatem cecidit? Divisibilis igitur erit. Quid autem afferri poterit, quin juxta tuam argumentandi rationem, ipse quoque voluntatis fœtus sit? Quod si nolens, quis eum coëgit, ut esset? Quo etiam modo Deus, si coactus est; et coactus quidem non ad aliud quidquam, quam ad hoc, ut Deus esset? Quomodo, inquis, Filius genitus est? Verum, tu quoque responde, quomodo creatus est? Siquidem, ut ipse asseris, creatus est. Nam id quoque eadem difficultate laborat. Dices fortasse, voluntate et sermone. At nondum rem totam expedis. Quomodo enim operis vim voluntas et sermo habuerint? Hoc explicandum adhuc tibi superest. Neque enim homo ita fabricatur.

VIII. Quomodo ergo, inquires, genitus est? Haud magna esset hæc generatio, si a te percipi posset, quippe qui ne tuam quidem noris, aut certe exiguam quamdam partem percepisti, quantumque te dicere pudeat. Et postea eam plene tibi cognitam esse censes? Magnus tibi labor prius subeundus est, quam ut rationes eas invenias, quibus constitutus, formatus, ac manifestatus fueris, quibus etiam

anima cum corpore, mens cum anima, ratio cum mente quasi vinculis quibusdam astringatur: tum quomodo corpus moveatur, et augeatur, atque alimentum ipsi assimiletur: ad hæc quæ sit sensuum ratio, quæ memoriæ, quæ reminiscentiæ, rerumque cæterarum, ex quibus constas: ac præterea quæ conjunctim utriusque partis sint, quæ divisa et separata, quæ rursus a se invicem accipiant. Quæ enim temporis progressu perfectionem suam consequuntur, eorum certe rationes ipsæ simul cum generatione extiterunt. Dicas, velim, quæ sint hæ rationes; sed ne tum quidem de Dei generatione pertracta. Nec enim id periculo vacat. Si enim tuam cognoscis, non protinus sequitur, Dei quoque generationem tibi cognitam et exploratam esse. Si autem tua tibi ignota est, quo tandem modo Dei generatio tibi nota erit? Quanto enim difficilius est Dei naturam, quam hominis, indagare, tanto quoque difficilius percipi potest superna illa et divina generatio, quam tua. Quod si, quia eam cognitione assequi nequis, idcirco ne genitum quidem esse contendis, tempus jam tibi fuerit, multa, quæ tu minime percepisti, atque ante omnia Deum quoque ipsum, e rerum natura delere atque obliterare. Neque enim, quid tandem sit, explicare potes, quamlibet audax sis, atque in supervacaneis rebus strenuus, et magnanimus. Tuas illas fluxiones, et divisiones, et sectiones prius abjice, ac de incorporea illa natura, quasi de corporea, disputare desine; atque ita fortasse dignum aliquid generatione divina concipere animo queas. Quomodo genitus est? Idem enim indignabundus repeto. Dei generatio silentii honore decoretur. Abunde magnum tibi est scire eum genitum esse. Quo autem modo genitus sit, ne ipsis quidem Angelis, nedum tibi intelligere concesserim. Vis declarem quomodo? Ut scit Pater, qui genuit, et Filius qui genitus est. Quod

supra hæc est, nube oblegitur, animique tui hebetudinem fugit.

IX. Sed argutari pergunt. Existentem, vel non existentem genuit Pater. O fuitiles nugas! Hæc enim mihi ac tibi conveniunt, qui partim eramus, « Ut Levi ille, in lumbis » Abrahæ¹, » partim procreati sumus : ac proinde partim ex entibus, partim ex non entibus sumus : contra quam in primigena illa materia accidit, quæ haud dubie ex non ente procreata est, utcumque eam nonnulli æternam esse confingant. At hic generatio cum essentia ipsa concurrat, atque a principio extilit. Ubi ergo anceps illud tuum, atque utrinque præceps argumentum pones? Quid enim eo, quod a principio erat, antiquius esse potest, ut illic tempus collocemus, vel quo erat Filius, vel quo non erat? Utroque enim modo illud, « A principio, » dissolvetur et evertetur; nisi forte tibi quoque Pater, percunctantibus rursus nobis, ex entibus-ne, an ex non entibus sit, bis esse periclitetur, alter nimirum præexistens, alter existens; aut certe propter ludicras tuas interrogationes, atque ex arena constructas domos, quæ ne levibus quidem ventis resistere possunt, idem ei, quod Filio, accadat, hoc est, ex non ente sit. Ego quidem neutrum horum admitto, quæstionemque hanc tuam absurditatis multum, difficultatis nihil habere aio. Quod si tu juxta tuas dialecticas sententias in omni argumento alterutram disjunctionum veram esse oportere existimas, parvam quamdam interrogatiunculam a me accipe. Tempus est-ne in tempore, annon? Si in tempore, quo tandem? Quidque supra hoc existente? Ac quomodo hoc continente? Si autem non in tempore, quæ hæc eximia sapientia, tempus temporis expers inducere? Age, hujus sermonis, « Nunc ego mentior (12), » da alterum, aut duntaxat verum esse, aut falsum; non enim

¹ Hebr. vii, 9, et seqq.

utrumque dabimus. Atqui nullo modo hoc fieri potest. Vel enim mentiens verum dicet, vel mentietur verum dicens. Ita prorsus necesse est. Quid igitur mirum, si quemadmodum hic contraria concurrunt, ita etiam illic utraque pars a vero aberret, atque ita scitum illud et eruditum tuum argumentum stultum atque ineptum appareat? Ac velim mihi hoc etiam ænigma solvas. Aderas-ne tibi cum gignereris? Ades-ne etiam nunc tibi? An neutrum horum? Si enim aderas, et ades, quisnam tandem, et cui? Et quomodo unus duo effectus es? Si autem neutrum horum quæ diximus, quomodo a te ipso disjungeris? Et quæ disjunctionis hujusce causa? Sed ineptum est, inquires, cum de uno disputatur, adsit ne sibi, necne, curiosius inquirere. Hæc enim de aliis, non de se ipso dicuntur. Ineptius, mihi crede, est id, quod a principio erat, utrum ante generationem erat, necne, in quæstionem vocare. Hæc enim disputatio iis demum convenit, quæ tempore dividi possunt.

X. At enim, inquiunt, non idem sunt genitum et ingenitum; ac proinde, nec Filius cum Patre idem est. Quid opus est dicere, hoc argumento vel Patrem, vel Filium a Divinitate manifeste submoveri? Si enim ingenitum essentia Dei est, profecto genitum essentia non erit: aut si hoc, procul dubio non illud. Quis enim est qui contrarium disputando tueri queat? Quamobrem, utram e duabus impietatibus malis, elige, o nove theologe, siquidem impiam doctrinam omnino amplecti tibi propositum est. Deinde, quomodo ingenitum et genitum non idem esse dicis? Si per hæc verba nihil aliud intelligis, quam id quod increatum et quod creatum, in eadem ipse quoque sum sententia. Neque enim natura idem est quod principio caret, et quod procreatum est. Sin autem his verbis eum, qui genuit, et eum, qui genitus est, accipis, haudquaquam recte

id abs te dicitur. Idem enim omnino esse necesse est. Hæc quippe geniti natura est, ut idem, si naturam spectes, sit cum eo qui genuit. Vel ad hunc rursus modum agamus: Quid per ingentum ac genitum intelligis? Si ipsam ingenti et geniti proprietatem, non idem sunt. Sin autem ea, quibus hæc insunt, quid vetat quominus idem sint? Quandoquidem quod insipiens est, et sapiens, inter se quidem non idem sunt; verum circa eundem hominem considerantur: nec substantias scindunt, sed circa eandem substantiam scinduntur. Quid? An etiam immortalitas, et innocentia, et immutabilitas, essentia Dei sunt? At si ita est, multæ Dei essentiæ erunt, non una: aut certe compositus ex his Deus erit. Neque enim hæc citra compositionem esse queunt, si modo essentiæ sunt.

XI. Hæc quidem haud dicunt. Communia quippe aliorum quoque sunt. Quod autem solius Dei est, ipsique proprie convenit, hoc ipsi essentia est. Atqui solius Dei ingentum esse, minime illi concesserint, qui materiam quoque et formam, ut ingentitas, induxerunt. Manichæorum enim tenebras longius adhuc projiciamus. Sed sit sane solius Dei ingentum. Quid Adam? Nonne solus a Deo effectus est? Maxime, inquires. Utrum ergo solus quoque homo? Minime. Quare? Quia effectio humanitas non est. Nam is quoque, qui progenitus est, homo est. Eodem modo nec ingentum solum Deus est, etsi solius Patris. Verum admittite etiam eum, qui genitus est, Deum esse. Ex Deo quippe est, quamlibet tu ingento faveas. Ad hæc quomodo Dei essentiam dicis, non ejus, quod est, positionem, sed ejus, quod non est, detractorem? Vox enim, Ingenti, significat eum quidem generationis expertem esse, non autem declarat quidnam natura sua sit id quod generatione caret. Quænam ergo est Dei essentia? Tuæ est dementiæ hoc dicere, qui generationem quoque ipsam anxie perscrutaris:

nobis autem abunde magnum atque amplum fuerit, « Si in » posterum quoque discamus¹, » soluta videlicet hac caligine et crassitie, ut pollicitus est is, « Qui non mentitur². » Ergo hoc ab his, qui ad eam rem sese perpurgant, cogitetur, ac speretur. Nos autem hoc duntaxat dicere non dubitabimus, si magnum Patri est a nullo profectum esse, non minus illustre Filio esse, ex tali Patre prodiisse. Nam præterquam quod gloriæ illius, qui causam a nullo habet, particeps est, quia ex eo est, accedit etiam generationis decus, res tanta, tamque veneranda, iis utique, qui non omnino humi provoluti sunt, crassoque animo præditi.

XII. Sed si Filius, inquit, essentiæ ratione idem cum Patre est, profecto, cum ingenuus sit Pater, ingenuus quoque Filius erit. Recte, si ingenuum essentia Dei esset, ut sic nova quædam mixtio esset genito ingenuum. Cum autem hoc discrimen circa essentiam consideretur, quid tu hoc quasi firmum quiddam profers? An tu quoque patris pater es, ut nulla re a patre tuo supereris, quandoquidem essentia idem cum eo es? Nonne perspicuum est, proprietate fixa et stabili permanente, quærendum nobis esse quæ sit Dei essentia, si tamen ea ullo modo quærenda est? Quod autem ingenuum et Deus idem non sint, hinc fere intelliges. Si enim idem essent, prorsus oporteret, quoniam Deus quorundam Deus est, quorundam quoque ingenuum esse: aut contra, quoniam ingenuum nullius est, nec Deum quoque quorundam esse. Nam quæ omnino eadem sunt, similiter etiam effertur. At ingenuum non quorundam est, (quorum enim?) Deus vero quorundam Deus est, (omnium quippe.) Quo ergo modo idem erunt Deus et ingenuum? Ac rursus, quoniam ingenuum et genitum inter se opponuntur, ut habitus et privatio, substantias quoque inter se oppositas induci necesse est, quod nemo

¹ 1 Joan. III, 2. — ² Tit. 1, 2.

concesserit. Aut rursus, quoniam habitus privationibus priores sunt, ac privationes habitus ipsos extinguunt, non solum antiquior erit Filii essentia, quam Patris, sed etiam, juxta hypotheses tuas, a Patre extinguetur, ac de medio tolletur.

XIII. Quid adhuc superest ex ineluctabilibus ipsorum, ut putant, argumentis? Fortasse ad illud postremum confugient. Si Deus gignendi finem non fecit, imperfecta est generatio. Et quando finem facturus est? Si autem gignere cessavit, omnino quoque cœpit. Sic rursus crassi et corporis rebus affixi homines corporeas ratiocinationes afferunt. Ego vero sic respondeo: Sempiternum-ne sit Filio nasci, necne, nondum dico, quoadusque illud Scripturæ: «Ante omnes colles gignit me¹,» accuratius expendero. Illud autem non video, quam necessarium sit hoc eorum argumentum. Si enim, ut ipsi aiunt, aliquando id cœpit, quod finem habiturum est, profecto id non cœpit, quod finem non est habiturum. Quid ergo de anima vel de angelica natura pronuntiabunt? Si principium habuit, finem quoque habebit: si autem sine carebit, secundum eos utique principio quoque hanc caruisse constat. Atqui et principium habuit, nec unquam esse desinet. Falsum est itaque quod aiunt, id, quod finem habiturum est, principium quoque habuisse. Enimvero doctrina nostra hæc est: ut equi, et bovis, et hominis, ac denique uniuscujusque earum rerum, quæ sub idem genus cadunt, eadem est definitio; ac quidquid definitionis hujusce particeps est, hoc etiam proprie dicitur; quidquid autem particeps non est, hoc vel non dicitur, vel certe improprie dicitur: eodem modo unam quoque Dei essentiam, et naturam, et appellationem esse, tametsi per cogitationes quasdam distinctas, nomina quoque simul distinguantur: et quod quidem pro-

¹ Prov. viii, 25.

prie dicitur, id etiam Deum esse; et rursus quod natura sua sit, hoc quoque proprie nuncupari: siquidem non in nudis nominibus, sed in rebus nobis veritas sita est. At isti perinde ac pertimescant, ne quid adversus veritatem immotum relinquant, Deum quidem Filium esse fatentur, cum Scripturæ ac auctoritatum testimoniis opprimantur; sed æquivoce Deum dici, ac nominis solius participem esse contendunt.

XIV. Cum autem hanc ipsis objectionem subjicimus: Quid ergo? Non proprie Deus est Filius, quemadmodum id quod pictum est, non est animal? Quomodo ergo Deus, si Deus proprie non est? Respondent: Quid prohibet quominus, et hæc æquivoca sint, et proprie utrumque dicatur? Ac nobis, et terrestrem, et marinum canem proferent, qui cum sub eodem nomine diversam significationem habeant, proprie tamen dicuntur. (Est enim hujusmodi quoque species quædam inter æquivoca; et si quid aliud, quod eadem appellatione utatur, ejusque peræque particeps sit, cum interim naturæ ratione dissideat.) At, vir optime, cum illic duas naturas sub eadem appellatione collocas, neutram altera præstantiore introducis; nec alteram priorem, alteram posteriorem; nec denique alteram quæ magis, alteram quæ minus sit id quod esse dicitur. Neque enim quidquam conjunctum est, quod hanc ipsis necessitatem afferat. Non enim hic canis magis canis est, quam ille canis, hoc est, marinus magis quam terrestris, vel contra, terrestris magis quam marinus; curenim, aut qua ratione? Sed in rebus, diversis quidem illis, verum pari honore præditis communis est appellatio. Hic vero, cum Deo venerationem adjungas, eumque supra omnem essentiam et naturam esse dicas, (quod Dei solius est, et velut Divinitatis natura,) ac deinde Patri quidem hoc tribuas, Filium autem privas, atque subjicias, secundasque illi ho-

noris et adorationis partes assignes, quamvis verborum syllabis æqualitatem ipsi largiaris, re ipsa tamen Divinitatem ei amputas, ac veteratorie ab hoc homonymiæ genere, quod æqualitatem complectitur, ad genus illud transis, quod res æquales minime connectit. Ac proinde, ut quidem argumentari instituis, pictus ille ac vivus homo ad Divinitatem adumbrandam propius accedunt, quam canes, quos exempli causa proposuisti. Alioqui utrique, ut nomen commune, sic etiam parem naturæ dignitatem tribue, etiamsi diversas cas inducis; atque ita canes illos tuos deleveris, quos ad probandam Patris ac Filii inæqualitatem excogitasti. Quis enim homonymiæ fructus, si dignitate pares sint, qui a te dividuntur? Nec enim, ut eos honore æquales, sed ut dispare ostenderes, ad homonymiam illam, et canes confugisti. Quonam modo quispiam magis convinci queat, et secum ipse, et cum Divinitate pugnare?

XV. Jam si dicentibus nobis Patrem, quantum ad causam, Filio majorem esse, ipsi hanc propositionem assumant: At causa natura; posteaque conclusionem hanc subnectant: Ergo major natura; haud scio, se ipsos-ne potius, an eos, cum quibus disputant, captiosa hac argumentatione circumveniant. Neque enim simpliciter, quæcumque de aliquo dicuntur, etiam de eo, quod ipsi subjectum est, dicuntur; sed perspicuum est de quo, et quænam dicantur. Alioqui quid prohibet quominus ipse quoque allata hac propositione: Pater major natura est; ac deinde assumpta altera: Natura autem non omnino major, neque Pater; ita postremo concludam: Majus igitur non omnino majus; vel, Pater non omnino Pater. Aut si mavis, ad hunc modum agam: Deus est essentia: Essentia non omnino est Deus; quod sequitur ipse concludo: Ergo Deus non omnino Deus. Verum, ni fallor, ab eo, quod secundum rationem quamdam dicitur, ad id quod simpliciter dicitur,

captiosè progreditur hæc argumentatio, quod artis hujus studiosis usitatum est et familiare. Nam cum nos hanc vocem, « Majus, » causæ naturæ tribuamus, inferunt ipsi causam naturam majorem esse. Quod perinde est, ac si dicentibus nobis : Hic mortuus homo ; inferrent ipsi : Ergo homo.

XVI. Quomodo autem istud, quod certe non minori admiratione dignum est, quam quæ superius dicta sunt, prætermitemus? Pater, inquit, vel essentiæ, vel actionis nomen est : sic enim nos utrinque ita astrictos putant, ut nulla ratione ex eorum vinculis elabi possimus. Si enim essentiæ nomen esse dixerimus, assentiemur, ut existimant, Filium diversam a Patre essentiam habere : quandoquidem una sit Dei essentia, quam Pater, ut censent, jam ante occupavit. Sin autem actionis, creatum esse fatebimur, non genitum. Ubi enim est agens, illic quoque omnino id quod agitur esse necesse est. Ac mirari se dicent, quo pacto factum cum factore idem esse queat. Me quoque ipsam vehementer hæc distinctio vestra permoveret, si mihi duorum alterutrum necessario admittendum esset, ac non potius, utraque disjunctionis parte vitata, tertium aliquid verius dicere liceret. Nec enim essentiæ nomen est Pater, o viri acutissimi, nec actionis ; sed relationem eam indicat, quam Pater erga Filium habet, vel Filius erga Patrem. Ut enim apud nos hæc nomina germanam quandam conjunctionem et necessitudinem declarant : ad eundem modum illic quoque Genitorem ac Genitum eandem naturam habere significant. Sed sit sane, in vestri gratiam, Pater essentiæ nomen : Filium utique simul introducet, non autem removebit, et alienabit, ut et communes notiones ferunt, et ipsa horum nominum vis ac facultas. Sit etiam actionis, si ita videtur : nec sic quidem causam obtinebitis. Eodem enim modo dicemus hoc

ipsum egisse Patrem, ut consubstantialis ipsi Filius esset ; etsi alioqui absurditate non caret hujusmodi actionis opinio. Vides ne quo pacto , quamlibet improbe ac maligne pugnare studeatis , captiones tamen vestras effugiamus ? Quoniam autem invictum illud tuum in ratiocinationibus et argutiis robur cognovimus, videamus jam quam vim in divinis oraculis positam habeas , si modo hinc quoque nobis dogma tuum persuadere non grave ducas.

XVII. Nos quippe ex magnis et excelsis vocibus Filii divinitatem percepimus, ac prædicamus. Quibus tandem ? His nimirum , Deus , Verbum , quod in principio erat , et cum principio , et principium : ut in his locis : « In principio erat Verbum , et Verbum erat apud Deum , et Deus » erat Verbum ¹ : » Et , « Tecum principium ² : » Et , « Qui » vocat eam a generationibus principium ³ . » Ad hæc Filius unigenitus dicitur : « Unigenitus Filius , qui est in sinu » Patris, ipse enarravit ⁴ . » Via, Veritas, Vita, Lux : « Ego » sum via , veritas et vita : » Et , « Ego sum lux mundi ⁵ . » Sapientia , Potentia : « Christus Dei potentia et Dei sapientia ⁶ . » Splendor , Character , Imago , Sigillum , ut in his verbis : « Qui cum sit splendor gloriæ ⁷ : » Et , « Character substantiæ ipsius ⁸ : » Et , « Imago bonitatis : » Et alio loco : « Quem Pater signavit Deus ⁹ : » Dominus, Rex, Ens, Omnipotens : « Pluit Dominus ignem a Domino ¹⁰ : » Et , « Virga directionis virga regni tui ¹¹ : » Et , « Qui erat , » qui est , et qui venturus est , omnipotens ille ¹² . » Quæ perspicue de Filio dicuntur, sicut et alia plura, quæ eandem vim habent, quorum nihil ascititium est, nec Filio, aut Spiritui sancto posterius accessit, quemadmodum nec

¹ Joan. 1, 1. — ² Psal. DLX, 3. — ³ Isaï. XLII, 4. — ⁴ Joan. 1, 18. — ⁵ Id. XIV, 4, et VII, 12. — ⁶ 1 Cor. I, 24. — ⁷ Hebr. I, 3. — ⁸ Sep. VII, 26. — ⁹ Joan. VI, 27. — ¹⁰ Gen. XIX, 24. — ¹¹ Psal. XLIV, 7. — ¹² Apoc. I, 8.

Patri. Neque enim ex accessione perfectio ipsis comparata est. Non enim Pater Verbi unquam expers fuit; nec unquam fuit quin Pater esset; nec denique unquam veritate, sapientia, viribus, vita, splendore, aut bonitate caruit.

XVIII. Tu mihi contra, illas ingrati animi tui voces enumera, has videlicet: « Deus meus et Deus vester ¹, Major ², » Creavit, Fecit ³, Sanctificavit ⁴. Servum etiam ⁵, » si ita lubet, « Et obedientem ⁶ » adjunge; atque hæc etiam, « Dedit ⁷, Didicit ⁸, Mandatum est ⁹, Missus est: » illud etiam, quod « A se ipso quidquam facere non possit, aut » loqui, aut judicare, aut donare, aut velle. » Huc adde ignorationem, subjectionem, precem, interrogationem, profectum, consummationem. Adde etiam, si ita placet, quæ his adhuc abjectiora sunt: « Dormire ¹⁰, Esurire ¹¹, » Fatigari ¹², Lacrymari ¹³, mortis pavore affici, ac dejecto » animo esset ¹⁴. » Fortasse etiam præbri causa crucem quoque ipsam et mortem objicies. Resurrectionem enim, ipsiusque in cælum ascensionem, consulto mihi prætermisurus videris: quoniam in his quidpiam, quod causæ nostræ faveat, reperitur. Multa etiam alia congerere queas, si componere velis æquivocum illum de tua sententia et ascriptitium Deum, ut autem ipse statuimus, verum, Patrique honore æqualem. Horum enim unumquodque sigillatim persequi, pioque sensu explicare minime difficile est, atque offendiculum illud, quod in litteris existit, repurgare et eximere, si modo vere offendis, ac non potius de industria peccas. Ut autem rem summatim contraham, hoc tibi faciendum est, ut sublimiores voces Divinitati, ac

¹ Joan. xx, 17. — ² Id. xiv, 28. — ³ Prov. viii, 22, et Act. ii, 1. — ⁴ Joan. x, 36. — ⁵ Isai. xlii, 1. — ⁶ Philip. ii, 8. — ⁷ Joan. xviii, 9. — ⁸ Matth. xx, 23. — ⁹ 1 Cor. xv, 28. — ¹⁰ Matth. viii, 24. — ¹¹ Id. iv, 2. — ¹² Joan. iv, 6. — ¹³ Id. xi, 35. — ¹⁴ Marc. xiv, 33.

illi naturæ, passionibus et corpore præstantiori, attribuas : humiliores vero, composito, et tua causa inanito atque incarnato, imo etiam, (non enim minus commode hoc a me dicetur,) humanato, ac deinde exaltato, ut tu videlicet, abjecta hac dogmatum humilitate et crassitie, sublimior esse, simulque cum Divinitate ascendere, non autem rebus in aspectum cadentibus inhærescere, condiscas, imo potius cum intellectilibus rebus assurgas, atque intelligas, quæ naturæ ratio, quæ ratio Incarnationis.

XIX. Hic enim, quem nunc aspernaris, quondam erat, et supra te erat : qui nunc homo est, compositionis expers erat. Quod erat, permansit : quod non erat, assumpsit. In principio sine causa erat. Quæ enim Dei causa afferri queat? At postea quoque certa de causa natus est. Ea autem erat, ut tu, insolens ac proterve, salutem consequeris, qui Deitatem idcirco contemnis, quia crassitiem tuam suscepit, per intermediam mentem cum carne conjunctus, atque inferior hic homo Deus effectus, posteaquam cum Deo coaluit, præstantiorique parte superante, unus factus est, ut ipse quoque tantum Deus efficiat, quantum ille homo. Natus quidem est, sed etiam genitus erat : ex muliere quidem, sed etiam virgine. Illud humanum, hoc divinum. Patris expers hic, matris expers illic. Utrumque horum Divinitatis est. Materno quidem utero gestatus est, verum « A Propheta » cognitus est¹, et quidem in utero adhuc existente, atque coram Verbo, cujus causa procreatus fuerat, exultante. « Pannis quidem involutus est², » at sepulturæ fascias redivivus excussit. « In præsepio quidem reclinatus est, » cæterum ab Angelis celebratus est, et « A stella indicatus, et a Magis » adoratus³. » Cur tu ad id, quod oculis cernitur, offendis, dum non id spectas, quod animo et intelligentia percipi-

¹ Luc. 1, 41. — ² Id. 11, 7. — ³ Matth. 11, 2.

tur? « In Ægyptum » quidem pulsus est¹ : verum Ægyptiorum errores in fugam vertit. « Non erat illi species » neque decor² » apud Judæos : sed apud Davidem, « Speciosus erat forma præ filiis hominum³, » atque etiam in monte, fulguris instar, lucet, ac sole clarior efficitur, futurum videlicet splendorem adumbrans.

XX. « Baptizatus⁴ » quidem est ut homo : sed peccata sustulit ut Deus ; non quod lustrationibus indigeret, sed ut aquis ipsis sanctitatem asferret. « Tentatus⁵ » est ut homo : at victoriam adeptus est ut Deus ; verum confidere nos jubet, ut qui mundum vicerit. « Fame affectus est⁶ : » sed multa hominum millia aluit⁷, ipseque panis est vivificus ac cælestis⁸. Siti laboravit⁹, » sed clamavit : « Si quis sitit, veniat ad me et bibat¹⁰ : » atque etiam facturum se pollicitus est, ut qui fide præditi sunt, fontis instar, scaturiant¹¹. « Fatigatus est¹² : » sed eorum, qui fatigantur, atque oneranti sunt, est requies. « Somno depressus est¹³ : sed in mari levis incedit, ac ventos increpat, Petrumque, cum jam mergeretur, sublevat¹⁴. » Vectigal pendit, sed « Ex pisce, » sed exigentium rex est¹⁵. « Samaritanus vocatur et dæmoniacus¹⁶ : » at ei, qui « ab Jerusalem descendens¹⁷, » in latrones inciderat, salutem affert, atque « A dæmonibus agnoscitur, et dæmones fugat, te spirituum legiones in mare præcipites agit, » principemque dæmonum, « Quasi fulgur, cadentem videt¹⁸. » Lapidibus petitur, sed non arripitur. « Orat, » sed alios orantes exaudit. « Collacrymat¹⁹, » sed lacrymas sedat.

¹ Matth. 11, 13. — ² Isai. LIII, 2. — ³ Psal. XLIV, 3. — ⁴ Matth. III, 16. — ⁵ Id. I, 1. — ⁶ Ibid. 2. — ⁷ Id. XIV, 21. — ⁸ Joan. V, 41. — ⁹ Id. XII, 28. — ¹⁰ Id. VII, 37. — ¹¹ Id. IV, 6. — ¹² Matth. XI, 28. — ¹³ Id. VIII, 24. — ¹⁴ Id. XIV, 25, et seqq. — ¹⁵ Id. XVII, 25, et seqq. — ¹⁶ Joan. VIII, 48. — ¹⁷ Luc. X, 33. — ¹⁸ Id. X, 18. — ¹⁹ Joan. XI, 24, et seqq.

Quærit « Ubi positus sit Lazarus¹, » homo enim erat; sed Lazarum a morte ad vitam excitat, Deus enim erat. « Venditur, » et quidem vili pretio, nempe « Triginta argenteis : » sed interim mundum « Pretio magno², » hoc est, cruore suo redemit. « Ut ovis ad occisionem ducitur³ : » verum Israëllem pascit⁴, nunc autem universum quoque terrarum orbem. « Ut agnus mutus est⁵, » sed idem Verbum est, illius « In deserto clamantis voce⁶ » annuntiatum. « Languore affectus ac vulneratus est⁷, » verum morbum omnem et longam rem pellit⁸. « In lignum » tollitur, illicque affigitur, sed a vitæ ligno restituit, sed « Latronem etiam simul pendentem⁹ salute afficit, » sed id omne, quod cernitur, obtenebrat. « Aceto potatur, ac » felle pascitur : » sed quis ? Is nempe, qui « Aquam in » vinum commutavit¹⁰, » atque amarulentum illum gustum sustulit, ipsamet, inquam, « Dulcedo, totusque desiderium¹¹. Animam tradit : » sed ejus rursus « Accipiendæ » potestatem habet¹²; sed velum rumpitur; » (supera enim patefiunt;) « Sed petreæ scinduntur; sed mortui resurgunt¹³. » Moritur, » sed vitam impertitur, ac morte sua mortem extinguit. « Sepultura afficitur, » sed resurgit. « In infernum descendit, » sed animas sursum ducit, atque « In » cælos ascendit, » venturusque est ad judicandos vivos et mortuos, et expendendos hujusmodi sermones. Quod si illa tibi erroris ansam afferunt, hæc errorem tuum dicunt.

XXI. Atque hæc ad ænigmatum studiosos a nobis dicta sint, non lubenter quidem (nec enim piis hominibus jucunda est inepta loquacitas verborumque contentio; satis

¹ Matth. xxvi, 15. — ² 1 Cor. vi, 20. — ³ 1 Petr. i, 19. — ⁴ Isai. liii, 7. — ⁵ Psal. lxxvii, 71. — ⁶ Joan. i, 23. — ⁷ Isai. liii, 4, 5. — ⁸ Matth. ix, 35. — ⁹ Luc. xxiii, 33, et seqq. — ¹⁰ Joan. ii, 7. — ¹¹ Cant. v, 16. — ¹² Joan. x, 18. — ¹³ Matth. xxvii, 51, et seqq.

enim superque est unus adversarius;) cæterum necessario, propter eos, qui in hæc incidunt, (quandoquidem ob morbos quoque medicamenta comparantur,) ut intelligant se non usquequaque sapientes et acutos esse, nec in supervacaneis disputationibus atque Evangelium evacuanti-
bus invicto quodam robore præstare. Cum enim relicta fide, vim facultatemque disserendi prætendimus, Spiritusque certam auctoritatem per quæstiones delemus, ac postea oratio rerum magnitudini cedit, (cedet autem omnino, utpote ab infimo organo, id est, animo nostro profisciscens,) quid efficitur? Orationis nimirum imbecillitas religioni nostræ ascribitur; atque ita sermonis ornatu et elegantia « Crucis evacuatio declaratur¹, » quemadmodum ipsi quoque Paulo videtur. Fides quippe, doctrinæ nostræ complementum est. Qui autem ligata exponit, et nexus dissolvit, ac nobis in mentem induxit, ut violentorum dogmatum obliquitates solveremus, maxime quidem optarim, ut hos immutet, ac pro argutatoribus pios, et pro iis, qui nunc appellantur, Christianos efficiat. Hoc autem, rogamus, ac pro Christo obsecramus: Reconciliamini Deo, ac Spiritum nolite extinguere; vel potius, vobiscum Christus in gratiam redeat, et Spiritus aliquando tandem vobis illucescat. Quod si nimia contendendi libidine flagritis, at nos certe Trinitatem nobis ipsis servemus, atque a Trinitate servemur, manentes puri et inoffensi usque ad perfectiorem eorum, quæ cupimus, ostensionem, in ipso Christo Jesu Domino nostro, cui gloria in sæcula. Amen.

¹ 1 Cor. I, 7.

ORATIO XXX¹. THEOLOGICA IV.*De Filio.*

ARGUMENTUM.

I. *Hæretici sacras Scripturas ad solum sensum detorqueant.* II. *Prima objectio. — Prosōpopœia Scripturæ familiaris. — Causa Dei nulla est, causa humanitatis assumptæ in Christo hominum salus.* III. *Filius Dei propter nos servus.* IV. *Secunda objectio.* V. *Christi subiectio, paternæ voluntatis adimpletio. — Christus in cruce, quomodo a Patre derelictus.* VI. *Christus supplicans, pro sua reverentia exauditus est. — affectio animi operibus declaratur. — Post iudicium erit Deus omnia in omnibus.* VII. *Tertia et quarta objectio.* VIII. *Responsio ad quartam objectionem.* IX. *Quinta objectio.* X. *Sexta objectio.* XI. *Quæ facit Pater, facit Filius. — Quo sensu dicatur Filius facere quæ facit Pater.* XII. *Septima objectio.* XIII. *Octava objectio.* XIV. *Nonia objectio.* XV. *Decima objectio.* XVI. *Urget iterum adversarios Gregorius.* XVII. *Deus nullo nomine exprimi potest.* XVIII. *Ens et Deus præcipua ac propria essentia Dei nomina.* XIX. *Nomina Deitate communia. — Nomina unicuique Personæ propria.* XX. *Propria Filii nomina. — Cur Filius. — Cur unigenitus. Verbum. Sapientia. Potentia. Veritas. Patris sigillum, character et imago. Lux. Vita. Iustitia. Sanctificatio. Redemptio.*

¹ Alias XXXVI, quæ autem XXX erat, nunc est XIII. Habita anno 380.

Resurrectio. XXI. Propria Filii nomina, ut homo. Cur homo. Filius hominis. Via. Ostium. Pastor. Ovis. Agnus. Pontifex.

I. QUONIAM tibi ratiocinationum versutias nexusque vi Spiritus abunde discussimus¹, eas autem a divinis Scripturis petitas objectiones, quibus illi, Littoræ sacrilegi, ac Scripturæ sensum suffurantes, plerosque ad suas partes trahunt, ac veritatis viam turbant; summatim quidem, perspicueque, ut candidissimo cuique visum iri persuasum habeo, dissolvimus: (dum videlicet sublimiores voces, et quæ Deo magis conveniunt, Divinitati attribuimus, humiliores autem, et quæ hominis naturæ magis congruunt, novo illi nostra causa Adamo, ac Deo adversus peccatum patibili:) cæterum, festinante oratione, sigillatim eas haudquaquam prosecuti sumus: ac tu earum quoque solutiones breviter a nobis afferri postulas, ne speciosis et ad persuadendum accommodatis sermonibus in errorem abstraharis: idcirco nos has quoque brevi complectemur, atque, ut facilius memoriæ hæreant, numeris distinguemus.

II. Illud quidem unum ipsis fere in promptu est: « Dominus creavit me principium viarum suarum ad opera sua², » Cui argumento quo tandem modo occurremus? Num Salomonem accusabimus? Num pristina ipsius dicta ob postremum ipsius lapsum abrogabimus? Num ipsiusmet sapientiæ, ac velut scientiæ, artificisque rationis, secundum quam omnia condita sunt, hunc sermonem esse dicemus? Pleraque enim ex his, quæ anima carent, Scripturæ per prosopopœiam loquentia inducere consuevit; juxta illud: « Mare hæc, atque illa dixit³. » Et, « Abyssus dixit: Non

¹ Vide D. Gaillon, tom. IV, p. 334-337. — ² Prov. VIII, 22. — ³ Jop. XXVIII, 14.

» est in me. » Et, « Cœli enarrant gloriam Dei¹. » Et rursus, « Francæ² » aliquid imperatur, et « Montes ac colles » exultationis³ » causam exposcuntur. Horum nihil proferre libet, etiamsi alioqui a nonnullis eorum, qui ante nos extiterunt, pro firmis et validis allata sunt. Sed demus hoc sane Salvatoris ipsius, hoc est, veræ sapientiæ, hæc verba esse. Illud vero aliquantisper una consideremus. Quid est ex omnibus rebus quod causæ sit expers? Divinitas. Nemo enim est, qui Dei causam dicere queat: alioqui id Deo antiquius esset. Quæ autem humanitatis a Deo propter nos susceptæ causa extitit? Profecto ut nobis salus pareretur. Quid enim aliud causæ afferri possit? Ergo quoniam hic aperte, « Et creavit, et gignit me, » reperimus, hoc simpliciter dictum censeamus. Quod enim cum causa conjunctum invenimus, id humanitati assignandum est; quod autem simplex causæque expers, Divinitati ascribendum. Age igitur, annon illud, « Creavit, » annexam causam habet? « Creavit enim me, inquit, principium viarum suarum ad opera sua⁴. » Opera autem ipsius, « Veritas et iudicium⁵, » quorum causa Divinitate delibutus est. Hæc enim humanitatis unctio est. At illud, « Gignit me, » causam non habet. Alioqui ostende quidnam ipsi adjunctum sit. Quis igitur inficias ibit, quin sapientia, secundum inferiorem quidem generationem, creata, secundum autem primam illam magisque incomprehensibilem, genita dicatur?

III. Huic velut consecrarium est, quod etiam « Servus⁶, » dicitur, et « Multis⁷ » bene serviens; illudque item, quod magnum atque amplum ipsi sit « Filium Dei vocari⁸. » Haud dubie quippe carni, et generationi, et affectionibus nostris,

¹ Psal. XVIII, 2. — ² Zach. XIII, 17. — ³ Psal. CXIII, 4. — ⁴ Prov. VIII, 17. — ⁵ Psal. CX, 7. — ⁶ Isai. XLIX, 6. — ⁷ Id. LIII, 11. — ⁸ Luc. I, 35.

libertatis nostræ causa servivit, ac denique omnibus illis, per quæ eos, qui a peccato detinebantur, in salutem asseruit. Quid autem majus et honorificentius hominis humilitati contingere queat, quam Deo copulari, atque ex illa mixtione Deum effici, tantumque « Ab Oriente ex alto visitari ¹, » ut illud etiam « Sanctum, quod gignebatur, Altissimi Filius ² » vocaretur, eoque nomine donaretur, « Quod est super omne nomen ³ ? » Quod porro aliud nomen illud est, quam Deus? Atque istud, « Omne genu ante eum » flectatur ⁴, qui nostra causa exinanitus est, ac divinam imaginem servili formæ conjunxit, « Sciatque omnis domus » Israël, quia et Dominum eum, et Christum fecit Deus ⁵. » Hæc enim factus est, opera quidem ejus, qui genitus est, bona autem voluntate genitoris.

IV. Quid secundo loco, tanquam maximi atque invicti cujusdam roboris, opponunt? « Oportet enim illum regnare ⁶ huc usque, et a cælo suscipi usque ad restitutionis tempora ⁷, et a dextris sedere ⁸, » donec hostes in potestatem redegerit. Quid vero postea? Regnandi finem facere, aut e cælis expelli? Et quisnam, obsecro, eum e regno ejiciet? Aut quam ob causam? Quam audax enarrator es, nimiumque a regio jugo abhorrens! « At regni illius » nullum finem fore ⁹ audis. » Verum hæc tibi erroris causa est, quod non intelligis hæc vocem, *ἔως* (id est, usque,) non semper futuro tempori opponi, sed ita interjectum tempus statuere, ut interim sequens tempus non excludat. Nam nisi ita res se habeat, quonam modo illud, ut alia præteream, intelliges: « Ero vobiscum usque ad consummationem sæculi ¹⁰ ? » An quasi postea minime futurus sit? Et quæ hæc ratio esset? Nec vero hac solum de

¹ Luc. 1, 78. — ² Id. 1, 32. — ³ Philip. 11, 9. — ⁴ Ibid. 10. — ⁵ Act. 11, 36. — ⁶ 1 Cor. xv, 25. — ⁷ Act. 111, 21. — ⁸ Psal. cix, 1. — ⁹ Luc. 1, 32. — ¹⁰ Matth. xxviii, 20.

causa in errorem incidis, sed etiam quia significationes ipsas non distinguis. Regnare enim duplici modo dicitur, uno, ut Omnipotens, ac volentium nolentiumque rex: altero, ut subjectionem in nobis gignens, et sub imperium suum ac ditionem nos redigens, utpote qui lubenter ipsius regno colla submittimus. Quod ergo ad priorem significationem attinet, regni ipsius finis nullus erit. Quod autem ad secundam, quis erit finis? Ut nos subjectos teneat, seruetque. Quid enim opus erit subjectionem in nobis moliri, cum jam ipsi subjecti fuerimus? Quod postquam effecerit, surrecturus est ad iudicium de terra ferendum, et secernendos eos, qui salutem consequuntur, ab illis qui perierunt: « Stabitque Deus in medio Deorum ¹, » hoc est, beatorum hominum, ut diiudicet ac distinguat, quo quisque honoris gradu, quaque mansionis dignus sit.

V. Huic subjectionem quoque istam adijunge, qua Filium Patri subijcis. Quid ais, « Quasi jam nunc subjectus non sit? » Aut etiam omnino opus est, ut Deo subijciatur, qui et ipse Deus est? Ergo quasi de latrone quodam, aut Dei hoste, verba facis. Verum ita rem expendo. Quemadmodum salutis meae causa maledictum ² vocatus est, qui maledictionem meam solvit; et peccatum ³, qui mundi peccatum delet; ac pro veteri Adamo, novus Adamus efficitur ⁴; ad eundem quoque modum contumaciam et rebellionem meam sibi asceiscit, ut totius corporis caput. Proinde quoad inobediens ipse sum ac turbulentus, tum per Dei abnegationem, tum per vitiosas animi permotiones, tandiu inobediens quoque, quantum ad me attinet, Christus dicitur. Cum autem ei omnia subjecta fuerint, (subijcientur autem, et per agnitionem, et per imputationem), tum ipse quoque subjectionem impleverit, addu-

¹ Psal. lxxxv, 1. — ² 1 Cor. xv, 28. — ³ Gal. iii, 13. — ⁴ 2 Cor. v, 21. — ⁵ 1 Cor. xv, 45.

cens me, salutem consecutum. Nec enim quidquam aliud est, mea quidem sententia, Christi subjectio, quam paternæ voluntatis expletio. Subjicit autem, et Filius Patri, et vicissim Filius Pater: ille opera sua, hic beneplacito, quemadmodum ante a nobis dictum est. Atque ita eos, qui subjecti sunt, Deo sistit ac repræsentat is, qui subjecit, nostra videlicet sibi vindicans. Eodem in genere mihi illud quoque esse videtur: « Deus, Deus meus, respice in me, » quare me dereliquisti? Neque enim, quod quidam opinantur, ipse, vel a Patre, vel a sua Divinitate, quasi passionem extimisset, ac propterea sese a perpetiente corpore collegisset, derelictus est. (Quis enim eum, vel primum humanitus gigni, vel in crucem ascendere coëgit?). Verum in se ipso, ut dictum est, nostra repræsentavit. Nos enim eramus derelicti illi prius atque contempti; nunc vero per impatibilis illius passiones, assumpti ac servati sumus; quemadmodum nostram quoque insipientiam ac peccatum sibi arrogavit, ut ea, quæ deinceps in Psalmo sequuntur, pronuntiant. Siquidem vigesimus primus Psalmus manifeste ad Christum refertur.

VI. Ejusdem speculationis, illud etiam est, quod « Ex his, quæ passus est, obedientiam didicit; quod cum clamore et lacrymis supplicavit; quod exauditus sit præ sua reverentia? » quæ omnia, nomine nostro mirabiliter efficiuntur et contextuntur. Nam, ut Verbum, nec obediens erat, nec inobediens. Hæc namque iis, qui aliorum imperio tenentur, quique secundæ classis sunt, convenient; illud scilicet, probis atque honestis, istud vero, improbis ac supplicio dignis. Ut autem servi forma, ad conservos, imo ad servos sese demittit, atque alienam formam suscipit, totum me simul, cum iis quæ mea sunt, in se ipsam ferens, ut, quod deterius est, in se ipso absumat, et con-

* Psal. xxi, 1. — * Hebr. v, 8, 7.

ficiat, non secus ac ceram ignis, aut terræ vaporem solis radius, atque ipse ob hujusmodi conjunctionem bonorum illius particeps fiam. Quocirca reipsa obedientiam honore afficit, eamque perpetiendis doloribus experitur. Neque enim sufficiebat animi affectio, quemadmodum nec nobis, nisi manum quoque operibus admoveamus. Opus enim, affectionis animi declaratio est. Nec forte pejus fuerit existimare, quod obedientiam nostram exploret, passionibusque suis omnia metiatur, arte quadam humanitatis et benevolentiae erga genus nostrum: ita ut ex suis nostra aestimare queat, quantumque, et a nobis exigi, et condonari debeat, expensa nimirum cum passionibus virium nostrarum imbecillitate. Nam cum lucem illam, propter corporis tegumentum, in tenebris, hoc est, in hac vita, lucentem, tenebræ aliæ, hoc est, pravus ille ac tentator insectatus sit: quanto magis tenebras ipsas, utpote infirmiores? Et quid mirum, si cum ille hostiles laqueos omnino effugerit, nos quadantenus saltem comprehendamur? Majus quippe illi est, quod hostis eum persecutus sit, quam nobis, quod nos assequatur atque comprehendat, apud eos utique, qui hæc recta ratione perpendunt. Addam illud quoque iis quæ dicta sunt, locum hunc mecum reputans: « In quo enim » passus est, ipse tentatus, potest iis, qui tentantur, auxiliari¹, » quod perspicue ad eundem sensum tendit. Sicut etiam: « Erit autem Deus omnia in omnibus² » illo restitutionis tempore; non utique Pater, resolutio videlicet in ipsum Filio, non secus ac si fax aliqua ad aliquod tempus ab ingenti rogo abstracta, in eum rursus adjungatur, (neque enim Sabelliani his verbis abutantur,) sed totus Deus; tum nempe, cum jam non multi erimus, sicut nunc sumus ratione motuum et affectionum, nihil omnino Dei gestantes in nobis, aut saltem parum, sed toti deiformes,

¹ Hebr. 11, 18. — ² 1 Cor. xv, 28.

totiusque ac solius Dei capaces. Hæc enim ea perfectio est, ad quam omni celeritate properamus; quod quidem Paulus ipse maxime conjicit. Quod enim hic de Deo indefinite ait, alio loco apertissimis verbis Christo sigillatim attribuit. Quibus verbis? « Ubi non est Græcus, non Judæus, circumcisio et præputium, barbarus et Scythæ, servus et liber: sed omnia et in omnibus Christus ¹. »

VII. Tertio loco vocem hanc, Major, numerant: quarto item, « Deum meum et Deum vestrum ². » Sane, si major quidem diceretur, non item æqualis ³, fortasse vim aliquam haberet quod afferunt. Cum autem utrumque inveniri liquido constet, quid tandem generosi homines dicent? Quid roboris habebunt? Quomodo convenient, quæ convenire nequeunt? Idem enim se ipso majus, pariterque sibi ipsi æquale, fieri non potest. Nonne ergo perspicuum est majoris vocem ad causam, æqualis autem ad naturam referendam esse? Ac nos istud ingenue admodum et candidè confitemur. Fortasse autem dixerit alius quispiam, sermonem nostrum acriori animi contentione prosequens, inferius habendum non esse, ab hujusmodi causa, causæ omnis experte, proficisci. Nam et quia ab eo, qui principio caret, originem trahit, ejus quoque gloriæ partem sibi vindicat: et accedit insuper generationis prærogativa, res tanta, tamque veneranda, iis quidem certe, qui mente præditi sunt. Nam, quod ratione humanitatis Pater Filio major intelligendus sit, vere quidem dici potest, sed non perinde honorifice. Quid enim mirum, Deum homine majorem esse? Atque hæc mihi dicta sint adversus eos, qui Majoris vocem insolentius jactant.

VIII. Quod autem ad alteram partem attinet, Deus dicitur, non ratione Verbi, sed partis quæ in oculorum sensum cadit; (quo enim modo illius, qui proprie Deus

¹ Gal. III, 28. — ² Joan. XIV, 28. — ³ Id. XX, 17.

» posse ¹, nec acu camelum admitti ². » Quid enim prohibeat quominus hæc fiant, si Dei voluntas ita tulerit?

XI. Præter hos omnes modos impossibile dicitur quod nulla omnino ratione fieri potest, ut quod nunc exquirimus. Ut enim impossibile esse dicimus Deum malum esse, aut omnino non esse; (hoc enim Dei impotentiam potius atque imbecillitatem, quam potentiam arguerit;) aut ut sit, quod non est, aut ut his duo simul et quatuor sint et decem: ita nec fieri ullo modo potest, ut Filius aliquid faciat, quod Pater non faciat. « Omnia enim quæ Pater habet, sunt Filii ³: » quemadmodum rursus omnia, quæ Filius, Patris. Nihil ergo peculiare, quia communia omnia. Quandoquidem ipsum quoque esse, commune atque æquale est ipsi cum Patre, licet alioqui hoc a Patre Filius habeat. Quo etiam sensu dictum est: « Ego vivo propter Patrem ⁴; » non quod ab illo ipsius vita atque essentia sustineatur, verum quod ex illo citra tempus ullum atque causam existat. Sed quomodo illud accipiendum, quod « Patrem facientem videre dicitur, atque ita facere ⁵? » An ut qui formas ac litteras pingunt, eo quod veritatem aliter assequi nequeant, nisi exemplar suum intueantur, atque inde velut manu ducantur? Qui vero quadrat, ut Sapientia magistro opus habeat? Nihil-ne efficiet, nisi edocta? Quid? Pater-ne aliquid facit, aut fecit? Utrum tandem alium mundum ante hunc coagmentavit, atque alium rursus in posterum coagmentabit, quos Filius sibi ante oculos proponens, alterum quidem jam procreaverit, alterum autem procreaturus sit? Quatuor ergo hac ratione mundi erunt, duo a Patre, duo a Filio effecti? O supinam vecordiam! Age, cum lepras purgat, dæmones et morbos profligat, mortuos ad vitam revocat,

¹ Joan. III, 4. — ² Matth. XIX, 24. — ³ Joan. XVI, 15. — ⁴ Id. VI, 58. — ⁵ Id. V, 10.

pare pedibus peragrat, aliaque omnia facit, in quo tandem, aut quando Pater hæc ante fecit? Nonne perspicuum est, earundem rerum formas a Patre quidem velut designari, a Filio autem peragi, non serviliter atque indocte, sed perite et heriliter, atque, ut aptius loquar, paterne? In hunc quippe sensum verba hæc accipio: « Quæcumque Pater » facit, eadem et Filius similiter facit⁴; » non quod similia sint utriusque opera, sed quod par sit utriusque potestas atque auctoritas. Atque hoc fortasse esse queat, quod et « Pater usque modo operari dicitur², et Filius; » non autem hoc duntaxat nomine, sed etiam ratione gubernationis et conservationis eorum, quæ facta sunt, ut indicat illud: « Qui facit Angelos suos spiritus. » Et, « Qui fundat » terram super stabilitatem³: » cum semel et hæc firmata atque stabilita sit, et illi procreati. Quo etiam pertinet: quod « Firmare tonitru⁴ dicitur, et ventum creare⁵: » quorum ipsa quidem ratio semel condita est, cæterum nunc quoque perpetua vis est ac facultas.

XII. Septimum proferatur, quod « Filius e cœlo descendisse dicitur, non ut voluntatem suam faciat, sed ejus » a quo missus est⁶. » Sane nisi ab illo ipso, qui descendit, hic sermo haberetur, dicere possemus hæc verba velut ab homine exprimi, non qui de Salvatore intelligatur; (illius enim voluntas, cum tota deificata sit, Deo procul dubio non adversatur;) sed qui nostræ conditionis sit. Humana quippe voluntas divinam non continuo sequitur, verum ut plurimum ei resistit atque obluctatur. Nam illud quoque eodem modo intelligimus: « Pater, si possibile est, transeat » a me calix iste; verumtamen non mea, sed tua voluntas » vincat⁷. » Neque enim, possibile esset, necne, ipsum ignorasse verisimile est, nec voluntati voluntatem oppo-

² Joan. v, 19. — ³ Ibid 17. — ⁴ Psal. ciii, et seqq. — ⁵ Job. xxxviii, 25. — ⁶ Amos. iv, 13. — ⁷ Joan. vi, 38. — ⁸ Matth. xxvi, 39.

suisse. Sed quoniam partis illius, quæ assumpsit, (hoc enim est, quod descendit,) non autem partis assumptæ, hic sermo est, ad hunc modum respondebimus : hæc non ita dici, quasi propriam voluntatem Filius habeat, atque a Patris voluntate separatam, sed potius quod non habeat; ut, quod colligitur, sit huiusmodi : « Nón ut faciam voluntatem meam ¹ : » nec enim voluntas mea a tua disjuncta est, sed communis utriusque nostrum, quorum, ut una est Deitas, ita una quoque voluntas. Permulta enim ex his, quæ ita dicuntur, a communi dicuntur, nec affirmationis modo, sed inficiationis, ut illud : « Non enim ad mensuram dat Deus Spiritum ². » Neque enim dat, nec mensura definitum : nec enim Deus Deum metitur. Ut item illud : « Neque iniquitas mea, neque peccatum meum ³. » Non enim, quod in eo peccatum sit, hæc sermone utitur, sed quod non sit. Ac rursus : « Non propter justitias nostras, quas fecimus ⁴. » Neque enim fecimus. Quod etiam perspicue colligi potest ex his quæ sequuntur. « Quæ est enim, inquit, voluntas Patris mei? Ut omnis qui credit in eum, salutem consequatur ⁵, » ac postremæ resurrectionis, compos fiat. An igitur Patris quidem hæc est voluntas, Filii autem minime? An invitus Evangelium prædicat, fidemque apud homines nanciscitur? Quis vero hoc credat? Quandoquidem illud quoque, quod ait Filius, « Sermonem, qui ab auditoribus excipitur, suum non esse, sed Patris ⁶, » eandem omnino vim habet. Quomodo enim hoc cujusquam proprium, aut solus esse queat, quod commune est, licet diu, multumque mecum considerem, perspicere nequeo, ac ne alius quidem quisquam, nisi mea me opinio fallit. Si hoc modo voluntatem intelligis, recte intelligis pieque admodum et orthodoxe,

¹ Joan. vi, 38. — ² Id. iii, 34. — ³ Psal. lvi, 5. — ⁴ Dan. ix, 18. — ⁵ Joan. vi, 40. — ⁶ Id. xiv, 24.

ut quidem mea est sententia, imo etiam cujusvis, modo recto iudicio præditus sit.

XIII. Octavo illud afferunt: « Ut cognoscant te solum » Deum verum, et quem misisti Jesum Christum¹. » Et, « Nemo bonus, nisi solus Deus². » Cujus argumenti perfacilis mihi videtur esse solutio. Si enim hæc verba, « Solum » verum, » Patri duntaxat tribueris, ubi tandem Veritatem ipsam collocabis? Etenim si illud, « Soli sapienti Deo; » aut illud; « Soli immortalitatem habenti, lucemque inaccessibleem habitanti³; » aut illud denique, « Regi sæculorum immortal; invisibili, soli sapienti Deo⁴, » ad hunc modum intellexeris, peribit utique tibi Filius, vel morte, vel tenebris mulctatus, vel in hoc condemnatus, ut nec sapiens sit, nec rex, nec invisibilis, imo nec omnino Deus, quod caput est eorum, quæ diximus. Quid autem asserri poterit; quin simul cum cæteris rebus, bonitatis quoque, quæ maxime solius Dei est, jacturam faciat? Verum hæc verba: « Ut cognoscant te solum verum Deum, » ad eorum, qui, quanquam falso, dii tamen appellantur, sublationem dici existimo. Neque enim adjectum fuisset: « Et quem » misisti, Jesum Christum, » si, ad eum opposita distinctione submovendum, illa; « Solum verum, » pertinerent, ac non de communi utriusque Divinitate sermo esset. Illa autem Christi verba, « Nemo bonus, » eo spectabant, ut tentatori legisperito, qui bonitatem ipsi, tanquam homini, tribuebat, occurreret. « Summe enim bonum esse, inquit, solius » Dei est⁵: » tamen si hoc quoque nomine homo nuncupetur, ut illud: « Bonus homo de bono thesauro profert bonum⁶. » Et Deus, ad Saulem de Davide verba faciens: « Dabo regnum tuum meliori te⁷. » Tum illud: « Benefac, » Domine, bonis⁸; » ac denique ea id genus omnia, quæ

¹ Joán. xvii, 3. — ² Luc. xviii, 19. — ³ 1 Tim. vi, 16. — ⁴ Id. i, 17. —

⁵ Luc. xviii, 19. — ⁶ Matth. xii, 36. — ⁷ 1 Reg. xv, 28. — ⁸ Psal. cxxiv, 4.

de his dicuntur, qui hominum laude ac prædicatione florent, ad quos primi illius boni rivus secundo cursu dimanavit. Hæc si tibi persuasimus, commodissime se res habet. Sin minus, quid dicturus es ad eos, qui ex altera parte, juxta id, quod pro causæ tuæ fundamento posuisti, Filium solum Deum dictum esse contendunt. In quibus autem verbis? In istis nimirum: « Hic Deus tuus, et non » æstimabitur alius præter eum¹. » Et paucis interjectis: « Post hæc in terra visus est, et cum hominibus conversatus est². » Nam quod, non de Patre, sed de Filio, sermo habeatur, adjectio hæc aperte declarat. Hic enim est, qui corpoream nobiscum consuetudinem habuit, terrenisque rebus conjunctus est. Quod si illud obtineatur, hæc verba, « Et non æstimabitur alius, » adversus Patrem dici, non adversus eos, qui falsa mortalium opinione dii habentur, quod ad Patrem attinet, per ea utique victi sumus, quibus adversus Filium obnixè contendimus. Qua victoria quid calamitosius et perniciosius esse queat?

XIV. Nono illud producent: « Semper vivens ad interpellandum pro nobis³. » Optime sane ac perquam mystice et benigne. Interpellatio namque non vulgi more id sonat, quod est vindictam quærere; (hoc enim humilitatis quodam modo esset;) sed idem significat, quod, pro nobis, mediationis ratione, supplicare; quemadmodum et Spiritus pro nobis intercedere dicitur. « Unus enim Deus, unus » etiam mediator Dei et hominum, homo Jesus Christus⁴. » Intercedit enim nunc quoque, ut homo, pro mea salute; quoniam cum eo corpore est, quod assumpsit, donec me, assumptæ humanitatis virtute, Deum effecerit, tametsi non jam secundum carnem cognoscatur, hoc est, secundum carnales affectiones, ac, citra peccatum, nostras. Eodem

¹ Baruc. III, 36. — ² Ibid. 38. — ³ Hebr. VII, 25. — ⁴ 1 Tim. II, 5.

modo « Advocatum quoque habemus Jesum Christum¹, » non ut nostra causa sese ad Patris pedes advolventem, servilique modo abjicientem. Procul sit ista servilis sane suspicio, Spirituque indigna. Neque enim Patris est hoc exposcere, aut Filii pati: nec de Deo hoc cogitare pium atque æquum est. Sed ex his, quæ humanitus perpessus est, ad tolerantiam me, ut Verbum et exhortator, inducit. Sic ego advocationem hanc intelligendam arbitror.

XV. Decimo loco ignorantiam ponunt, illudque, quod « Extremum diem atque horam nemo cognoscat, ac ne » Filius quidem ipse, sed solus Pater². » At qui fieri potest, ut Sapientia quidquam eorum, quæ sunt, ignoret ille, inquam, sæculorum factor, ille consummator atque immutator, ille eorum, quæ facta sunt, finis? Quique ea, « Quæ » Dei sunt³, » perinde novit, ac spiritus hominis ea, quæ in ipso sunt? Quid enim hac cognitione plenius ac perfectius? Qui vero constat ipsum ea quidem, quæ horam illam antecedunt, ac quæ velut in ipso finis articulo sunt, exactissime scire, ipsam autem horam ignorare? Ænigmati quippe res hæc similis est: perinde videlicet ac si quis ea, quæ ante murum sunt, certissime se nosse affirmet, murum autem ipsum ignorare se fateatur: aut diei finem probe sciens, noctis principium minime cognoscat: ubi alterius cognitio alterum necessario secum ducit. Eccei igitur dubium esse potest, quin horam quidem, ut Deus, cognitam habeat, ignoret autem ut homo, si quis partem spectabilem ab ea disjungat, quæ mente sola perspicui potest? Nam quia absolute hoc loco ac sine relatione, Filii nomen ponitur, nec adjungitur, cujus, idcirco hinc nobis ansa porrigitur ita existimandi, ut ignorantiam hanc sensu maxime pio interpretemur, eamque humanitati, non divinitati ascribamus.

¹ : Joan. II, 1. — ² Marc. XIII, 32. — ³ : Cor. II, 11.

XVI. Si igitur hæc ratio adversariis satisfacit, hic pedem figemus, nec quidquam amplius a nobis inquiratur. Sin secus, hæc secundam expositionem asseremus; quod quemadmodum singula alia, ita rerum quoque maximarum cognitio in Genitoris honorem ad causam ipsam referenda est. Quin ne exiguum quidem mihi intellecturus videtur, qui sic legerit, ut nostræ memoriæ vir quidam litterarum studiosus, nempe Filium non aliter diem illum vel horam nosse, quam ut Pater. Quid enim hinc colligitur? Quoniam Pater cognoscit, ideo etiam Filius: tanquam videlicet nemo hoc cognoscere ac percipere queat, præter principem illam naturam. Supererat jam de hoc verbo: «Mandatum est,» de eo etiam, quod «Patris mandata servasse, et, quæ placita sunt ei, semper fecisse dicitur; ac insuper de con-summatione et exaltatione¹,» ac de eo, quod «Ex his quæ passus est, obedientiam didicisse» scribitur², «De sacerdotio³» item, «Et oblatione, et traditione, et oratione⁴» ad eum qui a morte salvum eum facere poterat; ad hæc de «Agonia, et sanguineo sudore, atque oratione⁵,» etsi quid aliud ejusdem est generis, pertractare: nisi cuius exploratum esset, hujusmodi nomina perpetenti humanitati attribuenda esse, non autem immutabili illi naturæ, atque omni dolore et cruciatu sublimiori. Hæc habui, quæ ad diluendas adversariorum objectiones asserrem, ut, velut radici⁶ cujusdam, ac submonitionis instar, iis sint, qui majori inquirendi solertia præditi sunt, ad eandem materiam plenius exactiusque pertractandam. Operæ-prestium autem fortasse, minimeque ab iis, quæ prius diximus, aliorum fuerit, cum multa sint Filii nomina, et multis, quæ de eo intelligantur, imposita, hæc sine speculatione non

¹ Joan. x, 18; xv, 10, et viii, 29. — ² Hebr. v, 9, et seqq. — ³ Rom. iv, 25. — ⁴ Galat. ii, 20. — ⁵ Luc. xii, 44, et seqq.

præterire; verum quid quæque appellatio sibi velit, declarare, ac mysticam vim nominum explicare.

XVII. Hinc porro initium ducendum erit. Deus nullo nomine exprimi potest; idque declarant, non modo rationationes, sed Hebræorum doctissimi atque antiquissimi quique, quantum quidem nobis conjiciendum dederunt. Nam qui propriis notis summum illud nomen honorandum duxerunt, ac ne iisdem quidem litteris aliud quiddam eorum, quæ post Deum sunt, ac Deum ipsum, scribi sustinuerunt, (tanquam scilicet Deum huc etiam usque a rerum nostrarum commercio distinctum esse oporteat,) ecquando tandem solutilli voce naturam illam insolubilem, nec cum aliis communem explicari paterentur? Quemadmodum enim nemo est, qui aërem totum unquam hauserit; ita Dei naturam, nec mens unquam ulla prorsus concepit, nec vox ulla complexa est. Verum ipsum ex his, quæ in ipso sunt, adumbrantes, obscuram quamdam et imbecilem, atque aliam ex alio speciem colligimus. Ac præstantissimus hic apud nos theologus censetur, non qui in totum, quid Deus sit, invenerit; nec enim vinculum capere hoc totum potest; sed qui ampliorem ipsius speciem mente conceperit, ampliusque veritatis simulacrum, vel adumbrationem, vel quocumque tandem alio vocabulo nū quis malit, in se ipso collegerit.

XVIII. Quantum ergo nobis assequi concessum est, «Ens, et Deus,» magis quodam modo essentiae nomina sunt; ex iisque etiam vox, «Ens,» ad eam indicandam aptior est; non hoc solum nomine, quod ipse, cum Moysi in monte oraculum ederet, quæreretque ille, quo nomine vocaretur, ita se ipsum appellavit, edicens videlicet ei, ut ad populum his verbis uteretur: «Qui est, misit me¹»; sed etiam quia nomen illud magis proprium esse compe-

¹ Exod. III, 14.

rimus. Quamvis enim Dei vox, vel a verbo $\Theta\acute{\epsilon}\iota\varsigma$, vel $\alpha\beta\alpha\theta\epsilon\iota\varsigma$, ut putant qui in hoc genere sibi sciti atque arguti videntur, hoc est, a, currendo, vel ab, urendo, rationem originis suæ ducat, propter motus perpetuitatem, et quod vitiosos habitus consumat, (nam hinc quoque « Ignis consumens » dicitur¹), ex eorum tamen numero est, quæ ad aliquid referuntur, nec libera et absoluta est; quemadmodum nec vox ista, Dominus, quæ Dei quoque nomen esse dicitur². « Ego enim, inquit, Dominus Deus tuus: hoc meum nomen est³. » Et, « Dominus nomen ipsi⁴. » At nos naturam ejusmodi exquirimus, quæ ipsum esse per se habeat, ac non cum alio quopiam copuletur. Ens vero, proprium sane est Dei, ac totum, nec priore aliqua re, nec posteriore, (nec enim erat, aut erit,) definitum ac circumcisum.

XIX. Alia autem nomina partim potestatis esse constat, partim œconomix, et quidem duplicis; alterius nimirum corpore sublimioris, alterius cum corpore conjunctæ. Exempli causa, « Omnipotens⁵, et rex, vel gloriæ, vel sæculorum, vel virtutum⁶, vel dilecti⁷, vel regnantium. » Item Dominus, vel Sabaoth⁸, hoc est, exercituum, vel virtutum⁹, vel dominantium¹⁰. » Hæc sine ulla dubitatione potentiam Dei ostendunt. « Dens rursus, vel salvos faciendi, vel ultionum, vel pacis¹¹, vel justitiæ¹², vel Abrahamæ, Isaac, et Jacob¹³, » universique spiritualis Israël, ac Deum videntis. Hæc utique œconomix sunt nomina. Quoniam enim tribus his rebus gubernamur, nempe et supplicii metu, et salutis gloriæque spe, et cultu virtutum, quibus hæc comparantur; ultionum quidem nomine,

¹ Deut. iv. 24. — ² Isai. xlii. 8. — ³ Amos. ix. 6. — ⁴ Psal. lxxvii. 5. — ⁵ Exod. xv. 3. — ⁶ Psal. xxiii. 9. et 1 Tim. i. 17. — ⁷ Psal. lxxvii. 13. — ⁸ Rom. ix. 29. — ⁹ Psal. xxxiii. 10. — ¹⁰ Deut. x. 17. — ¹¹ Psal. lxxvii. 21, et xciii. 1. — ¹² Rom. xv. 33. — ¹³ Exod. iii. 6.

metus procuratur; salutis autem, spes; virtutum denique, probitatis studium: ut qui aliquid horum assequitur, perinde ac Deum in se ipso gerens, ad perfectionem et familiaritatem eam atque cognationem, qua nos virtus ipsi conciliat, majori celeritate festinet. Atque hæc vocabula Deitati communia sunt. Proprium autem ejus, qui principii expers est, nomen, « Pater: » ejus autem, qui citra ullum principium genitus est, « Filius: » illius denique, qui citra generationem processit, aut progreditur, « Spiritus sanctus. » Verum ad Filii nomina, de quibus nobis dicere propositum erat, accedamus.

XX. Primum ergo « Filius¹ » mihi dici videtur, quia essentia idem est cum Patre: neque id solum, sed quia etiam ex illo est. « Unigenitus² » autem, non quia solus ex solo, et solum; sed etiam quia unico modo, ac non ut corpora. « Verbum³ » porro quia ita se habet ad Patrem, ut sermo ad mentem, non modo propter generationem passionis omnis expertem, verumetiam propter conjunctionem ipsius cum Patre, vinque enuntiatricem. Fortasse etiam quis dixerit, eodem modo se ad Patrem habere, quo definitio ad definitum, quoniam definitio quoque Λόγος dicitur. « Qui enim Filium cognovit, » ait Christus, (hoc enim idem significat, ac, « Vidit,) Patrem quoque « cognovit⁴: » ac brevis, et compendiosa facilisque paternæ naturæ declaratio est Filius. Omne enim quod genitum est, genitorem suum tacita quadam voce definit. Quod si quis etiam, quia rebus omnibus insit, Λόγος vocari contendat, a ratione non aberrabit. Quid enim est, quod non Verbo conditum sit? « Sapientia » vero⁵, ut rerum divinarum et humanarum scientia, Qui enim fieri potest, ut conditor rerum a se conditarum rationes ignoret? « Po-

¹ Matth. xviii, 5. — ² Joan. i, 8. — ³ Ibid. 1. — ⁴ Id. xiv, 7 et 9. — ⁵ 1 Cor. i, 30.

» tentia¹, » ut rerum creatorum conservator, vinctus his suppedians ut contineantur. « Veritas², » ut natura unum, non multa. Verum quippe unum est; mendacium multiplex: atque etiam ut purum Patris sigillum, minimeque mendax character. « Imago, ut ejusdem cum Patre substantia³, » et quia ex illo est, non autem ex hoc Pater! Hæc siquidem imaginis natura est; ut sit imitatio exemplaris, cujus imago dicitur; quanquam hic imago exemplar suum expressius refert. Illic enim rei vivæ ac motu præditæ mortuæ et actus expers imago est: hic autem vivi exemplaris viva quoque est effigies, multoque minus a Patre differens, quam « Sethi ab Adamo⁴, » filiusque omnis a parente suo. Hujusmodi namque simplicium rerum natura est, ut non partim inter se similes sint, partim dissimiles, sed totæ totas repræsentent, eademque potius sint, quam similes. « Lux⁵ » etiam dicitur, ut animorum splendor, qui et vita et sermone purgantur. Nam si ignorantia et peccatum tenebræ sunt, lux profecto erit scientia, et vita divina. « Vita⁶, » quia lux, totiusque ratione præditæ naturæ coagmentatio, et procreatio. « In ipso enim vivimus, et » movemur, et sumus⁷, » secundum duplicem illam « Inspirationis » facultatem⁸. Nam et illinc omnes vitalem spiritum accipimus, et Spiritum sanctum, quotquot ipsius capaces sumus, et quatenus os mentis aperuerimus. « Justitia⁹, » quia pro merito præmia et pœnas distribuit, æquitque judicem se præbet his, qui sub lege sunt, et his, qui sub gratia; corporique item et animæ, ut illud pareat, hæc præsit atque imperet; præstantiorque pars principatum adversus inferiorem teneat, nec id quod deterius est, adversus id, quod melius est, insurgat. « Sanc-

¹ Ephes. 7, 19. — ² Joan. xiv, 6. — ³ Hebr. 1, 3, et Coloss. 1, 15. — ⁴ Gen. iv, 25. — ⁵ Joan. i, 9. — ⁶ Id. xiv, 6. — ⁷ Act. xvii, 28. — ⁸ Gen. ii, 7. — ⁹ 1 Cor. 1, 30.

» tificatio¹, » quia purities, ut purum illud Nomen per puritatem capiatur. « Redemptio², » quia nos a peccati detentis in libertatem asservit, nosque pro nobis, tra orbis terrarum expietur, liberationis pretium dat. « Resurrectio³, » ut nos hinc abductos suscitans, et a peccato morte affectos ad vitam reducat.

XXI. Atque hæc adhuc communia sunt; tum et qui supra nos est, quam qui propter nos. Nunc ad ea veniamus, quæ proprio nostra sunt; humanitatisque assumptæ. « Homo⁴ » itaque dicitur, non solum ut per corpus a corporibus capiatur, qui alioquin in incomprehensibilem naturam suam capi non poterat; sed etiam ut per se hominem sanctitate afficiat, fermentique inerat universæ massæ sit, sibi que uniens quod condemnatum fuerat, totum illud a condemnatione liberet, omnia pro nobis, quæ nos sumus, excepto peccato; factus; corpus; afflatus, mens; (per quæ videlicet mors pervaserat;) et, quod ex his commune est, homo, visibilis Deus, propter id quod animo atque intellectu comprehendebatur. « Filius hominis⁵, » propter Adamum, ac Virginem, ex quibus extitit; illo mirum ut generis auctore, hac autem ut matre, juxta matris legem, et non juxta legem generationis. « Christus⁶, » propter Divinitatem. Ea enim humanitatis unctio est, non operatione, ut in aliis Christis, sed totius ungentis præsentia sanctificans. Cujus hic effectus est, ut id, quod ungit, homo vocetur, et, quod ungitur, Deus fiat. « Via⁷, » ut per se nos ducens. « Ostium⁸, » ut introductor. « Pastor⁹, » ut nos in loco pascuæ collocans, et aqua refectio-
nis educans¹⁰, » atque hinc nobis itineris ducem se præbens, necnon adversus belluas pro nobis dimicans : tum

¹ 1 Cor. I, 30. — ² Ibid. — ³ Joan. XI, 25. — ⁴ Id. IX, 11. — ⁵ Matth. XXIV, 27, et 44. — ⁶ Matth. I, 16. — ⁷ Joan. XIV, 6. — ⁸ Id. X, 9. — ⁹ Id. X, 11. — ¹⁰ Psal. XXII, 2.

etiam, ut errantes revocans, et perditos reducens, et contractos obligans, et infirmos roborans, et firmos ac validos custodiens atque ad futuræ vitæ caulam, per pastoralis scientiæ rationes, colligens. « Ovis¹ » porro, ut victima. « Agnus², » ut perfectus. « Pontifex³, » ut oblator. « Melchisedech⁴, » ut matris expers, quod ad naturam illam nostra excelsiorem attingit, patre autem carens, quantum ad nostram: tum etiam quia sublimitus absque genealogia est, « Generationem enim illius, inquit, quis enarrabit⁵. ») Ac præterea, ut « Rex Salem, hoc est, pacis, et rex justitiæ⁶, » ac denique ut a Patriarchis adversus pestiferas potestates strenue rem gerentibus, decimas accipiens. Habes Filii appellationes. Per eas incede; per eas, inquam, omnes, quæ sublimes sunt, divine, per corporeas autem, humane: imovero prorsus divine, ut ex imis hisce ascendens, fias Deus propter eum, qui propter nos de supernis descendit. Præter omnia, et ante omnia, illud serva: nec aut in sublimioribus, aut objectionioribus nominibus errabis. Jesus Christus, heri et hodie corporaliter, idemque spiritualiter, et in sæcula sæculorum. Amen.

¹ Isai. LIII, 7. — ² Joan. I, 29. — ³ Hebr. VI, 20. — ⁴ Id. VII, 1. — ⁵ Isai. LIII, 8. — ⁶ Hebr. VII, 2.

ORATIO XXXI¹. THEOLOGICA V.*De Spiritu sancto.*

ARGUMENTUM.

I. *Impia hæreticorum de Spiritu sancto assertio.* II. *Cur difficilis sit de Spiritu sancto disputatio.*—*Spiritus sancti invocatio.* III. *Spiritus sanctus, verus Deus.* — *Pater, Filius, et Paraclitus, lux vera, lux una, Deus unus.* IV. *Pater, Filius, et Spiritus sanctus, perfecta Deitas.* V. *Varie de Spiritu sancto opiniones.* VI. *Spiritus sanctus sub diverso respectu consideratus.* VII. *Hæreticorum argumenta.* — *Gregorii responsio.* VIII. *Hæreticos urget Gregorius.*—*Ineffabilis Spiritus sancti processio.* IX. *Cur Spiritus sanctus non vocatur Filius.* X. *Spiritus sanctus, Deus consubstantialis.* XI. *Similitudo ex Adamo, Eva et Seth desumpta.* — *Nulla imago rei veritatem assequi potest.* XII. *Probatur ex Scripturis Spiritum sanctum adorandum esse et orandum.* XIII. *Præcipua hæreticorum objectio.* — *Gregorii responsio.* XIV. *Responsio ad Arianos et Macedonianos.* — *Deus in tribus personis unus est.* XV. *Apud sapientiores ethnicos Deitas una fuit.* XVI. *Ethnicorum dii fœdis affectionibus obnoxii.* XVII. *Objectio.* — *Responsio.* XVI I. *Numerus non rerum naturam, sed subjectorum quantitatem explicat.* — *Scripturis Arianos urget.* XIX. *Hæ-*

¹ Alias xxxvii, quæ autem xxxi erat, nunc est xxxvii. Habita anno 380.

reticorum argumenta in ipsos hæreticos retorquet. — *Essentia rerum non pendet ex numerorum ordine.* XX. *Ridiculum est res easdem, et ejusdem, et diversæ essentiae esse.* XXI. *Spiritus sancti Divinitas Scripturarum ac theologorum testimonio comprobatur.* XXII. *Primum rerum genus, quæ non sunt, et dicuntur.* XXIII. *Secundum rerum genus, quæ, cum sint, minime dicuntur.* — *Tertium rerum genus, quæ nec sunt, nec dicuntur.* — *Quantum rerum gentis, quæ et sânt et dicuntur.* XXIV. *Relictis rebus, syllabæ non sunt consecranda.* XXV. *Vetus ac Novum Testamentum sunt veluti duo terræ motus, quibus et tertius additur.* — *Deus, non invitis, sed volentibus benefacit.* XXVI. *Pater, Filius, et Spiritus sanctus per gradus prædicati.* XXVII. *Theologiæ tractandæ ratio.* — *Spiritus sancti Divinitas post ascensionem Christi apertius edocet.* XXVIII. *Spiritus sanctus, utpote Deus, colendus et adorandus.* XXIX. *Scripturarum testimonia, quibus sancti Spiritus Divinitas probatur.* *Varia Spiritus sancti nomina et operationes.* XXX. *Nemo, nisi procul a Spiritu sancto remotus, ipsius Divinitatem negare potest.* XXXI. *Natura divina nulli creatæ rei comparari potest.* XXXII. *Trinitatis similitudo cum sole, radio et luce.* XXXIII. *Remotis imaginibus circa sanctissimam Trinitatem, sola fides retinenda est.*

I. Ac de Filio quidem, talis est nostra oratio¹ : atque ad hunc modum lapidantium impetum effugit, per medium ipsorum transiens. Oratio quippe non lapidatur : verum lapides ipsa, cum lubet, jactit, ac « Belluas, hoc est, sermones, male ad montem ascendentes², » funda insec-

¹ Vide D. Gifford, tom. VI, p. 337-341. — ² Exod. 12, 12.

tatur. Sed de Spiritu sancto, inquit, quid dixeris? Unde nobis peregrinum Deum, nulloque Scripturæ loco proditum introducis? Atque hoc illi quoque obijciunt, qui de Filio moderatius sentiunt. Nam quod in viis et fluviiis reperire est, ut a se invicem secantur, ac rursus inter se coeant; idem hic quoque, (tanta est impietatis ubertas, et copia,) usuvenit, ut, qui in aliis rebus inter se dissident, in quibusdam rursus consentiant, ita ut ne plane quidem intelligi ac perspicui possit, vel qua in re consentiant, vel in qua contendant.

II. Et quidem in hac de Spiritu sancto disputatione, nonnihil inest difficultatis et molestiæ, non hoc solum nomine, quod homines in sermonibus de Filio fracti ac debilitati, acrioribus animis adversus Spiritum luctantur; (omnino enim eos aliqua in re impios se præbere necesse est, aut ne vitalis quidem, ut dici solet, ipsis vita est,) verumetiam quia nos quoque, quæstionum multitudine fatigati et enecti, similes sumus iis, qui ciborum fastidio laborant. Quemadmodum enim illi, postquam alicujus cibi fastidium contraxerunt, omnes quoque cibos averrantur, eodem quoque modo nos ex unius disputationis tædio ad omnes disputationes æque nauseamus. Det tamen Spiritus; et oratio curret, Deique gloria celebrabitur. Enimvero quot modis, vel « Spiritus, » vel « Sanctus, » apud Scripturam sacram intelligatur et dicatur, accurate excutere atque distinguere, commodumque cuique speculationi testimonium adhibere, quodque etiam peculiari quodam modo id, quod ex utroque connexam est, nimirum Spiritus sanctus, accipiatur, dicere supersedebimus, aliisque, qui hæc et sibi ipsis, et nobis, quemadmodum nos quoque ista ipsis, pertractarent, hoc munus relinqueamus. Nos autem ad ea, quæ deinceps sequuntur, orationem convertemus.

III. Atque illi quidem, qui perinde ac si nos peregrinum quemdam et ascriptitium Deum invehamus, animo discruciantur, acriterque pro littera contendunt, sciant se illic timere, « Ubi non est timor ¹, » studiumque erga litteram suum nihil aliud, quam impietatis obtentum esse aperte cognoscant, ut paulo post ostendetur, cum objectiones eorum pro virili nostra refutaverimus. Nos vero tanta Deitatis Spiritus sancti, quem colimus, fiducia nitimur, ut hinc etiam a Deitate orationis initium ducturi simus, easdem Trinitati voces accommodantes, etsi id audacius fortasse nonnullis videri queat. « Erat lux vera, quæ illuminat omnem hominem venientem in mundum, » Pater. « Erat lux vera, quæ illuminat omnem hominem venientem in mundum, » Filius. « Erat lux vera, quæ illuminat omnem hominem venientem in mundum ², » alius Paracletus. Erat, et erat, et erat : sed unum erat. Lux, et lux, et lux : sed lux una, Deus unus. Atque hoc illud est, quod David quoque ipse ante animo informavit, cum diceret : « In lumine tuo videbimus lumen ³. » Nunc autem nos, et perspeximus, et prædicamus, ex luce Patre, lucem Filium, in luce Spiritu sancto percipientes, quæ est compendiaria ac simplex divinæ Trinitatis confessio. Qui rejicit, rejiciat; « Qui inique agit, inique agat ⁴; » nos, quod intelleximus, prædicamus. « In montem excelsum ascendemus ⁵, » et clamabimus, siquidem ex inferiori loco minus audiamur. Spiritum efferemus, non metuemus. Quod si etiam metuemus, id ita erit, ut quiescere, non prædicare, metuamus.

IV. Si fuit tempus, cum non esset Pater, fuit quoque, cum non esset Filius. Si fuit tempus, cum non esset Filius, fuit quoque, cum ne Spiritus quidem esset. Si unum a

¹ Psal. xlii, 5. — ² Joan. 1, 9. — ³ Psal. xxxv, 10. — ⁴ Isai. xxi, 2. —

⁵ Id. lx, 9.

principio erat, utique et tria. Si unum dejicis, audax hoc dicam, ne duo quidem superiore loco colloces. Quæ enim imperfectæ Deitatis utilitas? Imo quæ Deitas, si imperfecta? Perfecta autem quomodo erit, in qua ad perfectionem aliquid desideretur? Desideratur enim, si sanctitate careat. Hanc porro quomodo habere queat, ni Spiritum habeat? Si enim alia quædam præter illum sanctitas est, quæ tandem illa intelligenda sit, dicat quispiam: aut, si quidem eadem hæc est, quid afferri potest, quamobrem non jam inde a principio fuerit? Quasi vero præstitcrit Deo, aliquando imperfectum extitisse, ac Spiritus expertem. Si a principio non erat, meæ classis atque ordinis est, etiamsi me nonnihil antecedit. Temporis enim interstitio a Deo dirimimur. Porro si ejusdem mecum classis est, quo pacto me Deum efficit? Aut quo pacto cum Deitate conjungit?

V. Sed operæ-pretium facturum me puto, si de eo altius aliquanto disputationem repetam. Nam de Trinitate prius jam a nobis est pertractatum. Spiritum sanctum Sadducæi penitus non esse censuerunt; quemadmodum nec Angelos, nec resurrectionem: quibus haud scio quid acciderit, ut tot ac tanta de eo in instrumento veteri testimonia pro nihilo haberent. Qui autem apud ethnicos theologiæ laude magis excelluerunt, propiusque ad nos accesserunt, per imaginem quamdam ipsum, meo quidem judicio, conceperunt, tametsi in nomine dissenserint, Universitatis nempe mentem, et extrinsecam mentem, aliisque in genus nominibus eum appellantes. Nostrates vero sapientes, partim vim quamdam et facultatem ipsum existimarunt, partim creaturam, partim Deum, partim, utro potius nomine vocandus esset, minime certum et exploratum habuerunt, ea, ut aiunt, ratione ducti, quod Scriptura neutrum horum plane aperteque demonstrasset. Ac proinde

nec ipsum venerantur, nec contemnunt, sed medio quodam modo, vel potius misere perditæque erga eum afficiuntur. Ex his porro, qui Deum ipsum credunt, alii animo tenus pii atque orthodoxi sunt: alii labiis quoque ipsis pietatem profiteri non verentur. Alios etiam quosdam sapientiores audiui, qui Divinitatem metiuntur, ac tria quidem, perinde ac nos, intelligi consentiunt, sed ea ita inter se disjungunt, ut unum eorum et essentia et potestate infinitum statuunt, alterum potestate, non item essentia, postremum utroque circumscriptum. Sic alio quodam modo eos imitantur, qui opificem, et cooperarium, et ministrum nominant, atque ordinem et gratiam, quæ nominibus inest, rerum quoque seriem esse arbitrantur.

VI. Nos vero, nec cum iis, qui ne Spiritum quidem esse censent, nec cum nugatoribus ethnicis verba ulla commutabimus. Absit enim ut « Peccatorum oleo sermonem nostrum impinguemus ¹. » Cum cæteris autem ad hunc modum disputabimus: Spiritus sanctus, vel ex eorum numero, quæ per se subsistunt, omnino statuendus est, vel inter ea collocandus, quæ in alio considerantur; quorum alterum substantiam, alterum accidens vocant, qui harum rerum scientiam callent. Ac siquidem accidens, vis utique et facultas quædam Dei fuerit. Quid enim aliud, aut cuius? Hoc profecto magis consentaneum, compositionisque expers. Si vis et facultas, agetur haud dubie, non aget: simulque, ut actus fuerit, desinet. Ejusmodi quippe est actus natura. Qui sit ergo, ut agat ipse, atque hæc et illa dicat, et « Segreget ², » et « contristetur ³, » et ad iram incitetur, et quæcumque rei motu agitatæ perspicue sunt, non autem motionis ipsius? Si autem substantia est, non accidens, vel creatura

¹ Psal. cxi, 5. — ² Act. xiii, 2. — ³ Ephes. iv, 30.

conoscitur, vel Deus. Medium enim aliquid inter hæc, aut quod neutrius particeps sit, aut ex utroque compositum atque conflatum, ne si quidem, qui Tragelaphos conflinxerunt, intelligere queant. Si creatura, quomodo in eum credimus, aut in eo perficimur? Neque enim idem est, credere in aliquid, et credere de aliquo. Hæd enim Divinitati convenit, hæc eulibet rei. Si autem Deus, certe nec creatura est, nec factura, nec conservus, nec denique ullum aliud humile atque abjectum nomen.

VII. Jam lingua tua ad disputandum prosillat, fundæ jactentur, argumenta nectantur. Ant ingenuus omnino est, inquis, aut genitus. Si ingenuus, ergo duo erunt principii expertæ. Si autem genitus, rursus subdividit; aut ex Patre genitus est, aut ex Filio. Si ex Patre, duo igitur sunt filii ac fratres. Gemellos etiam finge, si habet, aut alterum natum majorem, alterum minorem; cum ita corporeis rebus immersus es. Si autem ex Filio, jam nobis, inquis, nepos Deus existit. Quod quid absurdius fingi possit? Hæc homines « Ad malefaciendum sapientes » et ingeniosi, bona autem scribere recusantes. Ego vero, si divisionem hanc necessariam viderem, res ipsas profecto excepissem, nomina nihil veritus. Non enim, quia secundum excelsiorem quamdam relationem Filius est Filius, (quod videlicet aliter, quam hoc modo, indicare nequeamus id quod ex Deo est, essentiaque idem cum ipso,) idcirco terrena quoque omnia cognationisque nostræ nomina ad Deum necessario transferenda esse putandum est. Alioqui, quid impedit, quominus eadem ratione masculinum, Deum nostrum existimes, quoniam Deus et Pater nominatur? Ac scemineum quiddam, Deitatem, quantum quidem ex vocis genere aestimari potest? Et denique Spiritum, neutrum, quoniam nihil gignit? Quod si juxta veteres fabulas et nugæ hoc

quoque modo luseris, ut dicas Deum cum voluntate sua congressum Filium genuisse, Marcionis quidem ac Valentini, qui novos *Æonas* commentus est, Hermaphroditum quemdam Deum induxeris.

VIII. Quomodo porro divisionem tuam primam, qua inter ingenuitum et genitum nihil medium esse arbitraris, haudquaquam admittimus, protinus tibi cum præclara tua divisione fratres illi et nepotes peribunt, ut qui, primo illo disputationis tuæ capite, quasi multiplicis cujusdam nexu initio primo soluto, simul quoque soluti ac dilapsi sint, atque a Divinitatis doctrina sese subduxerint. Ubi enim, quæso, pones id, quod procedit, quod quidem inter duas divisionis tuæ partes interjectum esse constat, atque a theologo, multo te præstantiori, nimirum a Salvatore nostro, introducitur? Nisi forte, propter tertium tuum Testamentum, vocem illam ex Evangeliiis sustuleris, « Spiritus sanctus, qui a Patre procedit¹; » qui, quatenus ab illo procedit, creatura non est: quatenus rursus genitus non est, Filius non est: quatenus autem inter ingenuitum et genitum medius est, Deus est. Atque ita vitatis-syllogismorum tuorum laqueis, Deus manifeste apparuit, divisionibus tuis firmior et valentior. Quæ ergo est hæc processio, inquires? Dic tu quæ Patris ingenuitura sit, et ego Filii generationem, et Spiritus processionem explicare aggrediar, quo fiet ut ambo deliremus, in Dei mysteria oculos injicientes: idque qui tandem? Nempe qui ne ea quidem, quæ ante pedes sunt, scire, nec arenam maris, aut pluvie guttas, et dies sæculi enumerare possumus, nedum in Dei profunda penetrare, naturæque adeo arcanæ, atque omnem orationis facultatem usque adeo superantis rationes reddere.

IX. Quid ergo est, inquiunt, quod Spiritui deest, ad hoc ut sit Filius? Nisi enim aliquid deest, Filius esset.

¹ Joan. xv, 26.

Deesse nihil dicimus. Non enim Deo quidquam deest. Verum manifestationis, ut ita dicam, mutuaque eorum relationis differentia, diversa quoque ipsis nomina procreavit. Neque enim Filio aliquid deest, ad hoc ut sit Pater, (nec enim defectus est filiatio,) nec propterea tamen Pater est. Alioqui eadem ratione Patri aliquid deerit, ad hoc ut sit Filius. Nec enim Pater Filius est. Sed hæc defectum procul dubio undequaque non arguunt, nec essentiæ summisionem : quin potius ex his verbis : « Quod genitus non sit, » et quod genitus, et quod procedat, • hoc effectum est, ut alius Pater, alius Filius, alius Spiritus sanctus appelletur, atque ita inconfusa trium Personarum distinctio in una Divinitatis natura et dignitate conservetur. Neque enim Filius est Pater, (unus enim est Pater,) sed est id quod Pater : nec Spiritus est Filius, quia ex Deo est, (unus enim Unigenitus,) sed est id quod Filius : tria hæc unum, si Divinitatem spectes, et unum tria, si proprietatum rationem habeas : ut nec Unum Sabellio faveat, nec Tria pestiferæ divisioni, quæ hac tempestate viget.

X. Quid ergo ? Spiritus sanctus est Deus ? Maxime. Consubstantialis igitur ? Prorsus, siquidem Deus. Da igitur mihi, inquis, ex eodem aliud esse Filium, aliud, quod Filius non sit, et tamen ejusdem cum illo substantiæ, ac Deum, et Deum admittam. Da tu quoque mihi Deum alium, Deique naturam, et tibi eandem Trinitatem cum iisdem nominibus ac rebus dabo. Cum vero Deus unus, atque una suprema natura sit, unde tandem similitudinem tibi repræsentabo ? An rursus postulas ex terrenis et humanis rebus eam duci ? Valde profecto turpe est, nec turpe modo, sed etiam valde stultum et inane, ex humilibus rebus superarum cœlestiumque simulacrum sumere, rerumque certarum atque constantium ex fluxa fragilique natura,

quodque Isaias ait, « Viventia in mortuis requirere¹. » Et tamen annitar, quando ita vis, hinc quoque nonnullam orationi nostræ opem afferre. Atque alia quidem prætermittenda duco, etsi multa de animalium historia commemorare queam, partim nobis nota, partim paucis cognita, quæ circa animantium ortus ac generationes natura miro artificio edidit. Gigni etenim dicuntur, non modo ex iisdem eadem, atque ex diversis diversa; sed etiam eadem ex diversis, ac diversa ex iisdem. Quod si etiam cuiquam fidem facit hic sermo, alius est generationis modus, ut idem animal a seipso consumatur et procreetur. Sunt etiam quæ, velut quadam naturæ magnificentia, a se ipsis quodam modo desciscant, atque ex aliis animalibus in alia transcant atque immutentur. Quinetiam idem animal, partim non genitum, partim genitum, et tamen ejusdem substantiæ reperire est: quod quidem ad præsentis quæstionis similitudinem propius accedit. Unum quiddam ex nostris ubi commemoravero, quod etiam nemini ignotum est, alio postea transibit oratio.

XI. Quid tandem Adamus erat? Dei figmentum. Quid Eva? Figmenti segmentum. Quid Seth? Utriusque soboles. Idem-ne porro tibi esse videntur, figmentum, segmentum, et soboles? Quidni? Age, ejusdem-ne hæc essentia inter se sunt, an diversæ? Ejusdem. In confesso igitur est, ut, quæ variæ existunt, eandem tamen essentiam habeant. Nec vero hæc eo a me dicuntur, quod fictionem, aut sectionem, aut aliquid aliud ex his, quæ corporis natura fert, in Divinitatem conferam, (nec enim mihi rursus pugnax quispiam argutator insidiosè imminet,) sed ut in his rebus ea, velut in scena, spectent, quæ non nisi intellectu percipiuntur. Neque enim fieri potest, ut imago ulla et similitudo, rei veritatem plane perfectæque assequatur. Sed

¹ Isai. viii, 19.

dicunt, quorsum hæc? Nec enim unius ejusdemque, alter Filius, alter aliud quidquam. Quid igitur? Eva et Seth, nonne ex eodem Adamo sunt? Ex quo enim alio? Utrum autem ambo ex eo geniti sunt? Minime. Quid ergo? Altera segmentum est, alter Filius: atqui ambo inter se idem sunt: homines enim: nemo est qui inficietur. Desines-ne igitur adversus Spiritum dimicare, quasi videlicet aut genitus omnino sit, aut consubstantialis non sit, nec Deus, præsertim cum ex humana quoque similitudine sententiam nostram haudquaquam impossibilem esse intellexeris? Equidem tibi jam belle esse existimo, nisi pervacaciter admodum contendere, manifestisque rebus obluctari decreveris.

XII. Sed quis, inquires, Spiritum adoravit? Quis, vel veterum, vel recentium? Quis eum oravit? Quo Scripturæ loco eum adorandum aut orandum esse proditum est? Unde hoc hausisti? Nos hujus rei pleniorem causam postea reddemus, cum de non scriptis dogmatibus disseremus. Nunc vero hoc dicere sufficiet. Spiritus est, in quo adoramus, et per quem oramus. « Spiritus enim, inquit, est » Deus: atque eos, qui ipsum adorant, in Spiritu et veritate oportet adorare¹. » Ac rursus, « Quid enim oramus, quemadmodum oportet, nescimus. Sed Spiritus ipse » interpellat pro nobis gemitibus inenarrabilibus². » Et alio loco: « Orabo Spiritu, orabo et mente³, » id est, in mente et Spiritu. Ergo « Spiritu adorare, vel orare, » mihi nihil aliud esse videtur, quam ipsum sibi ipsi orationem vel adorationem offerre. Eamque sententiam quis est qui non comprobaturus sit, de magnis ac divinis viris loquor, qui- que probe norunt unius adorationem trium adorationem esse, propter æqualem trium Personarum dignitatem ac divinitatem? Sed ne illud quidem extimescam, quod « Om-

¹ Joan. iv, 24. — ² Rom. viii, 26. — ³ 1 Cor. xiv, 15.

» nia per Filium facta esse ¹ » dicuntur, tanquam in rerum universitatem Spiritus quoque sanctus aggregandus sit. « Omnia enim, quaecumque facta sunt ², » dicit Evangelista, non omnia simpliciter. Nam ne ipse quidem Pater, nec omnia ea, quæ facta non sunt. Proba ergo Spiritum factum ac procreatum esse, ac tum Filio cum da, et in creaturarum numero colloca. Quandiu autem id probare atque ostendere nequiveris, nihil tibi ad impietatem adjuvanti complexio illa allatura est. Si enim factus est, per Christum utique: ne ipse quidem inficias ivero. Si autem factus non est, quomodo, aut rerum universarum numero includetur, aut per Christum factus erit? Proinde desine, et Patrem, in Filii contumeliam male honorare, (malus enim honor est, Patrem Filio privare, utcumque eum præstantiorem creaturam esse concesseris,) et Filium in Spiritus sancti ignominiam. Non enim conservi opifex est, sed cum eo, qui pari dignitate est, glorificatur. Nihil Trinitati ex te ipso tribue, ne a Trinitate excidas. Nullo modo unam illam naturam ac peræque venerandam trunca. Alioqui si quid ex tribus everteris, totum everteris, imo a toto excideris. Præstat exiguum quoddam unionis illius simulacrum capere, quam profligata quadam audacia in omnem impietatem prorumpere.

XIII. Venit jam ad præcipuum disputationis caput oratio; ac quæstionem quidem, quæ jampridem oppressa est et extincta, atque fidei cessit, hoc tempore renovari doleo et ingemisco: adversus rabulas tamen stare necesse est, ac providere, ne velut deserta causa vincamur, qui Verbum habemus, Spiritusque patrocinium suscipimus. Si Deus, inquiunt, et Deus, et Deus, quid causæ esse potest, quin tres sint Dii, aut quin plurium Deorum principatum colamus? Quinam hæc? Hi nempe, qui perfectiores

¹ Joan. 1, 3. — ² Ibid.

in impietate sunt, aut etiam qui secundas partes tenent, hoc est, qui de Filio rectius sentiunt. Sermo enim mihi, partim adversus ambos communis est, partim adversus hos proprius et peculiaris. Ac cum his quidem ad hunc modum agemus. Quid Trideitis nobis dicitis, qui Filium colitis, etsi a Spiritu descivistis? Vos autem non Bideitæ? Nam si Unigeniti quoque cultum et adorationem abjuratis, haud dubie ab adversariorum partibus statis: ac proinde quid est, quamobrem lenius humaniusque vobiscum agamus, tanquam non omnino mortuis et extinctis? Si autem colitis, atque hactenus saltem salubriter affecti estis, ex vobis quæremus, qua ratione a Bideitatis crimine vosmet vindicare queatis, si quis eam vobis objiciat? Si est vobis sermo prudentiæ, respondete, nobisque etiam respondendi ansam præbete. Illæ enim rationes, quibus Bideitatis crimen propulsabitis, eædem quoque nobis ad Trideitatis crimen propellendum sufficient. Atque ita causam obtinebimus, vos, qui accusatores estis, patronos habituri. Quo quid fortius et generosius?

XIV. At vero quodnam nobis est cum utrisque certamen, et quænam oratio? Nobis Deus unus est, quoniam una Deitas; atque ad unum, ea quæ ex eo sunt, referuntur, etiamsi tres Personas credamus. Neque enim hoc magis, illud minus est Deus; nec hoc prius, illud posterius. Nec voluntate scinduntur, nec potentia dividuntur, nec denique quidquam eorum, quæ dividuis rebus contingunt, hic quoque reperitur. Sed individua in dividuis, ut uno verbo dicam, est Divinitas, ac velut in tribus solibus inter se cohærentibus una lucis commixtio et temperatio. Cum ergo ad Divinitatem, primamque illam causam, uniusque principatum et imperium respexerimus, unum est quod mentis nostræ oculis obversatur. Cum rursus ad ea, in quibus est Divinitas, et quæ ex prima illa causa, citra ul-

lam temporis intercapedinem, ac pari gloria sunt, tria sunt quæ adorantur.

XV. Quid autem, dixerint fortasse, nonne apud ethnicos quoque Deitas una est, ut docent qui plenius apud illos perfectiusque philosophantur, atque apud nos genus universum, humanitas una? Et tamen plures sunt Dii, et non unus, sicut etiam multi homines? At illic communitas unitatem habet, quæ cogitatione sola considerari possit: singularia autem, et tempore, et affectionibus, atque adeo potentia et facultate plurimum inter se divisa sunt. Nam nos, non solum compositi sumus, sed etiam, tum inter nos mutuo, tum nobis etiam ipsis oppositi; ut qui ne unius quidem diei spatio, nedum toto vitæ curriculo, plane iidem maneamus, verum, et corporibus, et animis, perpetuo diffluamus et immutemur. Atque haud scio, num idem quoque in Angelis locum habeat, ac in omni illa cœlesti natura, et Trinitati proxima; tametsi alioqui simplici quadam natura præditi sint, atque ob vicinitatem eam, quam ad summum bonum habent, in bonum firmitus defixi.

XVI. Jam deos illos, quos ethnici colunt, ac dæmones, ut ipsimet vocant, nihil a nobis accusari necesse est, cum a suismet theologis convincantur, quam fœdis affectibus obnoxii, quam turbulenti sint, quot malis scateant, quot mutationes subeant, atque non mutuo solum inter se, sed etiam primis illis causis adversentur, quos Oceanos, et Tethidas, et Phanetas, et nescio quo alio nomine appellant; ac postremo Deum quemdam ob principatus amorem liberis suis infestum, atque alios omnes præ inexplebili cupiditate devorantem, ut et hominum omnium Pater sit, et deorum, quos misere comederit, et evomuerit. Quod si hæc ipsi, ut sermonis turpitudinem fugiant, fabulosa, atque allegorico sensu interpretanda esse contenderint, quid tandem ad illud dicent, « Trifariam omnia divisa

» esse ¹, » aliamque alii cuiusque orbis parti præesse, atque, et materiis, et dignitatibus distinctos esse? At nostræ doctrinæ non eadem est ratio; « Nec pars hæc Jacob ², » ut inquit meus Theologus. Sed horum quodlibet unitatem habet, non minus ejus, cum quo conjungitur, quam sui ipsius respectu, propter essentiæ et potentiæ identitatem. Atque hæc unionis hujus ratio est, quantum quidem ipsi percipimus. Ac siquidem firma est hæc ratio, Deo ob hujusmodi speculationem gratias ago: sin minus, firmiorem aliam conquiremus.

XVII. Tua porro argumenta, quibus nostram illam unionem evertere conaris, statuere nequeo, ludentis-ne potius, an serio agentis esse dicamus. Quodnam enim est hoc argumentum? Ea, quæ ejusdem essentiæ sunt, connumerantur, inquis (connumerationem videlicet appellans in numerum unum contractionem,) quæ autem disparem substantiam habent, minime connumerantur. Unde vos quidem ex eo elabi non potestis, quin juxta hanc rationem, tres Deos asseratis. Nobis autem nullum tale periculum imminet. Non enim ea consubstantialia esse profite-mur. Respondeo: Unica voce te ipsum negotio ac molestia liberasti, malamque victoriam adeptus es: idemque tibi accidit, quod his, qui mortis metu, sibi ipsis laqueo vitam adimunt. Etenim, ne in defendendo unius principatu desudes, Deitatem negasti, hostibusque id, quod quærebant, prodidisti. Ego vero, etiamsi quid laboris subeundum sit, non tamen prodam id quod adoratur. Quanquam ne hic quidem video, quis labor suscipiendus sit.

XVIII. Connumerantur, inquis, ea, quæ eandem substantiam habent: quæ autem substantia inter se differunt, singularem indicationem habent. Unde hoc, et a quibus doctoribus aut fabulatoribus acceperisti? Illud-ne te fugit,

¹ Homer. Iliad. xiv, vers. 189. — ² Jerem. x, 16.

numerum omnem hanc vim habere, ut subjectorum quantitatem, non item rerum naturam, explicet? Ego vero ita simplex, vel imperitus potius sum, ut tria quidem ea nomen, quæ totidem numero sunt, etiamsi substantia differant: unum autem, et unum, et unum, totidem unitates, etiamsi substantia jungantur, non magis videlicet res ipsas intuens, quam rerum quantitatem, juxta quam enumeratione ipsa sit. Quoniam autem mordicus litteram retines, etsi alioquin litteræ bellum inferens, illinc mihi probationes hæc accipe. « Tria in Proverbiis sunt, quæ recte incedunt, leo, hircus, et gallus: et quarto loco, Rex apud populos suos concionem habens¹; » ut reliquas illas natura distinctas quaternitates, quæ illic recensentur, silentio præteream. Duos etiam Cherubim² apud Moysen invenio, qui separatim numerantur. Quomodo ergo, vel illa tria sunt, sicut ars tua præscribit, cum natura atque substantia adeo inter se discrepent: aut hæc singularia, quæ natura inter se adeo æqualia sunt, et copulata? Nam si dominos illos duos Deum et mammonam commemorare velim³, qui numero uno efferuntur, cum usque adeo inter se disjuncti sint, magis quoque fortasse me ob hanc connumerationem ridendum propinarem.

XIX. At, inquis, ea connumerari dicuntur, ejusdemque essentiae esse, quibus nomina ipsa respondent, cum efferuntur: ut homines tres, et Dii tres, non autem tria hæc, aut illa. Quæ enim est hæc relata responsio? Nimirum hoc jam hominis est legem nominibus præscribentis, non verum dicere instituentis. Alioqui mihi quoque pari eadem ratione Petrus, et Paulus, et Joannes non tres erunt, nec consubstantiales, quandiu non tres Petri, aut tres Pauli, aut totidem Joannes non dicentur. Quod enim tu in gene-

¹ Prov. xxx, 29, et seqq. — ² Exod. xxxvii, 7, et seqq. — ³ Matth. vi, 24.

ralibus nominibus retinuisti, hoc nos quoque juxta commentum tuum in specialibus postulamus. Injuste enim feceris, nisi, quod accepisti, dederis. Quid Joannes? Cum in catholicis Epistolis suis « Tres esse ait, qui testimonium » dant, Spiritum, aquam, et sanguinem ¹, » videtur-ne tibi delirare? Primum, quia res substantia diversas connumerare ausus est, quod tu consubstantialibus tantum tribuis. Quis enim hæc unius ejusdemque substantiæ esse dixerit? Alterum, quia modo minime congruenti voces sequentes subjunxit; sed cum tres masculino genere proposuisset, tria neutro genere subjunxit, contra quam tuæ, atque ipsius etiam grammaticæ leges ferant. Verum quid interest, aut cum tres masculino genere præposueris, unum, et unum, et unum subdicere: aut cum unum, et unum, et unum dixeris, non tres, sed tria appellare? Id quod tu in Deitate admittere gravaris. Jam, quid tibi cancer, qui et animal est, et organum, et sidus? Quid canis, qui terrestris est, et marinus, et cœlestis? Nonne tres cancri, aut canes tibi dici videntur? Ita profecto. An ergo proinde quoque consubstantiales sunt? Quis sanus hoc dixerit? Vides-ne quomodo tibi hoc connumerationis argumentum, tot tantisque rationibus confutatum, corruerit? Nam cum nec consubstantialia semper connumerentur, et quæ disparis essentiæ sunt, interdum connumerentur, et tamen in utrisque nomina simul efferri perspiciamus, ex tuis dogmatibus quid tibi accessit?

XX. Quin illud etiam expendo, nec fortasse temere atque absurde. Unum et unum, nonne composita duo constituent? Duo rursus, nonne in unum et unum resolvuntur? Ita sane. Si ergo consubstantialia quidem sunt, quæ componuntur, ut ipse argutaris, diversæ autem substantiæ sunt, quæ secantur, quid ex eo consequetur? Nimirum res

¹ 1 Joan. v. 8.

easdem, et ejusdem, et diversæ essentiae esse. Nec vero facere possum, quin tuas prænumerationes ac subnumerationes rideam, quibus tu perinde gloriaris, ac si res ipsæ in vocabulorum ordine sitæ sint. Nam si ita est, quid impedit, quominus eadem ratione, quoniam eadem, propter æqualem naturæ præstantiam, in sacra Scriptura nunc priori, nunc posteriori loco numerantur, sint quoque ipsæ se ipsis, tum excellentiora, tum abjectiora? Quod idem dicendum etiam habeo de his vocibus, «Deus et Dominus;» atque insuper de his præpositionibus, «Ex quo, Per quem,» et, In quo¹, » quibus tu divinum illud nomen ad artis præscriptum exigis, primam scilicet Patri, alteram Filio, tertiam Spiritui sancto assignans. Quid enim fecisses, si quælibet ex his præpositionibus unicuique Personæ constanter tribueretur; cum, tametsi omnes cum omnibus promiscue construantur, ut studiosis et accuratis lectoribus perspicuum est, tantam ipse per eas, et dignitatis, et naturæ diversitatem inducas? Sufficiunt hæc quidem hominibus non nimis iniquis ac præposteris. Sed quia tibi difficile est, cum semel in Spiritum sanctum insilieris, impetum comprimere, ac non potius, ferociorum aprorum instar, ad extremum usque pertinaciter contendere, teque in gladium ipsum impellere, quoad totum vulnus pectore exceperis: age, quæ tibi ratio supersit, videamus.

XXI. Identidem sæpiusque nobis inculcas, Spiritus sancti Divinitatem nullo Scripturæ loco proditam haberi. Enimvero quod nec novus ac peregrinus, nec introductivus ipse sit, verum et a priscis, et hujus ætatis hominibus agnitus, ac patefactus, quanquam a compluribus jam ostensum est, qui de hac re disseruerunt, atque in divinis Scripturis, nec ignave, nec perfunctorie versati sunt, sed litteram penetrantes, atque intro prospicientes, recondi-

¹ Rom. xi, 36.

tam pulchritudinem divino beneficio viderunt, scientiæque luce collustrati sunt: tamen nos quoque cursim, quantum res patitur, ostendemus; ne alioqui supervacaneam quamdam operam sumere, ac plus æquo ambitioni indulgere videamur, super fundamentum alienum ædificantes. Quod si, quia non admodum dilucide in Scriptura, nec sæpe nominatim Deus appelletur, quemadmodum Pater prius, et postea Filius, blasphemiae, ac supervacaneæ hujus loquacitatis et impietatis ansam præbet; nos tibi hoc incommodum depellemus, posteaquam de rebus et nominibus, ac potissimum de Scripturæ more atque usu nonnihil dixerimus.

XXII. Rerum ergo aliæ non sunt, sed dicuntur: aliæ cum sint, minime dicuntur: aliæ nec sunt, nec dicuntur: aliæ denique et sunt et dicuntur. Horum probationes a me exposcis? Impiger exhibebo. « Dormit¹ » in Scriptura Deus, et « Vigilat², et irascitur³, et proficiscitur⁴, » et pro throno « Cherubinos habet⁵. » Quid audio? Fuit-nouquam ille affectionibus obnoxius? Quando Deum esse corpus audisti? Ergo hoc, cum non sit, effectum est. Ex nostris enim rebus ea, quæ Dei sunt, ut potuimus, nominavimus. Cum seorsim quidem a nobis quiescit, ac velut nostri curam, ob eas, quas ipse perspectas habet, causas, abjicit, « Dormire » dicitur. Nam nos quoque, dum dormimus, omni agendi facultate caremus. Idem, cum repentina mutatione beneficiis nos afficit, « Vigilare » dicitur. Somni enim depulsio est vigilia, quemadmodum aversationis visitatio. Jam cum in aliquem animadvertit, « Irasci » eum solumus. Sic enim nos ira ad puniendum incitatur. Quod autem nunc hic, nunc illic operatur, « Incedere » dicitur. Ab alio enim ad aliud transitus, pro-

¹ Psal. LXXV, 65. — ² Dan. ix, 14. — ³ Isai. v, 25. — ⁴ Gen. xi, 5. — Isai. XXXVII, 16.

fectio est. Quod vero in sanctis illis et cœlestibus mentibus conquiescat, ac velut libenter immoretur, « Sedere » atque in throno esse nuncupavimus; quod ipsum quoque nostrum est. Deus enim nulla in re perinde ut in Sanctis, acquiescit. Jam levitatem ejus motusque celeritatem, volatum appellat Scriptura; visitationem, vultum, largitionem etiam et acceptionem, manum; atque, ut in summa dicam, alia quædam Dei vis et facultas, aliud quidpiam rerum corporearum nobis depinxit.

XXIII. Rursum undenam tu arces illas tuas, « Ingenium aut Anarchum, » (hoc est principii experts,) accepisti, aut nos etiam « Immortalis » vocem? Hæc nominatim et expresse ostende, ea vel rejiciemus, quia in Scriptura non extant, vel expungemus. Atque ita tuismet ipse principiis oppressus interibis, eversis nimirum tibi vocabilis illis, perfugique mœnibus, in quibus confidebas. Nonne perspicuum est hæc de iis sumpta esse, ex quibus colliguntur, tametsi minime dicantur? Quibus tandem? « Ego sum » primus, et ego post hæc. » Et, « Ante me non est alius » Deus, et post me non erit¹. » Totum enim illud « Est, » meum est; nec principium habens, nec finem habiturum, His a Scriptura acceptis, illud quidem, quod ante eum nihil sit, nec antiquiorem ullam ipse causam habeat, Anarchum et Ingenitum appellasti: quod autem nunquam esse desiturus sit, Immortale, atque interitus experts. Ac duo prima rerum genera ad hunc modum se habent. Quænam autem, nec sunt, nec dicuntur? Improbis Deus, quadrata sphaera, præteritum tempus præsens est, homo compositus non est. Ecquem enim unquam eo stuporis progressum cognovisti, ut aliquid tale, vel cogitare, vel pronuntiare ausus sit? Reliquum est ut ostendam quæ sint ea, quæ et sunt, et dicuntur. Deus, homo, Angelus,

¹ Isai. xli, 4, et xliii, 10.

judicium, vanitas, qua hujusmodi argumenta conficiuntur, fideique subversio, et mysterii evacuatio.

XXIV. Cum ergo in nominibus et rebus tantum discrimen reperiatur, quid causæ est, cur litteræ tantopere servias, judaïcæque sapientiæ te ipsum adjungas, relictisque rebus syllabas consecreris? Quod si te his quinque, aut his septem dicente, decem aut quatuordecim ex verbis tuis colligerem; aut ex eo, quod animal ratione præditum et mortale diceres, hominem esse concluderem, an tibi nugari viderer? Et quo pacto id fieri posset, cum tua dicam? Neque enim verba magis sunt ejus qui loquitur, quam illius qui loquendi necessitatem affert. Quemadmodum igitur hic, non ea magis quæ dicuntur, quam quæ intelliguntur, respicerem; eodem modo nec, si quid aliud eorum, quæ vel nullo modo, vel certe non satis aperte dicuntur, ex Scriptura tamen intelligi colligique reperirem, adeo te vocabulorum sycphantam pertimescerem, ut ab enuntiatione ipsa refugerem. Atque ad hunc modum adversus eos stabimus, qui dimidia ex parte recte sentiunt. Tibi enim, qui Filio quoque bellum indicis, ne hoc quidem dicere liceat. Nam qui tot tamque perspicuas ipsius appellationes abnegas, ne his quidem procul dubio movereris, etiamsi multo plures apertioresque cognosceres. Sed jam altius aliquanto sermonem repetens, vobis, tametsi sapientibus et eruditis, omnis ænigmatici sermonis causam explicabo.

XXV. Duæ ex omni ævo illustres vitarum mutationes extiterunt, quæ etiam duo Testamenta, atque, ob rei celebritatem, « Terræ motus » appellantur: altera a simulacrorum cultu ad Legem, altera a Lege ad Evangelium. Ac tertium etiam « Terræ motum » Scriptura nobis annuntiat, nempe migrationem ab hac vita ad alteram illam

• Hebr. xii, 26.

motus omnis et jactationis expertem. Idem porro duobus Testamentis accidit. Quid illud? Non subito, nec ad primam aggressionis impulsione commutata sunt. Quamobrem? (Id enim scire operæ-pretium est.) Ut ne vi pertraheremur, sed persuasione adduceremur. Quod enim voluntarium non est, ne diuturnum quidem est; quemadmodum nec fluenta, aut stirpes, quæ per vim retinentur. Quod autem voluntarium est, tum diuturnius est, tum certius. Atque alterum ejus est, qui vim intulit: alterum nostrum. Alterum divinæ benignitatis: alterum tyrannicæ potestatis. Quocirca Deus minime faciendum sibi duxit, ut invitos beneficiis afficeret, sed ut de volentibus bene mereretur. Ac proinde prædagogi cujusdam et medici more patrios ritus, partim subtrahit, partim concessit, nonnihil videlicet eorum voluptati indulgens, quemadmodum medici ægrotantibus, ut medicamentum, suavioribus rebus arte temperatum et edulcatum, admittant. Neque enim facile est ab iis, quæ longo usu et diuturno tempore in honore ac pretio fuerunt, ad alia transilire. Ergo prima Lex, sublatis idolis, sacrificia permisit. Secunda, submotis sacrificiis, circumcisionem minime prohibuit. Ac postea, ut semel subtrahi sibi aliquid æquo animo tulerunt homines, rebus etiam sibi concessis, hoc est, illi sacrificiis, hi circumcisione, abstinuerunt, atque, ut ex ethnicis Judæi, ita ex Judæis Christiani facti sunt, per mutationes quasi furtim ad Evangelium perducti. Hujus rei tibi fidem faciat Paulus, qui ex eo quod «Circumcidebat, ac purificabatur¹,» eo tandem progressus est, ut diceret: «Ego autem, fratres, si circumcisionem prædico, quid adhuc persecutionem patior²?» Illud dispensationis erat; hoc perfectionis.

XXVI. Huic exemplo Divinitatis doctrina comparari

¹ Act. xvi, 3, et xxi, 26. — ² Galat. v, 11.

potest, nisi quod contrario modo res procedit. Illic enim ex subtractione mutatione fiebat : hic autem ex accessione atque incremento ad perfectionem ventum est. Sic enim se res habet : Vetus Testamentum Patrem aperte prædicabat, Filium obscurius. Novum autem nobis Filium perspicue ostendit, et Spiritus Divinitatem subobscurè quodam modo indicavit. Nunc vero Spiritus ipse nobiscum versatur, seseque nobis apertius declarat. Neque enim tutum erat, Patris Divinitate nondum confessa, Filium aperte prædicari : nec, Filii Divinitate nondum admissa, Spiritum sanctum, velut graviolem quamdam, si ita loqui fas est, sarcinam nobis ingeri : ne alioqui, velut cibus ultra vires gravati, ac solis radiis hebetes oculos adjicientes, iis quoque, quibus præditi eramus, viribus periclitaremur : quin tacitis potius accessionibus, et, ut David loquitur, « Ascensionibus¹, » atque e claritate in claritatem progressionibus et incrementis, Trinitatis lumen splendidi-
 oribus illuceret. Ob hanc causam, ut opinor, ad Discipulos quoque sigillatim se confert, ad excipientium videlicet captum modulumque sese impertiens ; nimirum in Evangelii principio virtutes perficiens², post Christi passionem insufflatus³, post ascensum in igneis linguis appa-
 rens⁴. Quinetiam ab ipso Jesu paulatim declaratur, ut ipse quoque comperies, si animum diligentius adverteris. « Rogabo enim Patrem, inquit, et alium Paracletum mit-
 » tet vobis, Spiritum veritatis⁵. » Quæ quidem verba eo dixit, ne adversarius quispiam Dei esse, aut quasi de alia quadam potestate sermonem facere videretur. Postea
 « Mittet quidem, cæterum in nomine meo⁶, » hic, emissæ voce, « Rogabo, » vocem, « Mittet, » retinuit. Mox, « Mittam⁷ : » ut propriam auctoritatem ostendat. Tem

¹ Psal. LXXXIII, 6. — ² Luc. IX, 1. — ³ Joan. XX, 22. — ⁴ Act. II, 31. —
⁵ Joan. XIV, 16. — ⁶ Ibid. 26. — ⁷ Id. XVI,

denique , « Veniet¹ : » quo verbo Spiritus potestas indicatur.

XXVII. Vides illuminationes paulatim nobis affluentes , theologiæque ordinem , quem nobis quoque tenere præstiterit , ut nec repente atque confertim omnia in lucem efferamus , nec in finem usque occultemus. Illud enim inconsultum atque ab arte alienum fuerit , hoc impium : illud alienos offendere ac vulnerare queat , hoc nostros a nobis abalienare. Enimvero id , quod quibusdam quoque aliis fortasse in mentem venit , ego tamen animi mei foetum esse existimo , superioribus adjungam. Habebat quædam Salvator , quæ a Discipulis , licet alioqui multiplici doctrina implerentur , tunc tamen « Portari posse negabat² , » ob eas fortasse , quas attuli , causas , atque idcirco ea ipsis occultabat. Ac rursus dicebat fore ut ab adveniente « Spiritu » omnia edocerentur³. » Ergo unum ex eorum numero esse censeo , ipsam Spiritus sancti Deitatem , in posterum apertius declarandam , tum videlicet , cum jam post Salvatoris in integrum restitutionem , matura et perceptibilis esset ipsius cognitio , utpote cui ob tam insigne miraculum fides non jam abrogaretur. Quid enim hoc majus , vel ille polliceri , vel Spiritus docere potuisset ? Si modo magnum aliquid existimandum est , Deique magnificentia dignum , quod promittebatur , vel quod docebatur.

XXVIII. Ac de his ita sentio , utinamque sentiam , et quisquis mihi amicus est , colamusque Deum Patrem , Deum Filium , Deum Spiritum sanctum , tres proprietates , unam Divinitatem , nec gloria , nec honore , nec essentia , nec regno divisam , ut quispiam , divino Numine afflatus , non ita pridem philosophatus est. Nec « Luciferum exorientem » videat⁴ , » ut cum Scriptura loquar , nec cœlestis splendoris gloriam , quisquis aliter sentit , aut temporali obsequi-

¹ Joan. xvi, 8. — ² Ibid. 12. — ³ Id. xiv, 26. — ⁴ Job. xi, 17.

tur, aliam aliamque subinde formam assumens, putidumque de maximis rebus consilium capiens. Si enim Spiritus adorandus non est, quomodo me Deum « Per baptismum » effecit¹? » Si autem adorandus, annon colendus, et venerandus? Si porro venerandus, annon Deus? Unum uni cohæret, ac vere aurea quædam et salutaris est hæc catena. Et quidem a Spiritu regenerationem habemus, a regeneratione instaurationem, ab instauratione cognitionem dignitatis illius, a quo instaurati sumus.

XXIX. Hæc quidem sunt, quæ ab eo afferri queant, qui Spiritus Divinitatem nullo Scripturæ loco niti concesserit. Jamvero tibi auctoritatum examen prodibit, ex quibus Scripturæ testimonio admodum confirmatam esse Spiritus Divinitatem ostendetur, iis quidem certe, qui non nimis stolidi et obtusi fuerint, atque a Spiritu aversi. Sic autem expende: « Nascitur Christus²: præcurrit Spiritus³. » Baptizatur ille: hic testimonium affert⁴. Tentatur ille, » hic abducit⁵. Miracula edit ille, hic comitatur. Ascendit » ille: hic succedit⁶. » Quid enim adeo magnum et divinum est, quod non ipse possit? Quod tam divinum nomen est, quo non, excepto Ingeniti et Geniti nomine, appelletur? Patris enim et Filii proprietates incolumes atque integras ipsis manere conveniebat, ne alioqui apud Divinitatem, quæ alia quoque in ordinem et concinnitatem adducit, confusio existeret. Equidem ipse ad tantam nominum copiam, adversus quam frontem perfricant, qui Spiritui adversantur, totus cohorresco. « Spiritus Dei dicitur, » Spiritus Christi, mens Christi, Spiritus Domini, ac Dominus ipse, Spiritus adoptionis, veritatis, libertatis; Spiritus sapientiæ, prudentiæ, consilii, fortitudinis, scientiæ, » pietatis, timoris Dei, utpote horum omnium efficiens,

¹ Matth. xxviii, 19. — ² Luc. ii, 7. — ³ Id. i, 35. — ⁴ Id. iii, 21, et seqq. — ⁵ Ibid. iv, 1 et 18. — ⁶ Act. i, 9, et ii, 4.

» omnia essentia sua implens, omnia continens, mundum
 » quantum ad essentiam implens, interim ipse major quam
 » ut mundus vim illius et potentiam capere possit : bonus,
 » rectus, principalis, natura non gratia sanctificans ; non
 » sanctificatus, metiens non dimensus, impertiens non
 » particeps, implens non impletus, continens non con-
 » tentus, hæreditate acceptus, glorificatus, Patri et Filio
 » connumeratus, minaciter denuntiatus, Dei digitus, ignis
 » tanquam Deus ¹, ad ostendendum, ut opinor, quod ejus-
 » dem essentiae sit : Spiritus qui condidit, qui per baptis-
 » mum et resurrectionem deus creat ² : Spiritus omnia
 » cognoscens, docens, ubi vult, et quantum vult spirans,
 » ducatum præbens, loquens, mittens, segregans ³ : Spiritus
 » qui ad iram incitatur, qui tentatur, qui revelat, qui lucem
 » ac vitam affert ; imo qui ipsamet lux et vita est : qui
 » templa efficit, deificat, perficit, ita ut, et baptismum
 » antevertat, et post baptismum requiratur ⁴ : qui omnia
 » efficit, quaecumque Deus ipse, qui in igneis linguis divi-
 » ditur, qui dona distribuit, qui Apostolos, Prophetas,
 » Evangelistas, Pastores et Doctores facit ⁵ : Spiritus intelli-
 » gens, multiplex, apertus, clarus, incontaminatus, mini-
 » meque impeditus ⁶, » (quod idem valet ac si dicerem,
 sapientissimus, agendique facultate varius ac multiplex,
 omnia explicans ac declarans, arbitrii libertate præditus,
 et immutabilis,) « Omnipotens, omnia lustrans, per om-
 » nes spiritus penetrans, intelligentes, puros, tenuissimos ⁷, »
 (hoc est, per angelicas, ut opinor, Virtutes,) quemadmo-
 dum et propheticos et apostolicos, eodem temporis mo-
 mento, nec tamen in iisdem locis, (alii enim eorum affibi

¹ 1 Cor. II, 11. Scp. I, 7. Rom. VIII, 9, et seqq. Isai. XI, 2, et seqq.
 1 Cor. II, 4, et seqq. Isai. Lxi, 1. Joan. XIV, 17. 2 Cor. III, 15. Psal. Lxlii,
 10. Id. I, 12, 14. Matth. xii, 30. — ² Joan. III, 8. — ³ Act. xiii, 2. —
⁴ Id. II, 3. — ⁵ Id. xix, 5, 6. — ⁶ Sap. vii, 22. — ⁷ 1 Cor. II, 10.

fusi ac sparsi erant,) quod quidem perspicuè ostendit, eum nullius loci circumscriptione coërceri.

XXX. Qui hæc dicunt, ac docent, atque insuper « Pa-
» racletum alium ¹, » velut alium Deum, nominant qui blasphemiam solam adversus eum prolatam inexpiabilem esse sciunt², qui denique « Ananiæ et Saphiræ, postquam » Spiritui sancto mentiti essent³, » perinde ac Deo, non homini, mentiti essent, tam horribilem infamiæ notam inusserunt; quid tandem tibi videntur, Spiritum-ne Deum prædicare, an aliud quid? Quam crassi es ingenii, atque a Spiritu procul remoti, si de hac re dubitas, ac doctore opus habes! Ac tot nominibus, tam vivis, et expressis, in Scriptura Spiritus appellatur. Quid enim testimonia ipsa tibi ad verbum producere attinet? Quæcumque autem hic quoque humiliter dicuntur, velut quod « Detur, mittatur, » distribuatur, charisma etiam, donum, insufflatio, pollicatio, intercessio⁴, » ac si quid aliud hujusmodi, ne singula commemorem, ad primam causam referri debent, ut, ex quo sit, ostendatur, ac non tria principia divisâ, proindeque plures Dii admittantur. Paris enim impietatis est, vel Sabellii more Personas connectere, vel Arii instar naturas distinguere ac separare.

XXXI. Enimvero cum mentis curiositate multum diuque mecum considerassem, atque orationem undecumque explorassem, rei tantæ imaginem quamdam exquirens, cui tandem rerum inferarum divina illa natura comparanda sit, reperire non potui. Quamvis enim exiguam aliquam similitudinem invenerim, major tamen me pars fugit, humique me cum meo exemplo relinquit. Oculum quemdam, et fontem, et fluvium mihi proposui, quemadmodum

¹ Joan. xiv, 16. — ² Matth. xii, 31. — ³ Act. v, 3. — ⁴ Luc. xi, 13. Joan. xvi, 7. Hebr. ii, 4. 1 Cor. xii, 30. Act. ii, 38. Joan. xx, 22. Galat. iii, 14. Rom. viii, 26.

alii quoque, ut viderem, num Pater cum oculo, Filius cum fonte, Spiritus cum fluvio proportionem quadam conveniret. Hæc enim, nec tempore distinguuntur, nec ob continuitatem a se invicem abruptuntur: ac tribus insuper proprietatibus quodam modo scindi videntur. Sed subiit metimor, primum ne fluxio quædam Divinitatis stabilitatis expers admittatur. Deinde ne per hanc similitudinem unum numero introducat. Oculus enim, et fons, et fluvius unum sunt numero, varie efformata.

XXXII. Solem rursus, et radium, et lucem cogitavi. Verum hic quoque metuendum est; primum, ne incompositæ naturæ compositio quædam excogitetur, quemadmodum solis, et eorum, quæ soli insunt; deinde, ne Patri quidem essentiam tribuamus, reliquos autem subsistere negemus, sed facultates quasdam Dei constituamus, quæ ipsi quidem insint, non autem per se subsistant. Neque enim radius, aut lux, alii soles sunt, sed solis velut rivi quidam, et substantiales qualitates. Ac præterea, ne simul, et esse, et non esse, Deo in his demus, (quantum ex hoc exemplo colligi potest,) id quod superioribus etiam absurdius fuerit. Quinetiam aliquem audiavi huiusmodi similitudinem adumbrantem. Fingebat splendorem quemdam solarem parieti affulgentem, atque ex aquarum motu tremiscentem, quem, cum radius per intermedium aërem suscepit, postea solido ac renitente corpore repressus, mirabilis quædam subsultatio existit. Multis enim crebrisque agitationibus subsilit, ita ut non magis unum sit, quam multa, nec rursus magis multa, quam unum; ac tanta celeritate cōit vicissim, et dissociatur, ut prius quam oculis teneatur, fuga se proripiat.

XXXIII. Sed ne hoc quidem ipse constituere possum: primum quoniam, quid splendori illi motum afferat, admodum perspicuum est: at Deo nihil antiquius est, quod

ipsi motum dederit. Ipse quippe omnium causa est, nec antiquiorem causam habet. Deinde quod hic earundem rerum suspicio occurrit, nimirum compositionis, diffusionis, incertæque et instabilis naturæ, quare nihil de Divinitate cogitandum est. In summa nihil est in quo mens mea gradum figere queat, dum, quod imaginor, in exemplis considero; ni forte quispiam ea animi æquitate sit, ut, cum unum aliquid ex proposita imagine acceperit, reliqua projiciat. Postremo itaque hoc mihi consultissimum visum est, ut, missis factis imaginibus illis, atque umbris, ut fallacibus, plurimumque a veritate remotis, piam ipso cogitationem fidemque mordacius retineam, atque in paucis verbis insistens, duceque Spiritu sancto utens, quemque hic splendorem accepi, hunc ad extremum usque, tanquam fidum socium et congerronem, custodiens, ævum hoc trajiciam, aliosque pro viribus adducam, ut Patrem et Filium, et Spiritum sanctum adorent, unam Divinitatem ac potentiam: quoniam ipsi omnis gloria, honor, imperium in sæcula sæculorum. Amen.

ORATIO XXXII¹.

De moderatione in disputationibus servanda, et quod non sit cujusvis hominis, nec cujusvis temporis de Deo disputare.

ARGUMENTUM.

I. Festorum solemnitas, piæ negotiationis tempus. II.

¹ Alias xxvi, quæ autem xxxii erat, nunc est xlii. Habita anno 580.

Pax utilis, discordia turpis ac perniciosa. — Quid pacem arceat; quid discordiam inducat. III. Animorum petulantia, et temeritas, inscitiae fœtus, schismata generant. — Elegans equi similitudo. IV. Amarulenti schismatum fructus. V. Schismata Ecclesiam in multos partes dilacerant. — Multos Christos ac Spiritus fingunt hæretici. — Vera Trinitatis confessio. VI. Nemo ignaviae indulgeat, aut cæco impetu abripiatur. — Defectus steriles, excessus periculosi. VII. Ordinis excellentia. VIII. Creatâ omnia ordine servantur. — Pravi perturbationes ac confusionis effectus. IX. Creator ordinem præscripsit cunctis animantibus. Soli. Lunæ. Nocti. Diei. Homini. — Ordo hominem a mutis animantibus secernit. X. Ordo omnium rerum pater et præsidium. — Ordo in Ecclesia necessarius. XI. Corpus unum in Christo sunt Christiani. XII. Ordini in Ecclesia constituto magna debetur reverentia. — Non omnes Apostoli, nec Prophetæ, nec Interpretes. XIII. Docere in Ecclesia præclarum est, sed periculosum. XIV. Multum laboris et periculi pastoribus incumbit. — Quantum silentii donum. XV. Deus lux omnium sublimissima. — A paucis cernitur. XVI. Moyses hanc lucem viæ per petram conspexit. XVII. Ordo sacerdotii in veteri lege. XVIII. Ordo sacerdotii in nova lege. — Apostolorum moderatio ordinisque disciplina. XIX. Vere humilis, qui de Deo parce loquitur. XX. Utrum de Deo tacendum. — Non omnino de Deo tacendum; sed a pertinaci contentione abstinendum. XXI. In tempore de divinis rebus loquendum. — Sermonis ac disputationis cura doctioribus relinquenda. — Se ipsum nosse, sapientia est. XXII. Sunt alii aliis doctiores ac sapientiores. — Deus ex æquo dona hominibus largitur. XXIII. Communia sunt omnibus Lex, Prophetæ, Testamenta, etc. XXIV. Alius triplici doctrinae genere ins

tractus. XXV. Alius exiguo ingenio est, et lingua pauper. — Ille vere dives, qui corde credit, et ore confitetur. XXVI. Nihil fide iniquius, si tantum in eruditos caderet. — Omnes beneficiis afficere, id Deo maxime proprium est. XXVII. Non sapere plus quam oportet sapere. — Varia Creatoris dona. Mens. Visus. Memoria. Sermo. — Animæ et corporis affectiones. — Ratio omnium affectuum moderatrix. XXVIII. Sermonis contentiosi pericula. XXIX. Lingua freno coercenda. — Præcipua charitatis officia. — Neminem præcipiti iudicio condemnare, atque erga omnes humilem se præbere. — Delinquentes leniter et humane corrigere. XXX. Nec cito, nec temere membrum judicandum, aut secandum. — Erga delinquentes triplex medicinae regula. — Publica confessio et correctio. XXXI. Fraternalis fœtor spirituali odore curandus. — Fratrem lenitate ac benignitate lucrari. XXXII. Non quibuslibet, nec semper de fide disputandum. XXXIII. Variæ virtutes sunt varia viarum genera.

I. QUONIAM prompto animo convenistis¹, ac dies hic festus maxima hominum frequentia celebratur, ob idque potissimum negotiandi occasio se offert, age, merces quasdam vobis offeramus, si minus communi huic vestræ animorum alacritati pares, viribus certe nostris haudquaquam inferiores. Illa enim majora postulat, hæ autem mediocria solum præstant atque afferunt. Porro satius est, id, quod per facultates licet, afferre, quam officio prorsus deesse. Non enim qui huiusmodi res non potuit, in iudicium vocandus est; sed qui noluit, in culpa hæret, sive de divinis, sive de humanis loquamur. Atque ipse quidem exiguus et

¹ Vide *D. Guillon*, tom. 71, p. 270-290.

pauper sum pastor, pastoribusque aliis, ut parce dicam, nondum gratus atque acceptus; quod recto-ne iudicio ac ratione, an animi malevolentia et contentionis studio fiat, nescio: « Deus scit, inquit Apostolus, idque revelationis » dies perspicue declarabit, ignisque ille postremus ¹, » quo nostra omnia expendentur, aut purgabuntur. Enitar tamen, quantum potero, daboque operam, ne gratiam divinitus acceptam premam atque occultem; ac « Lucernam sub » modio ponam, talentumque in terra defodiam ², » (hæc enim a vobis sæpe audiui, cum mihi cessationem atque desidiam probro verteretis, ac silentium nostrum graviter et iniuncto animo ferretis,) verum ut veritatis doctrina vos erudiam, ac per Spiritum concordem reddam.

II. Unde igitur vos instruere incipiam, fratres mei? Aut qua oratione Athletas, quorum est præsens hæc celebritas, ornabo? Quid primum dicam, aut quid maximum? Quid animabus vestris maxime profuturum? Aut quid huic tempori commodissimum? Id vero hac demum ratione perspicemus. Quidnam in nostra doctrina præstantissimum est? Pax. Addam etiam, utilissimum. Contra, quid turpissimum ac perniciosissimum? Discordia. Quoniam autem hanc quæstionem proposui, eique respondi, quod secundum est, insuper sciscitabor. Quidnam præcipue illam sustulit, et hanc invexit? Ut, quemadmodum in corporum morbis, causis prius circumcisis, ac turbulentarum animi permotionum fontibus obstructis aut exsiccatis, ita demum profluentes hinc rivulos effectusque simul amputemus. Neque enim fieri potest, ut, principiis non recte consideratis, quidquam de fine præclare cognoscamus. Vultis igitur vos ipsi utriusque rei causam proferre ac declarare? An mihi potius, medici munere fungenti, eam indicandam et corrigendam relinquitis? Ego enim, et di-

¹ 2 Cor. xii, 2, et 1 Cor. iii, 13. — ² Matth. v, 15, et xxv, 18.

cere paratus sum, si ita voluntas vestra ferat, et dicentes audire paratior. Sed nihil dubito, quin dicendi munus mihi concedatis; quem non omnino imperitum et contemnendum morborum hujusmodi medicum, aut in curandis animis ignarum fortasse existimatis: sive id recte, sive secus arbitremini. Nec vero mirum vobis videatur, si novam, et ab animorum vestrorum sensibus alienam orationem attulero. Quanquam enim ab expectatione et opinione vestra, non tamen a veritate discrepabit, ut quidem ipse affirmo, ac vos assentiemini, si ad extremum usque audire sustinueritis, ac non ipsum, quod objicio, vobis usuveniat, nimirum ut præ animorum fervore, antequam ad calcem oratio pervenerit, exurgatis.

III. Ingenia magna et ferventia tumultus istos, in quibus versamur, excitarunt, non illa quidem simpliciter magna et ferventia; (nec enim ii sumus, qui animorum acrimoniam in vitio ponamus, sine qua nemo magnum aliquod pietatis aut cujusquam alius virtutis munus exequi potest;) sed quæ cum generositate imprudentiam, et inscitiam, et, qui malus ipsius fœtus est, temeritatem conjunctam habeant; siquidem inscitix fœtus, est temeritas. • Infirmi enim et imbecilles animi, tam ad virtutem, quam ad vitium segnes et tardi sunt, neque in alterutram partem magnopere inclinantur: non secus scilicet atque hominum torpore laborantium incessus. At fortes et generosi, quemadmodum si ratione, gubernentur et coërceantur, magnum ad virtutem pondus afferunt; ita, si a scientia et ratione deserantur, non minus momenti ad vitium habituri sunt. Sic nimirum equum acris esse ac generosæ naturæ necesse est, qui quidem, sive in bellis atque acie, sive in ludicro cursu et certamine victor sit discessurus: at idem tamen nullum unquam egregium sui usum præ-

buerit, nisi freno eruditus, et accuratiori exercitatione domitus et cicuratus fuerit.

IV. Atque hoc, ut plurimum, est, quod membra laceravit et distraxit, fratres divulsit, urbes perturbavit, populos in furorem præcipites agit, gentes armavit, reges in mutuum exitium concitavit, sacerdotes cum plebe, et secum etiam ipsos, plebem rursus non minus ipsam secum, quam cum sacerdotibus commisit, parentes cum liberis, liberos cum parentibus, viros cum uxoribus, uxores cum viris. Hoc omnia benevolentiae nomina permiscuit, atque confudit, servos et dominos, discipulos et præceptores, senes et juvenes : convulsaque et proculcata pudoris lege, quo nullum majus adjumentum ad virtutem excogitari potest, contumaciae arrogantiaeque legem induxit : factique sumus, non jam tribus ac tribus separatim, quod olim Israël objectabatur; nec Israël et Juda, duo, inquam, illa unius ejusque perangustae gentis segmenta; verum per domos et familias, et necessaria sodalitia, velutque in se quisque, divisi sumus, universus orbis terrarum, universum hominum genus, quod Dei verbum fideique doctrina peragravit; multorumque imperium in effrenam quamdam atque imperii expertem licentiam recidit, atque « Ossa nostra secus infernum dissipata sunt ¹; » quasi vero necessum esset, nos, exteris hostibus domitis, mutuo alios ab aliis opprimi, et furentium ritu in proprias carnes sævire, ac ne id quidem sentire, verum majorem ex hoc malo, quam alii ex pace et concordia, voluptatem capere, calamitatemque lucro ducere, atque existimare per eversionem nostram « Obsequium Deo præstari ², » ac dividi et incendi, non recta et laudabili divisione, sed turpi et vituperanda, nec incendio illo, quo animæ labes expiantur, sed funesto et exitiali. « Non enim acutus ille sermo ³, » hoc est, Christi

¹ Psal. cxl, 7. — ² Joan. xvi, 2. — ³ Hebr. iv, 12.

gladius, pios ab impiis dividit, nec « Ignis jacitur et accenditur »¹, » hoc est, fides, et Spiritus fervor, id quod terrenum est absumens ac devorans : sed contrario plane, ac prius, modo, scindimur et consumimur.

V. Hoc nimirum est, quod Ecclesiam, quæ una est, in multas partes discidit, atque disjunct, non in unum « Paulum, aut Cepham, aut Apollo »², » aut aliquem plantatorem, vel rigatorem, sed in multos Paulos, et Cephas, et Apollones, a quibus jam ipsi, non ab eximio illo et novo Christi nomine, appellamur, et eorum esse dicimur. Atque utinam mihi hoc solum dicere liceret. Verum, et multos Christos, (horresco referens,) pro uno produxit, genitum, creatum, a Maria incipientem, eo, unde in ortum prodiit, relabentem, hominem mentis expertem, revera existentem, et specie tenus adumbratum. Consimili modo multos quoque Spiritus, increatum, et creatum, et honore parem, et vim atque facultatem, et simplex ac nudum Spiritus nomen. At unum Deum Patrem agnoscere oportebat principii expertem et ingenitum, et unum Filium ex Patre genitum, et unum Spiritum ex Deo substantiam habentem, concedentem Patri Ingeniti proprietatem, Filio vero generationem ; de cætero autem ejusdem omnino naturæ, dignitatis, honoris, gloriæ. Hæc, inquam, agnoscere oportebat, hæc confiteri, hic gradum figere, prolixas autem nugæ ac profanas verborum novitates ad otiosos homines amandare. Quid hæc omnia excitavit? Animorum fervor, qui sine ratione ac scientia cohiberi nequit, fideique navigium gubernatore carens.

VI. Quod cum perspectum habeamus, fratres, demus operam, ut nec ad bonum pigri simus, sed Spiritu ferveamus, ne alioqui paulatim in mortem obdormiamus, aut, « Dormientibus nobis, prava zizania hostis superserat »³ ; »

¹ Luc. xii, 49. — ² 1 Cor. iii, 4. — ³ Matth. xiii, 25.

pigritia enim somno conjuncta est : nec rursus cum temeritate et cæco nostri amore acres ac fervidi, ne alioqui in transversum abripiamur, viaque regia excidamus; atque in horum alterum necessario incidamus, ut vel calcaribus propter tarditatem opus habeamus, vel propter animorum fervorem in præceps ruamus. Quin potius, cum ex utroque, id, quod utile ac fructuosum est, collegerimus, hoc est, ex illa mansuetudinem, ex hoc autem zelum; quod in utroque noxium ac perniciosum est, fugiamus, illius nempe pigritiam, hujus vero temeritatem; ut nec ob defectum steriles et infrugiferi simus, nec ob excessum periclitemur. Æque enim inutiles sunt, iners ac supina segnities, et imperitus fervor : illa ad bonum minime accedens, hic autem ulterius cadens, ac dextro dexterius aliquid efficiens. Atque id probe cognitum et exploratum habens divinus Salomon : « Ne declines, inquit, ad dexteram, neque ad » sinistram ¹ : » nec per contraria in æquale malum, hoc est, in peccatum, incidas. Quanquam alioqui, quod natura dextrum est, his verbis laudat : « Vias enim, quæ a » dextris sunt, novit Deus; perversæ autem sunt, quæ a » sinistris sunt ². » Qui fit igitur, ut qui dextrum laudat, idem rursus a dextro nos abducatur? Intelligit profecto quod dextri speciem habet, cum revera tale non sit. Quod etiam spectans alio loco inquit : « Ne magnopere justus » sis, nec supra modum sapiens ³. » Par etenim justitiæ atque sapientiæ detrimentum affert acris, tam in actione, quam in sermone, animi impetus, a bono nempe et a virtute propter excessum excidens. Hanc enim defectus, et excessus, peræque labefactant, non secus ac regulam additio aliqua aut subtractio.

VII. Nemo igitur sapientior sit, quam conveniat, nec lege exactior, nec luce splendidior, nec norma rector,

¹ Prov. 17, 27. — ² Ibid. — ³ Eccle. 7¹¹, 17.

nec præcepto sublimior. Id verò qua tandem ratione consequemur? Nempe si ordinem noverimus, et naturæ leges comprobemus, et rationem ducem sequamur, et disciplinam non aspernemur. « Respicite in cœlum sursum, et in » terram deorsum ¹, » atque animadvertite, quo pacto tota hæc rerum moles constructa et coagmentata fuerit, unde originem habuerit, quid ante earum concinnitatem erat, et quo jam nomine Universum appelletur. Ordine omnia concinnata et distincta sunt, et quidem concinnatore Verbo : non quod, ut una res, ita omnes simul produci non possent; (nam qui ea, quæ non erant, in ortum produxit, productisque formam et speciem dedit, idem profecto nequaquam infirmitate prohibebatur, quominus omnia simul in lucem ederet et exornaret;) verum ob hanc causam, aliud primum, aliud secundum, aliud tertium numeratur, ac sic deinceps, ut simul cum rebus creatis ordo statim ingrediatur.

VIII. Ordo itaque omnia constituit, et colligavit. Ordo cœlestia et terrestria continet. Ordo in iis, quæ ratione et animo intelliguntur, locum habet : ordo in iis, quæ sensibus percipiuntur : ordo in Angelis; ordo in astrorum motu, magnitudine, mutua relatione, et splendore. « Alia » enim solis claritas est, alia lunæ, alia stellarum. Stella » enim a stella claritate differt ². » Ordo in anni partibus et temporibus, apte et distincte, tum progredientibus, et recedentibus, ac per mediocritatem asperitatem mitigantibus. Ordo in diei et noctis mensuris et intervallis. Ordo in elementis, ex quibus corpora constant. Ordo cœlum in orbem duxit, aërem exporrexit, terram supposuit, aut etiam superposuit, humidam naturam fudit, atque in unum locum contraxit, ventos emisit, sed non ad hominum perniciem immisit, aquas in nubibus astrinxit, sed non retinuit,

¹ Isai. LI, 6. — ² 1 Cor. XV, 41.

verum in totius terræ faciem apte et æquabiliter sparsit : idque non ad exiguum tempus, vel unum aliquem temporis articulum, verum ab ipsis mundi primordiis in finem usque, eandem viam recto cursu tenentia, et circumeuntia, fixaque simul et motu agitata; illud vi Verbi et facultate, hoc rei fluxæ et caducæ natura. « Statuit ea » in æternum, et in sæculum sæculi : præceptum posuit, et non præteribit ¹. » Illud fixionis et soliditatis : at si quid ortum habuit, aut habiturum est, hoc fluxionis. Atque vigente quidem ordine, stat mundus, id est, universum hoc; ac ejus pulchritudo, certa et stabilis est. Contra autem, perturbatio et confusio, in aëre procellas, in terra motus, in mari exundationes, in urbibus domibusque bella et dissidia, in corporibus morbos, in animis peccata, procreavit. Hæc enim omnia, non pacis nec ordinis, sed confusionis et perturbationis nomina sunt. Quin celebrem quoque illam, atque omnium sermone tritam, et in expectatione positam labem et corruptionem, haud quidquam, fratres, aliud esse existimemus, quam profusam quamdam et redundantem omnium rerum confusionem; ut enim ordo constringit, ita perturbatio solvit, ac dissipat; cum videlicet, totam hanc rerum machinam dissolvere, aut in præstantiorem statum commutare, ei visum fuerit, a quo conjuncta, et tanquam vinculis quibusdam constricta est.

IX. Ordo cunctis animantibus ortum, et alimentum, ac sedes unicuique aptas et congruentes indixit, et quasi lata lege præscripsit. Ac nec delphinum quisquam arva sulcantem vidit, nec bovem per aquas lubricum iter carpentem; quemadmodum nec solem noctu decrescentem vel augescentem, nec rursus lunam mortalibus interdiu prælucentem. « Montes excelsi cervis : petra refugium he-

¹ Psal. cxlviii, 6.

» *Hiacis. Fecit Ionnath in tempora : sol cognovit occasum
 » stultum* ¹. » Simul atque nox terram caliginē obduxit, sta-
 tim homo somnō contrahitur, feræ autem libere vagantur,
 æ pabulum a Creatore concessum quærunt : simul atque
 dies illuxit ; statim bestię congregantur, atque homo ad
 opus properat. Ita ordine, et juxta naturæ legem atque
 rationem, nobis invicem cedimus. Addam, quod maximum
 est ; maximeque proprium. Ordo ex mixtura, partim ra-
 tione prædita, partim rationis experte, hominem, ratione
 utens animal, construxit ; atque arcano modo, et qui nul-
 lis verbis explicari queat, terram cum mente, mentem cum
 spiritu vinxit. Quin, ut mirabilius aliquid in figmento suo
 atque opere patraret, idem ipsum et conservavit, et dis-
 solvit. Alterum enim superinduxit, alterum subduxit, non
 secus atque in aquatum fluxu, corporique mortali immor-
 talem per dissolutionem comparavit. Ordo nos a mutis
 animantibus distinxit, civitates condidit, leges instituit,
 virtutem honoribus, vitium pœna affecit, artes excogitavit,
 matrimonia copulavit, ac, per ærem erga susceptos libe-
 ros amorem, feram et agrestem vitam ad humanitatem
 excoluit, et, quod terreno hoc et carnali amore majus est,
 divinum amorem animis nostris infixit.

X. Quid autem singula commemorare attinet ? Ordo,
 omnium rerum pater et præsidium est ; istudque Verbi,
 rerum omnium conditoris et architecti, solus recte dicere
 queat, siquidem vocem acceperit : « Cum mundus a Deo
 » crearetur ac produceretur, cum eo eram cuncta compo-
 » nitus : cum adornaret thronum suum supra ventos, ac
 » supernas nubes roboraret : cum fundamenta terræ ja-
 » ceret, et velut firmos et tutos fontes, qui sub cœlo sunt,
 » statueret, ac Spiritu oris sui virtutem omnem illis largi-
 » retur ¹. » Verim, (ut ad rem ipsam, cujus causa hæc

¹ Psal. ciii, 18, et seqq. — ² Prov. viii, 27, et seqq, et Psal. xxxii, 6.

omnia disserui, et ad quam jampridem oratio nostra festinat, veniamus,) ordo in Ecclesiis quoque constituit, ut alii oves sint, alii pastores, alii præsint, alii subsint ac parent; alius velut caput sit, alius pes, alius manus, alius oculi, alius aliud quoddam corporis membrum, ad totius Ecclesiæ concinnitatem et utilitatem, vel inferius, vel præstantius. Et quemadmodum in corporibus, nec membra inter se divulsa sunt, verum cuncta unum corpus sunt ex diversis membris conflatum; nec rursus idem omnium munus est, tametsi alioqui ad benevolentiae concordiaeque necessitatem, honorisque parem in disparibus rationem, alia aliorum opera ex æquo indigeant; neque enim oculus ambulat, sed viam commonstrat: nec pes prospicit, sed progreditur ac loca permutat: nec lingua voces accipit, id enim aurium est: nec rursus auris loquitur, quod linguae officium est: et nasus quidem est odoratus organum; « Gut- » tur autem, ut ait Job, cibos degustat¹: » manus porro dandi atque accipiendi instrumentum est: mens denique omnibus præest atque imperat, nimirum a qua vis sentiendi proficiscitur, et ad quam sensus omnes referuntur. Ad eundem quoque modum apud nos, hoc est, in communi Christi corpore, res se habet.

XI. « Omnes enim corpus unum in Christo sumus, » singuli autem Christi, atque alii aliorum membra². » Alii enim dominantur et præsunt: alii parent ac reguntur. Et quamvis non eadem sit utrorumque actio, siquidem imperare, et imperio regi, non est idem; fiunt tamen utraque unum in unum Christum, ab eodem Spiritu constructa atque compacta. Ac rursus, quemadmodum inter eos, qui subsunt, permagnum discrimen reperitur, ut qui, et doctrina, et usu atque exercitatione, et ætate inter se differant: eodem modo inter præfectos quoque non parva differentia

¹ Job. xxxiv, 3. — ² Rom. xii, 5.

est; ac « Spiritus Prophetarum Prophetis subjici ¹ » cum Paulus ipse affirmet, non est cur de ea re dubites. Et « Quosdam quidem, inquit, posuit Deus in Ecclesia, primum Apostolos, secundo Prophetas, tertio Pastores et Doctores ² : » primum propter veritatem, alterum propter umbram, postremum propter utilitatis et illuminationis divinæ mensuram. Et Spiritus quidem unus est, non autem pares gratiæ : quandoquidem nec paria Spiritus conceptacula. « Alii enim per Spiritum datur sermo sapientiæ » et speculationis, alii sermo scientiæ et revelationis, alii » fides certa minimeque dubia, alii virtutum sublimium- » que miraculorum operationes, alii gratiæ curationum, » opitulationes, hoc est, defensiones et patrocinia; gu- » bernationes, hoc est, carnis castigationes, genera lin- » guarum, interpretationes linguarum ³, » aliis denique præstantiores, aliis inferiores gratiæ, pro fidei nimirum ratione et proportionem.

XII. Hunc ordinem revereamur, o fratres, hunc tueamur et conservemus. Alius auris sit, alius lingua, alius manus, alius aliud quiddam. Alius doceat, alius discat; « Alius propriis manibus bonum operetur, ut habeat quod » egentibus impertiatur ⁴ : » alius præsit ac plebem moderetur : alius justitiæ laudem per ministerium consequatur. Qui docet, in modestia doceat. « Prophetæ enim duo aut » tres loquantur, idque vicissim, atque unus interpretetur. » Quod si alii revelatum fuerit, primus loco ipsi cedat. Et » qui discit, in obedientia : et qui tribuit, in hilaritate : et » qui ministrat, in alacritate ⁵. » Ne linguæ munere, quod omnium promptissimum et paratissimum est, omnes furgamur : « Nec omnes Apostoli simus, nec omnes Prophetæ, » nec omnes Interpretes ⁶. » Amplum et præclarum est de

¹ 1 Cor. xiv, 32. — ² Id. xii, 28. — ³ 1 Cor. xii, 8, et seqq. — ⁴ Ephes. iv, 28. — ⁵ 1 Cor. xiv, 29, et seqq., et Rom. xii, 8. — ⁶ 1 Cor. xii, 29.

Deo verba facere? At præclarius est se ipsum Deo purgare; « Quoniam in malevolam animam non introibit sapientia ¹. » Atque ad justitiam seminare, et vitæ fructum metere jubemur ², » ut scientiæ lumine perfundamur. Ac Paulus ipse « Nos per Domini amorem ³ » a Domino cognosci vult, per cognitionem autem doceri: atque hanc ad cognitionem viam, meliorem esse censet, quam opinionem eam, quæ inflat.

XIII. Magnum et præclarum est docere? At discere periculo vacat. Quid pastoris munus tibi arrogas, cum ovis sis? Quid caput efficeris, cum pes sis? Quid exercitum ducere aggrederis, in militum ordinem ascriptus? Quid magna quidem illa, sed incerta et periculosa maris lucra consectoris, cum terram sine periculo colere liceat, etiamsi minore cum quæstu? Si vir secundum Christum es, « Et » sensus excitatos habes ⁴, » ac splendido scientiæ lumine præditus es, « Dei sapientiam loquere, quæ apud perfectos » prædicatur ⁵, » et quæ in mysterio abscondita est; idque ita demum, si commodum tempus nactus fueris, eamque fidei tuæ commissam habueris. « Quid enim a te ipso habes, » quod tibi datum non fuerit, et quod non acceperis ⁶? » Sin autem ætate adhuc tenera es, atque humili et abjecto animo, viribusque infirmioribus, quam ut ad sublimiora progredi possis, Corinthius esto, satis tibi sit « Lacte nutriri ⁷. » Quid solidiorem cibum expetis, quem membra præ imbecillitate conficere, atque in alimentum vertere nequeant? Loquere sane, si quid silentio melius et excellentius habes; (neque enim te fugit laudi duci, si quis « Ordinem labiis adhibeat ⁸;) » at ubi silere præstat, quam loqui, silentium complectere. Atque alia dicere

¹ Sap. 1, 4. — ² Osee. 12. — ³ 1 Cor. VIII, 3. — ⁴ Hebr. 7, 14. — ⁵ 1 Cor. 12, 6. — ⁶ Id. 14, 7. — ⁷ Id. 13, 2. — ⁸ Prov. 10, 19.

amare, alia audire; alia laudibus evehere, alia, non tamen acerbe, ablegare ac rejicere.

XIV. Nescitis, fratres, qua difficultate premamur, nos, inquam, qui hic cum pompa et fastu præsidemus, atque hæc vobis, qui e plebe estis, quasi lata lege promulgamus. Ac fortasse nec nostrum plerique, (quod etiam deplorandum est,) intelligunt, quomodo apud Deum, et cogitatio omnis, et sermo, et actio velut ad lancem expendatur: nec apud Deum duntaxat, verum et apud omnes ferme homines; qui, cum rerum suarum tardi sint iudices, alienarum autem expediti sunt exploratores, citiusque aliis gravissima errata, quam nobis levissima, concesserint; ac, si imperitiores sint, nobis impietatis crimen potius impegerint, quam ut mediocrem suam inscitiam accusent. Nescitis quantum Dei sit silentium, ac loquendi necessitate minime constrictum esse, ita ut pro arbitrato alterum eligere, alterum fugere liceat, sibi, et sermonis, et silentii, velut dispensatorem esse. Nam cum omnis oratio suapte natura imbellis sit, facileque percellatur, ac propter repugnantem sermonem libertate careat; tum vero ea, quæ de Deo suscipitur, tanto plus habet difficultatis, quanto subjectum majus est, et zelus amplior, et periculum gravius. Quid autem metuemus? Aut quid erit ex quo fiduciam concipiemus? Mens-ne, an sermo, an auditus, cum in tribus his rebus periculum versetur? Nam et res divinas mente consequi arduum, et verbis explicare perdifficile, et purgatas aures nancisci majoris laboris et difficultatis est.

XV. Deus quidem lux est, atque adeo lux omnium sublimissima, cujus perexiguus quidam rivus, ac radius ad inferiora pertingens, est lumen id omne quod cernimus, quantumvis splendidum videatur; sed, ut video, caliginem nostram calcit, « Ac tenebras latibulum suum posuit¹, »

¹ Psal. xviii, 12.

easque inter se ac nos, quemadmodum olim Moyses « Ve-
 » lamen » inter se et obduratos Israëlitas, interjecit, ne
 sepositam ac reconditam pulchritudinem, qua pauci digni
 sunt, caliginosa natura facile videat, facile quoque propter adipiscendi
 aspectus compos effecta, facile quoque propter adipiscendi
 facilitatem amittat : verum lumen cum lumine, semper in
 sublime per appetitionem trahente, versetur, ac mens,
 vitiorum maculis repurgata, purissimæ menti jungatur,
 partimque nunc nobis aliquid appareat, partim autem
 postea, hoc scilicet virtutis, propensiorisque in Deum
 animi, seu expressæ illius similitudinis præmium ferens.
 « Videmus enim nunc, inquit, per speculum et in ænig-
 » mate : tunc autem facie ad faciem. Nunc cognosco ex
 » parte : tunc autem cognoscam sicut et cognitus sum¹. »
 Quanta est vilitas nostra et abjectio ! Quanta rursus polli-
 citatio ! Deum perinde cognoscere, ut cogniti sumus. Hæc
 Paulus magnus ille « Veritatis præco, gentium in fide
 » magister², qui amplissimum orbem Evangelio implevit³ ;
 » qui nulli alii, quam Christo, vixit⁴, qui usque ad tertium
 » cælum penetravit⁵, qui paradisi spectator fuit, qui deni-
 » que perfectionis causa dissolutionis desiderio flagrabat⁶. »

XVI. Ac Moyses quidem « Dei posteriora per petram »
 vix conspexit⁷, (quæcumque tandem posteriora illa erant,
 et quæcumque petra,) idque cum multum precatus esset,
 ac promissi compos factus : nisi quod non tantum, quan-
 tum exoptabat, vidit, plusque illud fuit, quod eum fugit,
 quam quod ipsius oculis sese objecit ; Moyses, inquam,
 qui Pharaonis Deus erat, qui tantam hominum multitudi-
 nem ductabat, qui tantam miraculorum vim demonstra-
 rat. Tu vero, quosnam usquam cœlitus aluisti ? Quam
 aquam e petra extudisti ? Quod mare virga dirupisti ?

¹ Exod. xxxiv, 33. — ² 2 Tim. i, 11. — ³ Rom. xv, 19. — ⁴ Galat.
 ii, 20. — ⁵ 2 Cor. xii, 2. — ⁶ Philip. i, 23. — ⁷ Exod. xxxiii, 22, et seqq.
 — ⁸ Id. xvi, 6.

Quem populum per aquas, tanquam per aridam, trans-
misisti¹? Quos hostes fluctibus obruisti? Quos per ignis
et nubis columnam deduxisti²? Quos Amalecitas per ora-
tionem, et manuum extensionem, ac crucem tanto ante
mystice adumbratam, fudisti et profligasti³, ut misere te-
cum et calamitose agi putes, quod plene ac perfecte Deum
non comprehendas, atque idcirco omnia tibi moveri, ac
sursum deorsumque jactari videantur? At quoniam Moy-
sis mentionem feci, nonne hinc gratiæ divini seriem,
ordinisque legem didicisti? Si Moyses es, » Nubem quoque
» ipsam ingredi, et Deum alloquere, et vocem audi, »
» legem accipe, ac leges statue⁴. » Si autem Aaron, « Si-
» mul quidem ascende : verum extra nubem in propinquo
» consiste⁵. » Si vero Ithamar quispiam, aut Eleazar, at-
que a Moyse tertius, ordinisque senatorii et ex septua-
ginta unus, « Longius adhuc gradum fige, » quamvis or-
dine tertius. Quod si plebei quispiam, infirmique ordi-
nis, « Mons minime te admittit, » quippe quem etiam si
bestia tetigerit, lapidibus opprimetur. Infra remane, vo-
cemque solam audi, idque etiam postquam te ipsum, ut
jussus es, expiaveris ac perpurgaveris.

XVII. Atque ut uberius te instruam, quis sacerdotum
manus consecrabat? Moyses. Quis eorum, qui consecra-
bantur, primus erat⁶? Aaron. Quis autem, quod ante a
nobis dictum oportuit, ea, quæ ad Deum spectabant, cu-
rabat? Quis rursus populo vocis instar erat? Jam, « In
» Sancta sanctorum⁷, » cui præterquam uni, aditus pate-
bat? Semper-ne autem illi patebat? Nequaquam; sed semel
per annum, et statuto tempore. Quinam porro arcam gesta-
bant, nisi Levitæ? Et ex iis, ut constitutum erat, alii quidem

¹ Exod. xiv, 16, et seqq. — ² Id. xiii, 21. — ³ Id. xvii, 10, et seqq.
— ⁴ Id. xix, 3, et seqq. — ⁵ Id. xxiv, 1, et seqq. — ⁶ Id. xxviii, 1, et seqq.
— ⁷ Levit. xvi, 2, et Hebr. ix, 7.

præstantiores ejus partes, alii autem inferiores minorisque pretii, prout cujusque dignitas ferebat? Et quoniam eam quoque custodiri oportebat, quinam eam, et quo pacto custodiebant? Alii videlicet aliud latus, alii aliud: nec quidquam non distinctum et ordinatum erat, ne minimarum quidem rerum. At nos si exiguam quandam gloriam assecuti fuerimus, ac ne hanc quidem persæpe, verum temere duo aut tria Scripturæ verba, eaque imperite et concise perdidicerimus; (illa videlicet sapientia est uno die parta, et Chalanæ turris, qua linguæ præclare divise sunt;) jam et contumaciter atque insano adversus Moysen insurgendum est, et Dathan et Abironis contumelia et impietas imitanda. Quorum arrogantiam et amentiam, quæso, fugiamus, ne iisdem pœnis opprimamur.

XVIII. Vis aliud quoque ordinis et disciplinæ exemplum in medium proferam, idque præclarum et laudabile, ac præsentì commemoratione atque admonitione imprimis dignum? Vides quemadmodum ex Christi Discipulis, magnis utique omnibus et excelsis, atque electioni dignis, hic Petra vocetur, atque Ecclesiæ fundamenta in fidem suam accipiat, ille impensius ametur, et «Supra pectus » Jesu » requiescat¹, ac reliqui Discipuli eos sibi præferri æquo animo ferant. Jam, cum in montem ascendendum fuisset, ut Christus «Corporea forma splenderet², » et Divinitatem suam patefaceret, eumque, qui carne tgebatur, nudaret, atque aperiret, quinam simul ascendunt? (Nec enim omnes ad hujus spectaculi spectaculum admittuntur;) Petrus, Joannes et Jacobus, qui ante alios, et erant, et numerabantur. Rursus cum «In supremo agone » versanti, et paulo ante passionem secedenti³, » ac precibus operam danti quosdam adesse oporteret, quinam

¹ Matth. xvi, 18. — ² Joan. xiii, 25. — ³ Matth. xvii, 1. — ⁴ Id. xvi, 37.

ad eam rem asciti sunt? Idem illi. Atque hæc Christi prælatio et electio fuit. Cæteroqui vero quanta concinnitas, et disciplina? Aliud Petrus interrogat, aliud Philippus, aliud Judas, aliud Thomas¹, aliud alius quispiam, neque aut idem omnes, aut omnia unus, sed vicissim quisque, ac sigillatim. Dices-ne hic fortasse hoc singulos quæsis-
visse, quod cuique opus erat? Istud autem, quale tibi videtur? Philippus quiddam dicere gestit², nec solus audet, verum Andreæ quoque adhibet. Petrus aliquid percunctari cupit, et Joanni rem capitis nutu proponit³. Ubi hic morositas? Ubi dominandi libido? Ecquod illustrius argumentum edere potuissent, se Christi Discipulos esse, » Mitis, inquam, illius et humilis corde⁴, » et servi propter nos, ipsius servos, atque omnem in omnibus rebus gloriam ad Patrem transmittentis, ut nobis moderationis exemplum et disciplinæ præberet? Quam tamen tantum abest, ut colamus et amplectamur, ut bene nobiscum actum iri putemus, si non omnes homines audacia et arrogantia superemus, utpote qui hanc de maximis et in maximis rebus ostentemus.

XIX. An te fugit humilitatem, non tam in parvis rebus levisque momenti, (fieri enim possit, ut eam ostentatio, fictaque et adumbrata virtutis species pariat,) quam in majoribus et gravioribus explorari? Ego certe humilitatis ac modestiæ laudem huic demum tribuerim, non qui de se ipso pauca, (idque apud paucos, et raro commemorat,) nec qui inferiorem humiliter affatur, sed qui parce ac moderate de Deo loquitur; ac quædam proloqui, quædam premere et retinere, quorundam etiam incitiam fateri novit, atque ei sermone cedit, cui loquendi munus commissum est, ac nonnullos uberiori Spiritus

¹ Joan. xiii, 6, et xiv, 5, 8, 22. — ² Joan. xiii, 22. — ³ Id. xiv, 24. — ⁴ Matth. xi, 29.

gratia præditos , et contemplatione altius provectos esse æquo animo patitur. Turpe enim est profecto, in veste ac victus ratione , non sublimiorem, sed viliorem eligere, ac genuum callo, lacrymarum fontibus, jejuniis, vigiliis, chamcuniis, labore, atque omni corporis maceratio nehumilitatem præ se ferre, ac propriam imbecillitatem agnoscere ; in divinis autem disputationibus principatum et tyrannidem sibi vindicare, nec cuiquam omnino cedere, verum supra omnes legis doctores supercilium efferre; cum ibi humilitas, non solum gloriam, sed etiam securitatem habeat.

XX. Quid igitur, (interpellabit quispiam ex iis, qui ferventioris animi sunt,) an de Deo tacebimus, idque nobis indicis? Et de qua tandem re potius quam de ipso loquemur? Aut quo loco illud ponemus: « Semper laus » ejus in ore meo: et, Benedicam Dominum in omni tempore¹: et, Veritatem meditabitur guttur meum²: et, » Ecce labia mea non prohibebo³: » et alia quæ in eadem sententiam meditata ac definita testimonia producet? Cui leniter et sine acerbitate, ut hinc quoque animi moderationem doceamus, occurrendum est. Non te tacere jubeo, vir sapientissime, sed a pertinaci contentione abstinere: non veritatem occultare, sed præter legem non docere. Nam et ipse vel primus inter eos nomen profiteor, qui sapientiam et doctrinam laudibus efferunt, atque in divinis sermonibus sacrisque studiis tempus atque operam ponunt, aut certe ponere cupiunt: ac Deus faxit, ne quid unquam huic occupationi prævertendum ducam, ne alioqui ab ipsa Sapientia miser appeller, ut « Sapientiam et » eruditionem spernens⁴, » ac pro nihilo ducens. Interim tamen excessum vito, et inexplebilem cupiditatem coër-

¹ Psal. xxxiii, 2. — ² Prov. viii, 7. — ³ Psal. xxxix, 10. — ⁴ Sap. iii, 2.

ceo ; malimque, si mihi utrumque fugere, ac mediocritatem assequi non liceat, nimis ignavus esse, quam nimis curiosus ; ac nimis timidus, quam nimis audax, et temerarius. At tu idem omnino mihi facere videris, ac si me ; immodico cibo tibi interdicientem, eo nomine accusares, quasi ab omni universum alimento tibi abstinendum esse præscriberem ; aut ad caste pudiceque cernendum hortantem, perinde criminareris, quasi cæcitatem laudibus efflerem.

XXI. « Si est tibi sermo prudentiæ, inquit ille, responde : nec quisquam prohibebit : sin minus, hæreat » vinculum labiis tuis ¹. » Quanto commodius hoc in eos, qui ad docendum prompti ac parati sunt, adhiberi queat ? Si tibi tempus est, doce ; sin minus, revincta lingua, aures solve. Meditare tu quidem, atque animo versare in rebus divinis, cæterum intra fines te continens. Loquere tu quidem ea quæ sunt Spiritus, ac, si fieri potest, ne aliud quidem quidquam loquere ; imo etiam crebrius loquere, quam respices ; (pulchrum enim ac divinum est per divinarum rerum commemorationem ad Dei amorem perpetuo extimulari ;) sed ita, ut ea, quæ tibi imperata sunt, cogites. Ne Patris naturam anxie inquiras, Unigeniti ortum, Spiritus sancti gloriam et potentiam ; unam, inquam, et eandem in tribus personis Deitatem et claritatem, individuum illam naturam, ac confessionem, et gloriam, et credentium spem. Verba ea, quibus simul cum lacte imbutus es, mordicus retine : sermonis autem et disputationis curam eruditioribus manda. Satis superque tibi est fundamentum habere : superstruat architectus. Sufficit tibi cor pane fulcire : obsonia copiosis et locupletibus relinque. Nemo sanus ac prudens te accusabit, si splendide ac magnifice cœnam non instruxeris : verum si, vel Christi disci-

¹ Eccli. v, 14.

pulo, vel cuipiam alii panem non apposueris, aut aquæ poculum non porrexeris, cum id tibi per facultates tuas liceat, tum demum jure ac merito condemnaberis. « Noli » celer esse in verbis ¹, » admonet Sapiens; nec inopia laborans, te cum locuplete compara, nec sapientibus sapientior esse affecta. Sapientiæ quoque genus est, se ipsum nosse, ac non immodice efferri, eodemque modo, quo voces, affici, quæ, si vehementius contenduntur, propter excessum omnino deficiunt. Præstat, cum doctus sis, ob mansuetudinem et animi æquitatem consulte cedere, quam, cum eruditione careas, per insolentiam ac temeritatem alius efferri. Celeritas tua usque ad fidei confessionem progrediatur, si quando a te poscitur; ultra eam autem timidior te esse velim. Nam ut illic tarditas, ita hic festinatio periculosa est.

XXII. Quid autem est, quamobrem grave et acerbum putes, si non in omni disputatione domineris, atque in omni problemate aut quæstione primariam sedem obtineas, verum alii te, vel doctiores, vel audaciores inveniantur? Deo gratiæ habeantur, quod, ut eximia largitur, ita per communia salutem hominum consulere norit. Atque hoc miraculum non in doctrina tantum ac disputationibus, sed in ipsa quoque mundi effectione locum habere comperies, si animum adverteris. Neque enim in rebus creatis excellentissima quæque nonnullorum duntaxat, sed omnium sunt, atque ad unum idemque creaturarum genus communis Dei gratia dimanat: neque in fidei ratione, ea, quæ salutem afferunt, potentiorum sunt, sed volentium. Quid pulchrius aëre, igne, aqua, terra, pluviis, fructibus, sativis juxta et agrestibus, tecto, indumentis? Atqui hæc sunt ejusmodi, ut omnes iis communiter utantur; partim quidem omnino communiter, partim ad quamdam mediocri-

¹ Eccle. v, 1.

tatem : nec quisquam adeo tyrannus est , ut communi benefeicio solus fruatur. Deus enim « Solem suum aequè » omnibus oriri facit ¹ , » divitibus ac pauperibus pluit : communis diei noctisque alternatio et vicissitudo , commune denuñ sanitas , communis vitæ terminus , communis mensura et gratia corporis , communis sensuum vis et facultas ; ac fortasse hoc nomine , meliori quoque conditione pauper est , quod pro his beneficiis ampliores Deo gratias agat , jucundiusque communibus , quam potentiores superfluis minimeque ad vitam necessariis , fruatur. Atque hæc quidem communia , omnibusque exposita sunt. Deique justitiam perspicuo argumento testantur. At aurum , et pellucidi ac deamati lapides , et molles ac nimis exquisitæ vestes , et mensa delictis turgens ac libidinem accendens , et redundantes opes , quæ dominos labore conficiunt , paucorum hominum ornamenta sunt.

XXIII. Hoc autem etiam circa fidem ipse animadverto. Communia sunt , Lex , Prophetæ , Testamenta , Testamentorum oracula , gratia , puerilis institutio , perfectio , Christi passiones , nova creatio , Apostoli , Evangelia , Spiritus distributio , fides , spes , charitas , eaque tum erga Deum , tum ex Deo , nec ea ad mensuram data , quemadmodum olim manna illud ingrato et improbo Israëlî donatum ² , sed ad uniuscujusque voluntatem , ascensus item , illuminatio , subobscura quidem hæc , quæ in hac vita contingit , clarior autem illa , quam spe conceptam habemus ; denique , quod maximum est , Patris , et Filii , et Spiritus sancti agnitio , ac primariæ nostræ spei confessio. Quid his majus ac sublimius ? Quid rursus communius ? At quæ ultra hæc sunt , tametsi ob raritatem præstantiora sint , tamen , si necessitatem spectemus , posteriores partes tenent. Nam ea , sine

¹ Matth. v, 45. — ² Exod, xvi, 16.

quibus nullus potest esse Christianus, iis utiliora sunt, quæ a paucis duntaxat attingi atque percipi possunt.

XXIV. Enimvero alius contemplationis opibus affluit, ac supra vulgus assurgit, et spiritualia cum spiritualibus comparat, atque « In cordis latitudine tripliciter describit¹, » nimirum, et eam doctrinam, quæ omnes instruat, et eam quæ multos, et eam quæ non omnes, nec multos, sed paucos duntaxat; nec pauper esse sustinet, verum in altissima et abstrusissima quæque penetrat. Ascendat vero ille, ac viæ ducem se præbeat, atque a mente feratur, vel « Ad tertium usque cælum², » si ita libeat, quemadmodum Paulo contigit: cæterum cum ratione et scientia, ne propter animi elationem cadat, pennisque propter volatus sublimitatem liquefactis, misere corruat. Quid enim ob laudabilem ascensum cuiquam invidia consletur? Quæ rursus fœdior prolapsio, quam ejus hominis, qui animi elatione transfixus est, nec humanæ mentis, quæ ad cœlestia erigitur, humilitatem intelligit, quantumque adhuc a vero fastigio absit, qui mortales omnes sublimitate antecedit?

XXV. Alius contra exiguo ingenio est, et lingua pauper, nec verborum flexus et captiones novit, nec sapientum dicta et ænigmata, nec Pyrrhonis instantias, aut assensus retentiones, aut oppositiones, nec syllogismorum Chrysippi solutiones, aut pravum artium Aristotelis artificium, aut Platonis facundiæ præstigias; qui velut Ægyptiacæ quædam plagæ in Ecclesiam nostram irrepserunt. At hic quoque habet, unde salutem consequatur. Quibus tandem verbis? O mirificas divinæ gratiæ opes! Nihil, inquit, tibi necesse est « In cælum ascendere, ut Christum illinc » trahas: nec in abyssum descendere³, » ut hinc eum a mortuis extrahas, nimirum, vel primam ipsius naturam

¹ Prov. xxii, 20. — ² 2 Cor. xii, 2. — ³ Rom. x, 6, 7.

curiosius investigans, vel postremam carnis assumptæ dispensationem. « Prope te, inquit, verbum est¹ : » mens et lingua thesaurum hunc habent; illa videlicet credendo, hæc confitendo. Quid his divitiis compendiosius? Quid hoc beneficio facilius expromptius? Confitere Jesum Christum, eumque a morte ad vitam rediisse crede, et salutem consequeris. Etenim justitia quidem est, vel solum credere: at perfecta salus in eo sita est, ut etiam confiteamur, ac cognitioni dicendi libertatem adjungamus. Tu majus aliquid salute quæris, nempe alterius vitæ gloriam et splendorem: mihi vero salutem consequi maximum est, et futuras pœnas vitare. Tu viam minime tritam et inaccessam ingrederis: ego tritam atque calcatam, et qua multi ad salutem pervenerunt.

XXVI. Nihil fide nostra, fratres, iniquius fingi posset, si in eruditos tantum dicendique facultate ac logicis demonstrationibus præstantiores caderet; popularis autem multitudo, ut auro et argento, aliisque omnibus rebus, quæ hic in pretio habentur, atque a plerisque avidissime expetuntur, si hac quoque frustraretur; ac Deus id, quod altum et excelsum est, atque ad paucos pertingit, gratum acceptumque haberet; contra, quod propinquius est, nec vulgi captum superat, aspernaretur et rejiceret. Nam ne in moderatiores quidem homines hoc cadit, ut non quales ipsis haberi honores possunt, exigant, sed excellentibus tantum eximiisque delectentur, nedum in Deum; qui, cum multis nominibus admirabilis nobis et suspiciendus occurrat, nihil tamen tam proprium habet, quam omnes beneficiis afficere. Usitata ne spernas, novitatem ne captes, ut nominis splendorem tibi apud vulgus concilies. Erudiat te consilio Salomon: « Melior est, inquit, exigua pars cum » securitate, quam magna cum infirmitate et incertitudine¹. »

¹ Rom. x, 8. — ² Prov. xvi, 8.

Et, « Melior est pauper ambulans in simplicitate sua ¹, » (nam insignis quoque et erudita est hæc parcēmia,) et qui sermonis ac scientiæ inopia laborat, simplicibusque verbis innititur, atque in illis, tanquam in parva et tenui rate, salutem assequitur, quam fatuus labiisque perversus, qui disputationibus et argumentis inepte atque imperite confidit, ac Christi crucem, rem omni sermone sublimiorem, per disserendi facultatem evacuat, ubi probationis at argumentorum infirmitas veritatem imminuit et labefactat.

XXVII. Quid in cœlum provolas, cum pedes sis? Quid « Turrim extruis ², » cum iis rebus careas, quæ ad eam perficiendam requiruntur? Quid ipse quoque « Manu » aquam metiris, et cœlum palmo ³, » terramque omnem pugillo, elementa magna, et ejusmodi, ut ea Creator solus dimetiri possit? Primum te ipsum cognosce: quæ in manibus sunt, intellectu assequere: quis sis, et quomodo effectus, ita ut simul et imago Dei sis, et deteriori astringaris; quid illud sit, quod tibi motum attulit, quæ in te sapientia eluceat, quod naturæ arcanum: quomodo loco circumscriberis, ac mens nullo limite includitur, sed in eodem loco manens, omnia lustrat ac pervagatur. Quomodo, cum tantillus sit oculus, tam longe pertingit; utrum quod rem visam admittat, an potius quod ea eam transeat; quomodo idem et movet et movetur, ac per voluntatem gubernatur: quæ motus quies, quæ sensuum partitio, quomodo mens eorum opera cum externis versatur, atque externa excipit: quomodo formas recipit: quæ assumptæ rei conservatio, vel memoria: quæ elapsæ recuperatio, vel reminiscentia: quomodo sermo mentis fœtus est, atque in alia mente sermonem procreat, et quomodo cogitatio sermone distribuitur: quomodo corpus per animam alitur, et

¹ Prov. xix, 1. — ² Luc. xiv, 28. — ³ Isai. xl, 12.

quomodo anima per corpus affectuum participes sit : quomodo eam timor constringit, præsidentia solvit, mœror contrahit, lætitia diffundit, livor tabe afficit, superbia effert, spes erigit : quomodo iracundia eam in furem agit, et pudor rubore suffundit ; hæc quidem, ebulliente sanguine, hic vero, recedente : quomodo perturbationum signa corporibus imprimuntur : quomodo ratio præsidet, quomodo hæc omnia regit, et moderatur, affectuumque motus lenit ac sedat : quomodo a sanguine et spiratione, id, quod corpore vacat, tenetur : quomodo horum defectio, animæ discessio est. Hæc, aut horum aliquid, o homo, cognitione comprehende : (nondum enim cœli naturam aut motum, nec siderum ordinem, nec elementorum permixtionem, nec animantium discrimina, nec cœlestium Virtutum inferiores gradus et sublimiores, atque omnia, in quæ artifex ratio distribuitur, nec denique providentiæ gubernationisque rationes commemoro :) ac tum nondum dicam, aude ; verum adhuc time ad ea, quæ sublimiora sunt, viresque tuas magis superant, accedere.

XXVIII. Ac maxime quidem, ita comparatum est, ut omnis sermo contentiosus et cum ambitione conjunctus, exercitati quædam sit, qua ad contendendum de rebus gravioris momenti provehamur. Proinde nobis curæ esse debet, ut quemadmodum pueros in primis moribus et prima institutione fingimus, ut insequentis ætatis improbitatem fugiant ; ita nos quoque ne in levibus quidem parvique momenti disputationibus, audaciæ atque ineptiæ significationem præbeamus, ne ea tandem diuturna consuetudine in majoribus abutamur. Minoris enim laboris est primum improbitati non cedere, ac eam accedentem fugere, quam progressam excindere, sequæ ea superiorem præbere : non secus videlicet ac facilius est petram initio firmare et retinere, quam ruentem sursum retrahere. Sin autem tam

immodico et inexplebili disputandi studio flagras, nec morbum sistere ac reprimere potes, hæc meditare, inhis esto: ambitionem istam in iis rebus, in quibus periculi nihil subest, effunde.

XXIX. Quod si hoc repudias, nec linguam freno coërcere, animique impetum frangere ac comprimere potes, sed tibi furere atque insanire certum est, ac primis potestatibus minime cedere, (nisi tamen iis quoque cognitionis modus est,) altiusque omnino assurgere, quam ex utilitate tua sit: at illud saltem tibi impera, ut fratrem non condemnes, nec timiditati impietatis nomen imponas, nec temere ac præcipiti iudicio eum condemnes, aut salutem ejus pro desperata habens discedas, qui animi facilitatem ac morum suavitatem profiteris. Quin potius, hic humilem te præbe, dum licet: hic nullo cum tuo detrimento fratrem tibi antepone, ubi condemnare et contemnere, nihil aliud est, quam a Christo, ac sola spe ejicere, atque exturbare, occultumque triticum, et quidem triticum fortasse te præstantius, « Una cum zizaniis exscindere ¹. » Hanc rationem tene, ut illum quidem corrigas, idque leniter et humane, non ut hostis, nec ut durus et rigidus medicus, nec ut sectionibus tantum et cauteriis adversus morbum grassari sciens; te ipsum autem, ac tuam infirmitatem agnoscas. Quid enim si lippientibus oculis, aut alio quopiam morbo laborantibus, obscurum solem aspicias? Quid si omnia verti ac sursum deorsumque ferri putes, ipse nausea correptus, aut vino obrutus, ignorantiamque tuam aliis attribuas? Multum diuque ante versandus atque contorquendus est animus, multa ferenda, quam ut alium impietatis damnemus.

XXX. Non idem est stirpem, aut brevem quemdam et caducum florem evellere, atque hominem exscindere. Imago

¹ Matth. XIII, 29.

Dei es, et imaginem quoque Dei alloqueris, « Tuque qui
 » judicias, ipse judicaberis ¹; et quidem alienum servum
 » judicas ², » et quem alius moderatur. Sic fratrem tuum
 explora, quasi ipse ad eandem mensuram expendendus.
 Quocirca, ne cito ac temere membrum seces ac projicias,
 cum incertum sit, an hac ratione partes quoque sanæ per-
 niciem aliquam contracturæ sint. « Verum argue, increpa,
 » obsecra ³. » Habes medicinæ regulam. « Christi Discipulus
 » es, mitis ac benigni, et qui nostras infirmitates portavit ⁴. »
 Si primum obluctetur, leniter expecta : si secundo, ne
 spem abjicias; nondum enim curationis tempus effluxit :
 si tertio, benignum illum et humanitate præditum agrico-
 lam imitare, cum Domino adhuc age, » Ne inutilem et
 » infructuosam ficum excindat ⁵, » atque odio habeat, ve-
 rum emendet et curet, ac stercus injiciat, hoc est, eam
 correctionem, quæ per confessionem ac publicam ignomi-
 niam, contemptio remque victus rationem efficitur. Quis
 scit, an mutabitur, ac fructum feret, Jesumque a Be-
 thania redeuntem pascet?

XXXI. Tu, qui spiritali illo unguento arte unguen-
 taria confecto delibutus es, fraterni fœtoris nonnihil per-
 fer, sive verus sit fœtor ille, sive ita tibi videatur : ut ipse
 vicissim boni tui odoris illi aliquid impertiaris. Vipera vi-
 rus non est improbitas, ut simul atque ictus fueris, dolo-
 ribus crucieris, aut etiam intereas, ob eamque causam
 tibi, bestiam fugienti, vel interimenti, venia parata sit.
 Verum, si quidem a te fieri potest, enim quoque morbo
 libera; sin minus, ipse certe ita demum in tuto versaberis,
 si improbitatis illius particeps nequaquam factus fueris. In-
 suavis quidam odor est illius morbus, quem fortasse fra-
 grantia tua vincet atque depellet. Libenter scilicet ac

¹ Matth. vii, 1. — ² Rom. xiv, 4. — ³ 2 Tim. iv, 2. — ⁴ Matth. xi, 29.
 Isai. lxi, 4, et 1 Petr. ii, 24. — ⁵ Luc. xiii, 8.

prompte huiusmodi quiddam conservi et cognati tui causa susciperes, quale Paulus ille zelo et æmulatione flagrans, præ commiseratione, non modo cogitare, sed etiam dicere ausus est; nimirum ut, si fieri posset, « Israël, in ipseus locum subrogatus, ad Christum introduceretur ¹; » cum sola plerumque suspicione ductus, fratrem præscindas. Quem fortasse lucrari benignitate potuisses, eum audacia tua perimis, « Membrum tuum, pro quo Christus mortem oppetiit ². » Proinde, si firmus ac robustus es, ait Paulus de cibis disserens ³, atque ob doctrinam fideique firmitatem confidis; fratrem quoque ut ædifices, cura. Noli cibo tuo eum, quem Christus communi passione honestavit, evertere, Etsi enim res diversa est, consilii tamen admonitionis ratio peræque utilis est.

XXXII. Ac profecto legem quoque apud nos constitutam esse oportebat, quæ juberet, ut, quemadmodum olim apud sapientes Hebræos, a quibusdam Scripturæ sacræ libris juvenes arcebantur, utpote tenerioribus adhuc minimeque firmis animis haudquaquam profuturis; eodem quoque modo, non quibuslibet, nec semper, sed certo tempore, ac certis hominibus, de fide disputandi potestas fieret, iis nimirum, qui nec ingenio sunt omnino segni et ignavo; nec rursum iis, qui inexplebili quadam aviditate laborant, gloriæque studio ducuntur, atque in pietate ferventiores sunt, quam par sit: atque hi quidem illic collocarentur, ubi nec sibi ipsis, nec aliis noxii essent; iis autem, qui in disputationibus modesti, ac vere compositi et temperantes essent, libera disputandi facultas daretur: promiscua vero multitudo ab hac via, et loquacitatis morbo hac tempestate vigente, abducta et aversa, ad aliud virtutis genus minus periculosum traduceretur, ubi et segnitias

¹ Rom. ix, 3. — ² 1 Cor. vii, 12. — ³ Rom. xiv, 15.

minorem labem ac detrimentum afferret, et insaturabilis aviditas pietatis laudem mereretur.

XXXIII. Etenim si, ut « Unus Dominus, una Fides, » unum Baptismum, unus Deus, Pater omnium, et per » omnia, et in omnibus ¹, » ita una quædam esset per disputationem et contemplationem ad salutem via, ut qui ab ea exciderent, fidem a toto quoque aberrarent, atque a Deo, ac spe salutis æternæ præcipites ejicerentur, nihil sane periculosius esset, quam vel hujusmodi consilium dare, vel huic parere. At si, ut in rebus humanis, multa et diversa sunt vitæ genera et instituta, alia majora, alia minora, alia illustriora, alia obscuriora, sic in divinis quoque, non una salutis ratio est, nec una quædam virtutis via, sed plures; atque hujus pervulgati dicti omniumque linguis celebrati, nimirum, « Multas apud Deum mansiones esse ², » nulla alia causa est, quam quod multæ sint viæ eo ferentes, quarum aliæ periculosiores et splendidiore sint, aliæ abjectiores et tutiores; cur, tutioribus relictis, ad unam hanc nos convertimus, adeo lubricam et periculosam, ac nescio quo ferentem? An idem quidem cibus non omnibus congruet, sed alius alii, pro diversa ætatum et constitutionum ratione; eadem autem vita, aut disputatio cunctis conducet? Hoc ipse quidem non dixerim, nec dicentibus assentiar. Quare si mihi obtemperandum duxeritis, juvenes et senes, præfecti et subditi, monachi et qui in sodalitiis vivitis, supervacaneas et inutiles ostentationes valere jubebitis; atque id potius curabitis, ut per morum probitatem, et honestam vitæ rationem, ac sermones periculo vacuos ad Deum appropinquantem, ad alterius sæculi veritatem et contemplationem perveniat, in Christo Jesu Domino nostro, cui gloria in sæcula sæculorum. Amen.

¹ Ephes. iv, 5 et 7. — ² Joann. xiv, 2.

ORATIO XXXIII ¹.*Adversus Arianos, et de se ipso.*

ARGUMENTUM.

I. *Ariani ob multitudinem gloriantur.* II. *Quantas excitet tragædias fidei diversitas.* III. *Arianorum crudelitates summatim enumerantur.* — *Immania Arianorum facinora.* — *Altaria sædata.* — *Virgines probro affectæ.* IV. *Sanctorum corpora feris objecta.* — *Episcopi laniati.* — *Presbyteri combusti.* V. *Catholici fraude et calumnia undequaque vexati.* VI. *Gregorius adversarios invitat, ut ipsi iniquitates suas narrent.* — *Insulsa Arianorum adversus Gregorium dicteria.* VII. *Lepidæ Gregorii responsiones.* — *Perfecta Catholicorum abnegatio.* VIII. *Aliæ Arianorum cavillationes.* IX. *Gregorii responsio.* X. *Gregorius hæreticorum dicteria exemplis confutat.* *Samuël. Saül. David. Amos. Joseph. Abraham. Moyses. Elias. Elisæus. Joannes.* XI. *Apostoli, licet peregrini, in orbem terrarum Evangelium prædicaverunt.* XII. *Superna Jerusalem una est Christianorum patria.* — *Unde nobilitas.* XIII. *Gregorius, non sponte, sed invito, ad animarum regimen accitus et coactus.* XIV. *Gregorii mansuetudo pro amentia habita.* XV. *Catholici in paupertate, hæreticis deteriores.* — *Propheticus Gregorii Spiritus.* — *Exigui gregis præro-*

¹ Alias xxv, quæ autem xxxiii erat, nunc est xxvii. Habita Constantino-
poli circa medium annum 380.

gativæ. XVI. Pastor exigui gregis oves nominatim vocat. — Dogma Valentini. Marcionis. Montani. Manis. Novati. Sabellii. Arii. Photini. — Vera Trinitatis confessio. XVII. Pater, Filius, et Spiritus sanctus, unus Deus. — Spiritus non est particeps, qui Spiritum non honorat. — Ex forma baptismi hæreticos confutat. — In quo sita vera beatitudo.

I. UBI tandem sunt, qui paupertatem nobis exprobrant, opesque suas insolenter jactant? Qui Ecclesiam multitudine definiunt (13), ac parvum gregem aspernantur? Qui et Divinitatem metiuntur, et populum velut ad lancem appendunt? Qui arenam in pretio habent, et mundi lumina contumeliis afficiunt? Qui denique lapides aggerunt, et gemmas contemnunt? Non enim norunt, quod quanto arcena stellis copiosior est, et lapides pellucidis lapidibus, tanto vicissim hæc illis puriora et præstantiora sunt. Rursus indignaris? Rursus arma induis? Rursus contumeliam infers? Num nova fides? Parumper, quæso, minas istas comprime, ut loquar. Non injuriam inferemus, sed coarguemus: non minas intendemus, sed exprobrabimus: non feriemus, sed medicinam asferemus. Istud-ne quoque tibi contumelia videtur? O insignem superbiam! Etiam-ne hic cum, qui tibi dignitate par est, in servilem ordinem cogis? Verum, si non ita se res habet, fac nostram dicendi libertatem æquo animo feras. Nam et frater cum fratre exposculat, quoties ab eo æqua portione fraudatur.

II. Vis-ne te verbis illis alloquar, quibus Deus rebellem et obdurum Israël affatur? «Popule meus, quid feci tibi, aut quid te læsi, aut quid tibi molestus fui? » Imo vero ad te, qui contumeliis in me uteris, orationem ipse

1 Mich. vi, 3.

habebō. Male omnino alii aliorum tempora observamus, ac soluta per sententiæ diversitatem animorum concordia, majori pene audacia et crudelitate nos ipsos mutuo insecutamur, quam, qui nunc bello nos lacessunt, barbari, quos Trinitas soluta conjunxit. Quin hoc quoque nomine sceleratiores sumus, quod non exteros exteri, nec ignotos ignoti, (quæ res nonnihil etiam calamitatem levat,) verum nos ipsos mutuo, et quasi domestici domesticos, populamur, et incessimus; aut, si mavis, ejusdem corporis membra, consumimus invicem atque consumimur. Neque id grave et indignum est, quanquam alioqui pergrave: sed quod animis ita comparati sumus, ut imminutionem nostram, accessionem, atque incrementum esse existimemus. Quoniam autem ad hunc modum affecti sumus, atque ad temporum rationem fidem nostram accommodamus, age, tempora cum temporibus committamus. Regem tuum profer: ego proferam meos. Tu Achab: ego Josiam. Tuam mihi humanitatem et mansuetudinem commemora: ego item meam audaciam et importunitatem exponam. Quin potius, tuam quidem inhumanitatem, et multi libri, et linguæ circumferunt, quas etiam posteritas omnis exceptura est, æternam, nisi me opinio fallit, rebus a te gestis ignominia notam inustura: meam vero ipse oratione complectar.

III. Quem populum audacia elatum in te immisi? Quos milites instruxi? Quem belli ducem ira inflammatum, iisque, qui imperabant, atrociorē, ac ne Christianum quidem ipsum, verum suam adversum nos impietatem, tanquam congruentem quemdam cultum dæmonibus suis offerentem? Quosnam precibus operam dantes, manusque ad Deum attollentes, obsidione cinxi? Quas Psalmorum cantiones, tubarum clangore compressi? Quorum mysticum sanguinem cum cædium sanguine permiscui? Quos

spirituales fletus, emorientium fletibus, et quas pœnitentis lacrymas, tragœdiæ lacrymis cohibui? Quam orationis domum in sepulcrum converti? Quæ vasa ministerio sacro destinata, nec vulgi manibus attrectanda, iniquorum manibus dedidi, nempe, vel Nabuzardæ coquorum præfecto¹, vel Baltazaro, qui male in sanctis poculis perbacchatus est², atque adeo dignas amentia sua pœnas exolvit? « Al-
» taria chara³, » ut ait Scriptura, nunc autem contumeliis habita; quisnam impudicus adolescens, turpiter membra torquens ac inflectens, nostra causa vobis insultavit? vel potius, per quem unquam huiusmodi nebulonem ego magnum et divinum mysterium ludibrio habui? O cathedra præclara, et præclarorum virorum sedes ac requies, quæque multos pios sacerdotes, qui jam olim res divinas docuerunt, commutasti; quisnam ethnicus concionator te conscendit, et improba lingua, Christianorum religionem invectiva oratione proscindens? O virginum pudor et castitas, ne pudicorum quidem virorum conspectum ferens, quisnam ex nostris, usque etiam ad eas corporis partes, quas inspicere nefas erat, probro et contumelia vos affecit, atque impiorum oculis miserandum spectaculum proposuit, flammaque sodomitica vindicandum? Mitto enim cædes huiusmodi probro tolerabiliore.

IV. Quas feras in Sanctorum corpora immisimus, ut nonnulli, qui humanam naturam publicarunt et prostituerunt, hoc unum crimini vertentes, quod impiis dogmatibus assentiri, atque ipsorum communione contaminari recusassent, quam velut serpentis virus fugimus, non illam quidem corpus lædentem, verum intimos animæ sinus infici-entem? Quibus crimini datum est, quod mortuos, qui feris etiam ipsis venerationi fuerunt, sepultura donassent? Et quidem quale hoc crimen iudicatum est? Alio scilicet

¹ 1 Reg. xxv, 14. — ² Dan. v, 3. — ³ Ecce. viii, 17.

theatro, atque aliis feris dignum. Quorum episcoporum, inspectantibus discipulis, nec præter lacrymas quidquam opis ipsis afferre valentibus, seniles carnes ferreis unguis laceratæ sunt: quæ cum Christo suspensæ fuerunt et per cruciatum victoriam retulerunt, et populum pretioso sanguine asperserunt, ac postremo ad necem abductæ sunt, cum Christo, et crucifigendæ, et sepeliendæ, et gloriam adepturæ; cum Christo, inquam, qui per hujusmodi victimas et hostias de mundo triumphavit? Quosnam presbyteros ignis et aqua, elementa contraria, inter se dividerunt, novo et inaudito more navigantibus prælucentes, simulque cum ea navi, in qua e portu solverant, conflagrantes? Quinam, (ut majorem nostrorum malorum partem silentio contegam,) ab ipsis etiam præfectis, qui ejusmodi officiâ illis præstabant, crudelitatis accusati sunt? Nam etsi cupiditatibus eorum obsequebantur, at sævum tamen et crudele animi propositum oderant. Illud enim temporis erat, hoc rationis et consilii; illud imperatorii sceleris, hoc animi agnoscentis, quid leges, ex quarum præscripto jus dicendum erat, postularent.

V. Atque, ut antiquiora commemoremus, (ejusdem enim hæc quoque sodalitii sunt,) quibusnam, vel mortuorum, vel viventium, manibus præcisis, falsum crimen sanctis viris intuli, ut fidem per fraudem et calumniam oppugnarem? Quorum exilia tanquam beneficia numeravi, ac ne sacrorum quidem philosophorum sacros cœtus veritus sum, in quibus supplices exquirebam; imo contra, illos quoque Martyres effeci, virtutis causa periculum subeuntes? Quibusnam ego, cui sermonis petulantia objicitur, scorta immisi, et quidem ejusmodi viris, qui carne pene ac sanguine carebant? Quosnam pios viros, patriæ finibus pulsos, hominibus iniquis dedidi, ut tenebricosis domibus ferarum in modum inclusi, atque alii ab aliis disjuncti,

(quod in tota tragœdia gravissimum erat,) fame ac siti laborarent, certam cibi mensuram, eamque per angustas rimas accipientes, ne facta quidem ipsis potestate eos videnti, qui in iisdem doloribus versabantur? Atque hæc, quinam viri? « Quibus dignus non erat mundus¹. » Sic fidem honori habetis? Sic hospitio excipitis? Majorem horum partem ignoratis; et merito sane propter rerum gestarum multitudinem, miramque in faciendo voluptatem. At is, qui patitur, tenaciori memoria esse solet. Quid autem longinqua colligo? At nonnulli violentiores etiam sese præbuerunt, quam temporis ratio ferre videretur, non secus atque apri, qui per septa quædam magno impetu feruntur. Hesternam meam victimam posco, senem illum (14), et Abrahamicum patrem, quem ex exilio redeuntem, medio die, media in urbe saxis excepistis. At nos, (nisi hoc dictu grave atque r̄ idiosum sit,) interemptores etiam ipsos deprecatione nostra periculo mortis liberavimus. « Super quo horum tibi propitius ero², » quodam Scripturæ loco ait Deus? Quid horum laudabo? vel potius, ob quæ coronam vos cingam?

VI. Quoniam autem hæc atque hujusmodi facinora tua sunt, age, jam iniquitates quoque meas mihi narra, ut vel malus esse desinam, vel erubescam. Etenim maxime id quidem optarim, omni culpa vacare: sin autem hoc minime conceditur, at illud saltem, ut si quid iniqui admittam, ad meliorem viam revocer: quæ secunda prudentum hominum classis est. Nam etsi « Justi illius more³, » in mei accusatione primas partes non occupo, at certe peccatis meis ab alio medicinam adhiberi gaudeo. « Parva tibi civitas est, inquis, ac ne civitas quidem, sed aridus locus, et inamœnus atque infrequens. » Atque hoc, si in malis habendum est, vir præclare, patior potius quam facio: et

¹ Hebr. xi, 38. — ² Jerem. v, 7. — ³ Prov. xviii, 17.

siquidem invito animo, miser sum, liceat enim ita loqui: si vero æquo ac libenti, philosophi laudem obtineo. Utrum horum criminis rationem habet? Nisi vero quis hoc nomine delphinum accusandum putet, quod terrestre animal non est: et bovem, quod non in aquis degat: et murænam, quod in utroque elementa vitam ducat. « At nobis, inquis, » et mœnia sunt, et theatra, et circi, et palatia, et pulchræ » atque ingentes porticus, atque hoc incredibile opus, sub- » terraneus nimirum, et æreus fluvius, et illustris hæc ac » visenda columna, et forum frequens, et vulgus exun- » dans, et nobilium virorum præclarum concillium. »

VII. Cur autem non commemoras commodissimum ur-
bis situm, et terram ac mare velut certalim sibi urbem
vindican tia, suisque bonis imperatricem urbem ornantia?
Ergo hæc injuria nostra est, quod vos quidem magni et
admodum splendidi estis, nos autem parvi atque a parvis
venientes? Nimirum, si ita est, multi quoque alii eandem
vobis injuriam inferunt, atque adeo omnes ii, quibus su-
periores estis. Num propterea morte molestandi sumus,
quod nec civitatem extruximus, nec muris cincti sumus,
nec circis, nec stadiis et venationibus, atque insanis circa
res hujusmodi studiis, nec balneorum venustate et splen-
dore, nec marmorum excellentia, nec picturis et punctis
auro fulgentibus, varioque opere confectis, naturæ soler-
tiam propemodum imitantibus, gloriamur? Nec vero nobis
adhuc mare in orbem effregimus, nec anni partes tempe-
ravimus, (quod tu videlicet novus rerum fabricator effe-
cisti,) ut vitam jucundissime simul et tutissime traduca-
mus. Adde, si placet, et alia crimina, qui dicis: « Meum
» est argentum, et meum est aurum¹, » Dei voces usurpans.
Nos, nec divitias jactamus, « Quibus affluentibus cor ne ap-
» ponamus², » lex nostra vetat, nec annuos diurnosque pro-

¹ Agg. 11, 9. — ² Psal. 111, 11.

ventus numeramus, nec torgida mensa stupidique ventris lenociniis gloriamur. Nec enim quidquam eorum laudamus, quæ semel in fauces transmissa pari postea honore sunt, vel, ut rectius loquar, pari ignominia et ipsa rejicienda. Verum simplici atque illaborato victus genere utimur, nec a bestiis, quarum vita suppellectilis atque omnis apparatus expers est, multum dissidemus.

VIII. An mihi quoque detritam vestem objicis, vultusque situm haud satis elegantem? Nam his quoque rebus nonnullos eorum, qui valde abjecti animi sunt, efferri perspicio. Quid? Caput-ne ipsum intactum relinques, nec iisdem cavillis, quibus Elisæum olim pueri illi, incesse? Nam quæ deinde sequuntur, tacebo. Quid? Rusticitatem-ne meam et insulsiatatem non accusabis, quodque asperum quiddam et agreste loqui videor? Jamvero quonam id locò pones, quod nec lepidus sum, nec facetus quispiam, ac familiaribus gratus et jucundus, nec multum in foro versor, nec temere et cum quibuslibet garrio, adeo ut sermones quoque ipsos graves et molestos reddam, nec novam illam Jerusalem, hoc est, Zeuxippum (15), inviso, nec e domo in domum subinde commeo, hominibus blandiens, ventrique deditus; verum domi, ut plurimum, maneo, tristis ac tetricus, mecumque ipse tacitus, cum vero scilicet atque germano actionum mearum censore, consuetudinem habeo, vinculisque fortasse dignus sum, ut inutilis atque incommodus? Qui sit ut nobis ista condones, nec in criminum ordinem referas? Quam facilis es, et lenis atque humilis!

IX. At ego ita pristorum hominum more, et philosophice affectus som, ut unum idemque cælum omnibus commune esse existimem, communem item solis et lunæ conversionem, communem siderum situm et ordinem, communem diei et noctis æquabilitatem et utilitatem; ac

insuper communes anni partium vicissitudines, et pluvias, et fructus, vimque aëris vitalem; fluvia etiam, communes scilicet et perennes divitias, æque omnibus fluero; unam præterea eandemque terram, et parentis, et sepulcri rationem habere, ex qua sumpti sumus, et ad quam revertemur, nulla jam re alii alios superantes: et, ut adhuc majora proferam, communem rationem, Legem, Prophetas, ipsos Christi cruciatus, per quos omnes citra ullam exceptionem instaurati sumus, qui eidem Adamo participavimus, atque a serpente in fraudem inducti, et per peccatum morte affecti, ac per cœlestem Adamum saluti restituti, atque ad vitæ lignum, unde excideramus, per ignominiae lignum revocati sumus.

X. Me vero Samuëlis quoque Ramatha fallebat ¹, parva, inquam, magni illius viri patria, quæ Prophetæ dedecori minime fuit, nec a se ipsa potius, quam ab eo honorem consecuta est; nec ei impedimento fuit, quominus Deo, prius etiam quam in lucem prodiret, donaretur, et oracula ederet, et futura prospiceret; ac præterea reges et sacerdotes ungeret, atque ex claris civitatibus ortos regeret ac gubernaret. Tum autem illud de Saûle audiebam, quod patris asinas quærens, regnum invenisset ². Atque ipse quoque «David ex ovium gregibus» ad pascendum Israël assumitur ³. Quid Amos? Nonne caprarius erat, ac moros carpebat ⁴, cum Prophetæ munus ipsi commissum et delegatum est? Quomodo Josephum præterii, «Qui et servus» fuit, et frumenti in Ægypto distributor ⁵, et innumera-bilium illarum copiarum, quæ Abrahæ promissæ fuerant, pater ⁶? Jam Abraham, ut majora colligam, annon peregrinus ⁷? Moyses autem, nonne prius expositus, deinde legislator, atque eorum, qui ad promissam terram conten-

¹ 1 Reg. 1, 1, et seqq. — ² Id. ix, 3, et seqq. — ³ Id. xvi, 11, et seqq. — ⁴ Amos. 1, 1. — ⁵ Gen. xxxvii, 36. — ⁶ Id. xli, 56. — ⁷ Id. xii, 1, et seqq.

debant ¹, imperator, de quo tot tamque admiranda prædicantur? Enimvero me quoque Eliæ, « Qui igneo curru » abreptus est ², » Carmelus fallebat: et Elisæi melote ³, quæ plus virium habuit, quam fila serica, et aurum vestibus per vim assutum. Quin mihi quoque desertum illud, in quo Joannes, « vir inter natos mulierum maximus ⁴, » cum cibo illo, et veste, et zona degebat, imposturam faciebat. Nec vero ulterius progredi dubitabo, Deum rusticitatis meæ patronum nactus. Cum Bethlehem collocabor, cum præsepi vilipendar, propter quod, cum Deum contemnas, quid mirum, si ob eandem causam præconem quoque despicias? Producam etiam tibi piscatores, et pauperes, quibus Evangelium annuntiatur, ac multis divitibus prælatos. Nunquam-ne de civitatibus gloriari desines? Nunquam-ne tibi despicabilem et infamem solitudinem venerationi habebis? Nondum dico aurum in arenis nasci, et pellucidos lapides a petris produci ac donari; quibus si quidquid in urbibus vile est, opponere velim, vereor ne dicendi libertate haud satis commode utar.

XI. At etiam peregrinum et exterum præconem habemus, dicet fortasse quispiam ex his, qui nimis circumscripti, et carni dediti sunt. Quid? Nonne Apostoli peregrini fuerunt apud nationes multas et urbes, in quas divisi sunt, ut Evangelium quaquaversum curreret, nec quidquam trini luminis expers esset, ac veritatis luce minime perfusum, adeo ut iis etiam, qui in tenebris ac mortis umbra sedebant, ignorantix caligo discuteretur? Audisti quid Paulus dicat: « Ut nos quidem, inquit, ad gentes, illi autem ad » circumcisionem ⁴. » Sitsane Petri Judæa. Quid Paulo cum gentibus commune, Lucæ cum Achaïa, Andreæ cum Epiro, Joanni cum Epheso, Thomæ cum India, Marco

¹ Exod. ii, 3, et Id. iii, 10, et seqq. — ² Reg. ii, 14. — ³ Matth. xi, 11.
— ⁴ Galat. ii, 9.

cum Italia? Quid cæteris omnibus, ne sigillatim loquar, cum iis, ad quos profecti sunt? Quare, aut illos etiam objurga, aut mihi quoque ignosce, aut ostende, cum veram doctrinam potissimum astruas, ex insulis nugis tibi calumniam strui. Quoniam autem de his rebus humiliter tecum hactenus et abjecte disserui, age, sublimius jam ac magnificentius disputabo.

XII. Magnis omnibus et excelsis viris, o homo, patria una est, superna Jerusalem, « In quam conversationem nostram recondimus ¹, » Omnibus genus unum, si inferiora hæc spectare velis, pulvis; si superiora, spiraculum illud, cuius participes facti sumus, quodque conservare jubemur, et cum quo mihi ad tribunal sisti necesse est, ut divinitus indita nobilitatis imaginisque rationem reddam. Quisquis igitur per rectam vivendi rationem animique ad exemplar suum inclinationem, spiraculum illud conservaverit, huc demum nobilitas constabit. Contra, qui illud per vitium fœdaverit, formamque alteram, hæc est, serpentis formam, sibi ipsi induxerit, ille vere ignobilis et obscurus habendus erit. Terrenæ autem hæc patriæ, atque hæc generum discrimina, brevis hujus et caducæ vitæ nostræ ac scenæ ludi sunt. Quam enim quisque terram, sive per tyrannidem, sive per calamitatem ante occupaverit, ea patria dicitur, cujus omnes æque hospites et advenæ sumus, quantamlibet vocum appellatione ludamus. Jam genus illud nobile censetur, quod vel olim opibus et copiis excelluit, vel quod nunc superbe intumescit: obscurum contra et ignobile, quod a parentibus, vel propter calamitatem, vel propter animi æquitatem egentibus ducitur. Quoniam enim pacto divinitus indita esse potest hæc nobilitas, quæ partim nunc incipit, partim extinguitur; atque aliis quidem negatur, aliis autem principum rescriptis concedi-

¹ Philip. III, 20. — ² Gen. II, 7.

tur? Hæc de his rebus mea sententia est. Ac propterea, te quidem ob sepulcra vel fabulas magnifico de te existimare sino. Ego autem me ipsum, quantum possum, a fraude atque impostura repurgare studeo, ut nobilitatem vel conservem, vel recuperem.

XIII. Sic igitur, atque ob has causas parvus ego ille, et mala patria ortus, ad vos accessi, idque non sponte, nec memet offerens, ut multi eorum solent, qui nunc ad Ecclesiæ imperia prosiliunt, sed accitus et coactus, ac timori et Spiritui obsecundans. Quod si falsa loquor, non recuso, quominus hic diutius incassum oppugner, nec quemquam errore liberem, sed voti sui compotes fiant, « qui animæ meæ sterilitatem imprecantur¹. » Postquam autem huc veni, ac fortasse cum potestate minime contemnenda, (libet enim ob ea, « Quæ insipientiæ sunt², » nonnihil gloriari,) quemnam eorum, qui inexplebili cupiditate flagrant, imitandum mihi duxi? Quidnam ex hac temporis licentia perperam æmulatus sum, idque cum talia exempla ob oculos posita haberem, quibus etiam remotis, malum tamen non esse, difficile ac rarum est? De quibus Ecclesiis vobiscum contendimus? De quibus pecuniis, idque, cum vos in utraque re, ultra quam necesse esset afflueretis, nos autem utrisque inopia premeremur? Quodnam imperatoris edictum contemptum et pro nihilo habitum acerbis animis persecuti sumus? Quos præfectos in perniciem vestram coluimus? Quorum audaciam denuntiavimus? At congesta in me mala, quot et qualia fuere? Tum autem dicebam: « Domine, ne statuas illis hoc peccatum³; » (nam opportuno Stephani verba in mentem venerunt;) et nunc idem precor. « Maledicimur, et benedicimus: persecutio- nem patimur, et sustinemus: blasphemamur, et obsecramus⁴. »

¹ Psal. xxxiv, 12. — ² 2 Cor. xi, 17. — ³ Act. vii, 59. — ⁴ 1 Cor. iv, 12, 13.

XIV. Quod si propterea injuriam facio, quia tyrannide pressus, æquo animo id fero, hanc injuriam mihi velim condonetis, nam etiam ab aliis tyrannice vexatus, patienti animo id tuli. Ac sane gratiam vobis habeo, quod mansuetudinem et facilitatem mihi tanquam amentiam objecistis. Sic enim, excelsius multo quam pro vestro more, mecum reputo. Quota tandem pars hæc sunt sputorum et alaparum Christi, pro quo, et ob quem pericula subeuntur? Omnia enimvero, unica spinea corona, quæ victori nostro coronam detraxit, et per quam me quoque vitæ asperitate velut corona quadam redimiri sentio, minoris duco: unica arundine, per quam infirmum et imbecille imperium sublatum est: unico felle, atque unico aceto, per quæ amarulenta nostra degustatio sanata est: unica in perferendo cruciatu animi æquitate ac lenitate. Si osculo prodatur ¹, coarguit quidem, sed non percutit: si subito comprehendatur, ita exprobrat, ut tamen sequatur: si zelo inflammatus « Malchi aurem gladio præcideris ², » indigne feret, eamque loco suo restituet: si quis « Sindone » amictus profugiat ³, » eum conteget: si ignem sodomiticum ⁴ adversus eos, a quibus abigitur, poposceris, haudquaquam profundet: si latronem ob scelus in crucem sublatum passus fuerit ⁵, eum pro sua benignitate in paradysum introducet. Benigni denique benigna sint omnia, itidemque Christi passiones, quibus quidnam tandem aliud majus ac præstantius daremus, si, cum Deus mortem ipsam nostræ salutis causa pertulerit, nos contra, ne leves quidem offensas et injurias æqualibus nostris remittamus?

XV. Quin hæc quoque mecum cogitabam, atque etiamnum cogito, (quam recte, ipsi videte,) de quibus etiam ipsis apud vos sæpe disserui. Hi domos habent, nos hos-

¹ Matth. xxvi, 49. — ² Joan. xviii, 10. — ³ Marc. xiv, 51, et seqq. — ⁴ Luc. ix, 54. — ⁵ Id. xxiii, 43.

pſitem : hi templa , nos Deum : idque præterea , quod viva viventis Dei templa sumus , victimæ vivæ , holocausta ratione prædita , sacrificia perfecta , Dii denique , Trinitatis adoratæ beneficio. Hi populos habent , nos Angelos : hi temeritatem et audaciam , nos fidem : hi minas , nos orationes : hi quod percutiunt , nos quod ferimus : hi aurum et argentum , nos repurgatam doctrinam. « Fecisti tibi duplices et triples contignationes , (agnosce Scripturæ verba ,) » domum perflatilem , fenestris distinctam ¹ ? » At hæc nondum fide mea sublimiora sunt , nec cœlis , ad quos tendo. At mihi grex exiguus ? Sed in præcipitia non fertur. At angusta mihi caula ? Sed quæ lupis non pateat , sed quæ latronem non admittat , nec a furibus , et exteris transcendatur. Eam , pulchre scio , eam latiore videbo. Multos enim ex his , qui nunc in luporum numero sunt , inter oves , ac fortasse etiam inter pastores , recensendos habeo. Hoc mihi fauste nuntiat Pastor ille bonus , ob quem « Ego animam meam pro ovibus pono ². » Exiguus grex timorem mihi non injicit , utpote facile conspicuus ; quoniam « Oves meas cognosco , et a meis vicissim cognoscor ³. » Tales sunt , quæ Deum cognoscunt , et a Deo cognoscuntur. « Oves meæ vocem meam audiunt ⁴ , » quam a divinis oraculis audiivi , quam a sanctis Patribus didici , quam per omnem vitæ cursum eodem modo docui , (nequaquam pro tempore aliam atque aliam subinde formam assumens ,) nec unquam docere desinam , cum qua natus sum , et cum qua hinc discedam.

XVI. « Eas nominatim voco ⁵ , » (nec enim nomine carent , quemadmodum nec sidera , quæ numero comprehenduntur , ac suo quæque nomine appellantur ,) et me sequuntur , utpote a quo super « Aquam refectionis ⁶ »

¹ Jerem. xxi, 14. — ² Joan. x, 11. — ³ Ibid. 14. — ⁴ Ibid. 27. — ⁵ Ibid. 3. — ⁶ Psal. xxi, 2.

educantur : quemvis etiam alium similem pastorem sequuntur, cuius vocem quanta cum voluptate audiverint, videtis : alienum autem minime sequuntur, verum ab eo diffugient, quandoquidem ad eum jam habitum pervenerunt, ut familiarem vocem ab aliena internoscant. Valentini tunc in duo sectionem fugient, rerum opificem a bono diversum minime esse credentes. Bythum insuper et Sigen, et fabulosos Æones fugient, res sanè profundo gurgite ac silentio dignas. Marcionis quoque conflatum ex elementis et numeris Deum fugient : Montani pravam et mullebre spiritum : Manis, una cum tenebris materiam : Novati arrogantiam, et sitam in verbis puritatem : Sabellii resolutionem et confusionem, atque, ut ita loquar, absorptionem, tres Personas in unam contrahentis, ac non unam in tribus Personis essentiam constituentis : Arii, et eorum, qui Ario subsunt, naturarum diversitatem, ac novum judaismum, solo videlicet Ingenito Divinitatem circumscribentis : Photini terrenum Christum, atque a Maria ortus initium trahentem. Ipsi vero Patrem, et Filium, et Spiritum sanctum adorabunt, Deitatem unam ; Deum Patrem, Deum Filium, Deum, (nisi hoc tibi stomachum movet,) Spiritum sanctum, unam naturam in tribus proprietatibus, intelligentibus, perfectis, per se ac separatim subsistentibus, numero quidem distinctis, Divinitate autem non item.

XVII. Has voces mihi concedat quisquis mihi hodie minuitur : alias autem, qui volent, sibi vindicent. Pater Filio privari non sustinet, nec Filius Spiritu sancto. Id autem contingat necesse est, si tempori subiciantur, et si creati sunt. Neque enim Deus est, quod creatur. Ne ipse quidem perfectionis detrimento affici sustineat. « Unus Dominus, una Fides, unum Baptisma ¹. » Hoc si mihi intantum reddatur, a quo tandem alterum habiturus sum ?

¹ Ephes. iv, 5.

Quid ad hæc dicitis, qui submergitis, vel remergitis? An quisquam sine Spiritu spiritualis esse potest? An Spiritus particeps est, qui Spiritum non honorat? An honorat, qui in creatum et conservum baptizatur? Minime profecto; nec id, multa verba profundens, persuadere poteris. Fidem tibi datam non fallam, Pater, principii expers: fidem non fallam, Verbum unigenitum: fidem non fallam, Spiritus sancte. Scio quid professus fuerim, cui renuntiarim, et cui me adjunxerim. Non patior, cum fidelis hominis vocibus imbutus sim, ut infidelis sim, discere: cum veritatem confessus sim, mendacio jungi; cum perfectionis adipiscendæ causa descenderim, imperfectior ascendere; cum, ut victurus, baptizatus sim, in aquis emori, quem admodum fœtus qui inter ipsos partus dolores extinguuntur, eodemque momento, quo nati sunt, morte opprimuntur. Quid me simul beatum et miserum, recenti luce perfusum et lucis expertem, divinum et Deo orbatum facis, ut regenerationis quoque spem quasi naufragio amittam? Breviter dicam: Confessionem tuam memoria tene. In cujus nomine baptizatus es? Patris? Recte: verum id adhuc judaicum. Filii? Præclare: hoc jam minime judaicum, sed nondum tamen plenum ac perfectum. Spiritus sancti? Optime: numeris omnibus absolutus est hic baptismus. Verum, heus tu, an simpliciter in hæc tria, an quoddam etiam nomen est, quod tribus his communiter quadrèt? Maxime. Quodnam hoc? Nimirum Dei nomen. In hoc igitur commune nomen crede, « Et prospere incede, et regna¹, » atque hinc ad alterius vitæ beatitudinem transibis. Ea porro, ut mihi quidem videtur, in expressiore horum cognitione ac comprehensione sita est: ad quam utinam ipsi quoque perveniamus, in ipso Christo Deo nostro, cui gloria et imperium cum Patre principii

¹ Psal. XLIV, 5.

experte, et vivifico Spiritu, nunc et semper, et in sæcula sæculorum. Amen.

ORATIO XXXIV¹.

In Ægyptiorum adventum.

ARGUMENTUM.

I. Eos, qui ex Ægypto venerant, salutat et alloquitur Gregorius. II. Ægyptii, fide et Verbi prædicatione, per totum orbem celeberrimi. III. Athanasii, et Petri ejus in throno successoris, laus. IV. Athanasius et Petrus, ex ipsis periculis pro fide susceptis, robur collegerunt. V. Christus veteres Ægyptiorum impietates superavit. VI. Ægyptii, ob fidem et pietatem, Gregorio amantissimi. VII. Ægyptii magis fidei ac veritatis amore, quam navali pompa celebres. — Dei frumentum, pro terræ frumento accipiunt. VIII. Veræ fidei circa Trinitatem expositio. IX. Deus unus et trinus. X. Pater, uno omnium consensu, ut Deus, agnitus. — Filius et Spiritus sanctus varie a variis impugnati. XI. Filii ac Spiritus sancti Divinitatem negare, blasphemia est. XII. Qui Deus non est, Divinitatem hominibus afferre nequit. XIII. Deus unus ac trinus prædicandus et adorandus. XIV. Fures sunt, qui Filii et Spiritus sancti Divinitatem negant. XV. Perfecta in tribus Personis divinis naturæ æqualitas.

¹ Alias xxiv, quæ autem xxxiv erat, nunc est xxviii. Habita Constanti-
nopoly circa mensem Augusti anni 380.

I. Eos, qui ex Ægypto venerunt, ut par est, salutabo, atque alloquar; quandoquidem, superata per zelum invidia, prompte et alacriter convenerunt, ex hac, inquam, Ægypto, quam et fluvius ditat, e terra pluens, ac tempestive maris instar exundans; (ut eos quoque nonnihil imiter, qui in huiusmodi rebus sciti et lepidi sunt;) quamque item ditat Christus meus, qui antea quidem «In Ægyptum» fugabatur¹, » hunc autem ab Ægypto alitur; tum nempe ob Herodem pueris necem afferentem, nunc vero ob parentum erga filios charitatem: Christus, inquam, novus eorum, qui recte esuriunt, cibus, annona illa, illa major omni ea, quæ historiæ monimentis prodita est, ac creditur: «Panis, inquam, ille de cœlo descendens², » vitamque finis omnis atque interitus expertem mundo afferens; de quo nunc mihi quoque Patrem audire videor dicentem: «Ex Ægypto vocavi Filium meum³. »

II. A vobis enim sermo ad omnes homines dimanavit, tum sincere creditus, tum prædicatus: ac vos omnium, et præsertim eorum, qui nunc recta fide præditi sunt, optimi largitores estis, quantum quidem ipse cognosco, qui huiusmodi cibi, non modo sum amator, sed etiam subministrator; nec in patrio duntaxat solo, sed etiam in externo. Vcs enim corporeis quidem cibis populos et urbes alitis, quacumque se benignitas vestra porrigit; spiritualibus autem, non certam quamdam plebem, aut certam civitatem, angustis finibus circumscriptas, quamlibet alte et splendide de se sentiant, verum universum præpe terrarum orbem alitis. Atque adeo, non panis famem, aut aquæ sitim curatis, quibus nec premi admodum grave est, et iisdem mederi facile; «Sed famem audiendi verbum Domini⁴, » quam et pati miserrimum, et curare hoc tempore perar-

¹ Matth. II, 15. — ² Joan. VI, 35. — ³ Osee. XI, 1. — ⁴ Amos. VIII, 11.

duum et perdifficile : « Quoniam abundavit iniquitas ¹, » ac paucos reperio, qui vere ac bona fide huic fami medeantur.

III. Talis enimvero erat Joseph, dispensator vester, ac proinde et noster, qui, et pro eximia sua sapientia famem prospicere norat, et consilio ac prudentia curare, perpulchris nimirum et obesis bobus, deformes ac macie confectas sanans. Et quidem utrumvis Joseph intelligere volueris, sive illum immortalitatis amatorem, et effectorem, et nomen ferentem; sive illius, et in throno, et in doctrina, et in capitis successorem, novum, inquam, nostrum Petrum, non minus virtute, quam nomine : a quibus, id quod mendicium fuit, excisum et contritum est, tametsi paululum adhuc et languide, velut serpentis intercisi cauda, palpitet : quorum alter in bona senectute post multas dimicationes et palæstras vita defunctus, nunc res nostras, ut persuasum habeo, cœlitus inspicit, ac virtutis causa laborantibus manum porrigit, eoque magis, quod corporis vinculis liberatus est; alter vero ad eundem vitæ finem aut resolutionem, post eadem certamina properat, et cœlitibus quidem jam propinquus est; cæterum hactenus adhuc in carne versatur, ut fidei doctrinæ postremam opem ferat, ac cum ampliori et copiosiori viatico inter capessat.

IV. Vos estis alumni et soboles illorum præstantium veritatis doctorum, et propugnatorum, et victorum; quos non tempus, non princeps, non sermo, non invidia, non metus, non accusator, non calumniator, non bellum aperte inferens, non clandestinas insidias struens, non in speciem noster, non alienus, non aurum, occultus ille tyrannus, per quem nunc multa sursum deorsumque, velut in talorum ludo, jactantur, non blanditiæ, non minæ, non exilia, et multa, et diuturna, (soli enim bonorum proscriptioni

¹ Matth. xxiv, 12.

in eos propter magnas illas divitias, hoc est, inopiam, nihil licuit,) non aliud quidpiam absentium, aut præsentium, aut in expectatione positorum, extulit, aut adducere potuit, ut deteriores fierent, ac de Trinitate aliquid proderent, et Divinitatis jacturam facerent. Imo contra, ex ipsis periculis robur collegerunt, atque ad pietatem ferventiores extiterunt. Talia enim pro Christo pati, amor cumulum avertit, atque animi magnitudine præditis viris ad sequentia certamina velut arrha existit. Hæc sunt, Ægypte, quæ de te modo narrantur miracula.

Y. At tu antea Mendesios hircos laudibus efferebas, et Memphiticum Apim, vitulum quemdam præpinguem et opesum, et Isidis sacra, et Osiridis lacerationes, et venerandum tuum Serapidem, lignum, fabula, et tempore, et adorantium amentia, adoratum, velut incognitam quamdam et cælestem materiam, cæterum materiam, quamlibet a mendacio adjuvetur: ac, quæ his etiam fœdiora et obsceniora sunt, varia quorundam animalium et reptilium signenta, quæ omnia Christus superavit, et Christi præcones; tum alii omnes, qui sua quisque tempestate fulserunt; tum hi etiam Patres, quos modo commemoravi; a quibus, o admiranda regio, hodierno die magis agnosceris, quam omnes ab omnibus simul, tam priscis, quam recentibus historiis agnoscantur.

VI. Quocirca te complector et saluto, populorum optime, Christique amantissime, ac pietate ferventissime, tuisque ducibus digne; neque enim majus quidquam, quod dicam, occurrit, nec quo magis vox excipiam. Et vero excipio, parum quidem lingua, multum autem animi affectibus. Popule mi, meum enim appello eum, qui eadem, ac ego, sentit, et eandem fidem profitetur, et ab iisdem Patribus et doctoribus eruditus est, atque eandem Trinitatem adorat. Popule mi, meus enim es, etiamsi homini-

bus invidia laborantibus aliter videatur. Atque, ut magis adhuc feriantur, qui ita affecti sunt, en dexteras societatis præbeo coram tot testibus, visibilibus juxta et invisibilibus; veteremque calumniam nova benignitate propello. Popule mi, meus enim es, etsi maximum minimus vindico. Talis enim Spiritus gratia est: pares honore eos facit, qui idem sentiunt. Popule mi, meus enim es, etsi procul a me disjunctus: quoniam divinitus connectimur, alioque modo, quam quæ crassitie prædita sunt. Corpora etenim loco conjunguntur, animæ autem Spiritu conglutinantur. Popule mi, qui prius quidem pro Christo pati studio habebas, nunc autem, si consilio meo pareas, operam dabis, ne quid mali inferas, sed lædendi potestatem satis magnum lucrum ducas, « Ac te obsequium Christo offerre existimes¹, » ut tum patientiam, ita nunc mansuetudinem animique facilitatem. « Popule, ad quem beneficiis ornandum » accinctus est Deus², » quemadmodum « Ad male mulcandos adversarios³. » Popule, « Quem Deus sibi elegit » ex omnibus quos accivit⁴. » Popule in manibus Domini scripte, cui, « Tu enim es Voluntas mea⁵, » dicit Dominus: et, « Portæ tuæ sculptura⁶, » et quæcumque postea ad eos, qui salutem consecuturi sunt, referuntur. Popule, ac ne me, quæso, tanquam immodicum, admiremini, si vos identidem compello; incredibilem enim ex vobis assidua hujusmodi appellatione lætitiā capio, non secus videlicet, atque qui spectaculis quibusdam vel auditionibus insatiabili quadam aviditate fruuntur.

VII. At, o Dei popule, et noster, pulchra quidem erat recens quoque illa vestra celebritas, quam in mari statuis-tis, et si qua alia, oculis grata et jucunda, cum mare arboribus stratum, et manufacta nube obtectum vidi, et

¹ Joan. xvi, 2. — ² Malach. i, 4. — ³ Zach. viii, 15. — ⁴ Psal. xxvii, 12. — ⁵ Isai. lxi, 4. — ⁶ Id. lvi, 12, et lx, 18.

navium, velut ad pompam instructarum, elegantiam ac celeritatem, modicumque ad puppim ventum, nantem in mari civitatem, tanquam dedita opera stipantem, atque ad urbem transmittentem; pulchrior tamen et magnificentior hæc, quam nunc cernimus. Nec enim vos ipsos multitudini admiscuistis, nec hominum numero pietatem definivistis, nec inconditum potius vulgus esse sustinuistis, quam populus, Dei verbo perpuratus: verum, posteaquam « Cæsari quæ sunt Cæsaris¹, » quantum officii ratio postulabat, contulistis, Deo etiam quæ Dei sunt tribuistis; illi nempe vectigal, huic timorem²: et postquam cibis vestris populum aluistis, ipsi quoque, ut a nobis alimini, huc acceditis. Nam et nos etiam frumentum largimur, ac frumentum quidem vestro nequaquam fortasse deterius. « Venite, comedite panem meum, et bibite vinum, quod miscui vobis³: » ad mensam meam vos cum Sapientia invito. Candorem enim vestrum laudo, atque animi promptitudine vobis occurro, quoniam ad nos, tanquam ad vestrum portum appulistis, ad similem videlicet accurrentes, fideique cognationem honore prosecuti estis, absurdumque esse censuistis, cum ii, qui res superas contumeliis insectantur, inter se consentiant atque concordent, ac privatam cujusque imbecillitatem communi consensu et conspiratione, non secus ac funiculi illi, qui mutuo nexu roborantur, suffulciri putent, vos autem non una convenire, nec cum iis colligari, qui ejusdem sententiæ sunt, quibus tamen multo æquius est, cum ipsi Deitatem quoque jungamus. Atque ut vos haud frustra ad nos accurrisse, neque ut ad externos et alienos, sed ad vestros portus appulisse, præclarumque itineris vestri ducem Spiritum sanctum extitisse cognoscatis, pauca de Deo ad vos disseremus. Ac facite, ut vestra agnoscatis,

¹ Matth. xxii, 21. — ² Rom. xiii, 7. — ³ Prov. ix, 5.

quemadmodum qui sup̄s, ex armorum signis, agnoscunt.

VIII. Quas summās in iis, quæ sunt, differentias reperio, dominationem nempe et servitutem: non quas apud nos, vel tyrannis scidit, vel paupertas disjuxit; sed quas natura distinxit, si cui tamen hæc voce uti libeat. Nam quod primum est, supra naturam quoque est. Harum autem altera effectrix est, et princeps, ac motus expers: altera effecta, et imperio subjecta, et caduca. Atque, ut compendiosius adhuc loquar, altera supra tempus est, altera temporis subest. Vocatur autem illa quidem, Deus, et in tribus maximis consistit, in Causa, in Opifice, in Perfectore; hoc est, in Patre, Filio, et Spiritu sancto. Qui quidem nec ita inter se distracti sunt, ut natura scindantur: nec rursus ita in arcum redacta natura, ut in unam circumscribatur Personam; (illud enim est furoris Ariani, hoc Sabellianæ impietatis;) sed ut magis singularis est, quam ea, quæ in divisionem omnino cadunt, ita copiosior, quam ea, quæ prorsus singularia sunt. Hæc vero altera nobiscum est, ac Creatura nominatur; tametsi inter res creatas aliæ aliis dignitate præstent, prout videlicet quæque Deum propinquius attingit.

IX. Quæ cum ita se habeant, « Si quis cor ad Dominum habet, nobiscum jungatur¹, » atque unam in tribus Personis Deitatem adoremus, nullum humilitatis nomen inaccessibili gloriæ tribuentes, sed unius Dei in tribus Personis « Exaltationes semper in gutture serentes². » Cujus enim ne magnitudinem naturæ, propter infinitam et nullis terminis inclusam ipsius vim, proprie dicere possumus, quo tandem modo ipsi humilitatem inducemus? Quisquis autem a Deo alienus et aversus est, ob eamque causam, unam illam rebusque omnibus superiorem essentiam in dispare naturas dividit, mirum sane fuerit, si non ipse

¹ Exod. xxii, 26. — ² Psal. cxlix, 6.

« Gladio dividatur, parsque ipsius cum infidelibus ponatur¹, » pravum pravæ sententiæ fructum, et nunc, et postea percipientis.

X. Ac de Patre quidem, quid dicere necesse est, cui uno consensu omnes, naturalibus animi notionibus edocti atque imbuti, parant? Quanquam etiam primas ignominias tulit, utpote qui primus in Bonum et Opificem a priscis novatoribus dissectus est. De Filio autem et Spiritu sancto, videte quam simpliciter et breviter disseramus. Si quis horum alterutrum, vel conversioni aut mutationi subesse, vel in temporis, aut loci, aut potentiæ, aut operationis mensuram cadere, vel non natura bonum, vel non per se moveri, vel arbitrii libertate carere, vel ministrum, vel divinæ laudis cantorem, vel metuentem, vel libertate donatum, vel non simul cum Patre numeratum, dicere potest; hoc ostendat, et acquiescemus, nosque conservorum gloria et dignitate honorari feremus, Dei licet jacturam faciamus. At si, quidquid Pater habet, idem, præter causam, Filii est; quidquid item Filius habet, idem quoque Spiritus sancti est, præter filiationem, eaque omnia, quæ corporea ratione de eo prædicantur, propter me hominem, meamque salutem, ut, quod meum erat, accipiens, quod suum est, mihi per novam hanc commixtionem largiatur; tandem aliquando nugari desinite, o inanum verborum ac statim cadentium artifices. « Et quare, ut ex » Scriptura vos deplorem, moriemini domus Israël²? »

XI. Ipse equidem, et Verbi appellationes, tot scilicet tamque magnas et sublimes, et quæ dæmonibus etiam pudorem incusserunt, revereor. Revereor etiam Spiritus sancti æqualitatem; ac constitutam in eos, « Qui blasphemis verbis eum impetunt³, » comminationem pertimesco. Blasphemia porro est, non theologia, ei Divinitatem au-

¹ Luc. xii, 46. — ² Ezech. xviii, 31. — ³ Matth. xii, 31.

ferre. In quo illud observandum, quod is, qui blasphemis vocibus incessebatur, Dominus erat; is autem, qui vindicabatur, Spiritus sanctus, procul dubio ut Dominus. Non sustineo, post illuminationem lucis expers esse, quidpiam trium, in quæ baptizatus sum, adulterans, ac vere in aquis sepeliri, non ad regenerationem, sed ad mortem initiatus.

XII. Audacius aliquid proloquar, o Trinitas; ac temeritati venia detur: nam de animæ salute periculum est. Dei quoque ipse sum imago, supernæ scilicet gloriæ, licet humi positus. Non adduco ut credam, mihi ab æquali salutem afferri. Si Spiritus sanctus Deus non est, Deus prius efficiatur, atque ita demum me, æqualem suum, Deum efficiat. At nunc, quæ hæc gratiæ impostura est, vel eorum potius, qui gratiam tribuunt, velut in Deum credere, et Deo orbatum recedere? Aliud professum esse, et aliud doceri? Quales furtivæ verborum fraudes, per aliam interrogationem et confessionem alio fereutes? Me miserum splendoris hujus nomine, si post lavacrum niger effectus sum, si eos qui nondum purgati sunt, splendidiore cerno, si per pravam initiatoris mei doctrinam, tanquam talis quibusdam deludor, si præstantiorem Spiritum quæro, nec invenio. Da mihi alterum lavacrum, ac tum de priore male cogita. Quid mihi perfectam regenerationem invides? Quid me, « Cum Spiritus, tanquam » Dei, templum sim¹, » rei creatæ domicilium facis? Quid ea, quæ mea sunt, partim honore, partim ignominia afficis, malum te Divinitati arbitrum præbens, ut mihi baptismum, vel me ipsum potius per baptismum, seces? Aut totum honore proseguere, o nove theologe, aut totum sperne, ut, etiamsi impius sis, tibi tamen ipse constes, naturam honore parem haudquaquam dispari modo expendens.

¹ 1 Cor. vi, 19.

XIII. Sit autem hoc orationis caput : divinam gloriam cum Seraphinis prædica , « Qui tres sanctitates in unam » dominationem contrahunt¹, » primamque essentiam hactenus indicant , quatenus eam studiosis hominibus eorum aë paululum aperiunt. Illuminare cum Davide , qui sic lumen alloquitur : « In lumine tuo videbimus lumen², » hoc est , in Spiritu Filium : quo quid fulgidius esse possit ? Cum Joanne illo , « Tonitruui filio³, » intona , nihil de Deo abjectum ac terrenum insonans , sed excelsum et sublime , (nempe , « Verbum illud , quod in principio erat , » et apud Deum erat , et Deus erat⁴, » Deum agnoscens , et Deum verum ex Patre vero , non autem conservum bonum , solo filii nomine ornatum : atque alium Paracletum , alium , inquam , ab eo , qui loquebatur ; Dei porro Verbum loquebatur ;) eamque rationem iniens , ut cum illa legis : « Ego et Pater unum sumus⁵, » essentiae conjunctionem tibi ob oculos proponas : cum autem illa : « Ad eum veniemus , et mansionem apud eum faciemus⁶, » Personarum distinctionem cogites : cum vero , « Patris , » et Filii , et Spiritus sancti nomen⁷, » tres proprietates spectes.

XIV. Cum Luca divinitus afflare , Apostolorum Acta legens. Quid te Ananiæ Saphiræque adjungis⁸, novis illis pecuniæ furibus ? (Nova etenim haud dubie est propriarum rerum surreptio ,) idque non pecuniam , aut aliud quidpiam leve et exigui pretii suffurans , « Ut linguam auream , paludamentum , aut didrachma⁹, » ut quondam avarus miles , sed ipsam Divinitatem surripiens , « Ac Deo , » non homini mentiens¹⁰, » ut Scripturæ verbis utar. Quid ? Ne ipsam quidem revereris Spiritus potestatem , « Qui in

¹ Isaï. vi, 3. — ² Psal. xxiv, 10. — ³ Marc. iii, 17. — ⁴ Joan. i, 1. —

⁵ Id. x, 30. — ⁶ Id. xiv, 23. — ⁷ Matth. xxviii, 19. — ⁸ Act. v, 1, et seqq. — ⁹ Josué. vii, 21. — ¹⁰ Act. v, 4.

per quos, et quando, et quantum vult, spirat¹? Ad Cornelium ante baptismum accedit; ad alios, Apostolorum opera, post baptismum². Ita utrinque, nempe, et ex eo quod herili, non autem servili modo accedit, et ex eo quod ad baptismum omnibus numeris absolvendam requiritur, Spiritus sancti Divinitas testata relinquitur.

XV. Cum Paulo de rebus divinis disserere, cum illo, inquam, qui « Ad tertium cælum evectus est³; » qui nunquam tres Personas connumerat, idque varie, nec nominum ordine servato, sed eandem Personam nunc prænnumerans, nunc connumerans, nunc subnumerans. Quorsum hoc? Nempe ut naturæ æqualitatem ostendat: nonnunquam etiam trium, interdum duorum, aut unius mentionem facit, tanquam videlicet reliquæ Personæ simul sequantur: atque etiam aliquoties, « Dei operationem Spiritui tribuit⁴, » ut nulla in re diverso; aliquoties autem rursum « Pro Spiritu Christum infert⁵: » et quidem, cum Personas distinguit, his verbis utitur: « Unus Deus, » ex quo omnia, et nos in ipsum; et unus Dominus Jesus Christus, per quem omnia, et nos per ipsum⁶. » Cum autem unam Deitatem colligit, ita loquitur: « Quia ex ipso, et per ipsum, et in ipsum omnia⁷, » nimirum per Spiritum sanctum, ut multis Scripturæ locis demonstratur. Ipsa gloria in sæcula sæculorum. Amen.

¹ Joân. iii, 8. — ² Act. x, 44, et xix, 2. — ³ 2 Cor. xiii, 2. — ⁴ 1 Cor. xii, 11. — ⁵ Rom. viii, 9, et seqq. — ⁶ 1 Cor. viii, 6. — ⁷ Rom. xi, 36.

ORATIO XXXV¹.*De Martyribus; et adversus Arianos.*

ARGUMENTUM.

I. *Exultat Gregorius, quod Ecclesiæ sint Catholicis restitutæ.* II. *Hæresis, instar nebulae, a Spiritu sancto dissipata.* III. *Horrenda hæreticorum facinora.* IV. *Singularis licentiæ ac libidinis descriptio.*

I. Quid tantum diel potest, quantum oculis usurpare licet? Quenam autem oratio, cum his bonis quæ conspiciuntur, comparari potest? En oculis nostris incredibile proponitur spectaculum; quod sæpe quidem videre optavimus, expellunt autem; vota quoque excedit. Hic rursus desertur Martyribus honor, qui longè jam temporis spatio neglectis erat; rursus Dei sacerdotum concursus; rursus tripudia et spirituales celebritates: Frequens hic conventus, non ad arma movenda, sed ad diem festum agendam promptus ac paratus est. O ingens miraculum! Arma e manibus projecta sunt, soluta est acies; bellum curâ abjicitur. Non jam amplius ululatum vocēs audiantur; contra verò; festa; et gaudia; et pacificæ animarum jucunditates totam civitatem, velut institutis choris; ambiunt: hæc, inquam, quæ olim Martyrum pærens erat;

¹ Alias XLVIII, quæ autem XXXV erat, nunc est XXIX. Habita exeunte mense novembri an. 380.

verum diuturno interea tempore, eo honore, quem ex filiis capiebat, orbata. At nunc, ut Apostoli verbis utar, « Omnia habet et abundat¹. » Euge, o Martyres; vestrum hoc quoque certamen est: vos ingens bellum confecistis, sat scio. Hæc quoque sudores vestri præstiterunt. Vos paci trophæum istud erexistis. Vos Dei sacerdotes ad vos ipsos attraxistis. Vos Spiritus sancti tripudiatore huius conventui præfecistis. O quanto affecti sunt damno, quibus vitæ tempus ad hoc usque spectaculum non pertractum est, ut molestiis ærumnisque saturati, pacis bonis fruerentur!

II. Abiit, et deleta est hæresis impostura, instar nebulae cujusdam, a Spiritu sancto dissipata. Pura autem effulsit pacis serenitas, ac per eam emicant urbis stellæ, in splendida veritatis luce radiantes; non nocti ac tenebris attributæ, sed omnes interdiu lucentes, vero iustitiæ lumine refulgentes. Et quoniam, ut ait Apostolus, « Nox præcessit², » vel potius omnino evanuit, atque diei luce omnia hilarescunt, fugiunt quidem feræ, quæ pabula noctu quærunt, ac in saltus et speluncas se recipiunt; ita etiam fugiunt nycticoraces hæreticæ stridorem edentes; et ad veritatis lucem cæcutientes, atque capitibus inter se hærentes, in petrarum scissuras se conjiciunt. Per huius diei lucem cessarunt comessatorum ac temulentorum sodalitia. Fures, parietum effossores, prædones, et si quid aliud noctis opus est, exorto pacis lumine, latebras petiit. Quandiu porro nox illa erat, erroris caligine cuncta obscurans, qualia tandem fuere quæ gerebantur? Hæc siquidem oblivione altoque digna silentio, ut ne tristium rerum memoria præsens gaudium contaminetur. Quonam enim modo, quæ tum patrata sunt mala, quispiam dixerit? Ac quonam rursus modo ea tacuerit? Quis

¹ Philip. IV, 18. — ² Rom. XIII, 12.

ad hunc modum ex tragœdia commotus est? Quæ fabula tantas calamitates efflinxit? Quis tragœdus rem tam luctuosam pro scena conclamarit? Sermonis facultatem calamitas superat: majora sunt mala, quam ut quis verbis ea enarrare possit.

III. Chorus ille, diaboli sedes et propugnaculum erat. Hic sibi exercitum constituerat, ac defensores et satellites in eo collocarat. Hic mendacii castra, erroris propugnatores, dæmonum expeditio, immundorum spirituum legiones; ac, si quid etiam externorum nominum usurpare licet, hinc pravus furiarum exercitus adversus Ecclesiam debacchatus est. Sic enim adducor, ut eas fœminas appellem, quæ supra naturam ad malum viriles sese præbuerunt. « Una erat in diebus Eliæ Jezabel adversus Prophetas Domini cædem anhelans¹; » eamque inspirata divinitus Scriptura proscindit, ut, mea quidem sententia, omne deinceps sæculum, petulantis ac impudicæ mulieris recordatione, erudiat. Verum, quot Jezabeli huic similes, velut cicuta, ex agro repente pullularunt, majori quoque sævitia eam, quam commemoravi, superantes. Quod si fidem sermoni meo non habeas, historiam inspice. Illa quidem Naboth vineam mœrenti Achab tradidit, ut ex vinea hortum faceret, luxus ornamentum, muliebres delicias; istæ autem, per se ipsas hoc malum perpetrantes, vivam Dei vineam, id est, Ecclesiam, penitus vi delere ac evertere tentarunt. Quodnam ejus quod refero exemplum reperiam? Ecquam hujus pravitatis ac nequitiae imaginem excogitabo? Vidi in dealbato pariete picturam. (Ignoscite animo malorum recordatione exulcerato; imo potius vos ipsi dolorem nostrum dolete; nostra quippe, non aliena mala narramus.) Quænam igitur illa erat pictura, quam rebus nostris comparo? Procax ac præpudiosa quædam

¹ 3 Reg. xxi, 1, et seqq.

erat mulierum chorea, alia in aliam tripudii speciem ad gesticulationem sese distortuentes. (Tales feminas Mœnadas fabulæ vocant.) Ad auræ flatum comæ involitabant : aspectus furoris aditus erat : accensi faces manibus gestabantur, ex quibus flammæ, corporum volutatione, rotabantur : aura in sinu peploꝝ concinnam gravitatem ac modestiam deturpabat : summis pedibus insiliebant ac saltitabant : honestus pudor nihil eorum, quæ fiebant, contingebat.

IV. Per medium autem hujusmodi choreæ, tale viri simulacrum adverti : semivir quidam erat, sexq̃ dubius et vultu effeminatus, in naturæ confinio positus, gestu fractus ac dissolutus, velut, commensatione quadam et tumultu, mente captus. Hic in curru quodam resupinus per Mœnadum chorum a feris gestabatur. Ingens autem circa ipsum meri copia erat, ac loquaces quidam naturæ monstrosi simulacrum circumstabant, facie pilosi, in hircinis cruribus circa simulacrum tripudiantes. Talia sunt exposita hujus noctis pectacula. Fœminæ in sexus sui dedecus et probrium spectatæ, communi naturæ accusatione, consuetam mulieribus modestiam abjicientes, per mediam urbem pompam agebant, ostentantes naturam turpiter per ipsas ac indecore habitam ; manus, scutorum loco, saxis armatæ, cædem occultam, impudenti oculorum conjectu, minitantes, intra divina septa ingressæ, suum in sacra sede Corybantem collocarunt. Deinde crapula, et merum, et ex solitariis locis panes, et nox, et promiscua consuetudo, et ea omnia, quæ Apostolus vel eloqui prohibet, dicens : « Quæ autem in occulto ab eis fiunt, turpe est dicere¹. » Quis enim accurate verbis percurrere queat ignem, lapides, cædes, vulpera ? Quo pacto certatim sacrarum ædium cultores funditus evertere tentarunt ? Quomodo in media

¹ Ephes. v, 12.

urbe virum quemdam, veritatis zelo flagrantem, fustibus ceciderunt, quem scilicet cedere destiterunt, quod mortuum crederent? Verum haud scio, quomodo ab ea, quæ decebat, voluptate defluxit oratio, in terrenis immorata narrationibus. Itaque eo, unde digressi sumus, redeundum est, ut suavi grataque orationis potione, salsam et amaram eorum, quæ narrata sunt, potionem eluamus. « In die » enim lætitiæ, inquit, malorum oblivio est. » Quocirca ad eundem sermonem revertor, quod scilicet nox illa et caligo depulsa est, pacisque radii, per puram serenitatem, veritatis luce undique collucent. Quapropter e divinis septis jectum est quidquid male olens et profanum erat; contra vero omni piorum virorum lætitia ædes resonant, nec quidquam ad jucunditatem desideratur. Præsto sunt convivatores, convivæ, et exquisitis referia dapibus mensa.

ORATIO XXXVI¹.

De se ipso, et ad eos, qui ipsum cathedram Constantinopolitanam affectare dicebant, et de populi alacritate, quam erga eum ostenderat.

ARGUMENTUM.

I. Gregorius ob sermones regi suo charissimus. — Nulla vana sui opinione inflatus. II. Nec facetus, nec jucundus. III. Cur populus erga Gregorium tanto amoris

¹ Eccli. xi, 27. — * Alias xxvii, quæ autem xxxvi erat, hunc est xxx. Habita Constantinopoli, medio circiter decembri anni 380.

studio sit inflammatus. IV. *Gregorius ob summitati eloquentiam invidia et calumniis objectus.* V. *Acerbi invidia fructus per enumerationem partium comprobantur. Lucifer. Adam. Caïn. Diluvium. Sodomitæ. Dathan et Abiron. Salomon. Judas. Herodes. Pilatus. Israëliticus populus. Julianus Apostata. Hæreses.* VI. *Erubesceret Gregorius, si morbis et senectute fractus, episcopalem cathedram affectasset.* — *Gregorius Constantinopolim venit, ut fidei patrocinaretur.* VII. *Objectiones refellit.* — *Deum veritatis testem appellat Gregorius.* VIII. *Non erubescendum, cum maledicta patimur.* IX. *Virtus ob ipsam virtutem colenda.* X. *Gloria pastoris est grææ doctrina et fide imbutus.* XI. *Gregorius monita salutis dat imperatoribus, et aulicis.* XI. *Dat etiam monita sapientibus et philosophis, et denique omnibus civibus.*

I. DEMIROR ¹, quidnam tandem istud sit, quod vobis circa sermones meos accidit, et quam ob causam peregrina hac nostra voce, et exigua fortasse, quæque nihil amore dignum habeat, ita capti sitis, ut eodem modo mihi erga me affecti esse videamini, quo ferrum erga magnetem. Nam et ex me pendetis, et alii ex aliis, mutuo nexu inter vos cohærentes, et omnes ex Deo, « Ex quo omnia, et in » quem omnia ². » O admirabilem catenam, quam Spiritus sanctus nectit, firmissimis vinculis compactam et coaptatam ! Cujus rei nullam equidem causam suspicari queo ; neque enim alios sapientia ullo modo supero, quantum quidem mihi conscius sum ; nisi quis hoc ipsum mihi sapientiæ ducat, quod, me sapientem non esse, nec ad veram et primariam sapientiam accedere, intelligam : quod permultum abest, ut hujus temporis sapientes de se existi-

¹ Vide D. Guillon, tom. vi, p. 291. — ² 1 Cor. viii, 6.

ment; quandoquidem nihil facilius est, quam ut se ipsum quis fallat, « Ac se aliquid esse putet, cum nihil sit ⁴, » inani videlicet opinione inflatus. Nec vero rectæ fidei doctrinam, quam arctissimo complexu tenetis, vobis primus prædicavi, sed aliena vestigia secutus sum, et quidem vestra: (vera enim loquar;) vos siquidem eximii illius Alexandri discipuli estis, qui magnus fuit Trinitatis propugnator et præco, quique sermone, et rebus ipsis, impietatem exturbavit, ac de melio sustulit. Neque enim memoria vobis excidit apostolica illa precatio, quæ impietatis ducem in locis impurissima lingua dignis oppressit, ut nimirum contumelia contumeliam ulcisceretur, atque animarum injusta mors justa morte ad æternam infamiam plecteretur.

II. Ergo non novum fontem vobis rupimus, quemadmodum quem Moyses ab Ægypto profugientibus in arenti loco demonstravit ²: verum abditum et obstructum aperuimus, ut olim « Servi Isaac, » Non puteos tantum aquæ vivæ fodientes, verumetiam « Quos Philisthiim obstruxerant ³, » repurgantes. Sed neque facetus quispiam ac jucundus sum, atque ita comparatus, ut hominum benevolentiam blanditiis et assentatione surripere queam: quales multos eorum video, qui hoc tempore sacerdotii munus profitentur, qui fidei nostræ pietatem, quæ prius simplex atque artis expers erat, artificiosam reddiderunt, ac novum quoddam politices genus, a foro ad Sancta translata, et a theatris ad sacrarium, vulgi oculis minime inspectandum: ita ut, si audacter hoc dicere oporteat, duæ jam scenæ sint, inter quas hoc duntaxat intersit, quod illa omnibus pateat, hæc quibusdam; illa rideatur, hæc in honore sit; illa theatra, hæc spiritualis nominetur. « Vos testes, et Deus ⁴, » ut

² Galat. vi, 3. — ³ Exod. xvii, 6. — ⁴ Gen. xxvi, 18. — 4: Thes. ii, 19.

Apostoli verbis utar, nos ab hac parte minime stare, verum tales esse, ut morositatis potius et rusticitatis, quam adulationis ac servilis animi nota in nos cadat; quippe qui eos etiam, qui nostri apprime studiosi sunt, asperius interdum accipiamus, si quid nobis non, ut rationi consentaneum est, facere videantur. Atque hoc ex novo eo facinore perspicuum factum est, quod circa me haud ita pridem edidistis, cum vos, qui plebs estis, zelo et iracundia ferventes, clamantem me et lamentantem in hac sede collocastis, quam tyrannicam, an episcopalem dicere debeam, incertum habeo; sed collocastis tamen, propter vim amoris erga me vestri, legem violantes. Quo quidem tempore nonnullis eorum, qui fervidiores erant, usque adeo succensimus, ut, amore in odium mutato, a nobis confestim recesserint. Non enim tam hominum gratiam, quam utilitatem spectamus.

III. Quæ igitur tanti erga nos sermonesque nostros desiderii et studii causa sit, vultis-ne ipsi expromere, atque in medium proferre, animique vestri affectum indicare, an potius per nos hoc declarare, quemadmodum et ad res alias exponendas nobis non illibenter uti soletis? Mihi vero non est dubium, quin hanc mihi dicendi provinciam imponatis, quantum quidem ex vestro silentio judicare licet. Audite igitur, atque expendite, num malus hujusmodi rerum sim conector. Primum, quia nos ipsi accivistis, idcirco iudicio vestro opem subsidium ferre, ac velut prædam vestram fovere videmini. Est enim ita natura comparatum, ut suis quisque, tam prædiis, quam liberis ac sermonibus laveat, spontaneaue benevolentia in suos fetus propendeat. Deinde, nulla re perinde moveri, quam quod nos, nec præcipientes, et importunos, nec violentos, nec ad theatrorum et festivitatum ostentationem compositos, sed modestos et submissos, atque in hominum frequentia et sociis

tate, velut ab hominum commercio remotos ac singulares, et, ut brevius adhuc loquar, philosophos esse perspicitis. Philosophiam autem dico, non callide, et politico artificio excogitatam atque accersitam, sed simpliciter ac spiritua-liter cultam et observatam. Non enim, ut quæsamur, latebras petimus, nec ut præstantiori honore digni appareamus, quemadmodum qui eximias quasdam formas paululum ostensas statim ex oculis subducunt; sed ut per quietam et e medio reductam vitæ rationem, illud planum faciamus, nos a præfecturis sacris abhorрere, nec hujusmodi honores ambire atque aucupari. Tertio, cum, quibus malis, tum ab externis aperto nos bello latessentibus, tum ab internis et domesticis insidias molientibus, afficiamur, exploratum habeatis; (quandoquidem, juxta Danielem, « Egressa est iniquitas a senioribus babylonis, qui » Israëlẽ regere existimabantur¹;) idcirco conqueri quidem atque animis apgi videmini, nec, quonam modo opem iniqua vi oppresso feratis, habere; ac proinde, quod unum licet, vicem nostram fortunamque miserari. Misericordie porro pudori conjuncta amorem procreavit. Atque has demum honoris mihi habiti arcanas causas esse censeo.

IV. Quoniam autem non aliam ob rem bello petimur, quam, propter eloquentiam, et supervacaneam hanc et invidiosam linguam, quam, in profanis doctrinis eruditam, divinis postea nobilitavimus, « Salsamque illam et amarum » lentam Maram² » per vitæ lignum dulcem reddidimus, affectum sane animis ingenuis et liberalibus dignum induistis: hoc amatis, ob quod oppugnamur. Cur enim mutam eruditionem amplexi non sumus? Cur non aridam et humi reptantem? Cur, cum ea plerosque delectari conspiceremus, in peregrina quædam et aliena studia incubuimus, atque adversariis linguis obstitimus? Cum contra oportuerit ra-

¹ Dani. xlii, 8, — ² Exodi. xv, 23.

tiocinationes audacter defugere, ac mutæ inscitæ fidei nomen imponere, quam ipse quoque, mihi credite, complexus essem, ut piscator; (quandoquidem hoc multis ad inscitæ excusationem in promptu est;) si sermonis ac doctrinæ loco, signorum et miraculorum vim habuissem. Utinam ex hominum vita interiret livor, hæc invidorum tabes, hoc venenum eorum, qui eo laborant, solus ex omnibus affectibus iniquissimus simul et æquissimus: illud, quia bonis omnibus infestus est; hoc, quia eos, qui hoc vitio laborant, conficit. Non enim iis, qui nos laudibus primi extulerunt, mali quidquam imprecabor. Neque enim, quis laudum finis futurus esset, perspectum habebant. Nam alioqui nonnihil quoque maledicentiæ adjunxissent, ut invidiam reprimere.

V. Hæc, et Luciferum obscuravit, ob mentis elationem prolapsus; indignum enim atque intolerandum ducebat, se, cum divinus esset, non Deum quoque existimari; Adamum quoque, per voluptatem et mulierem circumventum, e paradiso expulit. Adductus est enim, ut Deitatem sibi invideri crederet, dum a scientiæ ligno hactenus arceretur. Hæc, et Caïn ad inferendam fratri necem impulit, quod purius sanctiusque ejus sacrificium æquo animo ferre non potuisset. Hæc, et mundum immunde atque incomposite æe gerentem aquis texit, et Sodomitas igne obruit. Hæc, et Dathan, et Abiron, adversus Moysen furore elatos, in terram defodit, et Mariam, quæ adversus fratrem tantummodo murmuraverat, lepra infecit. Hæc, et Prophetarum cruore terram contaminavit, et sapientissimum illum Salomonem per mulieres perculit. Hæc, et illum laqueo dignum Judam, exigua pecunia illectum, proditorem exhibuit, et Herodem puerorum interfectorem, et Pilatum Christicidam effecit. Hæc, et Israëllem ventilavit, ac dispersit; ne nunc quidem adhuc e peccato suo emergentem. Hæc, et Apos-

tatam tyrannum in nos excitavit, cujus carbones adhuc molestiam inferunt, licet flammam ipsam effugerimus. Hæc, et præclarum Ecclesiæ corpus discidit, in diversa et contraria studia dissectum. Hæc, et Jeroboam illum peccati servum in nos concitavit, et linguæ vinculum imponit. Disrumpitur enim splendentem Trinitatem cernens, ac tota Divinitate collucentem, eosque, a quibus sincere prædicatur, vobis charos reddentem. Utrum tandem vobis nugari atque ineptire videmur, ita conjectantes? An vero perquam egregie vestri erga me amoris causas orationis penicillo expressimus? Ac de his quidem rebus ita iudico.

VI. Quoniam autem nonnullos contumelias quoque nobis inustas molesto animo ferre, atque ignominiam nostram, calamitatem suam ducere conspicio, age, de eo quoque paucis disseramus. Etenim si humanum aliquid abjectumque cogitans, atque hanc cathedram affectans, aut huc primum cum senectute hac cana, et his membris, tum vitæ diuturnitate, tum morbo rugatis atque contractis venissem, aut nunc has ignominias ferrem, profecto « Cælum et » terram, (quæ veteribus attestari moris erat,) erubescerem¹: » erubescerem etiam hanc cathedram, et sacrum hoc concilium, et sanctam hanc recensque coagmentatam plebem, adversus quam tot sceleratorum hominum copię aciem instruxerunt, ut, prius quam conjuncta sit, dissolvatur, et prius quam in lucem prodeat, extinguatur, jam secundum Christum formari incipiens. Ad hæc laborum meorum et ærumnarum me puderet, et asperæ hujus vestis, et secessus ac solitudinis, quam familiarem semper habuimus, et vitæ facilis et expeditæ, et simplicis ac frugalis mensæ, avium vita haud multo inferioris. In gratiam porro cum veritate redeant, qui nos alienam uxorem expetivisse aiunt, cum ne propriam quidem habere volueri-

¹ Deut. xxxii, 1.

mus. Sint etiam meliores, quam nos conditōne Gabaonitæ, quos tamen ne ad id quidem munus Spiritus sanctus admissurus est, ut ligna et aquam portent, quandiu cum huiusmodi, et sermonis, et vitæ maculis ad sacra accesserint. Sin autem ea nobis huc veniendi causa fuit, ut fidei patrocinium suscipereamus, Ecclesiæque virō interim orbata, hæud secus ac tutores quidam et curatores, operam pro virili nostra navaremus, alteri, qui præstanti ipsius forma dignus videretur, ac plura virtutum tanquam sponsalia reginæ obtulisset, eam collocaturi, utrum tandem nobis huiusmodi animi alacritas laudem, an hominum suspicio reprehensionem afferre debet? (Quandoquidem ex alienis affectibus iudicamur.) Eodem igitur modo, vir optime, si navi tempestate jactata ac periclitanti, aut urbi obsidione cinctæ, aut ædibus flammæ ardore conflagentibus manum porrexissemus, partim videlicet scaphis, partim exercitu, partim instrumentis ad extinguendam flammam accommodis opem ferentes, procul dubio nos, aut prædones, aut urbis vel domus amatores vocasses, non autem patronos et procuratores.

VII. At plerisque secus videtur, inquires. Quid vero mea interest, qui rei veritatem magis curo, imo solum curo? Hoc enim vel me condemnaverit, vel absolverit: hoc vel miserum vel beatum reddiderit. At, quid aliis videatur, nihil ad nos, quemadmodum nec alienum somnium. Non ita aliis videtur, ais. Quid vero? An iis, qui vertigine correpti sunt, terra fixa et stabilis esse videtur? An ebriis sobrii integra mente esse, ac non potius in caput incedere, ac sursum deorsumque moveri? Annon quibusdā interdum hominibus mel amarum est, nempe morbo laborantibus, maleque affectis? At non propterea res sic se habent, ut, qui ita affecti sunt, arbitrantur. Quocirca ostende prius eos, qui de nobis ita sentiunt, sanos esse, ac tum

nos admone, ut meliorem mentem induamus : aut condemna, si consilio tuæ non paremus, sed in eadem sententia perstemus. Non ita multis videor, at Deo ita : imo non videor, sed perspicuus atque manifestus sum ei, « Qui omnia, prius quam oriantur, novit ¹ ; qui corda nostra sigillatim fingit ² ; » qui in omnia opera nostra, omnes motus et cogitationes, quibuscum res a nobis geruntur, intelligit ; quem nihil eorum, quæ sunt, latet, aut latere potest ; qui aliter res nostras intuetur, atque mortales solent. » Homo enim videt in faciem : Deus autem intuetur cor ³. » Audisti Scripturam hæc dicentem : ac fidem adhibe. Cujus judicium cordatis hominibus pluris faciendum, magisque curandum est, quam omnium aliorum in unum coactorum. An tu, duos quidem homines, quorum alter acutior et sagacior, alter imperitior et hebetior esset, de eodem negotio in consilium adhibens, haud recta mente præditus esse videreris, si, relicto prudentis consilio, judicium imperiti sequereris ? Neque enim Roboam ex eo laudem est consecutus, « Quod, pro nihilo habita senum sententia, » juvenum consiliis paruit ⁴. » Cum autem Deus et homines inter se expendantur, judicia hominum potiora duces, quam Dei ? Nequaquam certe id facies, si me audias, recteque sentias.

VIII. At, inquis, tuarum contumeliarum nos pudet. Me vero vestri, quos ob eam rem pudeat. Nam si hæc juste patimur, nobis potius ipsis, quam vobis nostra causa, erubescendum est ; non quia contemnimur, sed quia contemptu et ignominia dignos nos præbemus : si autem inique, crimen eorum est, qui contumeliam inferunt ; ac proinde illorum potius, quam nostri causa indignari et stomachari debetis, quoniam ii sunt, quibuscum male

¹ Dan. xii, 4. — ² Psal. xxxii, 16. — ³ 1 Reg. xvi, 7. — ⁴ 3 Reg. ii, 8, et seqq.

agitur. Quod si me, cum malus essem, optimum virum existimares, quid mihi faciendum esset? Improbior-ne ut essem, quo magis tibi placerem? Haudquaquam sane id mihi consilii dedissem. Eodem modo nec si me, recte et cum virtute incedentem, offendere ac labi putes, a recta vivendi ratione propter te desistam. Nec enim tibi magis, quam mihi ipsi vivo: atque in omnibus rebus consiliarii loco, rationem, Deique justificationes habeo, a quibus plerumque, etiam nullo accusante, vincor; et rursum, condemnantibus multis, absolvor. Atque hoc unum tribunal nemo effugere potest, internum nempe atque in nobis situm, idque solum ob oculos propositum habentes, rectum vitæ iter tenere debemus. Quod autem ad hominum de nobis existimationem attinet, ita animo comparati sumus, ut, siquidem ea contingat, non illibenter accepturi simus, ut humani etiam aliquid dicam; sin autem in contrarium cadat, valere jubebimus, nec quidquam de rei veritate propter hominum opinionem detrahemus.

IX. Sic enim comparatum est: qui honestum alicujus causa studiose sectatur, is profecto neutiquam firmas in virtute radices egit. Simul enim atque res ea effluxerit, recti quoque studium deponet; quemadmodum qui quæstus causa navigat, nisi lucrum præsto sit, navigare desistet. At qui bonum ipsum propter se colit et amplectitur, quoniam rem fixam et stabilem amat, certam quoque et constantem erga illud animi alacritatem habet; adeo ut divinum aliquid sentiens, his quoque Dei verbis uti possit: « Ego idem sum, et non mutor ¹. » Quamobrem nec ab animo suo migrabit, nec immutabitur atque a se desciscet, nec cum temporibus ac rebus collabatur, alias alios mores inducens, ac novos subinde colores assumens, non secus ac polypi, petrarum, ad quas accesserint, colores

¹ Malach. III, 6.

referunt : verum idem semper sui que similis permanebit, fixus in rebus minime fixis, immotus in incertis et fluctuantibus, non aliter, opinor, ac rupes, quæ ventorum fluctuumque impetu non modo non concutitur, sed etiam incursantes undas circa se frangit atque absomit. Verum de his hactenus : nec enim mihi vacat cum linguis pugnare ; atque etiam fortasse plura diximus, quam conveniret.

X. Jam ad vos, o mi grex, se convertit oratio. « Vos » estote, quemadmodum ait Paulus, gloria mea, et gaudium, » et gloriæ corona¹ : » vos estote defensio mea apud eos qui me judicant : ut, quemadmodum iis, qui fabricandi aut pingendi artem profitentur, cum artis rationem exposcuntur, fabrile aut pictorium opus ostendere sufficit, ut negotio omni ac molestia liberentur, (« Opus enim, inquit » ille, sermone fortius est², ») sic ipse quoque, vobis in medium productis, obrectatorum meorum maledicta superem. Quomodo autem ea superabo ? Primum, si Patris, et Filii, et Spiritus sancti confessionem firmam et constantem retineatis, nihil uni Deitati addentes, nec detrahentes, nec imminuentes ; (nam si quid imminutum fuerit, totum quoque simul imminuetur ;) eos autem, qui aliud quiddam sentiunt, aut profitentur, aut per diversos naturarum gradus diversasque mensuras unitatem evertunt, aut dirimunt, tanquam Ecclesiæ labem et perniciem, ac veritatis virus ablegetis, non eos invisos habentes, sed eorum potius casum miserantes. Deinde, si vitam rectæ doctrinæ consentaneam præstetis, ut æqua utriusque virtutis laude floreatis, ac non altera parte deficiatis.

XI. Imperatores, purpuram vereamini ; nam sermo noster legislatoribus quoque leges statuet. Cognoscite quan-

¹ 1 Thess. II, 19, et seqq. — ² Tit. III, 14.

tum id sit, quod vestrae fidei commissum est, quantumque circa vos mysterium. Orbis universus sub manu vestra est, diademate parvo, atque exiguo panno coercitus. Supera quidem, solius Dei sunt; infera autem, vestra etiam sunt. Subditis vestris deos vos præbete, ut audacius aliquid dicam. « Cor regis in manu Dei est¹, » ut ex Scriptura audimus, ac credimus. Hic imperium vestrum sit, non autem in auro et in exercitibus. Aulici, procères, ac sublimibus thronis et dignitatibus insignes, ne ob potentiam magnopere animos efferatis, nec de mortalibus rebus tanquam immortalibus cogitetis. Fidem imperatoribus servate, sed prius Deo, propter quem his etiam quibus commissi et traditi estis. Qui generis splendorem jactatis, date operam ut mores quoque nobilitetis: aut aliquid dicam, injucundum quidem et molestum, at nobile tamen et generosum. Nam tum vere nobilissimus esset ordo vester, si ignobiles tabellis vestris non ascriberentur.

XII. Sapientes, et philosophi, et barba ac pallio venerandi, vosque sophistæ et grammatastæ, publicique plausus captatores, haud scio quonam pacto sapientes appellari possitis, primario sermone ac doctrina carentes. Quî opibus studetis, audite Prophetam dicentem: « Divitiæ si affluant, nolite cor apponere² »: scitote vos re incerta et fragili niti et confidere. Navem paululum exonera, ut levius naviges. Hosti fortasse aliquid eripueris, ad quem facultates tuæ devolventur. Qui deliciis indulgetis, aliquid genio et ventri subtrahite, ac Spiritui date. In propinquo est pauper: morbo succurre: aliquid eorum, quæ tibi redundant, in hunc eructa et evome. Cur uterque vestrum premitur, tu cruditate, ille fame? Tu crapula, ille aqua intercute? Tu saturitatem saturitate gravans, ille morbo vacillans? Ne Lazarum tuum hic asperneris, ut ne te ipse

¹ Prov. XXI, 1. — ² Psal. LXI, 11.

in futuro ævo diviti illi similem reddat. Vos magnæ urbis ciyes, qui primi statim post primam estis, aut ne id quidem ei conceditis, ostendite vos mihi primos esse, non improbitate, sed virtute; non morum dissolutione ac mollitie, sed optimis legibus. Turpe enim fuerit, si hæc urbs ita urbibus aliis præstet, ut tamen voluptatibus cedat; aut cætera quidem gravis et moderata sit, verum circa ludos Circenses, et spectacula, et cursus ac venationes adeo insaniat, ut hæc pro vita et serio quodam instituto habeat, atque urbs, inter urbes principatum tenens, ludentium urbs sit, quam aliis quoque virtutum omnium exempla præbere multo æquius erat et congruentius. Utinam hæc abjiciatis, utinam Dei civitas sitis, atque in manibus Domini depingamini, ac tandem nobiscum magno urbium Conditori splendidi splendide astetis. Hunc vobis lætum nuntium affero, in ipso Christo Domino nostro, cui gloria, honor et imperium in sæcula. Amen.

ORATIO XXXVII¹.

*In illud dictum Evangelii : Cum consummasset
Jesus hos sermones², etc.*

ARGUMENTUM.

*I. Cur Christus docens, locum sæpe mutaret. II. Cur
Christus varios pertulerit labores. — In Christo duas*

¹ Aliis xxxi, quæ autem xxxviii erat, nunc est xxxi. Habita Constantino-
poli labente anno 380. — ² Math. xix, 1.

naturæ, non duo filii. III. Christus pro nobis exinanitus. IV. Luget Gregorius, quod Christus contemnatur, quia exinanitus. — Varia Filii Dei nomina. Verbum. Lux. Ignis. Gladius. Ventilabrum. Securis Ostium. Via. Ovis. Pontifex. Filius. V. Legis doctores legem non intelligunt. — Christus quasdam quæstiones solvit, quasdam comprimit. VI. Quo pacto matrimonii lex expectanda. — Apud Deum æqua viri ac mulieris conditio, non item apud homines. VII. Vir et mulier æqualem a Christo misericordiam consecuti. — Vir et mulier sunt una caro, ac ejusdem honoris participes facti. VIII. Quid de polygamia sentiendum. — Libellus repudiî adversus impudicas ac adulteras uxores a Christo permissus. — Uxorum vitia benigne a viris corrigenda. IX. Non genus tantum, sed et mores Pharisæum efficiunt. X. Virginitas matrimonio præstantior. — Virgo Angelorum vitam eligit. XI. Angelicum est, in carne nullo carnis vinculo astringi. — Salutaria virginibus monita. — Corporis pulchritudo, temporis ludibrium est. XII. Castus Christi amor virginem ad Deum evehit. — Diabolus undequaque scrutatur. XIII. Quomodo intelligendum sit hoc verbum : Quibus datum est. — Quomodo intelligenda hæc verba : Non est volentis, neque currentis, etc. — Solus Deus currentibus ac certantibus præmium et victoriam dat. XIV. Matri filiorum Zebedæi ob vim amoris erga filios, ignoscitur. XV. Pythagoricum dogma de animabus refellitur. XVI. Eunuchorum castimonia laudem non meretur. XVII. Qualem pudicitiam ab eunuchis postulet Gregorius. XVIII. Christianus ostendat fide et bonis operibus, se esse Christianum. — Trinitatis cum margarita similitudo. XIX. Castimonia, et corpore et animo æque colenda. XX. Scriptura per corporum figuram ad sublimiora evehit. — Tria eunuchorum spi-

ritualium genera. Eunuchi a natura. Eunuchi a doctrina. XXI. Eunuchi a libero arbitrio. XXII. Anima, utpote corpore præstantior, majori cura purganda. XXIII. Principium edicta plus valent adversus hæreticos, quam pastorum pietas et doctrina. XXIV. Pro gregis vota facit Gregorius.

I. JESUS, qui prius piscatores elegerat, ipse quoque piscatur, ac loca subinde commutat : idque non ea tantum causa, ut majorem piorum hominum multitudinem, suam ipsis præsentiam exhibendo, lucretur : sed etiam, quemadmodum mihi videtur, ut plura loca sanctificet. « Fit Judæis, tanquam Judæus, ut Judæos lucrificiat : his, qui » sub lege sunt, tanquam legi subjectus, ut eos, qui sub » lege sunt, redimat : infirmis, tanquam infirmus, ut infirmis salutem afferat. Omnia omnibus efficitur, ut omnes » lucrificiat¹. « Quid dico, « Omnibus omnia ? » Imo vero, quod Paulus de se ipso dicere non sustinuit, hoc Salvatori contigisse reperio. Non enim Judæus tantum efficitur, nec quidquid absurdorum et improborum nominum est, in se recepit : sed, quod his omnibus absurdius est, ipsummet etiam peccatum, et ipsamet maledictio; non quod peccatum sit, sed quod ita nominetur. Quo enim modo peccatum esse queat, qui nos etiam « A peccati » vitute in libertatem asserit². » Quomodo maledictio, « Qui a legis maledicto nos redimit³ ? » Nimirum ut, tanto humilitatis edito argumento, nos ad animi submissionem, quæ sublimitatem parit, instituat. Fit igitur, quemadmodum dixi, piscator, ad omnes se demittit, everriculo utitur, omnia perfert, ut piscem e profundo extrahat, atque

¹ 1 Cor. ix, 20-22. — ² Rom. vi, 18. — ³ Galat. iii, 13.

in altum efferat, hominem scilicet in instabilibus et salsis hujus vitæ fluctibus natantem.

II. Quocirca nunc quoque, « Postquam consummavit hos sermones, migravit a Galilæa, et venit ad fines Judææ trans Jordanem¹. » In Galilæam se confert, « Ut populus, qui sedebat in tenebris, lucem magnam videat². » In Judæam migrat, quo illud nobis persuadeat, ut a littera exurgamus, ac Spiritum sequamur. « Nunc in monte docet³, nunc in planis locis disserit⁴, nunc in naviculam transit, nunc tempestatem increpat⁵. » Quin hæc quoque fortasse ratione somnum cepit, ut somnum benedicat : fortasse etiam fatigatur⁶, ut fatigationem sanctificet : fortasse etiam « Lacrymas fundit⁷, » ut lacrymas laudabiles reddat. Ex locis in loca transit, qui nullo loci spatio continetur, ille, inquam, temporis, et corporis, et circumscriptionis expers. Idem, et erat et fit : et supra tempus erat, et sub tempus venit; et invisibilis erat, et videtur. « In principio erat, et apud Deum erat, et Deus erat⁸. » Tertio reperitur hoc verbum, « Erat, » ut numero ipso confirmetur. Id, quod erat, exinanivit : id, quod non erat, assumpsit : non duo factus, sed unum ex duplici natura fieri sustinens. Ambo enim Deus, nimirum, quod assumpsit, et quod assumptum est : duæ naturæ in unum concurrentes, non duo Filii : (ne falsi nota prematur unitio.) Hic, qui tantis est, tamque magnus : sed quid ago ? Rursus in humana verba prolapsus sum. Quo enim modo, quod simplex est, tantum esse potest ? Quo item modo, quod quantitatem nescit, tantæ magnitudinis ? Sed dictis nostris, quæso, ignoscite : organo exiguo de rebus maximis loquor. Atque hoc feret multus ille et longanimis,

¹ Matth. xix, 1. — ² Isai. ix, 2, et Matth. iv, 15, 16. — ³ Matth. v, 1. — ⁴ Luc. vi, 17. — ⁵ Marc. iv, 38, et seqq. — ⁶ Joan. iv, 6. — ⁷ Id. xi, 35. — ⁸ Id. i, 1.

natura illa formæ et corporis expers, quod, velat de corpore loquens, infirmioribus verbis utar, quam veritas ipsa postulet. Nam cum carnem suscepit, utique et hujusmodi sermonem perferet.

III. « *Et secuta sunt eum turbæ multæ; et cecidit eos* » illi¹, » ubi vastior solitudo erat. Si in specula sua mansisset, si ad hominum infirmitatem misere se demisisset, si, quod erat, mansisset, inaccessibilem se ipsam et incomprehensibilem custodiens, pauci fortasse secuti fuissent: atque haud scio an pauci, fortasse Moyses solus; idque etiam hactenus, ut Dei posteriora egre videret². « *Etenim nubem* » quidem ille penetravit³; » extra corporis pondus positus, aut a sensibus collectus ac reductus; Dei vero tenuitatem, aut a corpore vacuitatem, aut quocumque tandem alio nomine res ea appellanda sit, quo tandem modo perspicere potuisset, qui et corpus erat, et corporeis oculis cernebat? Verum, quoniam nostra cæca exinanitur, quoniam descendit, (exinanitionem autem voco, quasi gloriæ submissionem et imminutionem,) idcirco perceptibilis et comprehensibilis efficitur.

IV. Ac mihi velle ignoscatis, affectum quemdam humanarum rerum sentienti. Ira et mœrore impleor propter meum Christum, (utinam ipsi quoque simul doleatis,) cum etiam hac de causâ contemni ac pro nihilo haberi conspicio, propter quam eum maxime honorari par erat. An idcirco, dicit mihi, humilis et abjectus est, quia propter te humilis? An ideo creatura, quia de creatura sollicitus est? An ideo temporis subest, quia eos, qui temporis substant, invisit? Veruntamen omnia fert, omnia excipit. Et quid mirum? Alapas tulit⁴, sputis aspergitur sustinuit, propter gressum meum fel gressavit⁵. Nunc etiam se lap

¹ Matth. xix, 2. — ² Exod. xxxiii, 25. — ³ Id. xx, 21. — ⁴ Marc. xiv, 65. — ⁵ Joan. xix, 29.

dibus inaccessi patitur¹, non modo ab oblectantibus et vexantibus, sed a nobis etiam ipsis, qui fidei pietatem profiteamur. Etenim de incorporeo disputantem, corporeis nominibus uti, vexantis fortasse fuerit, et lapidantis; sed infirmitati nostræ, iterum dicam, venia concedatur. Lapidamus enim haud lubenter: sed quia aliter loqui non possumus, quibus possumus verbis utimur. Verbum diceris, et verbo omni superior es: lucem superas, et Lux nominaris: Ignis vocaris, non quod in sensum cadas, sed quia levem et improbam materiam expurgas: Gladius, quia rectum a malo scindis: Ventilabrum, quia aream repurgas; ac, quidquid leve et ventosum est, rejiciens, id omne, quod grave et plenum est, in superna horrea recondis: Securis, quia diuturna patientia et lenitate usus, infrugiferam ficum tandem exscindis, quia improbitatis radices amputas: Ostium, propter introductionem: Via, quia recto itinere gradimur: Ovis, quia victima: Pontifex, quia corpus offers: Filius, quia Patris. Rursus linguas incito ac provoco: rursus adversus Christum quidam insaniunt, vel adversum me potius, qui, ut Verbi fierem præco, dignus habitus sum. Ut Joannes efficior: « Vox clamantis in deserto², » deserto quidem prius loco, et siccitate laboranti, nunc autem valde habitabili et frequenti.

V. Cæterum, ut ad rem redeam, sermonemque meum repetam, ideo sequebantur eum turbæ multæ, quia ad infirmitatis nostræ captum se demittit. Quid postea? « Et accesserunt, inquit, ad eum Pharisei, tentantes eum, » et dicentes: Si licet homini quacumque ex causa dimittere uxorem suam³? » Rursus Pharisei tentant: rursus, qui legem legunt, legem non intelligunt: rursus, qui se legis interpretes profitentur, magistris aliis opus habent. Parum erat Sadducæos de resurrectione tentasse, legispe-

¹ Joan. x, 31. — ² Matth. iii, 3. — ³ Id. xix, 3.

ritos de perfectione interrogasse, Herodianos de censu, alios de potestate. Adhuc de matrimonio quispiam eum, qui tentari non potest, qui matrimonium creavit, qui ex prima causa universum hoc hominum genus condidit, percunctatur. Ipse autem respondens, dixit eis : « Non legis, » tis, quia is qui fecit hominem ab initio, masculum et feminam fecit eos¹ ? Christus quasdam quæstiones solvere atque explicare solet, quasdam velut obstructo interrogantium ore comprimere. Cum ex eo quæritur : « In qua potestate hæc facis² ? » Propter ingentem eorum, qui interrogaverant, ineptiam, vicissim ipse quoque interrogat : « Baptismus Joannis de cælo erat, an ex hominibus³ ? » Atque utrinque interrogatores suos premit ac constringit. Unde etiam nobis nonnunquam ad Christi imitationem eos, qui curiosa disputatione nos lacessunt, comprimere, quæstionumque absurditatem absurdioribus interrogatibus solvere licet. Nam ipsi quoque interdum in rebus vanis sciti atque ingeniosi sumus : utinam hi, quæ sunt insipientiæ, glories. At cum quæstionem ratiocinatione ac judicio indigentem videt, tum eos, a quibus interrogatur, prudenti responso nequaquam indignos censet.

VI. Quæstio hæc, inquit, quam proposuisti, ad pudicitiae cultum et honorem spectare mihi videtur, responsionemque humanam et commodam postulare. Circa, hæc enim plerosque male affectos carno, ac legem eorum injuriam, nec sibi constantem. Quid enim causæ fuit, cur mulierem coercerent, marito contra indulgerent, eumque liberum relinquerent? Et mulier quidem, quæ improbum consilium adversus viri sui cubile susceperit, adulterii piaculo constringatur, acerbissimisque legum penis excrucietur; vir autem, qui fidem uxori datam per adulterium violaverit, nulli supplicio obnoxius sit? Hanc legem

¹ Matth. xix, 4. — ² Luc. xx, 2. — ³ Ibid. 4. — 2. 1. mod. 1.

haudquaquam probe, hanc consuetudinem minime laudat. Viri erant, qui hanc legem sanxerunt, de propterea adversus mulieres lata est; quandoquidem et filios paternæ potestati subjecerunt, infirmiore sexum incultum atque incuratum reliquerunt. Ac Deus non sic; verum, «Honora patrem tuum et matrem tuam, ut bene tibi sit», quod est primum mandatum, in pollicitationibus situm. Et, «Qui maledixerit patri vel matri, mortē moriatur¹.» Equæ, et virtuti honorem ac præmia, et sceleri poenam constituit. Item illic hæc: «Benedictio patris firmat domos filiorum: maledictio autem matris eradicat fundamenta².» Legis æqualitatem videtis. Unus viri et mulieris Creator, pater unus uterque, imago una, lex una, thors una, resurrectio una. Equæ ex viro et muliere præcreati sumus: unum itaque parentibus debitum filii persolvendum habent.

VII. Qua igitur fronte pudicitiam exis, quam ipse vicissim non præstas? Quomodo, quod non das, petis? Quomodo corpori pari honore prædito, imparem legem statuis? Si deteriora expendis: peccavit mulier; eodem quoque modo Adam peccavit³. Utrumque serpens decipit atque in fraudem impulit. Non altera infirmior inventa est, alter fortior. At meliora consideras? Utramque Christus passione sua salute donavit. Pro viro caro factus est? Pro muliere item. Pro viro mortem subit? Ipsius item morte mulieri salus parata est. At «Ex semine David⁴» nominator, atque hinc forsā viros honore præferri colligis? Audio, sed ex Virgine quoque nascitur⁵, quod et pro mulieribus valet. «Erunt igitur, inquit, duo in carne una⁶»: proinde caro, quæ una est, æqualem honorem habeat. Jamvero Paulus exemplo quoque castitatem velut

¹ Exod. xx, 12. — ² Id. xxi, 17. — ³ Eccli. iii, 11. — ⁴ Gen. iii, 6.
— ⁵ Rom. i, 3. — ⁶ Matth. i, 25. — ⁷ Gen. ii, 24.

lege præscribit. Quo tandem modo, et qua ratione? « Sacramentum hoc magnum est : ego autem dico in Christo » et in Ecclesia¹. Pulchrum est mulieri Christum per virum revereri : pulchrum quoque viro Ecclesiam per uxorem non aspernari. « Mulier, inquit, ut virum timeat, » quippe et Christum. « At vir etiam, ut uxorem foveat » atque complectatur²; nam et Christus Ecclesiam. Quia etiam hæc verba studiosius et accuratius expendamus.

VIII. « Mulge læ, ait ille, et erit butyrum³ : » sedulo exquire, et scrutante in his succulentissimis aliquid invenies. Hoc enim sermone secundas nuptias mihi dissuadere videtur. Si enim duo Christi sunt; duo quoque viri sint; et duæ uxores : si autem unus Christus, unum Ecclesia caput; una etiam caro sit; secunda autem respiciatur. Quod si secundam prohibeat, de tertia quid dicendum est? Primum lex est; secundum venia et indulgentia; tertium iniquitas. Qui autem hunc numerum excedit, porcius plane est, utpote ne multa quidem vitii exempla habeas. Enimvero Lex omnes ubi causas libellorum dat repudiū. At Christus non ob omnes, sed ab impudica tantum et adultera uxore viro separari permittit : reliquis autem omnibus in rebus animi æquitate ac patientia uti jubet. Ergo impudicam quidem, quia genus corrumpit et adulterat, expellamus : cætera autem omnia patienter et moderate ac sapienter feramus; aut, ut rectius loquar, sapienter et moderate forte, quicumque matrimonium iugum subiistis. Si illius fucus et oerusa colores et pigmenta perspexeris, eam hoc ornata spolia : si præcoccam et petulantem linguam, coërce : si meretriciam visum, verecundiam et gravitatem conpone : si sumptum aut potum immodicum, contrahis : si intemperantes progressus, domi confide : si oculum elatum et vagum, reprime. At eam ne temere a te

¹ Ephes. 7, 32. — ² Ibid. 32, et seqq. — ³ Prov. xxx, 33.

divellas et abstrahas. Incertum est, utra pars in discrimine versetur, ea-ne, quæ secat, an ea quæ secatur. « Fons aquæ, » ait ille, sit tibi proprius, nec ullus extraneus tecum sit » particeps. » Et, « Pullus gratiarum tuarum, et cervus » amicitiae tuæ, consuetudinem vitæ tecum habeat¹. » Quocirca tibi cavendum est, ne fluvius alienus efficiaris; atque aliis potius, quam uxori tuæ, placere studeas. Quod si alio fertur cupiditas tua, parti quoque tuæ libidinem præscribis. Atque ad hunc quidem modum Salvator locutus est.

IX. Quid autem Pharisei? « Durus illis hic sermo videtur². » Nec mirum, cum et aliis honestis et præclaris rebus offendantur, tum illius temporis Pharisei, tum etiam nostrates. Phariseum enim, non solum genus, sed etiam morum vitæque ratio efficit. Sic Assyrium quoque et Ægyptium, eum censeo, qui animi instituto et voluntate ipsis adjungitur. Quid igitur Pharisei? « Si ita est, » inquirunt, causa hominis cum uxore, non expedit nubere³. » Nunc demum, o Pharisee, illud agnoscis: « Non expedit nubere? » An prius id nesciebas, cum viduitates atque orbitates videres, et præmaturas mortes, et luctus plausibus succedentes, et funera thalamos excipientia, et sterilitates, et infelices liberorum procreationes, et imperfectos partus ac matris expertes, atque omnem hujusmodi rerum comœdiam sive tragœdiam? Utrumque enim appositissime dici potest. « Expedit nubere? » Id ipse quoque probo; honorabile enim connubium, et torus immaculatus⁴; » sed moderatis expedit, non petulantibus et libidine perditis, quique plus æquo carnem colere in animum inducunt. Cum matrimonium nihil aliud est, quam matrimonium, et conjunctio, et proles ac successionis cupiditas, tum bonum est matrimonium.

¹ Prov. v, 17, et seqq. — ² Joan. vi, 61. — ³ Math. xix, 10. — ⁴ Hebr. xiii, 4.

Plures enim introducit, qui Deo placeant. At cum carnis molem inflamat, et spinis circumdat, vitique quasi via invenitur, tum ipse etiam dico : « Non expedit nubere.

X. Bonum est matrimonium : sed, quod virginitate præstantius sit, dicere non possum. Neque enim magnum aliquid esset virginitas, nisi re aliqua bona melior et præclarior esset. Nolite hoc moleste ferre, quæ matrimonii jugo subjectæ estis. « Obedire oportet Deo magis quam hominibus¹. » Cæterum facite, ut inter vos quasi vinculo constringamini, et virgines et uxores, atque unum sitis in Domino, mutuumque aliæ aliarum ornamentum. Non esset cœlebs, nisi matrimonium esset. Unde enim in hanc vitam virgo prodisset? Non esset honorificum et venerandum matrimonium, nisi virginem proferret, tum Deo, tum vitæ. Honora tu quoque matrem tuam, ex qua natus es. Honora etiam eam, quæ ex matre est, et mater. Non quidem mater est, sed Christi sponsa. Pulchritudo quidem ea, quæ in oculos cadit, non occultatur : quæ autem oculorum aciem fugit, a Deo perspicitur. « Omnis gloria filiæ regis ab intus, in fimbriis aureis circumdata, variogata², » sive actionibus, sive etiam contemplationibus. Quæ sub jugo est, aliqua ex parte Christi sit : quæ virginitatem amplexa est, tota Christi sit. Illa mundo non prorsus alligetur : hæc nullo modo animum mundo addicat. Quod enim conjugatæ est pars, id virgini totum est. Angelorum vitam elegisti? In eorum ordinem te aggregasti, qui jugum nesciunt? Ne in carnem prolaboris, ne in materiam dejiciaris, ne cum materia matrimonio jungaris, etiamsi alioqui in cœlibatu perstes. Oculus lascivus et impudicus virginitatem minime servat : lingua impudica diabolo miscetur : pedes vacillantes, aut morbum, aut imminentes morbi periculum produnt. Virginitatem animus quo-

¹ Act. 7, 23. — ² Psal. xlv, 14.

que ipse colat : ne vagetur, ne oberret, ne metetriciarum rerum formas in se ipso ferat, (nam libidinis quoque pars, impressa in animo forma est,) ne odio insectanda rerum simulacra in anima effingat.

XI. At ille dixit eis : « Non omnes capiunt verbum istud, sed quibus datum est ¹. » Videtis rei hujus sublimitatem? Prope modum etiam talis reperitur, ut ne concipi quidem et comprehendi queat. Annon enim præstantius est, quam pro carnis fragilitate, id, quod ex carne creatum sit, in carnem non gignere? Annon plane angelicum, cetera, quæ carnis vinculis alligata, sit non secundum carnem vivere, sed natura ipsa excelsiorem esse? Caro mundo devinxit, sed ratio ad Deum subyexit. Caro deprossit, sed ratio extulit, eique velut pennas addidit. Caro vinculis astringit, sed amor solvit. Tota anima, o virgo, ad Deum intensa esto; (hoc autem ipsum et viris et mulieribus præscribo;) nec quidquam tibi ex omnibus aliis rebus pulchrum videatur, quæ vulgo videri solent; non generis splendor, non opes, non alta subsellia, non principatus et potentia, non pulchritudo ea, quæ in coloris elegantia et apta membrorum compositione animo flagitat, temporis utique et morbi ludibrium. Si vim totam amoris in Deum effudisti, si tu non duplicis rei amore flagras, fluxæ animarum, et immotæ, visibilis, et oculorum obtutum fugientia, profecto usque adeo electa illa sagitta sauciata es, sponsique pulchritudinem cognovisti, ut illud quoque sponsalis dramatis et Cantici dicere queas : « Dulcedo es, et totus desiderabilis ². »

XII. Videtis ne aquarum profluvia, plumbeis canalibus inclusa, quæ, propterea quod nimium comprimuntur, atque ad unum feruntur, adeo plerumque aquæ naturam excedunt, ut, quod retrò impollitur, sursum semper ten-

¹ Matth. xix, 11. — ² Cant. v, 16.

dat? Consimili modo si amorem strinxeris, totaque Deo conjuncta fueris, sursum tendes, nunquam humi prolaberis, nec diffues, tota Christi manebis, quousque Christum quoque sponsum tuum videas. Inaccessibilem te ipsam custodi, et verbo, et opere, et vita, et cogitatione, et motu atque impulsione. Undequaque pravus ille te perscrutatur, atque explorat, ubi feras, ubi vulneret, num pudum quid, et apertum plagaeque obvium reperiat. Quò puriorem cernit, eo epixius te commaculare atque inquirere contendit: splendidae etiam vestis manifestiores sunt sordes. Ne oculus oculum trahat, ne visus risum, ne familiaritas noctem, ne nox interitum et exitium. Nam quod paulatim attrahitur, ac tanquam surreptor, tametsi eam rationem habeat, ut damnum in praesenti minime sentiat, tamen in vitii summam occurrit.

XIII. « Non omnes, inquit, capiunt verbum istud, sed quibus datum est. » Cum audis hoc, « Datum est, » nec haeretico ullo affectu tenearis, nec multiplices naturas introduces, nec terrenos, et spirituales, et medios. Sunt enim quidam ita male affecti, ut alios omnino perditae esse naturae putent, alios salutem accepturam, alios denique, ut eos vel ad virtutem vel ad vitium voluntas duxerit, ita se habere. At vero, aptitudinem quidem alios aliis, vel majorem, vel minorem habere, ipse quoque concedo: ceterum ad adipiscendam perfectionem, aptitudinem solam minime sufficere contendo; rationem enim esse, quae eam excitet, ut natura in opus prodeat, quemadmodum silex ferro pulsatus, atque ita ignis excutitur. Cum audieris: « Quibus datum est, » addo: Vocatis datum est, atque iis, qui ex animi preposicione sunt. Etenim cum illud audis: « Non est volentis, neque currentis, sed misentis Dei; » idem tibi existimandum concepo. Quoniam enim

Matth. xx, 13. et Rom. ix, 16.

nonnulli sunt, qui ob recte facta ita animis efferuntur, ut id totum sibi ipsis ascribant, nec quidquam Creatori, et sapientiæ eorum auctori, ac honorum omnium suppeditatori acceptum ferant, his verbis eos docet Paulus, quod ipsum etiam recte velle, divino auxilio indigeat; imo, ut rectius loquar, voluntas quoque ipsa et electio eorum, quæ recta et cum officio conjuncta sunt, divinum quoddam beneficium est, atque a Dei benignitate manans. Quod enim salvamur, id et a nobis, et a Deo esse oportet. Idcirco ait: « Non volentis, id est, non solum volentis, nec » currentis solum, sed etiam miserentis Dei. » Ita, quoniam velle quoque ipsum a Deo est, optimo jure totum Deo assignavit. Quantumlibet curras, quantumlibet certes, opus habes eo, qui det coronam. « Nisi Dominus ædificaverit domum, in vanum laboraverunt, qui ædificant eam. Nisi » Dominus custodierit civitatem, frustra vigilant qui custodiunt eam¹. Scio, inquit, quod nec velocium cursus est, » nec fortium bellum, nec pugnantium victoria², » nec prospere navigantium portus: sed Dei est, victoriam afferre, et incolumem scapham in portum perducere.

XIV. Jam illud quoque, quod alio loco dicitur, atque intelligitur, mihique in mentem venit, superioribus adjungere fortasse necessarium fuerit, ut meas opes vobis etiam largiar. Postulavit mater filiorum Zebedæi³, materno quodam affectu impulsa, atque eorum, quæ petebat, modum ignorans, digna tamen, cui, propter immodicam vim amoris ac benevolentiam filiis debitam, ignosceretur. Neque enim quidquam est materno affectu mollius: idque eo commemoro, ut matrum honori quasi lata lege consulam. Postulavit ergo a Jesu mater illorum, ut alterum ad dexteram, alterum ad sinistram collocaret. Quid ad hæc Salvator? Primum quærit, an calicem bibere queant, quem

¹ Psal. cxxvi, 1. — ² Eccle. ix, 11. — ³ Matth. xx, 20, et seqq.

ipse bibiturus erat. Ut autem id quoque professi sunt, atque affirmarunt, ac Salvator ipse assensus est; (futurum enim norat, ut illi quoque eundem calicem haurirent, ac martyrio perfungerentur;) quid subjunxit? « Calicem quidem bibent: collocare autem eos ad dextram et sinistram, non est meum hoc dare, sed quibus datum est¹. » Nihil igitur mons dux et gubernatrix? Nihil labor? Nihil ratio? Nihil philosophia? Nihil jejunasse? Nihil noctes insomnes duxisse? Nihil humum pro strato habuisse? Fontes lacrymarum profudisse? Nihil quidquam horum profuerit, sed forte quadam ac lege fatali, et Jeremias sanctificatur², et alii ab ipsa vulva rejiciuntur?

XV. Vereor, ne absurda etiam ac præpostera cogitatio cuiquam obrepat, tanquam anima alibi usquam versata sit, ac deinde corpori huic astricta fuerit; atque, prout illic se gesserit, alii prophetiam accipiant, alii, qui improbe vixerunt, condemnentur. Sed quoniam hoc existimare nimis stultum et absurdum est, atque ab ecclesiastica fide et doctrina alienum; (alii enim de hujusmodi dogmatibus, si velint, ludant; nobis autem hujusmodi ludis animos oblectare minime tutum est;) illic quoque his verbis « Et quibus datum est, » hoc adjunge, qui digni sunt; quique, ut tales sint, non modo a Patre acceperunt, sed sibi ipsis etiam dederunt.

XVI. « Sunt enim eunuchi, qui ex utero matris castrati sunt³, » etc. Vehementer cuperem virile aliquid de eunuchis proloqui posse. Ne admodum magnifice de vobis sentiat, qui a natura eunuchi estis. Fortasse enim pudicitia hæc minime voluntaria est. Non enim explorata est, nec castimonia periculo facto comprobata. Bonum enim, quod a natura proficiscitur, laudem non meretur: quod autem a libera voluntate animique instituto fluit, id laude

¹ Matth. xx, 23. — ² Jerem. i, 5. — ³ Matth. xix, 12.

dignum existimandum est. Quæ igni gratia est, quod urit? Urere enim a natura habet. Quæ aquæ, quod deorsum fertur? Hoc enim a summo rerum omnium opifice habet. Quæ nivi gratia habenda est, quod frigida sit? Aut soli, quod luceat? Lucebit enim etiam invitus. Hoc mihi largire, ut, quæ recta sunt, velis. Largieris autem, si caro factus, spiritualis efficiaris; si a plumbea carnis mole tractus atque depressus, a ratione in altum subleveris; si humilis creatus, celestis inveniaris; si carni quasi vinculis quibusdam astrictus, superior carne appareas.

XVII. Quoniam igitur corporea sapere, carnalibusque affectibus duci, haudquaquam laudabile est, aliud quiddam ab eunuchis postulo. Ne circa Divinitatem scortemini. Qui Christo conjuncti estis, Christum ne contemnatis. Qui a Spiritu perfectionem accipitis, ne parum vobis Spiritum faciatis. « Si adhuc hominibus placerem, inquit Paulus, Christi servus non essem¹. » Si creaturam colerem, Christianus utique non appellarer. Cur enim Christiani nomen venerabile est? Annon quia Christus Deus? Nisi fortasse hoc humano more facio, amicitia nimirum cum eo conglutinator. At et Petrum honore prosequor, nec tamen Petrianus vocor: et Paulum, nec tamen Paulianus nominatus sum. Non fero me ab hominibus nomen ducere, qui a Deo sum creatus. Proinde si, quia Deum ipsum existimas, ideo Christianus vocaris: voceris sane, et maneat in nomine, atque adeo in re. Sin autem non aliam ob causam a Christo nomen ducis, quam quod eum amore complecteris, nihil amplius ipsi tribuis, quam aliis nominibus, quæ a studio quodam et instituto, aut re aliqua constituuntur.

XVIII. Videtis hos, qui in cursibus equestribus studium atque operam posuerunt. Illi a coloribus nominantur,

¹ Galat. 1, 10.

atque ab his partibus, cum quibus steterunt. Vos nomina ipsa tenetis, etiamsi non dixerō. Si ad eundem modum Christianus vocaris, parvum admodum ac leve hoc cognitum est, eo licet gloriaris, tibi que placeas. Sin autem, quia Deum credis, rebus ipsis quod credas, ostende. Si Filius creatura est, nunc quoque creaturam colis prater Creatorem. Si Spiritus sanctus creatura est, incassum baptizatus es, ac duabus quidem partibus sanus es, imo ne illis quidem : una autem omnino periclitaris. Finge Trinitatem esse margaritam quamdam, undique sibi similem, atque aequae fulgentem. Quaecumque margaritæ pars fuerit oblata, tota lapidis gratia extincta fuerit. Eodem modo cum Filium contemnis, ut Patrem honore afficias, tuum honorem non recipit. Ad contemptum Filii, Pater haudquaquam glorificatur. « Si filius sapiens lætificat patrem¹, » quanto magis Filii honor, Patris quoque honor fuerit ? Quod si hoc etiam probas : « Fili, ne gloriaris de ignominia patris² : » eodem modo nec Pater ob ignominiam Filii glorificatur. Si Spiritum sanctum aspernaris, honorem tuum Filius repudiat. Tametsi enim non eodem, quo Filius, modo ex Patre est, tamen ex eodem Patre est. Aut totum honore affice, aut totum contemne, ut saltem tibi ipsi constes. Dimidiatam istam pietatem improbo. Totum quidem te pium esse volo, sed quemadmodum volo. Ignosce affectui. Eorum quoque vicem dolo, qui me oderunt. Membrum meum eras, etsi nunc abscinderis : membrum quoque fortasse sis ; atque ob hanc causam humane ac benigne loquor. Hæc eunuchorum causa nobis dicta sint, ut circa Divinitatem pudice et caste se gerant.

XIX. Non enim peccatum illud solum, quod in corpore admittitur, fornicatio et adulterium dicitur, sed et quodvis aliud flagitium, ac præsertim scelus id, quod in divinitate

¹ Prov. x, 1. — ² Eccl. iii, 12.

Numen perpetratur. Unde id ostendamus, fortasse quæris? « Fornicati sunt, inquit, in adinventionibus suis ¹. » Vides-ne et impudens fornicationis facinus? Et alio loco: « Adulterium committebant in ligno ². » Vides-ne et adulterium quemdam cultum? Quocirca ne animo adulterium committas, corpore castitatem colens. Alioqui perspicuum facies, te, quoad carnem attinet, invite pudicum esse, quoniam in iis rebus, in quibus scortari tibi licet, pudicitiam non præstas. Quid impietatem vestram effecistis? Quid omnes in vitium præcipites ferimini, ut deinceps idem sit, aut eunuchum, aut impium vocari? Tandem aliquando viris vos adjungite, virilem aliquem affectum habete, gynæcea fugite, ne ad nominis turpitudinem prædicationis turpitudine accedat. Vultis in hac oratione nonnihil adhuc immoremur? An potius sufficiunt, quæ diximus? Verum per hæc, quæ sequuntur, eunuchi quoque honorentur. Laudabilis enim hic sermo est.

XX. « Sunt eunuchi, inquit, qui ex utero matris ita » nati sunt: et sunt eunuchi, qui castrati sunt ab homi- » nibus: et sunt eunuchi, qui castraverunt se ipsos prop- » ter regnum cælorum. Qui potest capere, capiat ³. » Videtur mihi Scriptura, a corporibus abducens, per corporum figuram sublimiora significare. Etenim, in corporeis quidem eunuchis consistere, atque orationem figere, parvum fortasse, valdeque infirmum et Scripturæ majestate indignum fuerit. Decet autem nos quidpiam Scriptura dignum excogitare. Alii quidem videntur naturæ indole ad virtutem tendere. Naturam porro cum dico, liberam voluntatem haudquaquam sperno, sed utrumque statuo, nimirum et naturæ ad bonum facilitatem atque aptitudinem, et animi voluntatem, naturalem illam aptitudinem ad bonum ducentem. Quidam autem alii sunt, quos doc-

¹ Psal. cv, 39. — ² Jerem. lxxv, 6. — ³ Matth. xix, 12.

trina expurgat, vitiososque animi affectus abscindit. Hos esse existimo, qui ab hominibus castrantur, cum videlicet magistri præcepta et sermones, virtutem a vitio distinguentes, atque alterum rejicientes, alterum præscribentes, (juxta illud, « Declina a malo, et fac bonum¹, ») spirituales pudicitiam effecerint. Quod etiam exsectionis genus probo, atque et doctores, et discipulos imprimis laudo, quoniam et illi pulchre exsecuerunt, et hi pulchrius exsecti sunt.

XXI. « Et sunt, qui se ipsos castraverunt propter regnum cælorum. » Alii, cum nullos magistros nacti essent, prohi sibi ipsis magistri extiterunt. Non docuit te mater quid officii esset, non docuit te pater, non presbyter, non episcopus, non alius quispiam ex iis, quibus docendi cura commissa est. At tu, rationem tibi insitam movens, ac virtutis igniculum per arbitrii libertatem exsuscitans, te ipsum exsecuisti, radicem excidisti, vitii instrumenta depulisti, tantum tibi virtutis habitum comparasti, ut jam ad vitium ferri propemodum nequeas. Quamobrem hanc quoque exsectionem laudandam censeo, magisque etiam fortasse, quam duas superiores. « Qui potest capere, » capiat. » Quam libuerit partem accipe, aut magistrum sequere, aut tibi ipsi magister esto. Hoc unum turpe est, affectus exsectos non habere. De his autem excindendis ne quid liliis crees. Et qui docet, figmentum Dei est, et tu eundem ortum habuisti : sive præceptor gratiam hanc rapiat, sive hoc bonum tuum fiat, bonum perinde est.

XXII. Hoc tantum nobis curæ sit, ut nos ipsos ab animi perturbationibus abscindamus, « Ne qua radix amarulentæ sursum germinans turbas moveat². » Hoc tantum curemus, ut imaginis divinæ vestigiis insistamus, ut exemplar nostrum revereamur. Corporeos affectus amputa,

¹ Psal. xxxvi, 27. — ² Hebr. xii, 15.

amputa etiam spirituales. Quanto enim anima corpus antecellit, tanto præstantius est animam purgare, quam corpus. Quod si corporis purgatio laudabilis est, cogita, queso, quante major atque sublimior sit animæ purgatio. Exscinde Arianam impietatem, exscinde pravam Sabellif sententiam. Nec plus, quam æquum est, conjungas, nec scelerate dividas : nec in unam Personam tria contrahas, nec tres naturarum diversitates efficias. Et unum laudabile est, cum recte intelligitur : et tria, cum recte distinguuntur; nempe, cum Personarum distinctio facta fuerit, non Divinitatis.

XXIII. Hæc et laïcis præscribo, hæc et presbyteria mando, hæc et iis, quibus imperium creditum est. Omnes rectæ doctrinæ opem ferte, qui, Dei beneficio, opem ferre potestis. Magnum est cædem comprimere, adulterium coercere, furtum castigare; multo majus pietatem sancire, ac sanam doctrinam largiri. Non tantas vires sermo meus habiturus est, pro sancta Trinitate bellum gerens, quantas edictum tuum, si perversis dogmatibus imbutos compresseris, si persecutione oppressis auxilium tuleris, si interfectores represseris, si interfici prohibueris. De corporea autem cæde non tantum loquor, sed etiam de spiritali. Omne enim peccatum, animæ mors est. Atque hic finem habeat oratio.

XXIV. Reliquum est, ut pro iis, qui huc convenerunt, votum faciamus. Viri simul et uxores, principes et subditi, senes et adolescentes ac virgines, omnes cujusvis ætatis, dispendium quidem ac detrimentum omne, tum in pecuniis et facultatibus, tum in corporibus æquo animo ferte : hoc autem unum nunquam patiamini, ut Divinitatis jacturam faciatis. Adoro Patrem, adoro Filium, adoro Spiritum sanctum; vel, ut rectius dicam, adoramus, ego, qui hæc loquor, et ante omnes, et post omnes, et cum

omnibus, in ipso Domino Christo nostro, cui gloria et imperium in sæcula. Amen.

ORATIO XXXVIII.

In Theophania, sive, natalitia Salvatoris.

ARGUMENTUM.

I. Nascente Christo, cæli et terra tentantur. II. Fux venitatis mundum illuminat. III. Duo hujus festi nomina, ac duæ incarnationis Verbi causæ. IV. Christi nativitas, propria Christianorum festivitas. V. Non ethnicorum more celebranda. VI. Christianorum delicta, in Christi nascentis et ejusdem legis meditatione reconducuntur. VII. Deus semper est. — Immensus et infinitus. VIII. Immensitas bifariam consideratur, ratione principii et ratione finis. — Quid æternitate intelligatur. — Tota Trinitas, unus Deus est. IX. Omnis creaturæ a Dei benignitate originem ducit. — Angelorum creatio. X. Fixibilis mundi creatio. — Naturæ mente præditæ Divinitatis propinque sunt; remotæ vero, quæ anima et motu carent. XI. Hominis ex visibili et invisibili natura creatio. — Homo terrenus simul et cælestis. XII. Arbitrii libertate donatus. — Ecce, quasi materia, libero arbitrio tradita. — Primi parentis lapsus. — E paradiso expellitur. XIII. Roma, ob peccatum, lege, Prophetis castigatus, majori auxilio indigebat. — Majus illud

* Aliq., et nunc est xxviii. Habita 25 decembris anni 580.

auxilium fuit ipse Dei Filius. — Dei Filius e virgine conceptus, humana omnia, excepto peccato, suscipit. — Nova mixtio, ac mirabilis temperatio in Christi natiuitate agnoscenda. XIV. Verbi incarnatio ab impiis ac derisoribus ludibrio habita. — Incarnationis mysterium Angelos non latuit. XV. Duplex in Christo nascente natura. — Diversæ hæreticorum de Christo opiniones. XVI. Verbi incarnatio omnium Christi mysteriorum fons et origo. XVII. Christi natiuitas venerabilis et veneranda. XVIII. Christus nascens, Christianorum omnium solatium et exemplar.

I. CHRISTUS gignitur, glorificate¹; Christus e cœlis, obuiam prodite; Christus in terra, subvehimini. « Cantate Domino omnis terra². » Atque, ut hæc duo in unum contraham: « Lætentur cœli, et exultet terra³, » propter cœlestem, ac postea terrestrem. Christus in carne, tremore et gaudio exultate; tremore, propter peccatum; gaudio, propter spem. Christus ex Virgine: mulieres, virginitatem colite, ut Christi matres sitis. Quis eum, qui a principio est, non adorât? Quis eum, qui postremus est, non laudat ac celebrat?

II. Rursus tenebræ solvuntur, rursus lux creatur, rursus « Ægyptus tenebris vexatur⁴, » rursus « Israël per columnam illuminatur⁵. Populus, qui in ignorantiae tenebris sedet⁶, » magnam cognitionis et scientiæ lucem inspiciat. « Vetera transierunt: ecce facta sunt omniâ nova⁷. » Littera cedit, Spiritus superat, umbræ prætereunt, veritas ingreditur. Melchisedech colligitur: qui sine matre erat, sine patre efficitur; prius quidem sine matre, post

¹ Vide D. Guillon, tom. vi, p. 342-348. — ² Psal. xcvi, 1. — ³ Ibid. 11. — ⁴ Exod. x, 21. — ⁵ Id. xiii, 21. — ⁶ Isai. ix, 2. — ⁷ 2 Cor. v, 17.

autem sine patre. Naturæ leges evertuntur. Supernum mundum impleri oportet. Christus jubet : ne obsistamus. « Omnes gentes plaudite manibus ¹, quoniam parvulus natus est nobis, et filius datus est nobis, cujus principatus » super humerum ejus, (cum cruce etenim extollitur,) ac » vocatur nomen ejus, magni consilii, hoc est, paterni, » Angelus ². » Clamet Joannes : « Parate viam Domini ³. » Ego quoque diei hujus viam ac potentiam clamabo : Carnis expers incarnatur : Verbum crassescit : invisibilis cernitur : intactilis tangitur : tempore vacans initium sumit : Dei Filius, hominis Filius efficitur, « Jesus Christus heri, » et hodie, ipse et in sæcula ⁴. » Judæi offendantur, Græci derideant, hæretici linguæ prurigine afficiantur. Tum credent, cum in cælum ascendentem viderint : quod si ne tum quidem : at certe cum e cælo descendentem, atque, ut judicem sedentem aspexerint.

III. Verum hæc posterius. Nunc autem Theophania, sive, natalitia, præsens celebritas : utroque enim modo appellatur, duobus scilicet nominibus uni eidemque rei impositis. Deus enim per nativitatem hominibus apparuit, alterum quidem jam existens, et quidem sempiternæ ex sempiterno, supra causam omnem ac rationem ; (neque enim causa ulla Verbo superior erat ;) alterum, nostræ salutis causa, postea factus, ut, qui vitam dederat, idem beatam quoque vitam largiretur ; vel potius, ut nos per vitium a beata vita prolapsos, ad eandem rursus per Incarnationem suam revocaret. Theophania igitur ob eam causam hoc festum appellatur, quod apparuerit : Nativitas vero, quod natus sit.

IV. Hoc festum nostrum est, hoc hodierno die celebramus, Dei nimirum ad homines adventum, ut ad Deum accedamus, aut, (id enim aptius dicitur) revertamur ; ut,

¹ Psal. XLVI, 1. — ² Isai. ix, 6. — ³ Matth. iii, 3. — ⁴ Hebr. xiiii, 8.

deposito veteri homine, novum induamus; et quemadmodum in veteri Adamo mortui sumus, ita in Christo vivamus, dum nimirum cum Christo, et nascimur et cruci affligimur, et sepelimur, et resurgimus. Pulchra enim in contrariam mutatio mihi subeunda est, ut, quemadmodum ex secundis rebus molestæ venerunt, sic etiam ex molestis lætæ et jucundæ redeant. « Ubi enim abundavit peccatum, superabundavit et gratia¹ : » et, si gustus condemnavit, quanto magis Christi passio justificavit? Quocirca non ut in publicis festis fieri solet, sed divine; non mundanæ, sed supra mundanæ; non quæ nostra sunt, sed ejus qui noster est, vel, ut rectius loquar, ejus qui Dominus est; non quæ infirmitatis sunt, sed quæ curationis; non quæ creationis, sed quæ regenerationis celebremus.

V. Id autem qua ratione consequemur? Nempe, si nec domus vestibula coronis cingamus, nec choros agitemus; nec viços ornemus, nec oculum pascentis, nec atriem cantu mulceamus, nec olfactum muliebriter deliniamus, nec gustui lenocinemur, nec tactui gratificemur, promptis, inquam, illis ad vitium viis, et peccati januis, nec delicatis et circumfluentibus vestibus emolliamur, quarum quod pulcherrimum est, nulli usui est, nec gemmarum splendoribus, nec auri fulgoribus, nec colorum artificis nativam pulchritudinem ementientibus atque adversus divinam imaginem excogitatis; nec « Comessionibus et ebrietatibus² : » quibus cubilia et impudicitias adjuncta esse scio; quandoquidem majorum magistrorum malæ doctrinæ sunt, vel potius, majorum seminum malæ segetes. Ne altos e frondibus toros figamus, ventri umbracula delicata fabricantes. Nec fragrantia vina, nec coquorum lenocinia, nec exquisitissima unguenta in pretio habeamus. Nec terra et mare pretiosum nobis stercus donó offerant: (hoc enim

¹ Rom. v, 20. — ² Id. xiii, 13.

honore delicias afficere soleo.) Nec alius alium intemperantia superare contendamus. Mihi enim intemperantia est; quidquid superfluum est, ususque necessarios excedit; idque esurientibus aliis, atque inopia laborantibus, iis, inquam, qui ex eodem luto et temperamento constant.

VL Verum hæc gentilibus, ac gentilibus pompis, festisque relinquamus: qui etiam iis, quos sacrificiorum nidor oblectat, Deorum nomen tribuunt, apteque proinde divinum Numen ventre colunt, mali utique malorum dæmonum, et fictores, et sacerdotes, et cultores. At nos, a quibus Verbum adoratur, si quid deliciis dandum est, in sermone deliciemur, atque in lege divina, et narrationibus, cum aliis, tum iis præsertim, quæ præsentī festo consentaneæ sunt; ut aptæ, minimeque ab eo, a quo convocati sumus, alienæ sint deliciæ nostræ. An verò placet, ut, quandoquidem hodierno die convivatoris apud vos munere perfungor, vobis, præclaris convivis, sermonem de his rebus, quam fieri poterit, lautissimum et copiosissimum apponam, ut noscatis, quam belle, et indigenas peregrinus, et urbanos rusticus, et deliciis operam dantes homo a deliciis alienus, et opibus claros pauper ac domo carens, alere queat? Hinc autem exordiar: ac vos, quæso, et mentem, et aures, et animum purgatum afferte, quicumque hujusmodi deliciis studetis; (quandoquidem quæ de Deo habetur, divina quoque ipsa est oratio;) ut deliciis haudquaquam evanescentibus revêra affecti discedatis. Erit autem eadem simul et plenissima, et maxime compendiosa; ut nec ob defectum molestiam, nec ob saturitatem tedium afferat.

VII. Deus, et erat semper, et est, et erit: vel, ut rectius loquar, semper Est. Nam Erat, et Erit, nostri temporis, fluxusque naturæ segmenta sunt. Ille autem semper Est,

atque hoc modo se ipsum nominat ¹, cum in monte Moysi oraculum edit. Universum enim id, quod est, in se complectitur, nec principium habens, nec finem habiturum, velut pelagus quoddam essentiæ immensum et interminatum, omnem, tum temporis, tum naturæ cogitationem superans; mente sola adumbratus is, et quidem perexigüe ac perobscure, non ex his quæ in ipso sunt, sed quæ circa ipsum: alia ex alio collecta specie ad unum quoddam veritatis simulacrum, prius quam teneatur, effugiens, et prius quam intellectu percipiatur, se ipsum fuga proripiens: tantum principem nostri partem, eamque a vitiorum labe purgatam, collustrans, quantum oculorum aciem fulguris celeritas, minime consistentis. Hoc autem mea quidem sententia, idcirco sit, ut quatenus comprehendi potest, nos ad se trahat; (quod enim percipi omnino nequit, id nec sperat quisquam, nec assequi conatur;) quatenus autem capi non potest, admirationem sui excitet, atque ex ipsa admiratione vehementius expetatur, expetitus purget, purgans autem divinos efficiat, talesque cum redditi sunt, cum iis jam, velut cum familiaribus, consuetudinem habeat, (metuo ne hoc audacius, a me dictum videri possit,) Deus diis unitus et cognitus, ac tantum fortasse, quantum iam eos, qui ipsi noti sunt, cognoscit. Immensus igitur et infinitus est Deus, et ad contemplandum difficilis: atque hoc solum omnino de ipso comprehendi potest, nempe quod immensus, et infinitus sit: etsi quispiam existimet eum, quia simplicis naturæ sit, rationem hanc habere, ut, vel prorsus incomprehensibilis sit, vel prorsus ac perfecte comprehendi queat. Quid enim ille sit, qui naturam simplicem habet, exquiramus. Neque enim simplicitas illi natura est: quandoquidem nec compositis sola compositio.

VIII. Jamvero, cum immensitas bifariam consideretur,

¹ Exod. III, 14.

nempe et principii, et finis ratione ; (nam quod supra hæc est, ac non in his, immensum est ;) cum in superius profundum mens aspexit, non habens ubi consistat, formisque illis, quas de Deo concipit, innitatur, immensum hoc et inextricabile, anarchum, hoc est, principio carens, appellavit : cum autem ad inferiora et posteriora, immortale atque interitus expers : cum vero utrumque contraxit et collegit, æternum. Æternitas enim, nec tempus, nec temporis pars ulla est ; (nec enim in mensuram cadit ;) sed quod nobis tempus est, solis motu definitum, hoc æternis ævum est, nimirum ille quasi temporalis quidam motus, et intervallum, quod simul cum æternis extenditur. Atque hæc nobis in præsentia de Deo dicta sint. Neque enim plura disserere hujus est temporis, quandoquidem nobis hoc loco, non de Divinitate, sed de œconomia instituta est oratio. Deum porro cum dico, Patrem, et Filium et Spiritum sanctum dico ; nec ultra hæc diffusa Divinitate, ne Deorum turbam inducamus ; nec rursus infra hæc finita et restricta, ne Deitatis inopia premi judicemur, vel propter unius principatum in judaïsmum, vel propter Deorum multitudinem in gentilismum incidentes. Nam utrobique malum æquale est, tametsi in contrariis reperiatur. Sic nimirum Sancta Sanctorum, quæ etiam a Seraphinis obtinentur, ac tribus sanctificationibus celebrantur ¹, in unam dominationem ac Deitatem coëuntibus : quemadmodum et alius quidam ante nos pulcherrime et sublimissime philosophatus est.

IX. Quoniam autem bonitati nequaquam satis erat sua ipsius solum contemplatione moveri, sed bonum diffundi ac propagari oportebat, ut plura essent, quæ beneficio afficerentur, (id enim summæ bonitatis erat,) primum angelicas et cœlestes Virtutes cogitavit : atque illa cogita-

¹ Isai. vi, 2 et seqq.

tio opus erat, quod Verbo conficiebatur, ac Spiritu explebatur. Atque ita secundi splendores procreati sunt, primi splendoris administri; sive intelligentes Spiritus, sive ignem velut materiæ expertem et incorporeum, sive aliam quamdam naturam, quam proxime ad has accedentem, eas existimare oportet. Gestit quidem animus dicere ad malum immobiles, atque ad bonum duntaxat agitationem habentes, utpote Deum circumstantes, ac primario Dei fulgore collucentes; (hæc enim inferiora secundariæ illuminationis sunt;) verum ut non omnino immobiles, sed ægre mobiles existimem ac dicam, mihi persuadet ille ob splendorem Lucifer, qui propter superbiam caligo, et effectus est, et nominatur, ac subjectæ ipsi rebelles potestates, quæ per boni fugam vitium effecerunt, illudque nobis contraxerunt.

X. Sic igitur, atque ob has causas, intellectilis mundus ab eo creatus est, quantum quidem ipse de his rebus philosophari quæo, exigua oratione res magnas expendens. Posteaquam autem primas creationis partes præclare constitutas vidit, alterum mundum materia constantem et aspectabilem cogitavit; hanc nimirum ex cælo et terrâ, et his rebus, quæ eorum complexu continentur, coagmentationem et concretionem, laudandam illam quidem, ob singularum partium elegantiam, verum laudabiliorem ob eam, quæ ex universis existit, concinnitatem atque concordiam, alia re videlicet cum alia quadam pulchre quadrante atque omnibus cum universis, ad unius mundi ornatum omnibus numeris absolvendum: ut illud ostenderet, se non modo sibi ipsi cognatam et propinquam naturam, sed etiam omnino alienam posse procreare. Divinitatis enim propinquæ sunt naturæ mente præditæ, et quæ mente sola percipi possunt: alienæ autem prorsus quæcumque sub sensus cadunt, hisque ipsis longius adhuc remotæ, quæ anima prorsus et motu carent. Sed quorsum hæc ad hos,

dixerit fortasse quispiam ex his, qui festis impensius delectantur, ac fervidiori animo sunt? Equum ad metam stimula. De iis, quæ ad festum attinent, et ob quæ hodie assidemus, philosophare. Hoc equidem faciam; etsi paulo altius exorsus sum, cum desiderium et orationis series ad id cogant.

XI. Enimvero mens jam et sensus, sic inter se discreta, finibus suis se continebant opificisque Verbi majestatem in se ipsis ferebant taciti laudatores insignis opificii, et celebres præcones. Nondum autem utriusque temperatio ulla erat, aut contrariorum mixtura, quæ sublimioris sapientiæ ac circa naturarum creationem varietatis et excellentiæ specimen exhiberet; nec omnes bonitatis divitiæ notæ atque spectatæ erant. Cum igitur artifice Verbo istud ostendere placuisset, animal unum ex utroque, hoc est, ex invisibili ac visibili natura hominem fabricatur; atque a materia, quæ prius jam creata erat, corpus accipiens, a se autem spiraculum inserens, (quod quidem intellectua-lem animam, Deique imaginem Scriptura vocat,) velut alterum quendam mundum, in parvo magnū, in terra collocat, Angelum alium, mixtum adoretorem, visibilis naturæ spectatorem, intellectilis mysten, eorum quidem, quæ in terra sunt, Regem, superis autem subditum, terrenum et cælestem, caducum et immortalem, visibilem et intelligibilem, medium inter magnitudinem et humilitatem; eundem, spiritum et carnem; spiritum, propter gratiam; carnem, ob superbiam: illud, ut maneat, ac benefactoris gloriam prædicet; hoc, ut vexetur, ac per vexationes admoneatur, et ob magnitudinem glorians erudiat atque castigetur; animal hic gubernatum, atque alio demigrans, et, quod mystérii extremum est, per animi ad Deum propensionem Divinitatem consequens. Eo enim mihi veritatis ille splendor, quem hic exigue haurimus,

tendit, ut Dei claritatem, et videam, et sentiam, dignam eo, qui, et constrinxit, et dissolvit, ac rursum sublimius colligabit.

XII. Hunc arbitrii libertate donatum, (ut bonum non minus illius esset, qui elegisset, quam ejus, qui semina præbisset,) in paradiso, quicumque tandem erat paradisi ille, collocavit, plantarum immortalium cultorem, hoc est, fortasse divinarum cogitationum, tam simpliciorum, quam perfectiorum, nudum, quantum ad simplicitatem et vitam arte et suco carentem, atque omnis integumentum et munimentum expertem. Talem enim eum esse conveniebat, qui primum esset creatus. Ac legem, quasi materiam, libero arbitrio tradit. Lex autem illa præceptum erat, quo præscribebatur, tum quibus arboribus ei utendum esset, tum a qua manus abstinendæ. Ea porro erat scientiæ arbor, non illa quidem aut male a principio consita, aut per invidiam interdicta, (ne illuc linguas suas Dei hostes injiciant, nec serpentem imitentur,) sed bona quidem, tempestive percepta; (contemplationis enim, ut ipse contemplando assequor, hæc arbor erat, ad quam iis solis tutus est ascensus, qui animi habitu perfectiori sunt;) haudquaquam autem bona simplicioribus adhuc animis, atque appetitu avidiori præditis; quemadmodum nec perfectus ac solidus cibus iis conducit, qui tenera adhuc sunt ætate lacteque opus habent. Postquam autem diaboli invidia, et mulieris injuria, quam et ut mollior passa est, et ut ad persuadendum accommodatior, admovit; (o infirmitatem meam! meam enim duco primi parentis infirmitatem;) accepti mandati memoriam abjecit, et ab acerba esca victus est: tum vero simul et a ligno vitæ, et a paradiso, et ab ipso Deo propter peccatum expellitur, Et pelliceas tunicas induit, hoc est, fortasse crassiorem carnem, et mortalem ac renitentem; sicque primum suam fœditatem agnoscit, Deoque se ab-

scondit. Illic tamen aliquid elucrat; et ipsum aliquid, ipsa mors est, ac peccati præcisio, ne malum immortale esset. Ita pœna ipsa in misericordiam cessit. Sic enim Deum supplicia inferre persuasum habeo.

XIII. Multis autem prius modis, ob multa peccata, quæ ex vitii radice pullularunt, secundum diversas causas et tempora castigatus, Sermone, Lege, Prophetis, beneficiis, comminationibus, plagis, aquis, incendiis, bellis, victoriis, cladibus, signis e cœlo, signis ex aëre, ex terra, ex mari, hominum, urbium, gentium insperatis mutationibus; quæ omnia eo tendebant, ut malitia contereretur. Validiori tamen medicamento propter graviores morbos opus habere cœpit, nimirum ob mutuas cædes, adulteria, perjuriam, furiosos masculorum amores, et, quod omnium malorum extremum ac primum est, idolorum cultum, atque adorationis a Creatore ad creaturas translationem. Quæ quoniam majus auxilium requirebant, majus etiam acceperunt. Istud autem erat ipse Dei Filius, ille sæculis antiquior, ille invisibilis, ille incomprehensibilis, ille incorporeus, illud ex principio principium, illud ex lumine lumen, ille fons vitæ et immortalitatis, illa archetypi expressio, illud immotum sigillum, illa per omnia similis imago, ille Patris terminus et ratio; ille, inquam, ad imaginem suam se confert, et carnem ob carnem gerit, et cum intellectuali anima propter animam meam jungitur, ut simile per simile repurget. «Atque humana omnia excepto peccato suscipit¹;» conceptus quidem ex Virgine, animo et corpore a Spiritu præpurgatus; (nam et generationem honore affici, et virginitatem præferri oportebat;) progressus autem Deus cum humanitate, unum ex duobus inter se contrariis, carne nimirum et Spiritu; quorum alterum deificavit, alterum deificatum est. O novam mixtionem! o admirandam tem-

¹ Hebr. iv, 15.

perationem ! Qui est, fit : qui creatus non est, creatur : qui nullo loco contineri potest, per interventum animæ intellectualis, inter Divinitatem et carnis crassitatem, continetur. Qui locupletes alios ditat, paupertate afficitur : carnis enim meæ paupertatem subit, ut ego Divinitatis ipsius opes consequar. Qui plenus est, exinanitur : sua enim gloria nonnihil exinanitur, ut ego plenitudinis ipsius particeps efficiar. Quænam hæ bonitatis divitiæ ? Quodnam me circumstat mysterium ? Divinam imaginem accepi, nec custodivi : ille carnis meæ particeps fit, ut et imaginis salutem, et carni immortalitatem afferat. Secundum consortium nobiscum init, et quidem priori longe admirabilius ; tum enim id, quod præstantius erat, nobis impertiit ; at nunc ipse ejus, quod deterius est, particeps efficitur. Hoc priori illo divinius ; hoc apud cordatos et prudentes viros multo sublimius.

XIV. Quid ad hæc nobis sycophantæ dicunt, acerbis, inquam, isti Divinitatis expensores, rerum laudandarum reprehensores, circa lucem tenebrosi, circa sapientiam imperiti, pro quibus Christus gratis mortuus est, ingrata creaturæ, diaboli figmenta ? Siccine Deo beneficium ut crimen objicis ? An propterea parvus est, quia propter te humilis, quia bonus ille pastor, « Qui animam suam pro » ovibus ponit¹, » ad errantem ovem venit, ad montes et colles, in quibus sacrificabas, et vagantem invenit, « Et inventam iisdem humeris², » quibus et crucis lignum, sustulit, sublataque ad supernam vitam reduxit, reductamque eodem, quo eas quæ nunquam a grege aberrarunt, loco numeroque habuit ? Quia lucernam, hoc est, carnem suam, accendit, et domum everrit, mundum scilicet a peccato repurgans, et drachmam, hoc est, regiam imaginem vitiosis affectibus obrutam, conquisivit, atque Angelos

¹ Joan. x, 11. — ² Luc. xv, 4, et seqq.

amicos suos, ea inventa, convocat, lætitiæque participes facit, quos etiam œconomix suæ conscios habuerat? Quia præviam lucernam splendidissima illa lux sequitur, et vocem Verbum, et pro nubum sponsus, Domino peculiarem populum comparantem, ac per aquam ad Spiritum præpurgantem? Hæccine Deo objicis? Atque idcirco eum inferiorem esse censes, « Quia linteo præcingitur, ac Discipulorum pedes abluit¹, » optimumque ad sublimitatem iter humilitatem ostendit? Quia propter humi inclinatam animam se dejicit, ut ob peccatum deorsum vergentem secum erigat? Illud autem quin tu item reprehendis, « Quod cum publicanis, et apud publicanos edit, et publicanos in Discipulos convertit², » ut ipse quoque aliquid lucretur? Quid tandem? Peccatorum salutem; nisi quis forte eo nomine medicum accuset, quod ad morbos se inclinet, fetoremque sustineat, ut sanitatem ægrotis donet: atque eum etiam, qui humanitatis et commiserationis affectu permotus in foveam se ipsum demittit, ut prolapsum jumentum, juxta legis præscriptum³, servet.

XV. Missus quidem est, verum ut homo; (duplici enim natura erat;) siquidem, juxta corporis legem, et fatigatus est, et fame ac siti laboravit, et angore affectus est, et lacrymas fudit. Quod si etiam ut Deus, quid propterea? Beneplacitum Patris missionem esse existima, cui sua quoque ascribit, tum ut principium temporis expers honore afficiat, tum ne Dei adversarius esse videatur. Quandoquidem ut traditus fuisse dicitur; ita se ipsum quoque tradidisse scribitur: atque ut a Patre ad vitam revocatus, et ad supera susceptus fuisse; ita se ipsum quoque a mortuis excitasse, rursusque in cælum ascendisse prædicatur. Illa beneplaciti, hæc potestatis. At tu ea quidem, quæ minuendi vim habent, profers; quæ autem efferendi, præ-

¹ Joan. XIII, 4. — ² Luc. V, 27, et seqq. — ³ Deut. XXII, 4.

teris: atque id quidem expendis, quod passus sit; quod autem sponte, non adjungis. Proh qualia etiamnum patitur Verbum! Ab aliis ut Deus honoratur atque contrahitur: ab aliis ut caro contemnitur, ac separatur. Utris tandem gravius irascetur? Vel potius, utris plus condonabit, iis-ne qui male contrahunt, an qui scindunt? Nam et illos dividere, et hos conjungere oportebat: illos, inquam, numero, hos Divinitate. Offendis ad carnem? Et Judæi etiam. Num Samaritanum quoque vocas? (Nam quod sequitur, tacebo.) Deitati fidem abrogas? Hoc nē dæmones quidem ipsi fecerunt. O dæmonibus incredulior, et Judæis insipientior! Isti quidem Filii nomen, æqualitatis vocem esse censebant: illi autem eum, a quo fugabantur, Deum norant. Illis enim ea, quæ patiebantur, fidem faciebant. At tu, nec æqualitatem admittis, nec Divinitatem confiteris. Proinde satius tibi fuerat circumcisum esse, atque a dæmone obsideri, ut ridicule aliquid dicam, quam in præpulio et incolumi valetudine, tam prave et impie affici.

XVI. Ac quidem paulo post, et Jesum, purgationis meæ causa, in Jordane purgari videbis²; vel potius, aquas purgatione sua purificare; (neque enim ipse purgatione opus habebat, qui peccata mundi tollit;) et cælos scindi, et cognati Spiritus testimonio celebrari, et tentari, et victoriam referre, et Angelorum ministerio uti, et morbos omnes ac languores curare, et mortuos ad vitam lucemque revocare, (quemadmodum utinam te quoque, fidei pravitate mortuum,) et dæmones, partim per se ipsum, partim etiam per Apostolos, in fugam agere, et paucis panibus multa hominum millia nutrire, et pedibus per mare iter facere, et prodi, et in crucem tolli, ac peccatum meum cruci secum affigere: ut agnum offerri, et ut sacerdotem offerre; ut hominem sepultura affici, et ut Deum resurgere;

² JOAN. VIII, 48. — ² MATTH. III, 13.

ac postea in cœlum ascendere, tandemque cum gloria sua venturum esse. Papæ, quot mihi festos dies, hæc singula Christi mysteria suppeditant! Quorum omnium unum hoc caput est, atque unus hic scopus, nimirum mea perfectio et instauratio, atque ad primum illum Adamum reditus.

XVII. Nunc autem conceptum accipe, ac præsulda : si minus ut Joannes ab utero, at certe ut David ob requiem Arcæ¹. Descriptionem reverere, propter quam in cœlis ipse describeris : et nativitatem celebra, ob quam nativitatis vinculis solutus es : et parvam illam Bethlehem honora, quæ te in paradysum reduxit : et præsepe adora, propter quod, cum rationis expers esses, a Verbo nutritus es. « Cog-
nosce, ut bos, possessorem tuum, Isaias te admonet, et,
» ut asinus, præsepe domini sui²; » sive mundus quispiam sis ac legi subjectus, rectamque doctrinam ruminans, atque ad sacrificium idoneus; sive etiam adhuc immundus, ac cibo et sacrificiis inutilis, ethnicæque partis. Cum stella curre, cum Magis dona offer, aurum, thus, et myrrham, ut regi, ut Deo, et ut tua causa mortuo. Cum pastoribus Deum laudibus celebra : cum Angelis hymnum dicito : cum Archangelis choros ducito. Sit cœlestium et terrenarum virtutum communis celebritas. Nam eas quoque hodierno die simul festum celebrare, ac lætitia gestire confido : siquidem hominum Deique amore præditæ sunt, quemadmodum illæ, quas David inducit post passionem, cum Christo simul ascendentes, ac simul occurrentes, seque invicem ad portas attollendas inhortantes³.

XVIII. Unum hoc duntaxat ex iis omnibus, quæ circa Christi nativitatem contigerunt, odio habe, ac detestare, nimirum puerorum cædem ab Herode perpetratam. Ino vero hanc quoque venerare, inquam, coætaneam Christo

¹ 2 Reg. vi, 14. — ² Isai. i, 3. — ³ Psal. xxiii, 7.

victimam, quæ pro nova victima mactata est. Si in Ægyptum profugiat, alacri animo te ipsi fugæ comitem adijunge. Præclarum est cum Christo persecutionem patiente fugere. Si diuturniorem in Ægypto moram faciat, ex Ægypto eum voca, qui rite illic adoratur et colitur. Per omnes Christi ætates ac virtutes, ut Christi Discipulus, sine reprehensione incede. Purificare, circumcidere, velum a nativitate contractum abscinde. Postea in templo doce, sacrilegos nundinatores ejice: lapidibus, si ita necesse sit, incessi te patere. Lapidatores, mihi crede, falles, ac per medium ipsorum, ut Deus fugies. Verbum enim lapidibus non fertur. Si ad Herodem adductus fueris, plerumque ne verbum quidem unum respondeas. Silentium tuum magis venerabitur, quam prolixos aliorum sermones. Si flagello cæsus fueris, quæ supersunt, exposce. Fel gusta propter gustum; aceto potare, sputa require, alapas et colaphos accipe, fac spinis, hoc est, piæ vitæ asperitate, coroneris. Coccinum induas, arundinem accipias, ab iis, qui veritatem ludibrio habent, adoreris. Denique prompto animo simul crucifigaris, simul moriari, simul sepeliaris, ut simul quoque resurgas, et gloria doneris ac regnes, Deum, quantus est, conspiciens, vicissimque conspectus ab eo, qui in Trinitate adoratur, et glorificatur, quem nunc quoque nobis, quantum carnis vinculo constrictis licet, declarari optamus, in Christo Jesu Domino nostro, cui gloria in sæcula. Amen.

ORATIO XXXIX¹.*In sancta lumina.*

ARGUMENTUM.

I. Sacrum Christi baptisma, mysterium excelsum et divinum. II. Lux vera illuminans mundum. — Lux in tenebris lucens. III. Gentilium mysteria, inter nuda a demonibus inventa. IV. Impia ac indecora gentilium mysteria enumerantur. — Jobis surreptio. — Curetuli plausus ac saltationes. Corybantes. Ceres. Bacchus. Pallas. Venus. Diana. V. Inhumana Tantalii hospitalitas. — Hecate spectra. — Trophonii subterranea viscinea. — Dodonæe quercus deliramenta. — Magorum incanticia. — Chaldaeorum astrologia. — Orgia Thracum. — Orphei mysteria. — Mithræ sacra. Osiris. Isis. Apis. VI. Gentiles omnes ad horrendam communemque impietatem animis concordēs. VII. Dæmones honorem soli Deo debitam ad se detorquent. — Invidia et odio adversus hominem flagrantēs. — Homo, inobediens, erroris licentiæ traditus. VIII. Supra creata omnia assurgendum, ut cognoscantur divina. — Timor principium sapientiæ. — Ubi timor, illic mandatorum observatio. IX. Solus purus cum Deo puro colloqui potest. — Timor Centurionis laudabilis. — Zachæi humilitas imitanda. X. Dei Verbum indigentis formidolosum, dignis vero benedictum. — Ad villi fugam, addendus virtutis cultus.

¹ Alias, et nunc est xxxii. Habita Constantinopoli. 6 januarii an. 581.

XI. *Festa instituta, ut divince laudes celebrentur. — Deus unus et trinus.* XII. *Deus Pater, Deus Filius, Deus Spiritus sanctus.* XIII. *Creatur homo, ut sit super terram Dei adorator. — Deus homo efficitur. — Miscentur quæ a mixtione aliena erant. — Cur diabolus Christi incarnatione deceptus.* XIV. *Christi nativitas ab omnibus celebrata. — Christi baptisma celebrandum. — Quid significet baptismus a Christo susceptus. — Non decet senes a junioribus doceri.* XV. *Baptizatur Christus, ut veterem hominem in aquis sepeliat. — Quid significant ventilabrum, ignis, etc.* XVI. *Cur, baptizato Christo, Spiritus sanctus in columbæ specie apparuit.* XVII. *Multiplex baptisma. — Baptisma Moysis. Joannis. Christi. Martyrum. Pœnitentiæ.* XVIII. *Homo infirmitate circumdatus baptismo indiget. — Novatianos perstringit, qui Catharos se appellabant. — Pœnitentes non sunt arcendi.* XIX. *In dubiis ad benignitatem propendendum.* XX. *Christi baptisma spiritualibus gaudiis celebrandum.*

I. Rursum Jesus meus, et rursum mysterium¹ : mysterium non fallax, nec indecorum, nec gentilitii erroris ac temulentix; (sic enim veneranda illorum mysteria voco, atque etiam, ut arbitror, omnes mente præditi;) sed mysterium excelsum et divinum, ac supernum splendorem concilians. Etenim sanctus luminum dies, ad quem pervenimus, quemque hodie divino beneficio celebravimus originem quidem a Christi mei baptismate ducit; Christi, inquam, « Qui est lux vera, illuminans omnem hominem » venientem in mundum² : » meam autem quoque purgationem operatur, ac lumini ei adjumentum affert, quod

¹ Vide D. Guillon, tom. vi, p. 348-355. — ² Joan, i, 9.

ab eo sublimitus ab initio acceptum, peccati caligine obduximus atque confudimus.

II. Quocirca divinam vocem audite, mihi quidem huiusmodi rerum et discipulo et magistro, atque utinam etiam vobis, vehementer insonantem : « Ego sum lux mundi¹. » Ac proinde : « Accedite ad eum, et illuminamini; et facies » vestrae, vero lumine consignatae, minime confundentur². » Tempus regenerationis; nascamur denuo. Tempus instaurationis; primum Adamum recipiamus. Ne in eo statu, quo sumus, maneamus; verum ad pristinum redeamus: « Lux in tenebris, hoc est, in hac vita et carne, lucet³; » ac tenebrae quidem eam persequuntur, sed non comprehendunt, adversaria, inquam, potestas, quae, dum pro sua impudontia in visibilem Adamum impetum facit, in Deum incurrit, ac superatur; ut nos, abjectis tenebris, ad lucem accedamus, ac deinde lux quoque perfecta efficiamur, a perfecta luce prodeuntes. Videtis-ne huius diei gratiam? Videtis-ne huius mysterii vim et facultatem? Annon a terra in altum sublatis estis? Annon in caelo perspicui positi, nostra videlicet voce ac contemplatione in sublime elati? Ac multo etiam magis collocati ac stabiliti eritis; cum Verbum sermoni nostro prosperum cursum dederit.

III. Ecqua talis est legalis atque umbratilis purgatio, quae per temporarias aspersiones utilitatem affert, ac pollutos per vitulae cinerem lustrat? Ecquid ejusmodi gentiles celebrant? Quorum ego caeremonias omnes et mysteria, meras nugas esse censeo, tenebrosorum daemonum inventum, ac perditae mentis figmentum, temporis ope ac praesidio fultum, et fabulis furtim oblectum. Nam, quae ut vera adorant, eadem ut fabulosa obvolvunt et occultant. Oporteret potius, siquidem vera sunt, quam praedicant, non ea fabulas nuncupare, sed ostendere, quod ab

¹ Joan. viii, 12. — ² Psal. xxviii, 6. — ³ Joan. i, 9.

omni turpitudinis obscœnitatisque nota vindicentur : si autem falsa, non ea suspicere, nec ita impudenter de una eademque re maxime oppositas sententias tenere ; perinde ac il, qui in cœtu puerorum ludunt, aut amentium prorsus visorum, non autem cum sapientibus viris, ac Verbi adoratoribus disputant ; tamesi artificiosum istud et sputum verborum lenocinium aspernentur.

IV. Non hæc Jovis partus et furtâ, illius, inquam, Creteusium tyranni, (moleste licet hoc gentiles ferant ;) nec Curetum soni ac plausus, armatæque saltationes, Dei vagiehtis clamorem obruentes, ut crudelenti patrem effugeret. Grave enim profecto atque indignum erat eund, quærit lapis devoratus fuerat, ut infantem ejulare. Nec Phrygum emeciones, et tibia, atque Corybantès, et quascumque circa Rheam homines furore capti peragunt, ejusmodi sacra Deorum matri obeuntes ; atque ipsi vicissim ita initiati, ut par est in talium Deorum parentis mysteriis ! Nec puella quædam apud nòs rãpitur, nec Ceres vagatur, ac Calceos quosdam, et Triptolemos ; et dracones inducit, multaque alia et facit, et patitur. Pudet enim me nocturnum sacrum in lucem proferre, ac turpitudinem mysterium facere. Novit hæc Eleusis, atque illi tacitorum, ac profecto silentio dignorum sacrorum spectatores. Nec Bacchus hæc nostra mysteria sunt, nec semur, inchoatum foetum parturiens, quemadmodum caput alium quemdam foetum prius parturierat : nec semivir Deus, et ebriorum chorus, exercitusque mollis et dissolutus, et Thebanorum amentia, hunc colens, ac Semelæ tonitruum adoratum. Nec meretricia Veneris mysteria, turpiter, ut ipsi narrant, et procreatas, et cultæ : nec Phalki quidem et Ityphalli, formis et actibus obscœni. Nec atrox Taurorum in hospites feritas, nec aræ affusus Spartanorum adolescentum cruor, flagris sese lacerantium, atque hæc una in re male viriles animos geren-

tium, a quibus Dea colitur, eaque virgo. Nam iidem, et molliem honori habuerunt, et audaciam venerati sunt.

V. Jam Pelopis dilanationem, esurientes Deos satiantem, ac sævam et inhumanam hospitalitatem, quo tandem loco pones? Quo item loco horrenda et caliginosa Hecatæ spectra, Trophonijque subterranea ludicra et vaticinia; aut Dodonææ quercus deliramenta, aut Delphicæ tripodis præstigias, aut fatidicos Castalij fontis latices? Quæ omnia hoc unum vaticinari minime potuerunt, nimirum silentium suum. Nec Magorum ars sacrificandi, atque ex victimarum incisione futurorum præsensio: nec Chaldæorum astrologia et nativitatum observatio, res nostras eodem cum sideribus motu volvens, cum tamen ipsi, nec quid sint, aut futuri sint, cognitum habere queant. Nec Tharacum orgia hæc sunt, a quibus et religionem natam esse aiunt: nec Orphei sacra et mysteria, quem Græci sapientiæ nomine adeo suspexerunt, ut etiam Iyram, quæ fidium pulsibus omnia pertraheret, ipsi effluerint. Nec Mithræ iustum adversus eos supplicium, qui huiusmodi sacris initiari sustinent. Nec Osiridis lacerationes, alia calamitas, quæ apud Egyptios colitur. Nec Isidis infortunia, atque hirci Mendesijs ipsis venerabiliores; nec Apidis præsepe, hoc est, vituli, Memphitarum vecordia ad luxum abutentis. Nec omnes ii honores, quibus Nilum dedecorant, illum, inquam, frugum parentem, ut ipsi prædicant, spicisque copiosum et locupletem, atque ubertatem cubitis metientem.

VI. Mitto enim reptilium et vilium animalculorum honores, ac profusam obscœnitatem; quorum privatim quidem sua cuique sacra et festa erant, communiter tamen omnia ad horrendam perditamque impietatem tendebant; adeo ut, si quidem omnino eos impietate constringi, atque ad simulacra et artis opera manuumque figmenta pro-

lapsos, a Dei gloria dejici oportebat, nihil aliud ipsis cordati homines imprecari possent, quam ut talia venerarentur, talibusque honoribus afficerent, « Ut erroris mercedem, quam decebat », ut ait Paulus, per hujusmodi venerationem reciperent; non magis ea numina per se ipsos honorantes, quam ipsi per ea dedecus atque infamiam sibi ipsis inurentes. Execrabiles quidem illi ob errorem, execrabiliores autem ob eorum, quæ venerantur atque adorant, vilitatem; ita ut iis etiam, quæ colunt, stupidiores se præbeant, tantumque ea dementia et stoliditate superent, quantum ab iis, quæ adorant, vilitate superantur.

VII. Atque hæc quidem ludant gentiles, ac dæmones, a quibus illi in hanc amentiam impelluntur, dum nimirum Dei honorem ad se ipsos detorquent, atque in turpes sententias, et rerum species, alios alio modo discindunt, ex quo nos, per scientiæ lignum minus tempestive et commode perceptum, vitæ ligno exturbatos, velut jam infirmiores, exagitarunt, gubernatrice mente abrepta, januaque vitiosis animi affectionibus patefacta. Nec enim ferre poterant, cum invidia atque odio adversus hominem suapte natura flagrarent, vel, ut rectius loquar, propter vitium suum in hunc habitum degenerassent, terrenos homines supernis bonis frui, cum ipsi e cælo in terram corruissent, nec tantam gloriæ, pristinaeque ipsorum naturæ mutationem fieri. Idcirco persecutio adversus Dei figmentum excitata est: idcirco Dei imago probro et dedecore affecta. Et quemadmodum mandato parere recusavimus, ita licentiæ erroris traditi sumus: et quemadmodum aberravimus, ita vicissim in iis, quibus cultum et venerationem adhibuimus, probro et ignominia perfusi sumus. Nec enim hoc solum grave et indignum est, quod, cum ad bona

1 Rom. 1, 25, et seqq.

opera, in opificis laudem et gloriam, Deique, quantum fas est, imitationem, creati essemus, omnis generis vitiorum, quæ intestinum hominem misere depascunt atque consumunt, sedes et propugnaculum facti sumus; sed etiam quod Deo vitiorum patronos effinximus, ut peccatum, non modo crimine careat, sed etiam divinum censeatur, ad ea videlicet, quæ pro diis adorantur, defensionis causa confugiens.

VIII. At vero, quemadmodum nobis divino beneficio concessum est, ut, superstitioso errore fuga relicto, a veritate stemus, ac Deo vivo et vero serviamus, et supra creaturam assurgamus, omnia, quæ tempori primæque motioni subjacent, trajicientes; ita etiam faciendum est, ut ea, quæ de Deo, ac divina sunt, cognoscamus, de iisque disseramus. Disseremus autem, hinc, unde satius est, initium ducentes. Hinc porro satius est, unde Salomon nobis legem statuit: « Principium sapientiæ, inquit, posside sapientiam¹. » Quidnam hoc vocat principium sapientiæ? Timorem². Neque enim ea nobis ratio ineunda est, ut a contemplatione auspicantes, in timorem desinamus; (effrenata enim contemplatio in præcipitia quoque fortasse nos impulerit;) verum ut timoris rudimentis imbuti, et purgati, atque, ut hoc verbo utar, attenuati, in altum efferamur. Ubi enim timor est, illic quoque mandatorum observatio: ubi autem mandatorum observatio, illic etiam carnis, quæ, nobis cujusdam instar, animæ lumen obscurat, nec divini radii splendorem pure intueri sinit, purgatio est. Porro ubi purgatio, illic illuminatio; illuminatio autem, desiderii summa est, iis utique qui maximarum rerum, vel potius maximæ rei, atque adeo magnitudinem omnem superantis, cupiditate flagrant.

IX. Quocirca se quemque prius purgare oportet, atque

¹ Prov. iv, 7. — ² Eccli. i, 16.

ita demum cum puro consuetudinem habere; nec alioqui nobis idem, quod Israëlī, accidat, vultus Mosāici gloriam non ferenti, ac propterea velamine opus habenti¹: aut eodem, quo manūē, modo afficiamur, ac dicamus: « Perimus, mulier, Deum vidimus², » cum videlicet Dei species ipsi objecta esset: aut, Petri instar, « Jesum a navicula » submoveamus³, utpote tali præsentia indigni. (Petrum autem cum dico, quem virum dico? Eum, qui super fluctus ambulavit.) Aut oculorum sensu orbemur, quemadmodum Paulo accidit, cum, prius quam a persecutionibus expiatus esset, « Colloquium cum eo, quem persequeretur⁴ » miscuisset, vel potius, exiguo magni illius luminis splendore perstrictus fuisset: aut denique, ut Centurio ille, medicinam ita requiramus, ut tamen laudabili timore perterriti, medicum « In ædes nostras non admittamus⁵. » Proinde dicat quoque ex nobis quispiam, quandiu nondum purgatur, sed adhuc Centurio est in multos vitii principatum tenens, ac Cæsari, hoc est, mundi principi, eorumque, qui humi volutantur, domino militat: « Non sum dignus, ut intres sub tectum meum⁶. » Cum autem Jesum conspexerit, quamvis spirituali statura parvus, ut Zachæus ille, ac super sycomorum evectus fuerit, « Mortificatis videlicet membris, quæ super terram sunt⁷, » atque humilitatis corpore superato, tum vero Verbum excipiat, et audiat: « Hodie salus huic domui⁸, » salutemque accipiat, ac perfectiones fructus ferat, præclare spargens et effundens, quæ ex telonii lucris male collegerat.

X. Idem enim Verbum, et propter naturam suam indignis formidolosum est, et propter benignitatem capi potest, iis quidem certe, qui in hunc modum fuerint præparati;

¹ Exod. xxxiv, 30, et seqq. — ² Judic. xiii, 22. — ³ Luc. v, 8. —

⁴ Act. ix, 17, et seqq. — ⁵ Matth. viii, 8. — ⁶ Luc. xix, 2, et seqq. —

⁷ Coloss. iii, 5. — ⁸ Luc. xix, 9.

qui, impuro spiritu depulso, animas agnitione mundarint et exornarint, nec eas desides et otiosas reliquerint, ita ut cum majori apparatu a septem vitii spiritibus, hoc est, totidem, quot virtutis numerati sunt, rursus occupetur; (quod enim difficilius expugnatur, studiosius atque ardentius appetitur; verum ad vitii fugam virtutis cultum adiungunt, totum Christum, vel certe quam maxime, in animi domicilium admittentes, ne prava potestas, vacuum aliquid offendens, domum rursus impleat, « Ac novissima prioribus deteriora fiant ¹, » tum propter acriorem ac vehementiorem incursionem, tum propter maiorem arcis firmitatem, ejusque expugnandæ difficultatem. Postea quam autem, « Anima nostra omni custodia servata ², atque ascensionibus in corde dispositis, novalibusque in nobis ipsis innovatis ³, ac denique semine ad justitiam sparso, » quemadmodum, et Salomon, et David, et Jeremias admonent, scientiæ lumen nobis excitaverimus; tum demum in « In mysterio absconditam Dei sapientiam » loquamur ⁴, » aliisque præluceamus. Interim vero purgemur, ac Verbo ante initiemur, ut quam præclarissime de nobis ipsis mereamur, Deo similes nos ipsos reddentes, ac Verbum veniens suscipientes : nec solum suscipientes, verum etiam retinentes, aliisque præmonstrantes.

XI. Quoniam autem sermone theatrum repurgavimus, age, jam de festo nonnihil disseramus, et cum piis animis festique celebrandi studiosis, diem hunc sacrum celebremus. Et quoniam Dei memoria præcipuum festi caput est, Deum memoria colamus. Nam nec sonum eorum, qui in altero sæculo, in quo « Lætantium omnium habitatio est ⁵, » festum celebrant, quidquam aliud esse existimo, quam laudes eas, quibus Deus ab illis, qui in rem-

¹ Matth. xii, 45. — ² Prov. iv, 23. — ³ Psal. lxxxiii, 6. — ⁴ Jerem. iv, 3. — ⁵ 1 Cor. ii, 7. — ⁶ Psal. lxxxvi, 7.

publicam illam admissi sunt, celebratur. Quod si quid eorum, quæ jam a nobis dicta sunt, hæc oratio habitura est, id nemini mirum videatur. Neque enim eadem solum proloquar, sed de iisdem quoque rebus, et quidem lingua, et mente, et cogitatione horrescens, quoties de Deo sermonem habeo; quem etiam præclarum ac beatum affectum vobis inesse optarim. Deum porro cum dico, uno eodemque triplici lumine perstringamini: triplici quidem, quantum ad proprietates, sive Hypostases; si cui hoc verbum magis arridet, sive Personas; (neque enim de vocabulis dissidebimus, quandiu syllabæ ad eandem sententiam ferent;) uno autem, quantum ad substantiæ, hoc est, Divinitatis rationem. Distinguitur enim indistinctim, ut sic loquar, et distinctim connectitur. Unum enim in tribus, Divinitas est, et tria unum; ea, inquam, in quibus, Divinitas est, vel, ut magis proprie dicam, quæ, Divinitas est. Excessus autem ac defectus missos faciamus, nec per unionem confusionem, nec rursus per divisionem sejunctionem efficientes. Æquo enim intervallo a nobis absint, et Sabellii contractio, et Arii divisio, mala ex diametro opposita, et impietate paria. Quid enim necesse est Deum vel male contrahere, vel in inæqualitatem scindere?

XII. « Nobis quippe unus Deus Pater, ex quo omnia, » et unus Dominus Jesus Christus, per quem omnia, et » unus Spiritus sanctus, in quo omnia¹. » In quibus hæ particulæ, « Ex quo, per quem, et in quo, » non naturas secant; (alioqui enim propositiones istæ nominumque ordines nunquam immutarentur;) verum unius et inconfusæ naturæ proprietates exprimunt. Idque ex eo perspicue constat, quod rursus in unum contrahuntur, si modo quis illud apud eundem Apostolum non neglectim atque osci-

¹ 1 Cor. VIII, 6.

tanter legat : « Ex ipso, et per ipsum, et in ipso sunt » omnia : ipsi gloria in sæcula. Amen ¹. » Pater pater est, et principii expers : neque enim ex ullo est. Filius filius est, ac non principii expers : ex Patre siquidem. Quod si temporis principium accipis, principio etiam caret ; neque enim temporum effector temporis subest. Spiritus sanctus vere spiritus est, procedens quidem ex Patre, non tamen filiationis modo, ut nec generationis, verum processione ; liceat enim perspicuitatis causa nova nomina fingere. Neque enim Pater eo ingenuitus esse destitit, quia genuit : nec Filius genitus esse desinit, quia ex ingenito est. Quoniam enim modo desineret ? Nec Spiritus idcirco vel in Patrem, vel in Filium migrat, quia processit, ac Deus est, etiamsi impiis hominibus aliter videatur : proprietas enim moveri non potest. Nam alioqui quonam pacto proprietas maneret, si moveretur et mutaretur ? Qui autem ingenuituram, et generationem, deorum homonymorum naturas esse statuunt, iidem, credo, Adamum quoque et Seth, (quoniam ille, non ex carne, utpote a Deo effectus, hic autem ab Adamo et Eva procreatus est,) diversa natura præditos esse contendunt. Unus igitur Deus in tribus, et tria unum sunt, ut diximus.

XIII. Quæ cum ita se habeant, imo cum hoc ita se habeat, atque adorationem nequaquam supernis tantum Spiritibus definitam et circumscriptam esse conveniret, sed et inferos quosdam adoratores esse deceret, ut omnia Dei gloria, (quandoquidem Dei omnia sunt,) implerentur ; cam ob causam homo creatur, divina manu et imagine ornatus. Hunc autem invidia diaboli, atque acerbo peccati gustu, a Deo conditore misere separatum despiciere, a Deo alienum erat. Quid igitur sit ? Quamque magnum circa nos mysterium designatur ? Innovantur naturæ, ac Deus homo effi-

¹ Rom. xi, 36.

citur : « Et qui super cœlum cœli ad gloriæ suæ et splendoris Orientem ascendit¹, » in vilitatis et humilitatis nostræ occasu celebratur, Deique Filius, hominis quoque filius et esse, et vocari sustinet; non, quod erat, immutans, (neque enim mutatio in eum cadit,) sed pro suo erga homines amore, id, quod non erat, assumens, ut qui natura sua comprehendi non potest, comprehendatur, intermedia carne, tanquam velo quodam interjecto, nobiscum versans : quandoquidem procreata natura et interitui obnoxia, imbecillior est, quam ut puram ipsius Divinitatem ferre queat. Idcirco ea, quæ a mixtione aliena erant, miscentur; ac non modo Deus nativitati, et mens carni, et temporis expers temporis, et id quod circumscribi non potest, mensuræ jungitur; sed virginitati quoque procreatio; et ei, quod omni honore præstantius est, ignominia; et affectibus, id, quod affectibus vacat; et corruptibili, id, quod immortale est. Quoniam enim ille vitii parens et effector, ideo se invicto quodam robore præditum esse existimabat, quia nos, spe Divinitatis obiecta tanquam illecebra quadam, in fraudem induxerat; ideo ipse quoque carnis prætextu inescatur, ut dum quasi in Adamum impetum facit; in Deum incurrat, atque ita novus Adamus pristinae salutis et incolumitati veterem asserat, sententiaque adversus carnem pronuntiata rescindatur, morte nimirum a carne oppressa et interempta.

XIV. Jam Christi quidem nativitas congrua solemnitate prius, tum a me festi duce et auspice, tum a vobis, atque adeo ab omnibus, tam qui in mundo versantur, quam qui mundo sublimiores sunt, celebrata est. Cum Stella cucurrimus, cum Magis adoravimus, cum Pastoribus luce circumfusi sumus, cum Angelis divinam gloriam

¹ Psal. LXXII, 34.

prædicavimus, cum Simeone in ulna accepimus, cum Anna, illa, inquam, vetula et casta fœmina, confessi sumus¹, ei quoque, qui ut alienus « In propria venit², » gratia habeatur, quod exterum hominem et peregrinum gloria affecit. Nunc vero alia Christi actio, aliudque mysterium sequitur. Animi voluptatem tenere nequeo, divino furore corripior; propemodum etiam, Joannis instar, faustum nuntium profero, non præcursor quidem, ut ille, cæterum a solitudine veniens. Christus illuminatur, simul illustremur, « Christus baptizatur³, » simul descendamus, ut simul etiam ascendamus. Jesus baptizatur. Num id solum spectandum est? Nonne et alia etiam sedulo observare juvat? Nimirum quis, et a quo, et quando? Purus videlicet, et a Joanne, et tum, cum signorum edendorum initium faceret? Quid ut inde discamus et doceamur? Nempe purgationem, animique submissionem prius adhibendam esse, nec concionandi provinciam ante suscipi debere, quam ad spiritualis et corporeæ ætatis perfectionem ventum fuerit. Hoc ad eos dictum velim, qui subito et temere ad baptismum accedunt, nec ad eum præparantur, nec per animi constitutionem, ad virtutis habitum pervectam, id agunt, ut redemptio ipsis certa atque incolumis maneat. Quanquam enim hoc gratia affert, ut præteritæ noxæ remittantur, (gratia enim est,) hinc magis cavendum, ne ad eundem vomitum redeamus. Hoc quoque in eos valeat, qui adversus mysterii dispensatores insolentius efferuntur, si dignitate quadam præsent. Tertium ad eos spectat, qui juvenili ætate confidunt, atque quodvis tempus ad docendum, aut antistitis munus obeundum, idoneum esse arbitrantur. Jesus purgatur; et tu purgationem contemnis? A Joanne; et tu adversus

¹ Matth. 11, 1, et seqq., et Luc. 11, 7, et seqq. — ² Joan. 1, 11. — ³ Marc. 1, 8.

præconem tuum insurgis? Trigesimum annum agens; et tu ante lanuginem senes doces, aut docere te posse credis, nec ab ætate, nec a moribus fortasse, auctoritatem habens? Ac deinde hic Daniel profertur, tum iste, tum ille, in juvenili ætate judices, et hæc exempla in ore versantur. Quisquis enim inique agit, ad sui defensionem promptus et paratus est. Sed non habetur ut Ecclesiæ lex, quod raro accidit: quandoquidem nec hirundo una vel efficit, nec geometram una linea, nec denique nautam una navigatio.

XV. Cæterum baptizat Joannes, Jesus accidit; forsannidem ut ipsum quoque, a quo baptizatur, sanctitate afficiat; procul dubio autem, ut totum veterem Adamum in aquis sepeliat: ante hos vero, et propter hos, Jordanem sanctificans; ut, quemadmodum spiritus et caro erat, sic etiam per Spiritum et aquam initiaret. Baptista non admittit: Jesus certat. Tum: « Ego a te baptizari debeo¹, » inquit lucerna Soli, vox Verbo, amicus Sponso, « Major » inter omnes natos mulierum, omnis creaturæ primogenito², » is, qui a materno ventre præsultarat, ei, qui in ventre adoratus fuerat, præcursor et præcursorus, ei, qui apparuerat atque apparebit. « Ego a te baptizari debeo: » adde, et pro te. Exploratum enim habebat fore, ut martyrio baptizaretur; aut, ut Petrus, non pedibus duntaxat purgaretur. « Et tu venis ad me³? » Hoc quoque propheticum. Futurum enim norat, ut quemadmodum post Herodem Pilatus fureret, ita eum quoque prius vita functum Christus sequeretur. Quid autem Jesus? « Sine » nunc⁴. » Hoc enim certo consilio et dispensatione fit. Sciebat namque paulo post futurum, ut ipse Baptistam baptizaret. Jam, quid « Ventilabrum⁵ » significat? Purgationem. Quid « Ignis⁶ »? Levitatis consumptionem, et

¹ Matth. III. 14. — ² Id. XI. 11. — ³ Id. III. 14. — ⁴ Ibid. 15. — ⁵ Ibid. 12. — ⁶ Ibid. 10.

Spiritus fervorem. Quid « Securis? » Insanabilis animi, etiam post adhibitum finem, excisionem Quid « Gladius? » Verbi divini sectionem, bonum a malo dividentem, atque fidelem ab infideli secantem, « Ac filium, et » filiam, et nurum, adversus patrem, et matrem, et socrum excitantem¹, » novaque et recentia, adversus prisca et umbratica. Quid autem « Calceamenti corrigia², » quam non solvis, qui Jesum baptizas, tu, inquam, solitudinis alumne, ac nullius cibi homo, tu nove Elia, « Plus » quam Propheta³, » utpote qui eum etiam, qui prædicebatur, vidisti, tu inter Vetus et Novum Testamentum interjecte? Adventus forsitan et carnis rationem, cujus ne extrema quidem facile solvi atque explicari possunt, non dicam ab iis, qui adhuc crassi et carnales sunt, atque in Christo parvuli, sed ne ab iis quidem, qui Spiritu Joannem referunt.

XVI. At etiam Jesus ex aquis ascendit; mundum epim secum in altum effert, ac cælos, quos Adamus, et sibi, et posteris, quemadmodum et flammeo gladio paradisum, clauserat⁴, findi atque aperiri cernit. Ac Spiritus Deitatem testatur, nimirum ad parem accurrens; « Et vox cæli » tus mittitur⁵; » illinc enim is erat, cui testimonium dicebatur; et « Ut columba⁶, corpus enim honore afficit, quandoquidem hoc etiam per deificationem Deus est, » Corporeo modo conspecta. » Ac simul multis retro sæculis columba diluvii finem nuntiare consuevit⁷. Quod si mole ac pondere Deitatem æstimas, ac propterea Spiritum parvum esse censes, quia in columbæ forma cernitur, o homo in maximis rebus minute ac jejune, jam tibi regnum quoque cælorum contemnendum et pro nihilo putandum est, quia sinapis grano comparatur⁸, ac majes-

¹ Matth. x, 35. — ² Id. iii, 11. — ³ Id. xi, 9. — ⁴ Gen. iii, 24. — ⁵ Matth. iii, 17. — ⁶ Luc. iii, 22. — ⁷ Gen. viii, 10. — ⁸ Matth. xiii, 31.

tati Jesu præferendus adversarius, quoniam hic quidem « Mons magnus vocatur¹, » et « Leviathan², » et « Rex eorum³, », quæ in aquis degunt: ille autem « Agnus, et » margarita, et gutta⁴, » atque id genus nominibus appellatur.

XVII. Quoniam autem baptismi hoc festum est, pro eo qui nostra causa formatus, et baptizatus, atque in crucem sublatu8 est, nonnihil ærumnæ sufferre convenit, age, de variis baptismorum generibus aliquid disseramus, ut hinc purgati discedamus. Baptizavit Moyses, verum in aqua, priusque etiam « In nube et in mari⁵. » Cæterum hoc per figuram agebatur, quemadmodum et Paulo placet. Mare enim aquam, nubes Spiritum, manna panem illum vitæ, potio divinam potionem adumbrabat. Baptizavit etiam Joannes, non jam ille quidem judaico more, non enim in aqua solum, sed etiam ad pœnitentiam; nondum tamen prorsus spiritualiter, nec enim addit, in Spiritu. Baptizat quoque Jesus, sed in Spiritu. Quandoquidem perfectum numerisque omnibus absolutum baptismum reddit. Quid autem, ut paulo fidentius obiter aliquid dicam, afferri potest, quin ille Deus non sit, per quem tu Deus efficeris? Quartum etiam baptismi genus novi, nempe quod martyrio et sanguine comparatur, quo ipse quoque Christus baptizatus est, et quidem eo cæteris augustius, quod nullis postea sordibus contaminatur. Quintum locum lacrymarum baptismus tenet: verum martyrio asperior et laboriosior est, utpote qui « Per singulas » noctes lectum suum ac stratum lacrymis lavat⁶, cui ipsæ quoque « Vitii cicatrices fœtent; » qui « Lugens et » contristatus ingreditur⁷, » et qui « Manassis resipiscen-

¹ Zach. iv, 7. — ² Job. xl, 2. — ³ Matth. iii, 4. — ⁴ Joann. i, 29. —

⁵ Exod. xiii, 22, et 1 Cor. x, 1, et seqq. — ⁶ Psal. vi, 7. — ⁷ Id. xxxvii, 6 et 7.

» tiam¹, » ac « Ninivitarum humilitatem², » cui misericordia impertita est, imitatur; qui Publicani verbis in templo utitur³, ac supra insolentem et superbum Pharisæum justificatur; qui denique, Chananææ instar, deprimitur, et misericordiam implorat, ac micæ, hoc canis vehementi fame correpti pabulum, exposcit⁴,

XVIII. Ipse quidem, (nam hominem me esse fateor, animal mutabile, fluxæque et fragilis naturæ,) hunc quoque baptismum libenter amplector, ejusque datorem adoro, aliisque tribuo, ac misericordiam erogo, ut misericordiam consequar. Nam me quoque infirmitate circumdatum esse scio, illudque fore, ut « Qua mensura mensus fuero⁵, » eadem quoque mihi vicissim Deus remetiatur. Tu vero quid ais? Quam legem statuis, o pove Pharisee, ac nomine, non autem animi proposito, pure, ac Novati dogmata cum eadem infirmitate nobis efflans? Pœnitentiam non admittis? Luctibus locum negas? Lacrymas lacrymis non prosequeris? Utinam talem tibi judicem experiri non contingat. Jesu benignitate non moveris, qui « Infirmitates nostras » suscepit, et morbos nostros portavit⁶, qui « Non venit » vocare justos, sed peccatores ad pœnitentiam⁷, qui misericordiam mavult, quam sacrificium⁸, » qui septuagies septies peccata condonat⁹? » Quam beata esset sublimitas tua, si puritas ea esset, non autem fastus, leges supra hominis captum instituens, ac morum correctionem per desperationem tollens. In eodem enim vitio sunt, indulgentia non corrigens, et severitas non condonans: illa omnes habenas laxat, hæc ob vehementiam strangulat. Puritatis specimen ede, et tum audaciam tuam probabis. At nunc vereor, ne ipse ulceribus scatens, medendi im-

¹ 2 Paral. xxxiii, 15. — ² Jon. iii, 5. — ³ Luc. xvm, 15. — ⁴ Matth. xv, 22, et seqq. — ⁵ Matth. vii, 2. — ⁶ Isai. liii, 4. — ⁷ Luc. ix, 31. — ⁸ Osee. vi, 6. — ⁹ Matth. xviii, 22.

possibilitatem inducas. Quid ? Ne pœnitentem quidem Davidem admittis ¹, cui prophetica quoque gratiam pœnitentia conservavit ? Nec magnum illum Petrum ², qui circa Salvatoris passionem humani aliquid perpessus est ? At Jesus cum suscepit, « Ac per triplicem interrogationem et confessionem ³, » triplicem abjurationem sanavit. Quid ? Ne martyrio quidem perfunctum admittis ? (Nam id quoque tuæ arrogantiae est.) Nec eum, qui « Scelere sese in Corintho devinxit ⁴ ? At Paulus charitatem etiam erga eum firmavit, simul atque eum ad meliorem vitæ frugem rediisse perspexit ; istamque causam affert : « Ne abundantiori tristitia absorbeatur, qui ejusmodi est ⁵, » immodica objurgatione gravatus et oppressus. Aune juvenibus quidem viduis, propter ætatis lubricum, ineundi matrimonii potestatem facis ? At Paulus hoc facere minime dubitavit, cujus te scilicet magistrum profiteris, perinde atque ad quartum cœlum, alium que paradysum perveneris, ac verba magis arcana audiveris, majoremque circulum Evangelio comprehenderis.

XIX. Verum, inquis, hæc minime post baptismum. Quo argumento id confirmas ? Aut rem ita se habere proba : aut, si id nequis, ne condemnes. Quod si res dubia est, vincat humanitas et facilitas. At Novatus, inquis, persecutionis tempore lapsos non recepit. Quid hoc ? Si quidem illi pœnitentia minime ducebantur, optimo jure eos repulit ; (nam ne ipse quidem eos recipio, qui vel nullo modo, vel non satis deprimuntur, nec patrato crimini parem vitæ emendationem afferunt ; cumque recipio, convenientem ipsis locum assigno ;) sin autem lacrymis confectos haudquaquam istud imitabor. Quid autem Novati crudelitatem pro lege habeam, qui avaritiam quidem,

¹ 2 Reg. xii, 13. — ² Matth. xxvi, 70. — ³ Joan. xxi, 15. — ⁴ 1 Cor. v, 1, et seqq. — ⁵ 2 Cor. ii, 7.

« Alterum scilicet idololatriæ genus ¹, » nulla pœna vindicavit; stuprum autem ita sæve acerbeque condemnavit; quasi ipse carnis et corporis expers esset? Quid dicitis? An vos his verbis permovemus? Agedum, a nobis, hoc est, ab hominum partibus, state. Dominum una magnificemus. Ne quis vestrum, quamlibet virtute sua fretus, eo audaciæ prorumpat, ut dicat: « Noli me tangere; purus enim » sum ², » et quis mihi par? Facite ut nos quoque in splendoris vestri partem veniamus. At non flectimus? Lacrymas pro vobis fundemus. Atque hi quidem nostra si velint, atque adeo Christi, via, sin minus, sua insistant. In altero ævo igni fortasse baptizabuntur; qui postremus est baptismus, nec solum acerbior, sed et diuturnior, qui crassam materiam instar fœni depascitur, ac omnis vitii leuitatem absumit.

XX. Nos autem hodie Christi baptismum honore complectamur, ac festum honeste celebremus, non ventris deliciis operam dantes, sed spiritualiter nos ipsos oblectantes. Quonam autem modo deliciis indulgebimus? « Lavamini, mundi estote ³. » Si peccato rubri estis, minusque sanguinei, « Quasi nix dealbemini ⁴: » si autem coccinei ac perfecti viri sanguinum, etiam usque ad lanæ candorem pervenite. Omnino autem purgati sitis, ac purgemini. Nulla enim re Deus perinde delectatur, ut hominis, pro quo omnis sermo et omnia mysteria, resipiscentia et salute; ut efficiamini, « Sicut luminaria in mundo ⁵, » vis quædam vitalis reliquis hominibus, quo perfecta lumina magno illi lumini astantes, ejus ipsius, quæ in cælo est, lucis splendoribus imbuamini, purius et clarius a Trinitate illuminati, cujus nunc radium unum ex una Deitate manantem minus plene accepistis, in Christo Jesu Do-

¹ Ephes. v, 5. — ² Isai. lxxv, 5. — ³ Id. i, 6. — ⁴ Ibid. 18. — ⁵ Philip. ii, 15.

mino nostro, cui gloria et imperium in sæcula sæculorum.

Amen.

ORATIO XL¹.

In sanctum Baptisma.

ARGUMENTUM.

I. Christianorum solennitates a mundi solennitatibus longe dispares. II. Triplex nativitatis genus à Christo constitutum. III. Baptismi effectus. — Baptisma, omnium Dei benefactorum præstantissimum. IV. Partis baptismatis nomina. V. Deus est summum, inaccessibile et ineffabile tamen. — Angelus, secundum tamen. — Homo, tertium tamen. VI. Alii tamina, Dei beneficio; hominibus concessa. — Lex scripta. VII. Provare, non Dei, neque Angelorum, sed hominis est. — Regenerationis donum; donec creationis præstantius. — Baptismus, primam hominis lavacrum. VIII. Baptismi aqua et Spiritu constat. — Baptismi natura et effectus. — Fides Deo in baptismo datur; nequaquam obedienda. — Penitentia, altero hominis lavacro, minime indigere præstat. IX. Pergrave est post baptismum peccare. X. Baptismus, propugnaculum est adversus hostiles tentationis insidias. XI. Aqua baptismi; hyssopo, legum sanguine, et cinere virule præstantior et efficacior. — Baptismus non differendus. XII. Periculosum baptisma in morbo est

¹ Alias, et nunc est XL. Habita Constantinopoli 7 januarii 381.

alia necessitate susceptum. — Baptismi donum hilariter suscipiendum. XIII. Tres salvandorum ordines. — Non contemnenda Dei misericordia, quia gratuita. XIV. Omnia tempus habent. — Omni tempore salutis consulendum. XV. Baptismus in periculis efficax antidotum. — Unctio baptismalis, maximum in vita et mortis articulo solatium. XVI. Speciosa Catechumenorum argumenta. — Diaboli astutia contemnenda. — Catechumenus in pietatis ac salutis vestibulo positus. XVII. Baptismus perutilis ac necessarius juvenibus: senibus: infantibus: XVIII. Virginibus: conjugatis. — Virginitas matrimonio præstat. — Continentia quandoque a conjugatis colenda. XIX. Baptismus magistratibus necessarius. — Baptismus in omnibus vitæ institutis perutilis. XX. Aliæ refelluntur argumenta circa baptismi dilationem. — De vineæ operariis parabola explicatur. XXI. Vineæ parabola ad cunctantes accommodata. XXII. Triplex genus baptizatorum. — Impii. — In pietate fluctuantes. — Pii. — Baptismus peccata, non virtutes delet. XXIII. Triplex etiam genus non baptizatorum. — Contemptiores. — Ignavi. — Infantes et alii, qui inopinato casu, baptismi gratia privantur. — Parvuli, sine baptismo morientes, qua pœna mulctati. XXIV. Non confunditur quisquis ad baptismum illuminandus accedit. — Miserrima procrastinantium conditio. XXV. Promptus ad scelus, tardus ad virtutem pari vitio laborant. — Vocatiōi divinæ statim obtemperandum. XXVI. Nihil salubre sublimius. — Ad suscipiendum baptismum, non inquirenda ministrorum dignitas. XXVII. Dives et pauper, nobilis et ignobilis æquali dignitate et conditione sunt, cum baptismum suscipiunt. — Exorcismus in baptismo. — Baptismi donum sola voluntate acquiritur. XXVIII. Num infantes baptizandi. — Circumcisio baptismi

figura. XXIX. *Cur exemplo Christi non sit prorogandus baptismus.* XXX. *Non omnis Christi actio imitanda.* — *Ecclesiæ ritus observandus.* XXXI. *Baptizandi duplex certamen incundum occurrit.* — *Baptismi recordatio ad virtutis exercitium incitat.* XXXII. *Baptismus pristinas vitæ sordes abluit.* — *Opes male partæ restituendæ.* — *Tres peccantium classes.* XXXIII. *Per baptismum homo erigitur ac roboratur.* XXXIV. *Peccati lepra mundatus, sacerdoti se ostendat.* — *Baptismo initiatus bonis operibus studere debet.* — *Quid baptizato cavendum.* XXXV. *Impuri spiritus parabola.* XXXVI. *Nihil lumine dulcius ac jucundius.* — *Ignis purgans.* — *Ignis scelerum vindex.* XXXVII. *Duplex lumen.* — *Deliciæ, fallax lumen.* XXXVIII. *Omnia membra, omnes sensus purificare debemus.* — *Lingua et auribus illuminandus est baptizatus: olfactu: tactu et gustu.* XXXIX. *Purgandum caput: humeri: manus et pedes: ventr: cor et intestina: XL. Lumbi ac renes.* — *Omnia, quæ in nobis sunt, Deo consecranda.* XLI. *Brevis circa Trinitatem expositio.* XLII. *Deus ab omni passione alienus, contra Arianos, Eunomianos, et Macedonianos.* XLIII. *Nullum est ratione substantiæ discrimen inter eos qui eandem substantiam habent.* — *Non licet omnibus adversus hæreticos disputare.* XLIV. *Fides vera et immutabilis, nec temporibus accommodanda.* XLV. *Veritatis ac salutis doctrina fidei adjungenda.* — *Nulla mali essentia, contra Manichæos.* — *Ad fidem adjungenda bona opera.* XLVI. *Baptismi cæremoniæ.* — *Inopinatus Christi adventus.* — *Impii sero damnum suum intelligunt.* — *Nullus, nisi veste nuptiali indutus, thalamum sponsi ingreditur.*

I. QUONIAM heri splendidum luminum diem celebravimus, (salutem etenim nostra lætitia prosequi conveniebat, ac multo quidem magis, quam carnis amici, qui dies eos quotannis celebrant, quibus vel nati, vel matrimonio juncti sunt, vel nomen acceperunt, vel certe inter juvenes censerī cœperunt, vel locum aliquem primum incoluerunt, vel quacumque tandem alia de causa, quæ ab hominibus celebratur;) hodie de baptismo, ac beneficio hinc ad nos manante, breviter disseremus: tametsi hesternæ luce nos oratio effugerit, tum quia temporis angustia premebamur, tum quia sermo saturitatem ac fastidium fugiebat. Sermonis quippe saturitas non minus auribus inimica est, quam immodicus cibus corpori. Operæ-premium autem fuerit vos ad ea, quæ dicturi sumus, animum attentum afferre, atque orationem de tantis rebus institutam, non perfunctorie et oscitanter, sed prompte et alacriter excipere: quandoquidem hoc quoque splendor est, vim hujusce mysterii perspectam habere.

II. Triplex nativitatis genus agnoscit Scriptura: primum ex corporibus, alterum ex baptismo, tertium ex resurrectione. Horum primum, nocturnum et servum est, ac cum libidine conjunctum: alterum, diurnum et liberum, ac depellendarum vitiosarum affectionum vim habens, omne, quod a nativitate contractum est, velamen amputans, et ad supernam vitam nos revocans: postremum, formidabilius ac brevius, omne hominum genus temporis momento in unum cogens, ut Creatori sistantur, suæque servitutis, et vitæ actæ rationem reddant, sive carnem solum secutæ fuerint, sive sese una cum Spiritu in altum evexerint, atque instaurationis gratiam coluerint. Has porro cunctas natiuitates honore a Christo meo affectas fuisse constat; primam quidem, per primam illam et

• Vide D. Guillon, tom. VI, p. 355-362.

vitam insufflationem ¹; secundam vero, per incarnationem et baptismum ², quo ipse baptizatus est; tertiam denique, per resurrectionem ³, quam ipse auspicatus est; nimirum sicut primogenitus in multis fratribus extitit ⁴, ita primogenitus quoque ex mortuis ⁵ fieri non dedignatus.

III. Ac de duabus quidem nativitatibus, hoc est, de prima et ultima, non est nunc disputandi locus: verum de media, et hoc tempore nobis necessaria, a qua luminum dies nomen accepit, tractabimus. Baptismus igitur, splendor est animarum, vitæ in melius mutatio, « Conscientiæ ad Deum interrogatio ⁶. » Baptismus, infirmitatis nostræ adjuvamentum. Baptismus, carnis est abjectio, Spiritus assectatio, Verbi participatio, figmenti correctio, peccati diluvium, lucis communicatio, tenebrarum oppressio. Baptismus, vehiculum ad Deum, peregrinatio cum Christo, fidei amiculum, mentis perfectio, cælestis regni clavis, vitæ commutatio, servitutis depulsio, vinculorum solutio, compositionis in meliorem statum conversio. Quid plura commemorare attinet? Baptismus, omnium Dei beneficiorum præclarissimum est, et præstantissimum. Etenim, ut quædam Sancta Sanctorum vocantur, et Cantica Canticorum; (quod scilicet latius pateant ac plura complectantur, præcipuamque dignitatem habeant;) eodem modo baptismus quoque illuminatio dicitur, quod omnes alias illuminationes sanctitate superet.

IV. Quemadmodum autem Christus, hujus doni dator, multis ac diversis nominibus appellatur, ita ipsum quoque donum varia nomina sortitur: sive id nobis ob miram quamdam rei lætitiā accidat; (fit enim fere, ut qui rem aliquam impensissime amant, nomina quoque ipsa liben-

¹ Gen. 11, 7. — ² Luc. 11, 7, et 111, 21. — ³ Marc. xvi, 6. — ⁴ Rom. viii, 29. — ⁵ Coloss. 1, 18. — ⁶ 1 Petr. iii, 21.

ter usurpent;) sive quod multiplex hujus beneficii utilitas, multas quoque appellationes nobis pepererit. Donum vocamus, Gratiam, Baptismum, Unctionem, Illuminationem, incorruptionis Indumentum, regenerationis Lavacrum, Sigillum, ac denique excellentissimo quovis nomine appellamus. Donum dicitur, quia iis, qui nihil prius contulerunt, datur. Gratia, quia etiam debentibus. Baptismus, quia peccatum in aqua sepellitur. Unctio, quia sacer et regius. (Hæc enim erant, quæ ungebantur.) Illuminatio, quia splendor et claritas. Indumentum, quia ignominia nostræ velamen est. Lavacrum, quia abluit. Sigillum, quia conservatio est, ac dominationis obsignatio. Huic gratulantur celi: hunc Angeli propter splendoris cognationem celebrant: hic beatitudinis illius imaginem gerit: hunc laudibus quidem et hymnis celebrare volumus, verum pro rei dignitate non possumus.

V. Ac quidem Deus summum et inaccessibile ac ineffabile lumen est, quod nec mente percipi, nec verbis explicari potest, naturam omnem ratione præditam illuminans. Hoc in intelligibilibus, quod sol in sensibilibus; eo se magis contemplandum nobis præbens, quo accuratius animos purgaverimus; eo rursus magis amandum, quo magis contemplati fuerimus; eo denique magis cognoscendum, quo magis amaverimus, sese ipse speculans et comprehendens, ac perexigue ad externa diffundens. Lumen porro hoc dico, quod in Patre, et Filio, et Spiritu sancto consideratur: quorum opulencia, naturæ identitas est, atque una eademque splendoris prosultatio. Secundum lumen est Angelus, primi illius luminis velut rivulus quidam aut participatio, per propensionem ad illud ministerium, ac illuminationem habens: de quo statuere nequeo, utrum pro classis suæ ordinisque ratione splendor ei impertiatur, an potius pro divinæ illuminationis modo

hanc vel illam sedem accipiat. Tertium lumen homo est, quod externis etiam perspicuum et manifestum est. $\Phi\omega\varsigma$ enim, id est, lumen, hominem vocant, propter rationis nobis insite vim et facultatem. Quo etiam rursus nomine it inter nos appellantur, qui Deo similiores sunt, propiusque ad Deum accedunt. Aliud quoque lumen agnosco, nempe illud, quod primigenæ tenebræ depulsæ, aut certe intorcisæ sunt, quod ante res eas omnes creatas, quæ aspectu sentiuntur, productum est; circularemque item illam siderum conversionem, et supernum splendorem, universum orbem illustrantem.

VI. Jam lumen etiam erat primigenum illud mandatum, quod primigeno homini datum est; (quandoquidem « Legis » mandatum lucerna et lumen est ¹ : et rursus, Lumen » præcepta tua in terra ² ;) » tamesi invida illa caligo irrepens vitium procreavit. Lumen etiam typicum, atque ad modulum eorum, qui excipiebant, admensum. Lex scripta erat, veritatem adumbrans, ac magni illius luminis mysterium : quippe et Moysis vultus, eo perfusus, gloria afficitur. Atque, ut plura lumina orationi demus, lumen igne conflatum id erat, quod Moysis oculos in monte perstrinxit, tum videlicet cum « Ignis flagrantem rubum ³ » perurere atque absumere non poterat, ut, et naturam suam indicaret, et divinam potentiam declararet. Lumen præterea id erat, quod « in ignis columna Israël præibat ⁴, » ac deserti asperitatem mitigabat. Lumen item, « Quod Eliam in igneo » curru rapuit ⁵, » nec raptum exussit. Lumen insuper, « Quod » tum pastores circumfulsit ⁶, » cum lumen temporis expers temporali miscebatur. Lumen quoque pulchrum illud « Si- » dus in Bethlehem præcurrens ⁷, » ut et Magis viæ dux esset, et lumen illud nobis sublimius, ad nos demissum, nobis-

¹ Psal. cxviii, 105. — ² Prov. vi, 23. — ³ Exod. iii, 2. — ⁴ Id. xiii, 21. — ⁵ 4 Reg. ii, 11. — ⁶ Luc. ii, 9. — ⁷ Matth. ii, 9.

que conjunctum velut stiparet. Præterea lumen erat Divinitas illa, « Discipulis in monte ¹ » velut per-transennam ostensa, et quidem ita firma, ut vix eam oculorum acies ferre posset. Lumen item visio illa, quæ « Paulum fulgore » circumfudit ², » ac per oculorum plagam tenebris animæ medicinam attulit. Lumen etiam illius vitæ claritas, his utique, qui animos suos a peccati sordibus in hac vita perpurgarint : quo tempore nimirum « Justi fulgebunt sicut sol ³, » quorum, utique deorum ac regum, in medio stat Deus, beatitudinis illius atque dignitatis gradus distinguens et dividens. Lumen postremo, præter hæc omnia, propiori et peculiari modo, est baptismi splendor, de quo nunc oratio nobis instituta est, quo magnum atque admirandum salutis nostræ mysterium continetur.

VII. Quoniam enim omni peccati labe carere, Dei est, primæque et incompositæ naturæ; (simplicitas enim pacata est, atque ab omni dissidio remota;) audacter etiam addam, et angelicæ, quia profecto, ob propinquitatem quam ad Deum habet, ad id proxime accedit. Peccare autem, humanæ ac terrenæ compositionis; (compositio siquidem dissidii origo est;) idcirco Dominus minime sibi faciendum putavit, ut figmentum suum auxilio destitutum relinqueret, et periclitans ab eo separari, despiceret. Quin potius, quemadmodum nos primum creavit, ita creatos instauravit ac refinxit, et quidem figmento diviniore, primumque figmentum superanti; (quod, ut vitæ cursum ineuntibus signaculum est, ita iis, qui adultiori ætate sunt, gratia etiam est, ac collapsæ imaginis erectio;) ne aliqui ob desperationem pejores efficeremur, et in graviora quotidie flagitia ruentes, penitus tandem a summo bono, atque a virtute, propter desperationem laberemur; sicque « In profundum malorum, ut Scripturæ verbis utar, gurgitem

¹ Matth. vii, 1, et seqq. — ² Act. ix, 5. — ³ Sap. iii, 7.

prolapsi, contemneremus¹: » verum potius, ut qui longum iter emetiuntur, in diversoriis interquiescunt, fessaque labore membra recreant, ita nos, quod superest viæ, vegeti et impigri conficiamus. Atque hæc baptismi gratia et facultas est, non orbem terrarum, ut olim, aquis obruens, sed uniuscujusque hominis peccatum purgans, easque obstructions vel maculas, quæ vitio contrahuntur, prorsus abstergens.

VIII. Quandoquidem autem duabus partibus, hoc est, animo et corpore, constamus, quarum altera in aspectum cadit, altera oculorum sensum fugit: duabus quoque rebus constat baptismus, aqua scilicet et Spiritu, illa visibili et corporeo modo accepta, hoc vero incorporeo et invisibili concurrente: illa typica, hoc vero, et intimos animi fines purgante. Qui primæ natiuitati opem et adiumentum ferens, ex veteribus novos, ex humanis divinos efficit, absque igne nos rursus conflat, et absque confractione rursus effingit. Nam ut compendio dicam, nihil aliud esse vim et facultatem baptismi existimare debemus, quam secundæ vitæ ac purioris vivendi rationis pactum cum Deo initum. Ac proinde vel maximo in metu omnes esse, atque omni custodia nostras animas servare debemus², ne mendacio fidem pactumque violasse comperiamur. Nam cum ad mutua hominum pacta firmanda Deus medius adhiberi soleat, quantum, quæso, periculum est, ne fœdera cum Deo ipso contracta perfregisse reperiamur; ac, præter alia peccata, ipsius quoque mendacii apud Veritatis tribunal rei peragamur? Idque cum nulla jam posthac altera regeneratio sit, nec instauratio, nec in veterem statum restitutio, quamlibet maxime eam multis cum gemitibus et lacrymis requiramus: quibus licet cicatrix agre tandem obducatur, ut quidem ipse statuo; (obducitur enim, idque

¹ Prov. xviii, 3. — ² Id. xv, 23.

persuasum habemus, ac præclare mecum agi putarem, si ipsæ quoque vulnerum notæ deleantur, quandoquidem et ipse misericordia opus habeo;) præstat tamen secunda purgatione minime indigere, verum in prima consistere, quæ omnibus communis est, et labore vacua, cunctisque ex æquo patet, tam servis, quam heris, tam egentibus, quam copiosis, tam abjectis, quam sublimibus, tam genere claris, quam ignobilibus et obscuris, tam ære alieno obstrictis, quam iis qui nihil æris alieni conflagrant, non æcus atque æris haustus, et lucis profusio, et temporum vicissitudines, et rerum creatarum, id est, magis illius omnibusque communis oblectamenti, spectaculum, ac denique æqua fidei portio.

IX. Grave enim est facilioris medicinæ loco, difficiliorem et molestiorem adhibere, ac, projecta misericordiæ gratia, suppliciis se ipsum obnoxium reddere, atque ex delicti ratione emendationem æquare. Quantam enim lacrymarum vim impendemus, ut eā cum baptismi fonte exquiri possit? Quis autem sponsor erit, fore, ut vitæ finis curationem expectet, ac non potius adhuc ære alieno pressos, atque ignis illius ardore opus habentes, tribunal illud suscipiat? Tu quidem fortasse, bonæ et humane agricola, dominum supplex rogabis, « Ut ficulneæ adhuc parcat¹, » nec eam sterilitatis accusatam adhuc succidat; verum tibi permittat, ut stercora undique in eam injicias, hoc est, lacrymas, gemitus, preces, chameunias, vigiliæ, animæ et corporis macerationem, ac denique correctionem eam, quæ ex peccati confessione, contemptiorique vitæ genere existit: at incertum est, an Dominus illi parcat, utpote quæ etiam locum otiose occupet, cum interim alius misericordia egeat, atque ob longanimitatem, quæ ipsi exhibetur, deterior fiat. Proinde, « Cum Christo per baptis-

¹ Luc. xli, 23.

» num sepeliamur, ut et cum eo resurgamus ¹; » cum eo descendamus, ut simul etiam extollamur: cum eo ascendamus, ut simul quoque gloria afficiamur.

X. Si te luminis persecutor et tentator post baptismum adortus fuerit: (et certe adoriatur; nam et Verbum, et Deum meum, propter carnis velamen oppugnare aggressus est, lumen, inquam, illud absconditum, propter humanitatem quæ in aspectum cadit;) habes quo eum superes; ne certamen reformides. Aquam adversus eum oppone, oppone Spiritum, « In quo ignita omnia pravi illius » tela extinguuntur ². » Spiritus quidem est, verum qui montes dissolvat. Aqua quidem est, sed quæ ignis extinguendi vim habeat. Si inopiam tibi proposuerit, (nam hoc quoque Christo proponere non dubitavit,) ac famem ob oculos ponens, postularit, « Ut lapides panes fiant ³; » ne illius cogitationes ignores. Doce quæ non didicit; oppone vitalem illum sermonem, qui « Panis est cœlitus missus, ac » mundo vitam largitur ⁴. » Si tibi per inanem gloriam insidias molitur; (quemadmodum et illi, cum in templi pinaculum eum sustulit, ac dixit: « Projice te deorsum ⁵, ut Divinitatis specimen edas;) ne per animi elationem deiciaris. Nam si hoc evicerit, nequaquam hic consistet. Inexplebilis est, ad omnia grassatur. Benignitatis quidem specie lenocinatur, verum in malum desinit. Hæc est illius pugnandi ratio. Atque etiam Scripturarum peritus est hic latro. Hinc illud « Scriptum est, » de pane: hinc istud, « Scriptum est, » de Angelis. « Scriptum est enim, inquit, quia Angelis suis mandavit de te, et in manibus portant te ⁶. » O vitii sophista! Quomodo id, quod sequitur, suppressisti? Hoc enim probe intelligo, etiamsi ipse retinueris;) nimirum, quod super aspidem te et basiliscum

¹ Rom. vi, 4. — ² Ephes. vi, 16. — ³ Matth. iv, 3. — ⁴ Joap. vi, 53. — ⁵ Matth. iv, 6. — ⁶ Ibid.

ascendam, et calcabo super serpentes et scorpiones, Trinitate videlicet septus et communitus. Si per avaritiam te oppugnet, uno temporis momento atque obtutu, regna omnia, velut ad se attinentia, ostendens, atque adorationem a te exigens; ut pauperem contemne. Dic, signaculo fretus: Ipse quoque Dei imago sum: nondum, ut tu, a superna gloria propter superbiam dejectus sum: Christo indutus sum: Christum mihi per baptismum vindicavi: tu me ipse adora. His verbis, mihi crede, ut a Christo primo lumine, ita ab iis, qui ab ipso illuminati sunt, victus ac pudefactus recedet. Hæc beneficia lavacrum affert iis, qui ipsius vim agnoscunt: has iis, qui laudabili fame laborant, epulas proponit.

XL. Baptizemur itaque, ut victoriam assequamur: lustralium aquarum participes simus, quæ et hyssopum extergendi facultate superant, et legalem sanguinem¹, puritatem, et vitulæ cinerem sanctitate, inquinatos homines aspergentis, ac brevem corporis purgationem afferentis, non autem peccatum prorsus de medio tollentis. Quid enim purgatione iis opus esset, qui semel purgati fuissent? Baptizemur hodie, ne cras vi aliqua cogamur. Ne beneficium tanquam injuriam differamus; nec expectemus ut plura peccata congeramus, quo plura nobis condonentur; nec Christo, cauponum et negotiatorum ritu, abutamur; nec graviori sarcina oneremur, quam vires nostræ ferre queant, ne simul cum ipsa navi demergamur, ac gratiam naufragio amittamus; sicque, dum plura spe atque animo concipimus, omnia perdamus. Ad donum accurre, quandiu mentis adhuc compos es: quandiu nondum es et corpore et animo æger, vel certe sic astantibus videris, etiamsi mente sis integra: quandiu bonum tuum non in aliis situm est, verum in tua ipsius potestate: quandiu lingua

¹ Hebr. x, 4.

non titubatur, nec frigore confecta est; nec, ut nihil amplius dicam, sacras initiationis pronuntiandæ vim et facultatem amisit: quædum fidelis effici potes, non hominum opinione et conjectura, sed argumento certo et explorato; non miserationem inuens, sed gratulationem: quædum perspicuum tibi donum est, non autem obscurum et dubium; ac gratia intimos animæ sinus attingit, non autem corpus fanebri aqua abluitur: quædum non circum te lacrymæ, discessus indices, ac fortasse etiam ipsæ in tui gratiam compressæ, atque uxor et liberi discessum retrahentes, et extrema verba requirentes: quædum lateri tuo non hæret imperitus medicus, horas tibi largiens, quærem potestas penes eum non est, capitisque nutu salutem velut ad lancem expendens, ac de morbo post mortem disputans, aut recessibus suis mercedem augens, aut deploratum morbum esse significans: quædum inter eum, qui baptizandi munere fungitur, et quæstuarium nulla pugna est; dum ille morientem viatico instruere, hic hæres scribi contendit, nec utrumque per tempus licet.

XII. Quid febrem, quæ te beneficio afficiat, expectas, non autem Deum? Quid tempus, non autem rationem? Quid insidiosum amicum, non autem salutare desiderium? Quid vim potitus, quam potestatem? Quid rerum angustiam potius, quam libertatem? Quid opus est, ut de exitu tuo ab alio certior fias, ac non ipse potius de te, tanquam jam præsentem, cogitas? Quid medicamenta quæris, nihil profutura? Quid criticum sudorem, cum fortasse letalis adsit? Tibi ipsi, prius quam urgeat necessitas, modere; tui ipsius miserere, qui verus et germanus infirmitatis es medicus; tibi ipsi revera salutare medicamentum adhibe. Dum secundo vento navigas, naufragium time; et velut a naufragio eris, adiutorem ac socium tibi timorem accensens. Læte atque hilariter Donum celebretur, non autem

defleatur : negotiationis ac crescat talentum, non autem terra obruatur. Inter gratiam ac mortem, temporis aliquid intercedat, ut non solum pravae litterae deleantur, verum etiam eorum loco meliores inscribantur; nec solum gratiam habeas, verumetiam praemium consequaris; nec ignis tantum supplicium effugas, verumetiam gloriae hereditatem percipias, quam negotiatio domo adjuncta conciliat. Nam parvis quidem atque abjectis animis amplem ac praecelsum videtur, pecuniam vitare; at qui magno et excelsae animae praediti sunt, ad mercedem quoque aspirant.

XIII. Tres enim sortum, qui salutem consequuntur, classes esse scio, servorum videlicet, mercenariorum, et filiorum. Si servus es, plagas metue. Si mercenarius, mercedem duntaxat spectâ. Sin autem supra hos assurgis, ac filius es, ut patrem reverere. Bonis operibus stude, quia hoc est patri obtemperare, etiam si ex ea re nihil quietus ad te redituro sit. Hoc ipsum merces est, patri obsequi. Quae utinam te contemnamus. Absurdum enim fuerit, cum pecunias avidè persequi, tabilem in longius diffarre atque extrahere; cum corpus propurges, animae purificationem in aliud tempus reservare; cum ex hac terrena servitute in libertatem, quidicem studeas, superne libertatis cupiditate minime tangi; cum studium et diligentiam omnem adhibeas, ut magnificens aedes incolas, atque splendidae vestes geras, nihil curae suscipere, ut ipse summo pretio dignus sis; cum ad bene de alia merendum promptus sis, de te ipso bene mereri nolle. Et quidem si tibi pretio hoc bonum comparare liceret, nullis omnino pecuniis perires: nam autem, quia gratuita misericordiae propositum, ideoque tibi prompta et exporrecta beneficentia et liberalitas contemptum parit. Omne tibi tempus ad abluionem idoneum est, quandoquidem nullum tem-

pus, mortis periculo vacat. Cum Paulo, id est, cum magna illa voce, ad te clamo : « Ecce nunc tempus acceptabile, » ecce nunc dies salutis ¹. » Quo loco particula, « Nunc, » non certum aliquod tempus, sed tempus omne designat. Et rursus : « Surge qui dormis, et exurge a mortuis, et » illuminabit te Christus ², » peccati noctem discutiens : quandoquidem « In nocte spes mala ³, » ut testatur Isaias, ac mane accipi conducibilis est.

XIV. Sere, cum serendi tempus fuerit, et fruges comporta, et horrea solve, cum tempus hoc postularit, et tempestive planta, et uvam maturam detonde, et Veris temperie fretus navem e portu solve, rursusque oriente hyeme, marique sæviante, fac eam in portum subducas. Quin tibi quoque, « Et belli, et pacis tempus sit ⁴, » et matrimonii ineundi, et a matrimonii opere abstinendi, et amicitie, et dissidii, siquidem ita necesse sit, atque omnis denique rei, si Salomoni auscultandum est. Auscultandum est autem ; utile enim consilium proponit. At vero salutis tuæ negotium semper age, ac quælibet occasio sit tibi tempus suscipiendi baptismatis. Si autem semper hodiernum diem præteriens, crastinum observes, paulatim differendo, non animadvertis te a pravo illo deludi, ut ita fert illius consuetudo. Da mihi præsens, inquit, futurum Deo : mihi juveniles annos, Deo seniles : mihi voluptates, Deo corpus effæctum, nullisque usibus aptum. Verum, quanto in periculo versaris ? Quot, quamque inopinati rerum casus ? Vel bellum oppresserit, vel terræ motus obruerit, vel mare exceperit, vel bellua rapuerit, vel morbus extinxerit, vel mica panis, res vilissima, transverſe per fances currens ; (quid enim hominis interitu facilius, quantumvis ob divinam imaginem glorieris ?) vel immo-

¹ 2 Cor. vi, 2. — ² Ephes. v, 14. — ³ Isai. xxxviii, 13. — ⁴ Eccle. iii, 1, et seqq.

dica crapula, vel ventus in præceps agens, vel equus sessorem secum abripiens, vel pharmacum de industria, ad insidias comparatum, fortasse etiam pro salutari pestiferum inventum, vel inhumanus iudex, vel inexorabilis carnifex, vel denique quidpiam eorum, quæ celerem mortem, atque omni ope et auxilio validiorem, efficiunt.

XV. At si per baptismum te ipsum præmunieris, ac pulcherrimo et firmissimo auxilio tibi in futurum caveris, animum scilicet et corpus unctione et Spiritu consignans, quemadmodum olim Israël nocturno illo cruore, qui primigenos tuebatur; quid tibi accidet, et quod tibi præsidium comparatum erit? Audi Salomonis Proverbia: « Si sederis, ait, intrepidus eris: Si dormieris, suavem somnum carpes¹. » Audi etiam quid tibi læti nuntiet David: « Non timebis, inquit, a timore nocturno, ab incursu, et a dæmonio meridiano². » Hoc tibi et viventi, maximum ad securitatem momentum afferet; (pecus enim signata non facile insidiis appetitur, quæ autem minime signata est, a furibus facile capi potest;) et vita perfuncto, commodum quoddam, tanquam funebre munus, futurum est, veste splendidius, auro præstantius, tumulo magnificentius, infructuosis libaminibus religiosius, maturorum fructuum primitiis tempestivius, iisque omnibus rebus, quas mortui mortuis largiuntur, consuetudinem pro lege observantes. Omnia tibi pereant, omnia diripiantur, pecuniæ, prædia, throni, splendores, ac cætera, quæ vagæ atque incertæ hujus vitæ sunt; tu vero secura et tranquilla mente diem ultimum claude, nullo ex omnibus, quæ Dei beneficio tibi ad salutem concessa sunt, auxilio destitutus.

XVI. At metuis, ne gratiam corrumpas, ac proinde purgationi moram producis, utpote nullam alteram jam ultra habens? Quid autem? Non vereris, ne persecutionis

¹ Prov. III, 24. — ² Psal. xc, 5.

tempore in periculum adducaris, ac Christo, possessione omnium, quas habes, præstantissima spolieris? Num igitur ob hanc causam a suscipiendo christianismo refugios? Absit. Non est sani hominis hic metus: desipientis est hæc cogitatio. O incautam, ut ita loquar, cautionem! O ingentes pravi illius versutias! Vere ille caligo est, et lucem ementitur. Cum aperto Marte nihil perficit, insidias obscure tendit; et cum pravi sit, quasi humanus ac bene affectus, consilium dat, ut alterutro certe modo superior omnino discedat, nec ulla ratione ipsius insidias effugiamus. Id quod hic quoque perspicue molitur. Nam cum tibi in animum inducere nequeat, ut baptismum palam aperteque contempnas ac pro nihilo ducas, per fictam cautionem te eo mulctat, ut in eam fraudem, quam metuis, imprudens per metum incidas; et dum times, ne donum corumpas, ea ipsa de causa ab hoc prorsus excidas. Atque ille quidem hoc ingenio est, nec unquam versutiæ suæ finem statuet, quandiu nos ad cælum properantes videbit, unde ipse dejectus est. Tu autem, o homo Dei, fac adversarii insidias cogitas habeas. Etenim adversus habentem, et de rebus maximis, certamen initur. Ne hostem in consilium adhibeas: ne fidelis fieri ac nominari parvipendas. Quandiu in catechumenorum numero es, in pietatis vestibulo versaris. Intrare te oportet, atrium pertransire, Sancta contueri, in Sancta Sanctorum prospicere, cum Trinitate conjungi. Magna sunt ea, ob quæ oppugnaris; magno quoque præsidio opus habes. Quocirca fidei clypeum adversus eum objice. Timet te cum armis dimicantem; ac propterea te charismate spoliatur, ut inermem et incautum facillius opprimat. Omnes ætatum gradus, omnia vitæ genera et instituta attingit. Quare omni studio propulsetur.

XVII. Juvenis es? Contra pravi affectus, in acie cum

subsidio sta, in Dei phalange nomen proficere, adversus Goliath strenue pugna, mille, vel decies totidem hostes cape, ac tibi subijce. Ita flere ætatis fructu; nec tuam juventutem marcescere sustine, imperfecta fide mortuam et extinctam. Senilem ætatem agis, nec a necessarie præstituto die longe abes? Canos reverere; prudentiam, quam a te requiritur, pro ea, qua nunc teneris, infirmitate, præsta; paucis his diebus, quos reliquos habes, succurre; purgationem senectuti committe. Quid in effecta senectute atque extremo vitæ spiritu, juvenilis ætatis vitia pertimescis? An tu etiam expectas, dum mortuus, non jam misericordiam magis, quam tui odium movens, abluaris? An voluptatum reliquias in his vitæ reliquiis expetis? Turpe est, cum ætate consenueris ac deflexeris, libidine tamen te minime consenuisse; sed, vel ea affici, vel eam certe opinionem, per baptismi dilationem, hominibus præbere. Infans tibi est? Ne occasionem improbitas arripiat: ab infantia sanctificetur, ab ipsis unguiculis Spiritui consecratur. At propter naturæ imbecillitatem sigillum metuis? Quam imbecillis animi mater es pusillæque fidei! Anna vero Samuellem, prius etiam quam procreatus esset, «Deo» vovit;» atque in lucem editum statim consecravit, ac cum sacerdotali stola educavit, nihil humani verita, sed Deo fidem habens. Nihil tibi amuletis, nec incantamentis opus est, quibuscum prævus ille in leviorum hominum animos simul irrepit, venerationem Deo debitam furtim ad se transferens. Trinitatem ipsi da, magnum, inquam, flud et pulchrum amuletum.

XVIII. Quid præterea? Virginitatem colis? Baptismo consignare: hunc tibi vitæ socium et familiarem ascisce. Hic tibi, et vitam, et verba moderetur, omnia membra, omnes animi motus, omnes sensus. Honore eum complec-

tere, ut te ornet, « Capitiq̃ tuo gratiarum coronam » nectat¹, » et corona deliciarum te protegat. Matrimonii vinculis astrictus es? Baptismo quoque constringere: huic tibi contubernalem adijunge pudicitiae custodem, innumeris eunuchis et janitoribus tutiorem. Nondum carni copulatus es? Ne baptismi perfectionem extimescas. Purus ac mundus es, inito etiam matrimonio: in me hoc periculum recipio, ego harum nuptiarum conglutinator, ego auspex. Nec enim, quia honoratior est virginitas, idcirco turpe et ignominiosum est matrimonium. Christum imitabor, purum, inquam, illum pronubum et sponsum, qui, et « Miraculum in nuptiis edit², » et conjugium praesentia sua honestat. In id tantum incumbere, ut purum sit matrimonium, atque ab obscenarum cupiditatum contagione liberum. Hoc unum posco; a dono securitatem accipe, ac vicissim istud dono repende, ut certo tempore, quandiu, scilicet assignatum fuerit orationi tempus, omni negotio praestabilius, a re uxoria abstineas, idque ex communi pacto et consensu. Non enim legem sancimus, sed consilium damus; ac quidpiam eorum, quae tua sunt, ad utilitatem tuam, communemque utriusque vestrum securitatem, accipere volumus. Ut autem in summa dicam, nullum vitae genus est, nullum studium et institutum, cui non hoc conducibilius sit. « Qui conditione libera gaudes³, » frenum accipe; qui servili premeris, æqualem honoris gradum; qui in mœrore versaris, solatium; qui læto atque hilari es animo, disciplinam; qui rerum inopia laboras, opes tutas, nec direptioni obnoxias; qui divitiis affluis, præclaram facultatum tuarum administrationem. Nihil adversus animæ tuæ salutem captiose comminiscere, nihil machinare. Nam licet aliis fucum faciamus, nobis quidem

¹ Eccli. xxxii, 3. — ² Joan. ii, 1, et seqq. — ³ Galat. iii, 28.

ipsis nunquam poterimus. Ac profecto adversus se ipsum ludere, admodum periculosum et stolidum est.

XIX. At in media hominum frequentia versaris, ac publicarum rerum cura et administratione inquinaris: atque idcirco metuis, ne misericordia, quam per baptismum consecutus es, depereat? Simplici oratione tecum agam. Forum quoque ipsum, si fieri potest, cum pulchro comitatu fuge, aquilæ, vel, ut magis apposite dicam, columbæ pennis tibi ipsi impositis. (Quid enim tibi cum Cæsare, aut Cæsaris rebus?) Atque ita fuge, ut non ante conquiescas, quam eo perveneris, ubi nec peccatum est, nec infuscatio, nec serpens in via mordens, piosque tuos gressus impediens. Abripe animam tuam ex hoc mundo; fuge Sodomam; incendium fuge; irretorto oculo gradere, ne in salis lapidem concreas. In montem salutis causa te confer, ne simul corripiaris. Quod si jam occupatus es, ac necessariis vinculis astrictus, ita tecum ipse disputa, vel ego potius tecum disputabo. Præstat quidem, et bonum consequi, et purificationem tueri ac conservare: verum si utrumque non datur, illud certe præstat, in rerum publicarum administratione nonnihil interdum sordium contraxisse, quam omnino a gratia excidere: quemadmodum scilicet a patre et hero quandoque objurgari satius est, quam domo ejici: et exiguo splendore perstringi, quam prorsus obscurari. Prudentum porro et cordatorum virorum est, ut in bonis meliora et excellentiora, ita in malis minora et leviora eligere. Quocirca ne tantopere purificationem formides. Ea enim, quæ recte et cum laude gerimus, a justo et benigno rerum nostrarum iudice semper ad vitæ nostræ studia atque instituta, tanquam ad amussim quamdam, exiguntur. Atque ita plerumque accidit, ut qui in civili vita et in medio posita, aliquid honeste et ex virtute fecerit, in meliori causa sit, quam qui a publicis muneribus feriatus, officio suo non usque-

quaque perfunctus fuerit : quemadmodum , ut mea fert opinio , mirabilius est hominem compedibus vinctum non-nihil progredi , quam nullo onere impeditum , currere : mirabilius item , eum , qui per cœnum incedat , leviter aspergi , quam eum , qui pura via iter faciat , purum ab omni macula manere. Argumento est Raab meretrix , cui , alioqui parum laudatæ , hospitalitas sola iustitiæ laudem attulit ; et publicanus , quem una tantum humilitas extulit , nullo alio nomine commendatum ; ut tibi documento sit , ne de tua salute temere desperes.

XX. Verum , dicit quispiam , quid mihi ex ea re accesserit , si per baptismum præoccupatus fuero , atque omnes vitæ suavitates mihi ipsi ob huiusmodi celeritatem præclusero , cum voluptatibus interim indulgere liceat , atque ita demum gratiam assequi ? Neque enim , qui « Priores in vinea laborarunt »¹ , « meliori idcirco conditione fuerunt , æqua nempe mercede postremis quoque persoluta. Negotio me liberasti , quisquis tandem es , qui talia profers , dum procrastinationis istius arcanum ægre tandem extulisti : et quamvis consilii tui perversitatem improbem , eo tamen nomine te laudo , quod eam aperte confessus es. Verum adesdum , et parabolæ expositionem accipe , ne ex hoc Scripturæ loco per imperitiam in fraudem incidas. Primum hic de baptismo non agitur , sed de his , qui aliis atque aliis temporibus fidem amplectuntur , atque in pulchram vineam , hoc est , Ecclesiam , ingrediuntur. Nam ex qua die atque hora ad fidem quisque accessit , ab eadem quoque hoc ab eo exigitur , ut operi manum admoveat. Deinde , tametsi quantum ad laboris modum , plus contulerint , qui priores ingressi sunt , non tamen , quantum ad bonæ voluntatis mensuram. Ea etiam ratione , postremis fortasse amplior merces debebatur , etsi quodam modo absurdum

¹ Matth. xx, 1, et seqq.

videri possit, quod dico. Nam quod posterius ingressi sint, ea causa fuit, quia posteriores ad vitis excolendæ operam vocati sunt. In cæteris autem rebus quantum alios antecelluerint, videamus. Illi quidem non prius crediderant, nec ingressi sunt, quam ipsis ex conventu merces constituta fuisset: hi autem nulla conductæ mercede ad laborem accesserunt, quod quidem majoris fidei argumentum est. Præterea, illi invidæ, et ad murmurandum proclivis naturæ esse inventi sunt: his nihil tale objicitur. Tum etiam, illis merces erat quod dabatur, etiamsi improbis et malignis: his gratia. Quamobrem stoliditatis etiam et amentię damnati, ampliori mercede merito privati sunt. Quid autem et iis qui tarde venerant factum sit, consideremus. Certe æqualem ipsi mercedem acceperunt. Qua igitur fronte operarum conductorem criminantur, velut in æquæ mercedis persolutione ab æquitate recedentem? Hæc omnia sudoris gratiam primis subtrahunt, etiamsi priores labore fatigati sint. Ex eoque efficitur, ut æquali huic mercedis distributioni æquitas sua constet, nimirum animi voluntate cum labore compensata.

XXI. Sed demus, lavacri quoque vim et facultatem, juxta hanc expositionem tuam, parabola designari; quid prohibet, quominus ipse, et prior ingressus, et diei æstum perpessus, postremis non inideas, ut humanitatē quoque ipsa et animi facilitate ac benignitate superior sis, atque remunerationem, non beneficii et gratiæ, sed debiti loco accipias? Huc etiam accedit, quod ita demum operarios mercedem accipere vult parabola, si in vineam ingressi fuerint, ac non ab ea aberraverint; quod quidem tibi periculum imminet. Quamobrem si tibi exploratum esset fore, ut ita sentiens, ac de labore aliquid malitiose subtrahens, baptismum consequeris, ignoscendum tibi esset ad hujusmodi rationes confugienti, ac nonnihil lucri ex Do-

mini benignitate facere cupienti; ut illud non dicam, hoc ipsum amplius laborare, amplioris mercedis loco habendum esse, his quidem certe, qui animo sunt non omnino illiberali et sordido. Cum autem periculum tibi sit, ne, dum hujusmodi lucra consectaris, a vinca prorsus excidas, et dum parva et exigua obiter colligis, sorte ipsa mulctoria; age, verbis meis obtempera, pravisque hisce interpretationibus et oppositionibus missis factis, simplici animo, et, citra argutationem, ad donum accede, ne, antequam spei tuæ compos fias, ex hac vita abripiaris, atque imprudens in perniciem tuam hujusmodi captiones et argutias comminiscaris.

XXII. Quid autem? Nonne, inquires, benignus et facilis est Deus? Nam et cogitationes humanas cognoscit, et animi nostri desiderium explorat, baptismique votum pro baptismo ducit. Ænigmati simile quiddam narras; si apud Deum, propter ipsius benignitatem, is pro illuminato habetur, qui luminis expertus est, aut etiam intra regnum cœlorum est, qui eo frui expetit, cum interim ea minime faciat, quæ ad cœleste regnum iter aperiunt. Ego vero, quid de his rebus sentiam, libere dicam; ac futurum arbitror, ut prudentes viri sententiæ meæ calculum suum addant. Eorum, qui Donum consecuti sunt, alii quidem prius a Deo et salute sua prorsus aversi erant, qui videlicet per omnia flagitiorum genera grassabantur, et de industria vitium amplexabantur. Alii quodam modo semimali, ac medio inter virtutem et vitium loco positi; ii nempe, qui tametsi malum perpetrarent, id tamen, quod perpetrabant, minime probabant, quemadmodum nec morbum suum qui febri divexantur. Alii etiam ante lustricam initiationem honeste et cum laude vivebant; illi quidem ex bona indole, isti vero quod ad baptismum se ipsos sedulo ac studiose præpurgarent: qui etiam post baptismum præ-

tantius adhuc cautiusque vitam instituunt : illud, ut bonum consequerentur ; hoc, ut tueantur atque conservent. In his porro, ut meliores illi judicandi sunt, qui de improbitate quidpiam remiserunt, quam qui omnino improbi et scelerati fuerunt : ita iis, qui non omnino effrenate ac prostitute peccarunt, illi præferri debent, qui virtutem coluerunt, ac se ipsos ante baptismum velut scopis quibusdam purgarunt. (Habent enim quiddam præter cæteros, nimirum superioris vitæ studia et labores ; non enim, quemadmodum lavacrum hanc vim habet, ut peccata deleat, ita etiam recte facta extinguit.) Atque his rursus anteponendi sunt, qui et gratiam excolunt, et se ipsos ad omnem virtutis elegantiam quam maxime expoliunt.

XXIII. De iis autem, qui baptismum non assequuntur, alii quidem pecudum omnino, vel ferarum vitam imitantur, prout vel amentia, vel animi pravitate laborant ; qui scilicet ad cætera mala hoc quoque adjunxerunt, ut nec baptismum ipsum, ut opinor, magnopere venerentur, eoque sint animo, ut, siquidem detur, eum non gravatim accipiant ; si vero non detur, susquedeque ferant. Alii donum quidem agnoscunt, atque honore prosequuntur ; verum moras producant, illi ob ignaviam, isti ob infinita et irrita desideria. Alii ne accipere quidem possunt, vel propter infantiam fortasse, vel propter inopinatum prorsus et violentum aliquem casum, quo efficitur ut ne cupientibus quidem gratia potiri liceat. Quemadmodum igitur in illis permagnum discrimen invenimus, ita etiam inter istos. Nam qui plane baptismum aspernantur, sceleratiores sunt iis, qui ob infinita ac irrita desideria, vel ob socordiam, a baptismo suscipiendo retardantur. Atque hi rursus in graviore crimine sunt, quam illi, qui per ignorantiam ac tyrannidem a baptismo exciderunt. Tyrannis enim nihil aliud est, quam rei alicujus consequendæ inopinato crepta fa-

cultas. Ac futurum existimo, ut primi quidem, cum aliorum scelerum, tum etiam baptismi contempti pœnas luant: alii autem pœnas quidem, leviores tamen pendent, ut qui non tam animi pravitate, quam stultitia, a baptismo aberrarint: postremi denique, nec cœlesti gloria, nec suppliciis a justo iudice afficiantur, utpote qui licet signati non fuerint, improbitate tamen careant, atque hanc jacturam passi potius fuerint, quam fecerint. Neque enim quisquis dignus supplicio non est, protinus honorem quoque meretur; quemadmodum ne quisquis honore indignus est, statim etiam pœnam promeretur. Quin ad hunc quoque modum rem expendo. Si cum, qui animo tantum et voluntate, non autem reipsa, cœdem perpetravit, cœdis damnandum putas, sit sane is quoque apud te pro baptizato, qui baptismum citra baptismi susceptionem expetivit: sin autem illud non admittis, quonam pacto hoc admittas, haud sane perspicio. Aut, si magis placet, hoc modo agamus. Si ad vim baptismi obtinendam, ipsius desiderio teneri satis esse censes, ac propterea de gloria contendis, tibi quoque ad gloriam, gloriæ desiderium sufficiat. Quid enim tua interfuerit, ea carere, modo eam habere concupiscas?

XXIV. Ergo, posteaquam hos sermones audivistis, « Accedite ad eum, et illuminamini, et facies vestræ non confundentur¹, » Baptismum videlicet non assecutæ. Atque illuminationem suscepit, quandiu per tempus licet, « Ne vos a baptismo disjunctos tenebræ comprehendant². » Venit nox, quando nemo potest operari³, » nimirum post discessum ex hac vita. Illa Davidis vox est; hæc veræ illius lucis, « Quæ omnem hominem in mundum venientem illuminat⁴. » Existimate Salomonis his verbis inertiam ac socordiam vestram acriter insectari: « Quousque tandem

¹ Psal. xxxiii, 6. — ² Joan. xii, 7. — ³ Id. ix, 4. — ⁴ Id. i, 9.

» piger jacebis ? Quando consurges a somno ¹ ? » Hoc et illud causaris, atque « Excusas excusationes in peccatis ². » Luminum diem expecto : Paschatis festum pluris facio : Pentecosten expectabo. Cum Christo in resurrectionis die ad vitam redire : Spiritus adventum honorare. Quid postea ? Veniet repente vitæ finis in die, quam non expectas, et in hora, quam ignoras : ac tum adveniet, quasi malus viator, gratiæ inopia, atque in tantis bonitatis opibus fame laborabis. Sed faciendum tibi est, ut contraria per contraria colligas, messem nempe per diligentiam et industriam, sitisque restinctionem per fontem, atque, « Instar cervi ³ » gravissima siti laborantis, magna celeritate ad fontes accurras, contractamque eundo fatigationem aqua extinguas ; non autem, ut Ismaëli accidit, aquæ inopia exarascas ; aut, quod poëtæ fabulantur, in medio fonte siti crucieris. Miserum est, cum nundinæ effluerint, tum demum negotiationem quærere. Miserum est, cum Manna præterierit, tum cibum appetere. Miserum est, serum consilium capere, ac tum damni sensu affici, cum nulla jam ratione acceptum incommodum sarciri potest, hoc est, postquam hinc excesserimus, acerbæque conclusa fuerint, quæ quisque in hac vita gessit, atque, et scelerati homines, supplicio, et qui animos purgariint, splendore affecti fuerint. Quocirca vobis providendum est, ne ad gratiam cunctanter accedatis ; verum summam celeritatem adhibeatis, ne latro vobis antevertat ; ne adulter vos prætereant ; ne avarus superiori conditione sit ; ne sicarius bonum illud præripiat ; ne publicanus, ne scortator, ne demique quisquam ex iis, qui « Per vim in regnum irrumpunt, illudque rapiunt ⁴. » Ultro enim vim patitur, ac propter bonitatem tyrannidem suffert.

XXV. Enimvero, si mihi auscultandum putabis, ad

¹ Prov. VI, 9. — ² Psal. CXL, 4. — ³ Id. XLI, 2. — ⁴ Matth. XI, 12.

scelus quidem et fraudem tardus eris, celer autem ad salutem. Pari enim in vitio sunt, promptitudo ad vitium, et segnities ad virtutem. Si ad comessionem vocatus fueris, ne festines; si ad fidei abjurationem, fac pedem retro celerissime referas; si tibi flagitiosorum ac perditorum hominum sodalitiū dixerit: « Veni nobiscum, particeps esto sanguinis, virum justum injuste in terram abscondamus¹; » ne auribus quidem hos sermones admitte. Ita duas maximas utilitates consequeris: nam et illis peccatum suum indicabis, et te ipsum a prava societate eximes. At si tibi magnus David dicat: « Venite, exultemus Domino². » Si alius Propheta: « Venite, ascendamus in montem Domini³. » Si ipse salutis nostræ Vindex: « Venite ad me omnes, qui laboratis, et onerati estis, et ego vos reficiam⁴: » aut, « Surgite, abeamus hinc⁵, nive splendidius effulgentes, et super coagulati, et super sapphirum colostrati⁶; » ne in contrarium nitamur, ne moram faciamus. Petrum et Joannem æmulemur: ad baptismum ut illi ad sepulcrum et resurrectionem⁷, omni festinatione properemus, simul currentes, certatim currentes, omni contentione in id incumbentes, ut hoc bonum priores occupemus. Ne dixeris: Abi et redi, et cras baptizabor, cum hodie beneficio affici queas. Adsit mihi mater, adsit mihi pater, fratres, uxor, liberi, amici atque omnes quos charos habeo, et tum salutem accipiam: nunc autem nondum mihi splendidum fieri vacat. Verendum enim est, ne luctus socios accipias, quos te lætitiæ socios habiturum speraveras. Quamobrem, siquidem adsint, pulchre tectum agi putā; sin autem absint, ne eos expectes. Turpe est enim dicere: Ubi est munus, quod propter baptismum offeram? Ubi splendida vestis, in qua explendescam? Ubi ea, quæ

¹ Prov. 1, 11. — ² Psal. xciv, 1. — ³ Mich. iv, 2. — ⁴ Matth. xi, 28.
— ⁵ Joan. xiv, 31. — ⁶ Thren. iv, 7. — ⁷ Joan. xx, 3.

ad initiatores meos excipiendos requiruntur, ut in his quoque rebus nominis celebritatem consequar? Valde enim, uti vides, hæc necessaria sunt; ac propterea gratia imminuitur. Ne in magnis rebus minuta et levicula in rationem mittas: ne turpi aliquo et abjecto affectu te duci patiaris. Istud mysterium sublimius est rebus iis, quæ in oculorum aspectum cadunt. Te ipsum offer, Christum indue, honesta et laudabili vita me ale: si ego excipi lætor: sic etiam Deus, qui maxima quæque beneficia nobis elargitur. Nihil apud Deum magnum est, quod non pauper quoque donare possit, ut ne hac quoque in re tenuiores propellantur; cum siquidem non habeant, quomodo cum locupletibus certent. Etenim in cæteris quidem rebus inter divitias et paupertatem interest: hic autem, qui promptior atque alacrior est idem quoque ditior evadit.

XXVI. Nihil progressum tuum inhibeat: nihil animi alacritatem reprimat. Quandiu vehemens est desiderium, id, quod desideras, arripe. Quandiu calet ferrum, frigida obduretur, ne quid interim accadat, quod animi cupiditatem infringat. Philippus sum: esto Candaces. Dic ipse quoque: « Ecce aqua, quid me prohibet baptizari¹? » Temporis occasionem arripe: ob bonum lætitiā concipe: atque hæc locutus, baptizare; baptizatus, salutem accipe; et quamvis corpore Æthiops sis, animo dealbare. Salutem consequere, qua nihil sublimius præstantiusque est, apud eos certe, qui mente præditi sunt. Ne dicas: Baptizet me episcopus, atque is metropolitanus, aut Jerosolymitanus; (non enim locorum est gratia, sed Spiritus;) isque etiam sit claro et nobili genere ortus; grave enim fuerit, nobilitati meæ ob ejus, qui baptizat, obscuritatem, labem ac dedecus inferri; aut, si presbyter, saltem qui cælebs sit, qui continentiae laude atque angelica vivendi ratione flo-

¹ Act. viii, 36.

reat; grave enim fuerit, si in purgationis tempore inficiar atque commaculer. Ne concionatoris aut baptizantis auctoritatem inquiras. Alius horum iudex est, ac rerum obscurarum explorator: quandoquidem « Homo faciem, Deus » autem cor intuetur¹. » Tibi autem quivis ad purgationem satis idoneus est, modo inter probatos censeatur, ac non aperte condemnatus sit, atque ab Ecclesia alienus. Qui curatione indiges, in iudices iudicium ne arripe; nec eorum, a quibus purgaris, dignitates excute, nec inter genitores delectum habe. Est quidem alius alio præstantior, vel inferior: te autem quivis est superior. Sic tecum reputa. Sint duo annuli, alter aureus, alter ferreus, atque ambo eandem imperatoris imaginem insculptam habeant, ac deinde ceram imprimant. Quid tandem hoc signum ab illo signo differet? Nihil. Materiam in cera internosce, quamlibet singulari solertia sis? Dic, utrum e duobus signis, aureo scilicet annulo, an ferreo expressum sit, et quomodo unum idemque signum existat? Discrimen enim in materia est, non in signo. Sic tibi quoque omnes, qui baptizandi munere funguntur, idonei habeantur. Quamvis enim alius alium vitæ probitate antecellat, eadem tamen baptismi vis est; ac quivis tibi initiator sit, qui modo eadem fide informatus est.

XXVII. Ne tua dignitate alienum putes, simul cum paupere baptizari, qui dives es, patricius cum ignobili, herus cum eo qui hactenus tibi servus extitit. Nondum tantum te demittes, quantum Christus, cui hodierno die baptizaris, qui salutis tuæ causa servilem quoque formam accepit. Ex quo die per baptismum immutaris, veteres omnes notæ cesserunt: una forma omnibus Christus impositus est. Ne peccatum tuum confiteri grave ducas, sciens quo pacto Joannes baptizaverit, ut per hujus vitæ

¹ 1 Reg. xvi, 7.

pudorem, futuri sæculi pudorem ignominiamque fugias; (nam hoc quoque sempiterni illius supplicii pars est;) ac perspicuum facias, te serio atque ex animo peccatum odisse ac detestari, dum illud tanquam contumelia dignum traducis, ac velut ludibrio exponis, de eoque triumphum agis. Ne exorcismi medicinam respuas, nec ob illius prolixitatem animo concidas. Nam id quoque velut lapis quidam Lydius est, ad quem exploratur quam sincero quisque pectore ad baptismum accedat. Equando tantum laboris susceperis, quantum « Æthiopum regina, quæ ab extremis terræ finibus perrexit, ut Salomonis sapientiam videret? Et ecce plus quam Salomon hic ¹, » solum apud eos, qui rem perfecte considerant. Ne viæ longinquitatem reformides, nec maris spatia, nec ignem, si adhibeatur, nec aliud quodcumque impedimentum, quo gratiam consequaris. Cum autem tibi, nec labore ullo, nec opera ulla suscepta, rei expetita compotem fieri liceat, quæ tandem stultitia est, donum in aliud tempus rejicere? « Sitientes, » inquit, venite ad aquam; (sic te hortatur Isaias;) et qui non habetis argentum, ite et emite, ac vinum, nullo persoluto pretio, bibite ²; » O ingentem benignitatis celeritatem! o faciliæ contrahendi rationem! Hoc bonum sola voluntate venale tibi proponitur; ipsum animi desiderium Deus ingentis pretii loco habet. Sitit sitiri; bibere volentibus potum præbet; cum ab eo beneficium petitur, ipso beneficio afficitur; in promptu est ipsius munificentia ac liberalitas: jucundius dat, quam alii accipiant. Hoc unum caveamus, ne jejuni ac minuti animi potam subeamus, parva, Deique munificentia parum digna postulantes. Beatus ille, a quo, ut ab illa Samaritana, potum Christus poscit, « Fontemque dat aquam in vitam æternam salientis ³.

¹ 3 Reg. x, 1-3, et Matth. xii, 42. — ² Isai. lv, 1. — ³ Joan. iv, 7, et seqq.

« Beatus, qui seminat super omnem aquam¹, » et omnem animam, crastino die aratro perstringendam et irrigandam, quam hodie bos et asinus calcant, utpote vastam, incultam et aridam, ac bruta stoliditate laborantem. Beatus, qui licet « Juncorum torrens sit, de dōmo tamen Domini rigatur², » atque ex juncifero frumenti ferax efficitur, pastumque eum, qui hominibus aptus sit, profert, non autem asperum et inutilem. Ac proinde omni cura et studio nobis est providendum, ne communi hac gratia careamus.

XXVIII. Sint hæc sane, dixerit aliquis, quantum ad eos attinet, qui baptismum requirunt. Quid autem de iis dices, qui tenera adhuc ætate sunt, nec aut damnum aut gratiam sentiunt? An eos quoque baptizabimus? Ita prorsus, si quod periculum urgeat. Præstat enim absque sensu sanctificari, quam sine sigillo et initiatione abscedere. Atque hujus rei ratio nobis est circumcisio, die octavo peragi solita³, quæ baptismi figuram quodam modo gerebat, atque iis, qui rationis adhuc expertes erant, offerebatur; sicuti etiam postium unctio, quæ, rebus sensu carentibus adhibita, primogenitis salutem afferebat. De reliquis ita censeo, ut triennio expectato, aut aliquanto breviori vel longiori temporis spatio; (nam tum, et mystici quiddam audire, et respondere possunt, ac si minus plene et exacte intelligunt, imbuuntur tamen et informantur;) ita demum, magno perfectionis sacramento, et animas et corpora sanctificent. Etenim res ita se habet. Vitæ quidem actionibus referendis tum demum obnoxii esse incipiunt, cum et ratio ad plenum accrevit, et mysterium didicerunt; (ætatis enim beneficio hoc habent, ut peccatorum, quæ per ignorantiam admiserint, rationem reddere minime cogantur;) at propter inopinatos et repentinos periculorum impetus,

¹ Isaï, xxxii, 20. — ² Joël, iii, 18. — ³ Gen. xvii, 12.

quique nulla ope atque auxilio propulsari queant, lavacro communiri omnino conducibilis est.

XXIX. At dices : Christus trigesimo anno baptizatur¹, idque cum Deus esset : tu vero me baptismum urgere jubes ? Cum Deum dixisti, quæstio abs te soluta est. Nam ille purgatio ipsamet erat, nec purgationis indigebat ; verum tua causa purgabatur, quemadmodum et carnem ferebat, cum carnis expers esset. Nec vero ei quidquam periculi metuendum erat, baptismum proroganti ; quippe qui passionis quoque suæ arbiter esset, quemadmodum et nativitatis. Tibi autem non leve periculum imminet, si hinc, corruptioni soli genitus, nec incorruptibilitate indutus, excesseris. Quin illud etiam animadverto, quod illi quidem tempus hoc baptismi necessarium erat ; tua autem non eadem est ratio. Idcirco enim ille trigesimo denique anno, ac non prius, sese indicavit, tum ne ostentator aliquis esse videretur ; (quo affectu inepti homines ducuntur ;) tum quia hæc ætas plenum virtutis argumentum, docendique maturitatem habet. Jam quoniam ei salutiferum mundo supplicium subeundum erat, omnia profecto, quæ ad passionem spectabant, ad passionem concurrere oportebat, nimirum ostensionem, baptismum, cœlestestimonium, prædicationem, multitudinis concursum, miracula et velut corpus unum fieri, non divulgum, nec temporum intervallis disjunctum et interruptum. Etenim ex baptismo et prædicatione excitatus est ille « Confluentis multitudinis terræ motus² ; » sic enim tempus illud Scriptura vocat. Rursus ex populi multitudine et frequentia, signorum editio, et miracula, quæ homines ad Evangelium adducebant, extiterunt. Ex his porro invidia nata est, ex invidia odium, ex odio insidiæ, et proditio. Hinc postremo crux, eaque omnia, quæ nobis salutem pepere-

¹ Luc, III, 23. — ² Matth, XXI, 10.

runt. Ac Christi quidem res ita se habent, quantum quidem nobis assequi licet : atque etiam fortasse alia quædam ratio illis, quas commemoravimus, reconditior inveniri queat.

XXX. Tibi autem quid necesse est, ut dum exempla, quæ te sublimiora sunt, sequeris, malum consilium capias, præsertim cum, permulta quoque alia ex his, quæ tum ab eo gesta esse historiæ proditum est, a nostro ritu discrepare, ac tempore dissidere, constet? Exempli causa: Christus paulo ante tentationem jejunavit; nos ante Pascha. Jejunium unum idemque est; at utriusque temporis non parva est differentia. Ille enim jejunium adversus tentationum impetus objicit; nobis autem jejunium hoc præstat ut cum Christo commoriāmur, ac festum præcedat purgatio. Jam ille totos quadraginta dies a cibo abstinuit; (Deus enim erat;) nos autem ad virium nostrarum modulum jejunium attemperavimus, etiamsi quidam, zelo impulsī, ultra virium facultatem in jejunando prosiliant. Præterea, ille Paschatis mysterium Discipulis in cœnaculo tradit, et a cœna, et unico ante passionem die; nos in templis, et ante cœnam, et post resurrectionem. Ille tertio die a morte ad vitam rediit; nos post diuturnum tempus. Ita ipsius res, nec a nostris penitus distractæ atque abruptæ sunt, nec rursus temporibus inter se cohærent; verum hactenus nobis traditæ, ut ad earum exemplar ritus nostros conformemus, plenam omnibusque modis perfectam similitudinem fugiunt. Quid igitur mirum, eum, quamvis salutis nostræ causa baptismum suscepit, temporis tamen ratione a nobis differre? Quod tu quidem mihi, velut magnum aliquid et admirandum, adversus tuam ipsius salutem opponere videris.

XXXI. Quare, si quid me audiendum putatis, hujusmodi rationes valere jubete, atque ipsi ad bonum hoc pro-

silitè, ac duplex certamen inite; alterum, ut vos ipsos ante baptismum emundetis; alterum, ut acceptum baptismum cōservetis : quandoquidem ejusdem est difficultatis, et bonum aliquod, quo prius carebas, adipisci, et, cum adeptus fueris, cōservare. Fit enim plerumque, ut, quod studio et industria partum est, secōrdia labefactetur, quod autem inertia amissum est, labore et diligentia recuperetur. Magnum tibi ad ea, quæ cupis, assequenda et retinenda, subsidium attulerint vigilæ, jejunia, chameuniæ, orationes, lacrymæ, commiseratio erga pauperes, largitio. His rebus, partim pro iis, quæ accepisti, gratias age, partim etiam ea tūcere ac cūstodi. Habes beneficium, quod te multorum mādātorum submoneat : nē contempnim prætereās. Pauper accessit? In mentem tibi veniat, ex quā grāvi paupertate ad quantas divitias provectus es. Pane carens, aut potu, atque etiam fortasse Lazarus quispiam ad domus tuæ fores provolutus¹? Moveat te mystica mensa, ad quam accessisti; panis ille, cuius particeps factus es; calix ille, quem accepisti, cum Christi passionibus initiareris. Peregrinus ad gēnua tuā procubuit, domo carens, advena²? Per hunc eum excipe, qui propter te peregrinatus est, idque in propriis, quique per grātiā ad te immigravit, teque ad cōlestē domicilium pertraxit. Zachæum imitare, illum, inquam, heri publicanum³, hodie magnificum : facultates omnes tuas ingredienti Christo offer, ut, licet corporali statūra pusillus, animo tamen eveharis, Christum egregie conspicatus. Ægrotus prostat, ac saucius? Moveat te sanitas tua, et vulnera, quibus te Christus liberavit. « Si videris nudum, operi eum⁴, » tuum incorruptionis indumentum, hoc est, Christum, honore prosequens : « Quotquot enim in Christum bapti-

¹ Luc. xvi, 20. — ² Id. xix, 2, et seqq. — ³ Idem. lviij, 7.

»zati sumus, Christum induimus¹. » Si debitorem nactus sis, ad pedes tuos sese abjicientem, syngrapham omnem, tam justam, quam injustam, rescinde². Decem illa talentorum millia, quæ tibi Christus remisit, in memoriam revoca. Noli te acerbum minoris debiti exactorem præbere, et quidem conservis, cum tibi a Domino major summa condonata sit, ne humanitatis quoque illius, quam tibi in exemplum propositam haudquaquam imitatus es, pœnæ a te expetantur.

XXXII. Sic te compara, ut lavacrum non modo corpus, sed imaginem quoque abluat: non modo peccata eluat, sed mores etiam emendet: non modo pristinas vitæ sordes abstergat, verum fontem quoque ipsum expurget: non hoc tantum in animo tibi insculpat, ut bona honeste acquiras; sed ut etiam bene parta amittas, aut, quod levissimum est, male parta deponas. Quid enim tibi profuerit, ita peccati veniam impetrasse, ut tamen ei, quem læseris, damnum non sarciatur; cum tu duplici scelere constrictus tenearis; altero, quia sceleratis artibus facultates tuas auxisti; altero, quia partas opes retines? Ita, quamvis illa tibi noxa condonata sit, hac tamen hodierno die adhuc implicaris. Hodie enim apud te aliena res est, ideoque minime sublatum et extinctum est peccatum, sed tempore solum intercisum. Illud quidem ante baptismum perpetratum est, istud vero post baptismum manet. Lavacrum enim admissorum peccatorum veniam habet, non eorum, quæ admittuntur. Porro non fucanda est purgatio, sed imprimenda; tibi que hoc agendum, ut plene ac perfecte splendas, non ut leviter atque in superficiem illinaris; ut gratia non peccata tantum obducatur, sed ab iis omnino te vindicet. « Beati, quorum remissæ sunt iniquitates: » hoc plenæ et cumulatæ purgationis est. « Et

¹ Galat. III, 27. — ² Matth. XVIII, 26.

» quorum tecta sunt peccata : » hoc iis congruit, quorum intimæ animi partes nondum purgatæ sunt. « Beatus vir , » cui non imputavit Dominus peccatum¹ : » tertia quædam hæc est peccantium classis; quorum scilicet, tametsi actio minime laudabilis est, mens tamen culpa et crimine vacat.

XXXIII. Quid igitur dico, et quo mea spectat oratio? Heri Chananæa anima eras², et per peccatum « In terram » inclinata³ : » hodie a Verbo erecta es. Ne rursus curve-
ris, ac, velut ligneo collari a diabolo depressa, in terram propendeas, atque ita afficiaris, ut vix erigi et assurgere queas. Heri « Sanguinis profluvio tabescebas⁴; » rubrum enim et cruentum peccatum ex te manabat; hodie siccato profluvio ad pristinum florem rediisti. Contacta quippe vestis Christi fimbria, fluxum compressisti. Fac purgationem serves, ne alioqui sanguinis defludio rursus labores, Christumque jam, surripiendæ salutis causa, prehendere nequeas. Neque enim Christus sæpius sibi aliquid surripi amat, tametsi mire benignus et facilis. Heri in lecto jacebas, corpore fractus et solutus, nec hominem præsto habebas, qui, « Cum turbaretur aqua, te in piscinam injiceret⁵; » hodie nactus es hominem, eundemque Deum, vel, ut rectius loquar, Deum et hominem. Elatus es e grabato, imo grabatum extulisti, ac beneficium acceptum, velut in columna incisum, omnibus spectandum proposuisti. Cave, ne admissio peccato rursus in grabato, id est, in pessima corporis voluptatibus fracti quiete, jaceas. Verum, ut es, proficiscere, præcepti hujus memor : « Ecce » sanus factus es; jam noli peccare, ne deterius aliquid » tibi accidat⁶; » si post acceptum beneficium malus inveniaris. Magnam hanc vocem, « Lazare, veni foras⁷, » in

¹ Psal. xxxi, 1, et seqq. — ² Matth. xv, 22. — ³ Luc. xiii, 11. — ⁴ Id. viii, 43, et seqq. — ⁵ Joan. v, 7. — ⁶ Ibid. 14. — ⁷ Id. xi, 43.

sepulcro jacens audisti. (Quid enim Verbi voce præstantius?) Ac prodiisti, non quatrduo, sed multis diebus mortuus, cum triduano illo simul ad vitam rediens, atque funebribus vinculis solutus es. Cave, ne rursus emoriaris, iisque, « Qui in sepulcris habitant¹, » aggregeris, ac peccatorum tuorum funibus constringaris; cum incertum sit, an rursus e sepulcro ad vitam excitaberis, usque ad postremam illam et communem resurrectionem; quæ, quidquid factum est, ad iudicium adducet, non jam ut curetur, sed ut iudicetur, rationemque certum reddat, quæ recte vel male coacervarit.

XXXIV. Si lepra, hoc est, deformi pravitate, prius infectus eras, ac deinde abrasa ejectaque hæc vitiosa materia, salvam et incolumem imaginem recepisti, purificationem mihi, sacerdoti tuo, ostende², ut cognoscam, quantum ea legalem purificationem antecellat. Novem illis ingratiss ne te adjungas, veram declinam tibi imitandum propone; qui, quanquam Samaritanus esset, alios tamen grati animi officio vicit. Da operam, ne mala vitiligo rursus erumpat, atque ita afficiaris, ut corporis tui vitio vix ulla medicina possit adhiberi. Nuper avaritia et tenacitas manum tuam siccabat; hodie eam largitio et beneficentia extendat³. Præclara ægræ manus curatio est, dispergere, dare pauperibus, ea, quibus circumfluimus, libenter exhaustire, quoad fundum quoque ipsum attigerimus; (fortasse ex eo quoque alimentum tibi manabit, velut olim Sarephthæ, ac præsertim si Eliam alueris⁴;) egregias opes existimare, inopia propter Christum, qui nostra causa paupertatem subiit, laborare. Si surdus ac mutus eras, auribus tuis Verbum insonet⁵; vel potius eum, qui insonuit, retine. Ne ad Domini disciplinam et admonitio-

¹ Psal. LXXII, 7. — ² Luc. XVII, 12, et seqq. — ³ Luc. VI, 6. — ⁴ 3 Reg. XVII 9. — ⁵ Marc. VII, 32.

nem, quemadmodum aspis ad incantationes, oclusas aures habeas. Si cæcus, et luminis expers¹, « Illumina oculos tuos, ne unquam in mortem obdormias. In Domini lumine lumen perspice², » in Spiritu Dei Filium intueri, trinum, inquam, illud et simplex atque indivisum lumen. Si Christum totum admiseris, universas ipsius curationes, quibus sigillatim unusquisque ad sanitatem revocatus est, in animam tuam congeres. Illud modo caveas, ne gratia mensuram ignores, neve tibi somno dedito, ac male securo, zizania hostis superseminet³. Illud modo provideas, ne, puritate tua diaboli invidiam subiens, te ipsum rursus per peccatum miserabilem reddas. Illud modo videas, ne propter bonum opus effusiori lætitia gestiens, atque immodice elatus corruas, dum in altum efferris. Illud modo cures, ut purgationem summo studio excolere nunquam intermittas, « Ascensiones in corde tuo disponens⁴, » atque acceptam Dei beneficio et gratia veniam, cura et diligentia tuearis; ut peccatorum quidem tuorum remissio a Deo proficiascatur, verum remissionis conservatio, ex te quæque sit.

XXXV. Quomodo autem id assequeris? Fac tibi parabola illa semper in animo hæreat, et tibi optime ac præstantissime consulueris. « Excessit a te impurnus et crassus Spiritus⁵, » per baptismum ejectus ac profligatus. Dirumpitur se in fugam conjectum; non patitur se domo et tecto carere. Ambulat per loca inaquosa, divineque rore minime perfusa; illic commorari gestit; vagatur, quærens requiem, non invenit; animas baptismo consignatas offendit, quarum vitia lotionem obruta sunt; aquam perhorrescit; lustricis undis, non secus ac legio marinis, suffocatur. Rursus, in domum, e qua recesserat, revertitur.

¹ Luc. xviii, 35. — ² Psal. xii, 4, et Id. xxxv, 10. — ³ Matth. xiii, 25.
— ⁴ Psal. lxxviii, 6. — ⁵ Luc. xi, 24, et seqq.

Impudens est, pervicax est, rursus impetum facit, rursus tentat. Ac si quidem Christum in ea inhabitantem invenerit, et locum, quem vacuum reliquerat, ab eo impletum; rursus propellitur et propulsatur, infectis rebus discedit; oberrationisque nomine miser et calamitosus existit. Sin autem animæ tuæ sedem, scopis quidem mundatam et ornatam, cæterum vacuum et inertem, atque ad hunc aut illum excipiendum, uter tandem prior invaserit, æque comparatam repererit, in eam insiliet, et cum majori apparatu immigrabit, fientque novissima tanto pejora prioribus; quanto quidem tum emendationis et præsidii a baptismo spes erat: nunc autem perspicua et manifesta est pravitas, per boni fugam malum attrahens; ob idque firmior jam et stabilior habitatori possessio.

XXXVI. Rursus enimvero, ac sæpius tibi luminum memoriam refricabo, ex Litterarum sacrarum monumentis ea colligens. Nam et ipse iis commemorandis exhilarescam. (Quid enim lumine dulcius et jucundius, his qui lumen degustarunt?) Et oculos tuos his verbis perstringam: «Lux orta est justo, et huic conjuncta lætitia¹. » Et, Lux »justis omni tempore². » Quinetiam quidam Deum ad hunc modum affatur: «Illuminas tu mirabiliter a montibus »æternis³; » hoc est, ut opinione assequor, ab angelicis Virtutibus, quæ nobis ad optima quæque adjumento sunt. Jam Davidem quoque his verbis utentem audis: »Dominus illuminatio mea, et Salvator meus, quem timebo⁴? » Qui etiam nunc sibi lucem et veritatem emitti »postulat⁵; » nunc ob eam sibi impertitam gratias agit, cum »lumen Dei super se signatum esse⁶ » ait, hoc est, impressa et cognita esse datæ illuminationis signa. Unum illud lumen fugiamus, quod ex sævo igne nascitur. Ne in

¹ Psal. xcvi, 11. — ² Isai. lx, 19. — ³ Psal. lxxv, 5. — ⁴ Id. xxvi, 1. — ⁵ Id. xlii, 5. — ⁶ Id. iv, 7.

ignis nostri lumine ambulemus, et in flamma quam accendimus. Ignem etiam purgantem novi, « Ad quem mittendum Christus in terram venit ¹, » qui et ipse mystice ignis appellatur. Hujus porro ignis ea vis est, ut crassiorem materiam, ac vitiosam animi affectionem absumat, eumque proinde celerrime Christus accendi vult. Cupit enim nos quamprimum beneficio affici; utpote qui nobis quoque ignis carbones auxilii causa porrigat. Est alter ignis non purgans, sed scelerum vindex; sive sodomiticus ille, quem sulphure et procella permixtum ², Deus in peccatores omnes fundit ³; sive ille, « Qui diabolo ejusque angelis paratus est ⁴; » sive etiam ille, « Qui ante faciem Domini procedit, et in circuitu inimicos ejus inflamat ⁵; » sive denique ille omnibus his formidabilior, qui cum insomni illo verme conjunctus est ⁶, nec unquam extinguitur, verum in sceleratorum hominum poenam perennis est et sempiternus. Hi enim omnes eam vim habent, ut perdant ac deleant; nisi tamen hoc quoque loco quispiam ignem mitiorem, et ut Deo vindice dignum est, intelligendum putet.

XXXVII. Quemadmodum porro duplex ignis genus est, ita duplex quoque lumen est: alterum, quo princeps animi nostri pars illustratur, ac nostri secundum Deum gressus reguntur: alterum, fallax et curiosum, veroque luminis oppositum, atque interim tamen illius speciem præ se ferens, ut nos externa specie fallat, et in frandem impellat. Hoc, et caligo est, et meridies esse videtur, id est, clarissima luminis pars. Sic enim illud Scripturæ audio, iis « Qui semper in meridianis tenebris fugiunt ⁷. » Hoc, et nox est, et splendor existimatur, his utique, qui deliciis et voluptatum illecebris corrupti sunt. Quid enim ait David? « Nox

¹ Luc. xii, 49. — ² Gen. xix, 24. — ³ Psal. x, 7. — ⁴ Matth. xxv, 41. — ⁵ Psal. xcvi, 3. — ⁶ Marc. ix, 43. — ⁷ Isai. vi, 20.

» me miserum circumstabat, et nesciebam : delicias enim
 » lumen esse arbitrabar ¹. » Atque illi quidem tales sunt,
 animoque ita affecti : nos vero scientiæ lumen nobis ipsis
 excitemus ; quod quidem nobis hac ratione continget, si
 « Ad justitiam seminemus ², » et vitæ fructum vindemie-
 mus ; (actio quippe contemplationem parit ;) ut cum alia,
 tum hoc quoque, nempe quod verum lumen, quod rursus
 fictum et e mentibus sit, intelligamus, nec in malum, tan-
 quam in bonum, per imprudentiam labamur. Lumen
 efficiamur, ut Discipuli a magno Lumine vocati sunt, his
 verbis : « Vos estis lux mundi ³. » Efficiamur luminaria in
 mundo, verbum vitæ sustinentes, hoc est, vitalis aliis ho-
 minibus vis et facultas. Arripiamus Deitatem, arripiamus
 primum et purissimum Lumen. Ad ipsius splendorem in-
 cedamus, prius quam pedes nostri ad tenebrosos et hosti-
 les montes offendant. Quandiu dies est, « Sicut in die ho-
 » neste ambulemus, non in comessionibus et ebrietatibus,
 » non in cubilibus et impudiciis ⁴, » quæ noctis furta sunt.

XXXVIII. Omnibus membris purificemur, fratres, om-
 nes sensus purgemus ; nihil in nobis sit imperfectum, ni-
 hil quod primam nativitatem oleat, nihil denique luminis
 expers relinquamus. Illuminemur oculis, ut recte cerna-
 mus, nec meretricium ullum et obscenum simulacrum,
 ex studioso et curioso aspectu conflatum, in nobis cir-
 cumferamus ; alioqui enim, etiamsi libidinem non adore-
 mus, anima tamen ipsa sordes contraxerit. Si qua in nobis
 trabes, si qua festuca, eam evellamus ; ut et aliorum tra-
 bes et festucas perspicere queamus. Illuminemur auribus,
 illuminemur lingua : partim ut, « Quid loquatur Dominus
 » Deus, audiamus, et auditam faciat nobis mane miseri-
 » cordiam suam ⁵, » atque exultatio illa, et lætitia, quæ

¹ Psal. cxxxviii, 11, et seqq. — ² Osee. x, 12. — ³ Matth. v, 14. —
⁴ Rom. xiii, 13. — ⁵ Psal. lxxxiv, 9, et cxlii, 8.

sanctis et divinis auribus insonat, auditui nostro infundatur : partim ne « Gladius acutus ¹, aut novacula acuta si-
 » mus ², ac sub lingua laborem et dolorem versemus ³, sed
 » Dei sapientiam in mysterio, quæ abscondita est, loqua-
 » mur ⁴, » igneas linguas reveriti. Olfactu curemur, ut ne
 effœminemur, suavisque odoris loco, pulvere consperga-
 mur; verum unguentum illud, nostra causa effusum, odo-
 remur, spirituali modo illud percipientes, atque ab eo ita
 efformati, et commutati, ut ex nobis quoque suavis odor
 affletur. Purgemur tactu, gustu, faucibus, non molliter
 tangentes, nec rebus levibus et politis gaudentes, sed
 Verbum, salutis nostræ causa incarnatum, ut decet, attrec-
 tantes, ac Thomam hac in re imitantes; nec succis cupe-
 diisque titillati, acriorum titillationum fratribus, sed « Gus-
 » tantes et agnoscentes, quoniam suavis est Dominus ⁵, »
 præstantiori gustu ac permanente; nec denique acerbis
 illas et ingratas fauces, quæ id, quod datur, transmittunt,
 nec unquam retinent, paululum recreantes, sed divinis
 sermonibus, « Qui melle dulciores sunt ⁶, » eas oblectantes,

XXXIX. Præclarum insuper fuerit, purgato capite, ut
 pars ea, quæ sensuum domicilium et officina est, pur-
 gari solet, Christi caput, « Ex quo corpus omne construi-
 » tur ⁷ » et conglutinatur, tenere; ac peccatum, supra nos
 sese offerens, atque in præstantiorem nostri partem impe-
 rium sibi arrogans, consternare. Præclarum etiam hume-
 ris sanctificari ac purgari, ut Christi crucem tollere queant,
 quam non facile quilibet ferre potest. Præclaram item ma-
 nibus et pedibus lustrari: illæ nempe, ut in omni loco
 puræ attollantur, Christique disciplinam, « Ne irascatur
 » Dominus ⁸, » apprehendant, ac per opera divinum sermo-
 nem sibi creditum probent, quemamodum ille qui datus

¹ Psal. lvi, 5. — ² Id. li, 4. — ³ Id. x, 7. — ⁴ 1 Cor. ii, 7. — ⁵ Psal. xxxiii, 9. — ⁶ Id. xlviii, 11. — ⁷ Coloss. ii, 19. — ⁸ Psal. ii, 12.

est « In manu cujusdam Prophetæ ¹ » his autem, ne ad fundendum sanguinem præcipites ruant ², atque ad vitium cursu ferantur; verum ad Evangelium, « Supernæque vocacionis ³ » palmam prompti ac parati sint, Christumque abluentem atque purgantem suscipiant. Quod si qua ventris quoque illius, qui cibos e Verbo procedentes capit ac distribuit, perpurgandi ratio est, præclarum etiam fuerit cavere, ne eum luxu et disfluentibus cibis Deum efficiamus; quin potius illum accuratissime purgemus et extenuemus, ut Verbum Domini intimo sinu suscipiat, ac pro peccante Israël in honesto et laudabili dolore versetur. Jam cordi quoque et intestinis honorem haberi comperio. Hoc mihi David persuadet, « Cum cor mundum in se ipso creari, ac Spiritum rectum in visceribus innovari ⁴, » postulat. Quibus verbis, ut opinor, ea animæ facultas, qua cogitamus, atque hujus motus aut cogitationes significatur.

XL. Quid lumbi? Quid renes? Nam ne hoc quidem prætereundum est. Attingat hæc quoque purgatio. Sint lumbi nostri succincti, ac per continentiam restricti, quemadmodum Israël olim, ex legis præscripto, Pascha comedenti ⁵. Nemo enim pure ac perfecte ex Ægypto excedit, nec exterminatorem fugit, nisi hæc domuerit ac frenaverit. Renes autem laudabilem immutationem sentiant, vim totam appetitus ad Deum transferentes, ut dicere queamus: « Domine, ante te omne desiderium meum ⁶. » Et, « Diem hominis non desideravi ⁷. » Viros etenim spiritualium desideriorum nos esse convenit ⁸. Nam ita demum draconem illum, cujus vires maxima ex parte in umbilico et lumbis sitæ sunt, oppresserimus, extincta videlicet eversaue ea

¹ Jerem. I, 1. — ² Psal. XLIII, 3. — ³ Philip. III, 14. — ⁴ Psal. L, 12. — ⁵ Exod. XII, 11. — ⁶ Psal. XXXVII, 10. — ⁷ Jerem. XVII, 16. — ⁸ Dan. X, 23.

potentia, quam in his partibus obtinet. Nec vero tibi mirandum accidat, quod « Minus honestis corporis partibus » uberiorem honorem ¹ » tribuo, eas sermone mortificans et castigans, atque adversus materiam stans in procinctu. Omnia membra, quæ sunt super terram, Deo demus, omnia consecremus; non autem fibram solum hepatis, non renes cum adipe, non partem quamdam corporis, non hoc, aut illud. Cur enim alia contemnamus? Verum nos totos offeramus. Simus holocausta ratione prædita, victimæ perfectæ; nec brachium solum, aut pectusculum sacerdoti attribuamus; nimis enim parvum hoc fuerit; verum nos ipsos totos Deo in munus offeramus, ut nos totos recipiamus; quandoquidem hoc est plane accipere, Deo donatum esse, et quasi rem sacram salutem nostram operari.

XLl. Præter hæc omnia, imo ante hæc omnia, « Bonum depositum custodi ², » cui vivo, et pro quo milito; et quod utinam me ex hac vita discedentem comitetur; cum quo et omnes vitæ molestias perfero, et jucunditates omnes contemno ac pro nihilo duco; fidem, inquam, et confessionem in Patrem, et Filium, et Spiritum sanctum. Hanc tibi hodierno die committo; cum hac te, et lustricis aquis immergam, et in altum extraham. Hanc tibi totius vitæ sociam, et patronam, unam Deitatem et potentiam, quæ in tribus conjunctim invenitur, et tria divisim comprehendit, nec substantiis aut naturis inæqualis est nec præstantiis aut submissionibus augetur vel minuitur sed undequaque æqualis est, undequaque eadem, non secus ac una cæli pulchritudo et magnitudo: trium infinitorum infinitam conjunctionem, Deum unumquemque, si separatim consideretur, ut Patrem sic Filium, ut Filium sic et Spiritum sanctum, servata sua cuique proprietate: Deum rursus tria hæc; si simul cogitentur; illud, propter

¹ 1 Cor. xiv, 23. — ² 2 Tim. i, 14.

eandem essentiam : hoc, propter unum principatum. Vix unum animo concepi, cum statim tribus circumfulgeo. Vix tria distinguere incipio, cum ad unum reducor. Si unum quodpiam trium appareat, id totum mihi esse videtur, atque implentur oculi, majorque etiam pars oculorum aciem fugit. Hujus magnitudinem comprehendere nequeo, ut ei, quod reliquum est, plus tribuam. Quod si rursus tria hæc animi consideratione contraxero, unum splendorem cerno, utpote qui lumen unitum distinguere aut dimetiri nequeam.

XLII. Num tu generationem metuis, ne quid patiat Deus, qui ab omni perpeffione alienus est? Ego contra creationem metuo, ne per contumeliam et iniquam sectionem Deus mihi pereat, si vel Filium a Patre, vel Spiritus essentiam a Filio distraxero. Nam quod mirum et absurdum est, non modo creatura Deo ab iis inducitur, qui Deitatem male trutinant, verum ipsa quoque creatura in se ipsam iterum secatur. Quemadmodum enim humiles et abjecti homines Filium a Patre sejungunt, atque inferiori loco ponunt; sic Spiritum rursus a Filio separant, inferioremque faciunt: ita ut, per novam hanc theologiam, et Deo, et creaturæ, contumelia infertur. Nihil, o viri, in Trinitate servum est, nec creatum, nec adventitium, ut ex cujusdam docti viri sermone accepi. « Si adhuc hominibus » placerem, Christi servus non essem ¹, » inquit divinus Apostolus. Si adhuc creatum aliquid adorarem, aut in rei creatæ nomine baptizarer, Divinitatem minime consequerer, nec primam procreationem in melius immutarem. Quid ad eos dicam, qui Astartem adorant, aut Chamos, Sidoniorum idolum, aut sideris formam, Dei quidem paulo majoris, apud idololatrias illos, sed tamen facti atque creati, cum ipse, aut hos duos, in quorum nomine bapti-

¹ Gala'. 1, 10.

zatus sum, non adorem, aut conservos adorem? Conservi enim utique erunt, ut cumque nobis aliquantulum honore præstent; quandoquidem inter conservos quoque discrimen, et præstantia reperitur.

XLIII. Cupio Patrem majorem dicere, ex quo id æquales habent, quod æquales sunt, et quod sunt. Hoc enim ab omnibus mihi concedetur. Verum, principium vereor, ne minorum principium illud faciam, ac per hujusmodi prælationem contumelia afficiam. Neque enim Patri gloria est, eorum, quæ ex ipso sunt, depressio. Ac præterea inexplabilem tuam aviditatem suspectam habeo, ne, arrepta hac voce, Major, naturam seces, atque hac voce ad omnia abutaris. Non enim hæc dictio, Major, ad naturam, sed ad causam referenda est. Neque enim quidquam eorum, quæ eandem substantiam habent, substantia majus aut minus est. Cupio Filium, ut Filium, Spiritui anteferre; sed mihi hoc non permittit baptismus, per Spiritum sanctum me perficiens. At enim vereris, ne tibi Tritheie crimen impingatur? Habe tu tibi hoc bonum, hanc, inquam, in tribus conjunctionem; certamen ad me trans mitte. Sine me navis extractorem esse, tu nave utere. Quod si alius est navis extractor, domus architectum me accipe; tu animo habita, etsi nihil laboris exantlasti. Non minus prospere navigabis, aut domum habitabis, quam ego, qui hæc fabricatus sum, quamvis in iis nihil elaboraveris. Eni quo animi candore tecum ago! En Spiritus benignitatem! Meum sit bellum: tua sit palma. Ego tellis seriar: tu tranquillus et pacatus sede, propugnatorem tuum precibus juvans; manum per fidem porrige. « Tres lapides habeo¹, » quibus Philistæum funda petam et percutiam: « Tres ad » versus Sarephthæ filium insufflationes habeo², » quibus homines morte sublato ad vitam revocem. « Tres

¹ 1 Reg. xvii, 40. — ² 3 Reg. xvii, 21.

»adversus assulas proluviones habeo¹, » quibus victimam consecrabo, aqua scilicet ignem excitans, quod quidem maxime mirandum est; atque ignominiosos Prophetas mysterii viribus prosternam.

XLIV. Quid longiori oratione opus est? Doctrinæ etenim hoc tempus est, non altercationis et disputationis. « Testificor coram Deo et electis Angelis, » quod cum hac fide baptizaberis. Si alio modo inscriptus es, quam mea doctrina exposcit, veni ac transcribere. Ego horum non incitus atque ineptus sum scriptor, scribens ea quæ mihi inscripta sunt, et docens quæ didici, atque a prima ætate ad hanc usque canitiem servavi. Meum sit periculum, meum quoque præmium, qui animæ tuæ sum dispensator, ac per baptismum te perficio. Sin autem ita te habes, ac pulchris litteris notatus atque iustus es, quæ scripta sunt serva, in obnoxiiis mutationi temporibus circa rem minime mutabilem immutabilis manens. Tu, qui recte conscriptus es, Pilatum qui male scripserat, in meliorem partem imitare. Dic iis, qui te a sententia deducere student: « Quod » scripsi, scripsi². » Puderet enim me profecto, si, cum malum stabile ac firmum maneat, bonum contra facile in deterius flecteretur; cum nos ita comparatos esse vitæ ratione oporteat, ut a vitio quidem ad virtutem facili motu impellamur, a virtute autem ad vitium nullo modo incitemur. Si cum hac sententia et doctrina ad baptismum accedis, « Ecce labia mea non prohibebo³, » ecce manus meas Spiritui commodo. Salutem acceleremus, ad baptismum exurgamus; exilit Spiritus, præsto est initiator, in promptu est baptismus. Sin vero adhuc claudicas, nec Deitatis perfectionem suscipis, quære qui te tingat, vel in malam rem tingat. Mihi enim non vacat Deitatem secare, atque in regenerationis tempore tibi mortem inferre; ut

¹ Reg. XVIII, 34. — ² Joan. XIX, 22. — ³ Psal. XXXIX, 10.

sic nec gratiam habeas, nec gratiæ spem, salute nimirum brevi tempore naufragio amissa. Si cui enim ex his tribus Divinitatem detraxeris, totum everteris, tibi que ipsi perfectionem ademeris.

XLV. At nondum ulla in animo tuo, vel melior, vel deterior littera impressa est; verum hodierno die inscribi te oportet, atque a nobis ad perfectionem informari? Nubem ingrediamur; da mihi pectoris tui tabulas; Moyses tibi ero, etsi hoc insolentius a me dictum videri queat; Dei digito novum Decalogum inscribam; compendiosam salutis doctrinam insculpam. Quod si qua bellua hæretica, et a ratione aversa sit, inferiori loco maneat; aut periculum erit, ne veritatis doctrina tanquam lapidibus obruatur. Baptizabo te, docens, in nomine Patris, et Filii, et Spiritus sancti. Nomen porro unum tribus commune, Deitas. Intelliges, tum ex ipsa rerum specie, tum ex verbis ipsis, te omnem impietatem rejicere, et cum tota Deitate conjungi. Crede mundum universum, tam qui oculis cernitur, quam qui oculorum obtutum fugit, a Deo ex nihilo creatum esse, et Creatoris providentia gubernari, foreque aliquando, ut in præstantiorem statum immutetur. Crede nullam mali essentiam esse, nec regnum, aut principii expers, aut a se ipso subsistens, aut a Deo creatum, sed nostrum opus hoc esse et Pravi illius, malum ex incuria et socordia ad nos irrepsisse, non autem a Creatore. Crede Dei Filium, Verbum illud omnibus sæculis antiquius, atque citra ullum temporis principium, et incorporeo modo a Patre genitum, hunc, inquam, Dei Filium, extremis diebus, hominis quoque filium tua causa factum esse, arcano modo, ac sine ulla spurcitie ex virgine Maria progressum; (nihil enim spurcum, ubi Deus est, et cujus beneficio et opera salus paratur;) totum hominem, eundem et Deum, pro toto homine læso, ut, tota peccati condemnatione

rescisa, tibi toti salutem afferat; impatibilem divinitate, patibilem assumptæ humanitatis ratione; tantum hominem propter te effectum, quantum tu propter illum Deus efficeris; hunc propter iniquitates nostras ad mortem ductum, in crucem sublatum, et sepultura affectum fuisse, (hactenus scilicet, ut mortem gustaret,) tertio demum die ad vitam rediisse, atque in cœlos ascendisse, ut thalami jacentem secum ducat; ac denique gloriosum et illustrem rediturum, ut de vivis ac mortuis iudicium ferat; non jam illum quidem carneum, nec corpore tamen vacantem, sed augustius diviniusque corpus habentem; qualique ipse solus novit, ut, et ab his, « Qui eum pupugerunt ¹, » videatur, et Deus, omnis molis et crassitie expers, maneat. Crede præterea resurrectionem, iudicium, mercedem ad justam Dei lancem exigendam. Hanc porro iis, qui animo et mente purgati fuerint, lucem esse, hoc est, Deum, sese cuique, pro puritatis ratione, spectandum cognoscendumque præbentem, id quod regnum quoque cœlorum appellamus; iis contra, qui animi cæcitate laborant, tenebras esse, hoc est, abalienationem atque aversionem a Deo, pro hebetudinis ac cæcutientiæ modo, qua quisque in hac vita affectus fuerit. Decimo ac postremo loco, super hoc dogmatum fundamento bona opera extrue; quandoquidem « Fides sine operibus mortua est ², » quemadmodum et opera, si fides absit. Habes quæ de mysterio foras exportare, atque ad vulgi aures efferre licet. Cætera intus, Trinitate largiente, addisces, quæ etiam ipsa apud te ipsum tegas, velut ea quæ sub sigillo tenentur.

XLVI. Cæterum illud ex me intelligas velim. Statio hæc, qua confestim a baptismo ante magnum sacrarium stabis, futuræ vitæ gloriam præsignat. Psalmorum cantus, cum quo accipieris, illius hymnodicæ præludium est. Lam-

¹ Apoc. 1, 7. — ² Jacob. 11, 20.

pades, quas accendes, illius luminum gestationis figuram gerunt, cum qua splendidæ et virgines animæ, splendidis fidei lampadibus, « Christo sponso obviam prodibimus ¹, » nec per ignaviam et socordiam dormientes, ne, inscientibus nobis, is, cujus adventus expectatur, inopinato adsit, nec alimento et oleo, bonisque operibus carentes, ne a nuptiali thalamo excludamur. Prospicio enim animo tristem et miseram calamitatem. Aderit ille, « Cum clamor » exortus ², » ut ei obviam procedatur, exigit : hæ quidem quoque prudentes sunt animæ, cum splendido lumine, et uberiori ejus alimonia ipsi occurrent; cæteræ autem in magna perturbatione erunt, oleum ab iis, quibus suppetit, intempestive quærentes. Ille porro festinanter ingreditur : prudentes autem simul introibunt; fatuæ vero, quæ tempus illud, quo ingrediendum erit, in lampadum adoratione consumpserunt, ab ingressu arcebuntur, multumque et graviter ingemiscant, damnum negligentia sua, desidiaque contractum sero intelligentes, cum jam ipsis, quamlibet obnixæ petentibus atque obsecrantibus, nequaquam ultra ad nuptialem thalamum aditus patebit, quem sibi ipsis male præcluserunt; alio quodam modo illos imitatur, qui nuptiis, quas bonus ille pater hono sponso celebrat, interesse recusant, vel propter « Uxorem recens duc- » tam, vel propter agrum nuper emptum, vel propter par- » boum ³, » quæ male acquisierunt, per exiguarum leviumque rerum studium majoribus bonis sese mulctantes. Nec enim illic cuiquam superbo et arroganti homini locus est, nec segni et inerti, nec sordida nuptiisque indigna veste contacto, etiamsi in hac vita splendore illo dignum se censuerit, furtimque se aliis inseruerit, inani spe animum lactans. Quid postea? Cum eo ingressi fuerimus, tum novit sponsus quæ docebit, et quo modo cum animabus iis,

¹ Matth. xxv, 1, et seqq. — ² Ibid. 6. — ³ Luc. xiv, 18, et seqq.

quæ ingredientem comitatæ fuerint, versabitur. Cum iis porro, ut quidem opinor, versabitur, excellentiora et puriora mysteria docens; quorum utinam ipsi quoque participes fiamus, tam qui hæc docemus, quam qui discitis, in ipso Christo Domino nostro, cui gloria et imperium in sæcula. Amen.

ORATIO XLI ¹.

In Pentecosten.

ARGUMENTUM.

I. *Festa non Judæorum aut Gentilium more, sed spirituali modo celebranda.* **II.** *Septenarius numerus a priscis hominibus commendatus. — Deus die septimo ab opere conquievit. — Septem dierum hebdomades Pentecostem pariunt.* **III.** *Septem Spiritus operationes.* **IV.** *Septenarius numerus in Enoch, Abrahamo et Christo consideratus. — Septenarius numerus in aliis rebus consideratus.* **V.** *Pentecoste mysterium magnum et venerandum. — Spiritus sancti auxilium implorat Gregorius.* **VI.** *Mali servi, qui in rerum creatarum ordinem Spiritum sanctum rejiciunt.* **VII.** *Macedonianos alloquitur, qui Spiritum sanctum, nec temporis expertem credebant. — Fraterna charitate cum hæreticis disputandum. — Turpe est, abjectis rebus, de vocibus contendere.* **VIII.** *Benigne cum Macedonianis controversiam init Grego-*

¹ Alias XLIV, quæ autem XLI erat, nunc est I. Habita Constantinopoli in festo Pentecostes anni 381.

rius. — Macedoniarum vitæ genus, abstinentioniam aliasque virtutes laudat Gregorius. — Pro eorum salute anathema esse desiderat. IX. Probatur Spiritus sancti æternitas. — Spiritus sanctus, lux, et lucis largitor; bonitas, et fons bonitatis. X. Honorandus Spiritus sanctus, ac dies ipsi consecratus. XI. Angelicæ Virtutes a Spiritu sancto perfectionem ac splendorem accipiunt. — Patriarchæ et Prophetæ per Spiritum sanctum Deum agnoverunt. — Triplex in Apostolis Spiritus sancti operatio. — Spiritus sanctus dæmonia et morbos depellit. XII. Cur Spiritus sanctus in igneis ac disperitis linguis et in cænaculo apparuerit. XIII. Spiritus sanctus a Prophetis prædicatus. XIV. Rerum creatio Filio et Spiritui sancto communis. — Varii ac benigni in homines. Spiritus sancti effectus. XV. Linguis externis, non vernaculis locuti sunt Apostoli. XVI. Laudabilis ac præclara linguarum divisio. XVII. Multiplex Judæorum captivitas. Ægyptiaca et Babylonica. Romana. Antiochica. XVIII. Peroratio.

I. DE hoc festo pauca disseramus¹, ut spirituali modo festum diem agitemus. Aliud namque alii festum est: Verbi autem cultori, sermo; et ex sermonibus, is, qui temporis maxime congruit. Nec ulla pulchritudo perinde pulchritudinis amantem oblectat, ut festorum amantem spiritualis celebrandorum festorum ratio. Sic autem consideremus. Festos dies Judæus etiam agit, verum juxta litteram; legem enim corpoream consecrans, ad spirituales legem non pervenit. Festos quoque dies gentilis agit, verum juxta corpus, deosque suos et dæmones; quorum alii vitiosarum affectionum effectores atque

¹ Vide D. Guillon, tom. vi, p. 369-373.

architecti sunt, quemadmodum ipsimet asserunt, alii ex vitiosis affectionibus honorem consecuti sunt. Quamobrem modus etiam ille, quo festa celebrant, cum vitiosis affectionibus conjunctus est, ut hoc ipsum quod peccant, in Dei honorem cedat, ad quem, vitium, quasi res quædam honesta et prædicanda, confugit. Festos dies nos quoque agitamus, verum ut Spiritui gratum est. Gratum est porro, eam a nobis rationem iniri, ut eorum, quæ ad festum pertinent, vel aliquid dicamus, vel agamus. Nec feriari nostrum quidquam est aliud, quam animæ aliquid eorum aggerere, quæ firma et stabilia sunt, ac tenentur, non ea autem quæ suffugiunt et dilabuntur, leviterque duntaxat sensum demulcent, magna vero ex parte, meo quidem iudicio, et labefactant, et noxam inferunt. « Sufficit enim corpori malitia sua ¹. » Quid flammæ ampliore materia opus est, aut belluæ copiosiori alimento, ut affrenatior, ac ratione violentior reddatur?

II. Quocirca nobis spiritualiter feriendum est. Orationis porro exordium erit huiusmodi; liceat enim hinc auspicari, etiamsi ab instituto argumento hic sermo nonnihil digredi videatur, atque in studiosorum gratiam elaborare, ut velut condimentum quoddam huius dici solemnitati admisceamus. Septenarium numerum, ex legis Mosaicæ præscripto, Hebræi in honore habent, quemadmodum postea Pythagorei quaternarium, per quem etiam jurare consueverant; atque octonarium et tricenarium Simoniani ac Marcionistæ, quibus etiam et parem Æonum numerum assignant et colunt. Et quidem, qua proportionis ratione, aut propter, quam huius numeri vim ac potentiam, eum in pretio habeant, haud scio, sed tamen habent. Quanquam ea perspicua causa afferri potest, quod cum Deus « Sex dierum spatio » materiam produxisset et informas-

¹ Matth. vi, 34.

set¹, atque omnis generis speciebus et commixtionibus exornasset, mundumque hunc, quem nunc cernimus, condidisset, septimo die ab operibus conquievit, velut ipsum quoque Sabbati nomen indicat, quietem hebræa lingua significans². Quod si circa hæc sublimior quædam est ratio, alii eam explicent. Porro hic honor apud eos, non in diebus tantum est, sed ad annos quoque porrigitur. Ac dierum quidem honor, Sabbatum est³; hoc declarat, quod apud ipsos in perpetuo honore est; cui etiam fermenti su-

¹atio atque submotio pari dierum numero respondet. Annorum autem honor, «Septenarius ille remissionis annus⁴». Nec vero in hebdomadis solum, sed etiam in hebdomadarum hebdomadis, in diebus juxta atque annis. Enimvero dierum hebdomades Pentecosten pariunt, sanctum diem apud illos nuncupatum: annorum autem septimanæ, jubileum annum⁵, sicut ipsi nominant, æquæ, tum terræ remissionem, tum servorum manumissionem obtinentem, et prædiorum emptores possessione sua excedere cogentem. Nam hæc natio, non modo frugum et primogenitorum, sed dierum etiam et annorum primitias Deo consecrat. Eo cultu venerabilis septenarius numerus, Pentecostes cultum una secum innoxit. Septenarius enim in se ipsum ductus, quinquagenarium gignit, uno die excepto, quem ex futuro sæculo assumpemus, octavum eundem et primum; vel, ut rectius loquar, unum et sempiternum. Illic enim præsens animarum nostrarum sabbatismus, desinat necesse est, ut detur pars, illis septem, et illis octo⁶, quemadmodum jam nonnulli majorum nostrorum hunc Salomonis locum exposuerunt.

III. Quanquam autem de septenarii honore multa sint nobis Scripturæ testimonia, pauca tamen e multis producere satis erit. Septem itaque pretiosi Spiritus nominan-

¹ Gen. 1, 1, et seqq. — ² Id. 11, 3. — ³ Exod. xvi, 26. — ⁴ Levit. xxv, 4. — ⁵ Ibid. 8, et seqq. — ⁶ Eccl. xi, 2.

tur. Isaïas enim, ut opinor, Spiritus operationes, Spiritus appellare solet¹. « Eloquia item Domini, juxta Davidem, » septuplum purgata sunt². » Ac justus a necessitatibus sexies liberatur, in septimo autem ne quidem percutitur³. Peccatori autem, « Non septies tantum, sed septuagies » etiam septies noxa remittitur⁴. » Ac rursum ex adversa parte; (nam improbitatis quoque pœna laudabilis est;) de Caïn quidem septies supplicium sumitur, hoc est, fraternæ cædis ab eo pœnæ repetuntur⁵; de Lamech autem septuagies septies⁶, quia, post legem et condemnationem, eadem perpetravit. Eodem pertinet, quod de pravis vicinis scriptum est, « Eos septuplum in sinum suum recipere⁷ » quod etiam de septem columnis⁸, quibus Sapientiæ domus nititur; quod de totidem oculis, quibus Zorobabelis lapis ornatur⁹. Quinetiam, septies in die laudatur Deus¹⁰. » Atque adeo sterilis septem filios, qui perfectus est numerus, parit¹¹, illa, inquam, quæ imperfectæ in filiis opposita erat.

IV. Quod si veteres etiam historias considerare oportet, animadverto septimum inter primævos homines Enoch translationis honore affectum¹². Animadverto item vigesimum primum Abraham patriarchatu ornatum¹³, mysterii majoris accessione. Septenarius enim, ter in se ductus, numerum hunc efficit. Ausit autem fortasse quispiam, juvenili animi impetu fervens, ad novum quoque Adamum venire, Deum, inquam, meum, et « Dominum Jesum » Christum¹⁴, » qui, juxta retrogradam Lucæ descriptionem; a veteri et sub peccato constituto Adamo, septuagesimus septimus numeratur. « Tum septem illas Jesu filii Nave

¹ Isaï. xi, 2. — ² Psal. xi, 7. — ³ Job. v, 19. — ⁴ Matth. xviii, 21, et seqq. — ⁵ Gen. iv, 15. — ⁶ Ibid. 24. — ⁷ Psal. lxxviii, 12. — ⁸ Prov. ix, 1. — ⁹ Zach. iii, 9. — ¹⁰ Psal. cxviii, 164. — ¹¹ 1 Reg. ii, 15. — ¹² Gen. v, 24. — ¹³ Id. xii, 1, et seqq. — ¹⁴ Luc iii, 23.

» tubas¹ » mecum reputo, totidemque circuitus, et dies¹, et sacerdotes a quibus muri Jericho quatiantur. Consimili modo septenam Eliæ prophetæ conversionem, mysticamque illam triplicem insufflationem, qua Sarephthanæ viduæ filio vita inspirata est², ejusdemque numero parem « Super assulas proluvionem³, » tum cum igne divinitus immisso sacrificium assumpsit, atque infames prophetas, qui, ab eo provocati, idem facere nequiverant, obtruncavit. Quo etiam in genere ponenda est « Septenaria illa nū- » his speculatio⁴, » puerulo imperata, et æqualis Elisei circum Sunamitidis filium inflexio, qua vitalis halitus suscitatus est⁵. Ad eamdem quoque, ni fallor, doctrinam pertinet, (ut Septem hastilibus et lucernis⁶ » instructum templi candelabrum præteream,) quod, et sacerdos septem diebus initiatur⁷, et septem item leprosus purgatur⁸, ac totidem diebus templum dedicatur⁹. Eodem denique referendum, quod septuagesimo anno populus ex captivitate reducitur¹⁰, ut quam vim in unitatibus hic numerus habet, eandem quoque in decadibus habeat, ac perfectiori numero septenarii mysterium honoretur. Quid autem longinqua colligo? Jesus ipse, qui pura perfectio est, « Quin- » que panibus » in deserto quinque hominum millia nutrire novit¹¹, ac rursus « Septem panibus quatuor millia¹². » Atque saturitatis reliquiæ, illic quidem duodecim cophini, hic autem septem sportæ : neutrum, opinor, temere, nec aliter, quam Spiritu dignum erat. Quin per te quoque ipse Scripturas pervolvens, multos numeros observaveris, qui profundius aliquid habeant, quam quod prima fronte præ se ferunt. Quod autem præsentī tempori commodissimum

¹ Josuë. vi, 3, et seqq. — ² 3 Reg. xvii, 18, et seqq. — ³ Id. xviii, 34. — ⁴ Ibid. 43, et seqq. — ⁵ 4 Reg. iv, 35. — ⁶ Exod. xxv, 31. — ⁷ Levit. viii, 35. — ⁸ Exod. xxix, 30. — ⁹ 3 Reg. viii, 65. — ¹⁰ Jerem. xxv, 11, et xxxix, 10. — ¹¹ Matth. xiv, 19. — ¹² Id. xv, 34.

est, ob has fortasse, vel his proximas, vel etiam sublimiores quasdam, ac diviniore rationes, Pentecostes diem Hebræi colunt, ac nos item colimus; quemadmodum et nonnullos alios hebraicos ritus observamus, qui apud illos quidem typice celebrabantur, a nobis autem mystice peraguntur. Cum hæc a nobis de die dicta sint, ad ea quæ sequuntur progrediamur.

V. Pentecosten celebramus, ac Spiritus adventum, et præstitutum pollicitationi exequendæ diem, speique impletionem. Ac, bone Deus, quantum est hoc mysterium! Quam magnum et venerandum! Corporea Christi finem habent, vel, ut rectius dicam, ea, quæ ad corporeum ipsius adventum spectabant; vereor enim dicere res ad corpus pertinentes, quoad mihi cujusdam oratio persuaserit, præclarius esse corpus deposuisse. Spiritus autem actiones initium sumunt. Quænam porro ea erant, quæ ad Christum spectabant? Virgo, Nativitas, præsepe, incunabula, Angeli divinam gloriam prædicantes, Pastores accurrentes, stellæ cursus, Magorum adoratio, et munusculum oblatio, infantium cædes ab Herode patrata, ipse in Ægyptum fugiens, ex Ægypto rediens, circumciscus, baptizatus, supernum testimonium consecutus, tentatus, lapidibus propter nos impetitus, (utpote quibus afflictionis pro fide ac recta doctrina subeundæ exemplum dari oportebat,) proditus, clavis affixus, sepultus, vitæ restitutus, ascendens; quorum nunc etiam plurima patitur: ab impiis quidem, ea, quæ ignominiam habent, pro sua quoque lenitate patienter tolerat: a piis autem et Christi amore præditis, ea, quæ cum honore conjuncta sunt. Atque ut illis iram, eodem modo nobis quoque benignitatem differt; hoc fortasse consilio, ut et illis pœnitentiæ spatium concedat, et desiderium nostrum exploret; num scilicet in calamitatibus et certaminibus pietatis causa susceptis, animis

frangemur : quemadmodum jam olim divina dispensationis et impervestigabilium ipsius judiciorum , quibus res nostras sapienter moderatur , est ratio. Atque hujusmodi quidem sunt , quæ ad Christum pertinent ; et quæ postea sequentur , splendidiora conspiciemus , utinamque et ipsi conspiciamus. Ad Spiritus autem mysteria explicanda , Spiritus ipse mihi adsit , tantamque dicendi facultatem tribuat , quantam cupio : aut si non tantam , at certe quæ huic festi celebritati par sit. Ac profecto aderit heriliter , non serviliter , nec jussum atque imperium , ut quibusdam videtur , expectans. Spirat enim ubi vult , et super quos vult , et quando , et quantum. Ex divina nobis est afflatus , ut sic de Spiritu sentiamus et loquamur.

VI. Qui Spiritum sanctum in rerum creaturarum ordinem dejiciunt , contumeliosi sunt et mali servi , atque adeo malorum pessimi. Malorum enim servorum est , imperium rejicere , et adversus dominationem insurgere , atque id , quod liberum est , in eandem secum servitutis classem redigere. Qui autem Deum eum censent , divini profecto viri sunt , ac splendido animo præditi. Qui vero etiam appellant , si quidem apud viros probos , sublimes et excelsi sunt : sin autem apud abjectos et humi provolutos , haud satis prudenter agunt ; utpote qui luto margaritam , et imbecillæ auri tonitruum sonum , et solem infirmis oculis , et lacte adhuc utentibus solidum cibum committant ; cum eos paulatim ad ulteriora promovere , atque ad sublimiora provehere conveniat , lumini lumen largiendo , ac veritati veritatem conciliando. Quocirca nos quoque , perfectiori interim sermone misso facto , (nondum enim tempus id postulat ,) ad hunc modum cum ipsis disseremus.

VII. Si quidem , o viri , nec increatum , nec temporis expertum Spiritum sanctum creditis , spiritu adversario haud dubie afflamini : dabit enim veniam , si zelo com-

motus, asperius aliquod verbum extulero. Quod si hactenus saltem recte sentitis, ac belle valetis, ut manifestam impietatem fugiatis, atque eum, qui nos quoque liberos efficit, a servili ordine eximatis, quod sequitur, una cum Spiritu sancto ac nobis, expendite. Vos quippe quadantenus ipsius participes esse confido, ac jam velut cum nostris simul rem considerabo. Aut mihi aliquid, quod inter servitutem et dominationem interjectum sit, date, ut illic Spiritus dignitatem collocem: aut, cum servitutis nomen fugiatis, non obscurum erit, quo loco atque ordine id, quod exquiritur, ponetis. At syllabas moleste fertis, atque ad vocem impingitis, « Lapisque offensionis et petra scandali » hoc vobis efficitur, nec mirum, cum Christus quoque nonnullis scandalo fuerit. Humanus is quidem affectus. Verum spiritualiter inter nos hanc controversiam transigamus: fraternæ potius charitatis studium, quam nostri amorem præ nobis feramus. Vim Divinitatis ac potentiam nobis date, et nos vicissim Divinitatis vocem vobis concedemus. Naturam aliis vocibus, quibus plus tribuitis, confiteamini; ac vos, ut infirmos curabimus, nonnulla vobis grata et jucunda suffurantes. Etenim turpe quidem illud est, turpe, inquam, ac perabsurdum, cum animo valeatis, circa vocis sonum jejunos et minutos vos præbere, ac thesaurum occultare, quasi aliis eum invidentes, aut metuentes, ne linguam quoque vestram sanctificetis; turpius autem nobis est, eodem vitio teneri, quod vobis objicimus, atque, cum vestram de minutis rebus contentionem damnemus, minute etiam de litteris disputare.

VIII. Trinitatem, o viri, unius Deitatis esse fateamini, aut, si magis placet, unius naturæ; atque hanc vocem, Deus, a Spiritu vobis postulabimus. Dabit enim profecto secundum, qui primum dedit, idque potissimum, si id de

• Isaï. viii, 14, et Rom. ix, 33.

quo pugnatur, spiritualis quædam timiditas fuerit, non autem diabolica contentio. Atque, ut apertius et compendiosius loquar, sic inter nos agamus, ut nec vos, sublimioris vocis causa, nos in crimen vocetis; (nec enim invidia et reprehensione premi debet huiusmodi ascensus;) nec nos vicissim eam vocem, cujus modo capaces estis, vobis objiciemus, quandiu alio itinere ad idem hospitium feremini. Non enim victoriam ambimus, sed, ut fratres, quorum disjunctione cruciamur, ad nos redeant, laboramus. Atque hæc ad vos dicta sint, apud quos vitale quidpiam reperimus, quippe qui sane atque integre de Filio sentiat; quorum, cum vitam mirifice probemus, doctrinam tamen non omni ex parte laudamus; qui cum ea, quæ sunt Spiritus, habeatis, Spiritum quoque insuper assumite, ut non solum certetis, sed etiam legitime, cum hinc quoque coronæ decus comparetur. Hoc vobis morum et vitæ præmium detur, ut Spiritum plene perfecteque confiteamini, ac nobiscum, imo etiam ante nos, quantum æquum est, prædicetis. Atque etiam majus quiddam vestra causa dicere, illudque Apostoli proloqui non dubitabo. Adeo vos amplector atque exosculor; adeo concinnam hanc vestram et compositam vestem reveor, et contractum ex continentia colorem, et sacros hos cœtus, et venerandam virginitatem ac purgationem, et noctes, quas in Psalmorum cantione insomnes transigitis, et propensum in pauperes, et fratres, et hospites studium atque amorem, « Ut anathema etiam a Christo esse¹, » ac non-nihil, ut damnatus, perpeti non recusem; modo nobiscum adjungamini, communibusque animis Trinitatem celebremus. Nam quid de aliis dicam, perspicue mortuis, (quos ad vitam revocare, Christi solius est, qui sua potentia mortuos vivificat,) qui loco male atque improbe distrahun-

¹ Rom. 15, 3.

tur, cum doctrinæ vinculo constricti sint, tantumque inter se contendunt, quantum distorti oculi, unam eandemque rem cernentes, ac non obtutu, sed situ duntaxat inter se dissidentes; si tamen illis distortio et perversitas, non autem cæcitas objicienda est? Postquam autem ad vos utcumque disserui, agendum, ad Spiritum jam ipsum redeamus; ac vos jam, ut opinor, dicentem sequemini.

IX. Spiritus sanctus semper quidem erat, et est, et erit, nec ullo ortu generatus, nec finem habiturus, sed semper cum Patre et Filio conjunctus, atque connumeratus: nec enim conveniebat, ut vel Pater Filio, vel Filius Spiritu sancto unquam careret. Nam alioqui maximum Divinitati dedecus conflaretur, ut quæ ad perfectionem tanquam ex pœnitentia venisset. Erat igitur semper perceptibilis, non particeps; perficiens, non ab alio perfectus; explens, non expletus; sanctificans, non sanctificatus; deificans, non deificatus: ipse semper, et secum, et cum iis, quibus adjunctus est, idem et æqualis; invisibilis, temporis expers, nullo loco inclusus, immutabilis; qualitate, quantitate, forma et tactu carens, se ipsum movens, ac sempiternum motum habens, arbitrii liber, per se potens, omnipotens; (tametsi ad primam causam, ut omnia ea quæ Unigeniti sunt, ita etiam quæ Spiritus sancti sunt, referantur;) vita, et vivificans; lux, et lucis largitor; bonitas ipsa, et fons bonitatis; Spiritus rectus, principalis, dominus, mittens, segregans, templum sibi extruens, viam præmonstrans, arbitrato suo operans, gratiasque dividens; Spiritus adoptionis, veritatis, « Sapientiæ, intellectus, scientiæ, pietatis, consilii, fortitudinis, timoris^a, » quemadmodum numerantur; per quem Pater cognoscitur, et Filius glorificatur, et a quibus solis ipse cognoscitur, una classis, unus cultus, una ado-

^a Isai. xi, 12.

ratio, potentia, perfectio, sanctitas. Quid pluribus verbis opus est? Omnia, quaecumque Pater habet, sunt Filii, præter quam quod ingenitus non est. Omnia quaecumque Filius, Spiritus sancti sunt, si generationem exceperis. Hæc porro substantiam non secernunt, ut quidem ipse sentio, verum circa substantiam secernuntur.

X. Parturis objectiones? At ego orationis cursum. Dicam Spiritui sacrum honori habere; linguam paululum, si fieri potest, comprime. De aliis linguis sermo nobis institutus est; has venerare, aut metus, utpote quæ cum igne appareant. Hodie doceamus; cras argute et artificiose disseremus. Hodie festum agamus; cras inhoneste et indecore nos geremus. Hæc mystice, illa theatrice; hæc Ecclesiis, illa foro; hæc sobriis, illa temulentis; hæc serio agentium sunt, illa adversus Spiritum ludentium. Posteaquam autem aliena submovimus, age, nostra componamus.

XI. Primum igitur Spiritus sanctus in angelicis, et celestibus Virtutibus, iisque, quæ post Deum primæ sunt, eumque circumstant, vim suam exercebat. Neque enim aliunde perfectionem et splendorem habent, idque præterea, ut ad malum ægre, vel nullo prorsus modo moveri queant, quam a Spiritu sancto. Deinde in Patribus et Prophetis, quorum alii Deum per imaginem viderunt, aut cognoverunt, alii autem etiam res futuras præciverunt, impressam nimirum per Spiritum sanctum principem animi partem habentes, et cum futuris tanquam cum præsentibus versantes. Huiusmodi quippe Spiritus vis ac potentia est. Tum in Christi Discipulis; (Christum enim prætermitto, cui aderat, non ut operans, sed ut æqualem comitans;) iisque trifariam, prout ipsorum captus ferebat, tribusque temporibus: nempe, antequam Christus per passionem glorificatus esset: postquam per resurrectionem glorificatus fuit: ac denique post ejus ad cælos ascensio-

nem, sive restitutionem, sive quocumque alio nomine res ea sit appellanda. Hoc autem perspicue ostendit, tum prima illa morborum spirituumque depulso, quæ scilicet non absque Spiritus Numine fiebat; tum illa post confectum salutis nostræ negotium insufflatio, quæ diviniore procul dubio inspirationis specimen habebat; tum postremo præsens hæc ignearum linguarum divisio, quam etiam solemni festo celebramus. Verum primo quidem, obscure; deinde, expressius; nunc vero, perfectius, utpote qui non jam operatione sola præsens sit, ut prius, sed essentiali, ut sic loquar, modo adsit, simulque versetur. Nam cum Filius corpoream nobiscum consuetudinem habuisset, Spiritum quoque corporeo modo cerni conveniebat; et cum Christus ad sese reversus esset, eum ad nos descendere, et quidem ita, ut et, tanquam Dominus, veniret, et, tanquam Deo nequaquam oppositus, mitteretur. Etenim hujusmodi voces non minus concordiam declarant, quam naturam distrahunt.

XII. Idcirco, post Christum quidem accedit, ne Paracletus nobis desit: Alius autem, ut tu honoris æqualitatem cogites. Quod enim ait, Alius, alium, qualis ego sum, constituit. Hoc porro nomen parem imperii gradum indicat, non ignominiam. Vox enim, Alius, non de alienis, sed de iis, quorum eadem substantia est, usurpatur. Jamvero in linguis apparet ¹, propter cognationem eam, quam cum Verbo habet. Cur autem in linguis igneis? Utrum propter purgationem; (ignis autem purgantis Scriptura meminit, quemadmodum cuivis discere promptum est;) an vero propter essentialiam? «Deus enim noster ignis est ², » et quidem ignis improbitatem absumens, discrucieris rursum licet propter Consubstantialem in angustias redactus. Atque in disperditis quidem linguis apparet, ob gratiarum

¹ Act. 11, 3, et seqq. — ² Deut. 10, 24.

diversitatem; sedentibus autem, propter regiae dignitatis excellentiam, ejusque super Sanctos requiem; quandoquidem Deus quoque pro throno Cherubinos habet¹. In cœnaculo vero², (nisi forte curiosius, quam par sit, ista persequi videor,) propter eorum, qui accepturi sunt, ascensionem³, atque a terra subvectionem: nam et cœnacula quædam divinis aquis⁴, a quibus Dei quoque laudes celebrantur, tegi audivimus. Atque ipse Jesus, cum sublimioribus rebus Discipulos initiaret, mysterium ipsis in cœnaculo impertit⁵, ut illud indicetur, et Deum ad nos descendere oportere, quemadmodum olim in Moyse contigisse scimus⁶, et nos ad eum ascendere, sicque Deum cum hominibus consortium inire, dignitate commixta. Quandiu autem uterque in propriis manserit, Deus scilicet in sua specula, et homo in humilitate sua, nec bonitas miscebitur, nec benignitas communicabitur; sed « Erit » magnum et inextricabile chaos interjectum⁷, » non modo divitem a Lazaro, et expetendo illo Abrahæ sinu dirimens, verumetiam procreatam et fluxam atque caducam naturam, ab increata et stabili.

XIII. Hic a Prophetis quidem prædicatus est, quemadmodum ex his Scripturæ locis patet: « Spiritus Domini » super me⁸: » et, « Requiescent super eum Spiritus septem: » item, Descendit Spiritus Domini, et deduxit eos⁹: » ad hæc, « Spiritus scientiæ, » a quo Beseleel¹⁰, tabernaculi architectus, impletus est: ac præterea, « Spiritus ad iracundiam provocatus¹¹: » insuper, « Spiritus » qui Eliam in curru extulit, ac duplex ab Eliseo positulatus est¹²: » adde « Spiritum bonum et principalem¹³, »

¹ Isai. xxxvii, 16. — ² Act. i, 13. — ³ 2 Reg. xviii, 35. — ⁴ Act. ix, 37, et seqq. — ⁵ Luc. xxii, 22, et seqq. — ⁶ Exod. iii, 2. — ⁷ Luc. xvi, 26. — ⁸ Isai. lxi, 1. — ⁹ Id. xi, 2, et lxiii, 14. — ¹⁰ Exod. xxv, 30, et seqq. — ¹¹ Isai. lxiii, 10. — ¹² 4 Reg. ii, 9, et seqq. — ¹³ Psal. l, 14.

quo David deducitur et confirmatur. Promissus autem est; primus quidem a Joële his verbis utente: « Et erit in novissimis diebus: Effundam de Spiritu meo super omnem carnem, scilicet fide præditam, et super filios vestros et super filias vestras¹, » et quæ sequuntur; postea autem ab ipso quoque Jesu; qui, ut « A Spiritu glorificatur², » ita vicissim quoque ipsum glorificat; quemadmodum « Et Patrem glorificat, et a Patre glorificatur³. » Et hæc quidem promissio, quam larga et copiosa est, fore ut « In æternum permaneat⁴; » sive nunc cum his, qui per tempus digni erunt; sive in posterum cum his, qui alterius ævi bonis digni habebuntur; posteaquam videlicet ipsum per honestam et præclaram vitæ rationem integrum servaverimus, ac non hactenus amiserimus, quatenus in peccatum prolapsi fuerimus.

XIV. Hic Spiritus, cum Filio quidem rerum creationem et resurrectionem fabricatur. Suadeat tibi istud: « Verbo Domini cæli firmati sunt, et Spiritu oris ejus omnis virtus eorum⁵. » Et, Spiritus divinus, qui fecit me: Flatus omnipotentis, qui docet me⁶. » Et rursus, « Emittes Spiritum tuum, et creabuntur, et renovabis faciem terræ⁷. » Est etiam ille spiritualis regenerationis auctor. Hujus rei tibi fidem faciat, quod Christus ait: « Neminem regnum videre aut accipere posse, nisi qui per Spiritum desuper renatus fuerit⁸, » ac per diurnam et lucidam creationem, qua per sese quisque fingitur, a priori generatione, quæ noctis arcanum est, purificatus fuerit. Hic Spiritus, utpote sapientissimus, atque hominum amantissimus, si Pastorem nactus fuerit, Psalterium efficit, pravorum spiritus incantantem, atque Israëlitis regem designat⁹. » Si Caprarium moros

¹ Joël. II, 28, et seqq. — ² Joan. XVI, 14. — ³ Id. VIII, 54. — ⁴ Id. XIV, 16. — ⁵ Psal. LXXII, 6. — ⁶ Job. XXXIII, 4. — ⁷ Psal. CIII, 30. — ⁸ Joan. III, 5. — ⁹ I Reg. XVI, 12, et seqq.

vellicantem, Prophetam reddit ¹. Davidem et Amos cogita. Si adolescentem pulchræ indolis acceperit, « Presbyterorum iudicem constituit ², » idque supra quam ætatis ratio ferre videtur. Testis est Daniel, qui leones in lacu superavit. Si piscatores invenerit, Christo irretit, ut orbem universum sermonis retibus complectantur ³. Petrum mihi atque Andream accipe, tonitruique filios, qui spiritalia intonuerunt. Si publicanos, ad discipulatum elucrat, atque animarum negotiatores efficit ⁴. Testis Matthæus, heri publicanus, hodie Evangelista. Si feroces persecutores, zelum commutat, ac Paulus pro Saulis facit, nec minus pios reddit, quam impios offenderat ⁵. Hic et lenitatis est Spiritus; et tamen in eos, qui peccant, incitatur. Proinde lenem ipsum et clementem, non autem iracundum experiamur, dignitatem ipsius confitentes, ac blasphemiam fugientes, nec eum implacabiliter irascentem videre in animum inducamus. Hic me quoque hodierno die præfidentem et audacem præconem reddit: si nihil propterea perpessus sum, Deo sit gratia; si autem perpessus, sic quoque Deo gratia: alterum, ut iis, qui nobis infesti sunt, parcat: alterum, ut nos sanctificet, hoc videlicet evangelici ministerii præmium consecutos, ut cruenta morte perfungamur.

XV. At vero linguis externis, non autem vernaculis, Apostoli loquebantur ⁶, singularique miraculo sermo ab his, qui non didicerant, proferebatur; signumque illud infidelibus erat, non fidelibus, ut infidelium accusator esset, sicut scriptum est: « Quoniam in aliis linguis, et in labiis » aliis loquar populo huic, nec sic exaudient me, dicit » Dominus ⁷. » Audiebant autem. Verum hic paululum

¹ Amos. 1, 1. — ² Daniel. xiii, 45. — ³ Matth. iv, 18, et 21. — ⁴ Id. ix, 9. — ⁵ Act. viii, 3, et seqq. — ⁶ Id. ii, 4. — ⁷ Isai. xxviii, et i Cor. xiv, 21.

consiste, atque ambige quo modo distinguenda sit oratio. Textus enim nonnullam ambiguitatem habet, interpunctione dirimendam. Utrum enim audiebant sua quisque dialecto, ita ut, verbi gratia, vox quidem una emitteretur, multæ autem audirentur, sic videlicet pulsato ac perstrepente aëre, pluribusque vocibus, et, ut magis perspicue dicam, ex una voce effectis: an potius in hoc verbo, «Au-
diebant¹, » punctum statuendum est; atque hæc verba, « Loquentes suis linguis, » cum his, quæ sequuntur, iungenda sunt, ut sic legatur: « Loquentes linguis, » propriis scilicet audientium, hoc est, « externis; » quia etiam sensus mihi magis arridet. Nam in primo quidem sensu, eorum potius, qui audiebant, quam qui verba faciebant, hoc miraculum fuerit; in isto autem, eorum qui loquebantur; utpote qui etiam temulentiae insimulantur, haud dubie, quia ipsi Spiritus operatione novum quoddam miraculum circa voces designabant.

XVI. Quanquam autem laudabilis quoque fuit vetus illa «linguarum divisio²; » cum scilicet male atque impie inter se concordantes erant, qui turrim extruebant, quemadmodum nunc quoque quidam facere non verentur;) dissoluta simul, cum linguarum divortio, animorum concordia, susceptum negotium abruptit; laudabilior tamen est ea, quæ nunc insigni miraculo patrat. Ab uno enim Spiritu in multos diffusa, ad unum concentum rursus connectitur. Atque gratiarum diversitas est, alia gratia opus habens, ad discernendum quænam sit præstantior; quandoquidem nulla est, quæ laude careat. Quin præclara quoque illa divisio dici possit, de qua loquitur David: «Præcipita, Domine, et divide linguas eorum³. » Quid ita? Quoniam «Dilexerunt omnia verba præcipationis, » linguam dolosam⁴; » tantum non aperte huiusce loci ac

¹ Act. II, 6, et seqq. — ² Gen. XI, 1, et seqq. — ³ Psal. CIV, 10. — ⁴ Id. LI, 6.

tempestatis linguas accusans, quæ Divinitatem scindunt. Ac de his quidem hactenus.

XVII. Quoniam autem habitantibus Jerusalem religiosissimis Judæis, Parthis, Medis, et Ælamitis, Ægyptiis et Libycis, Cretensibus et Arabibus, Mesopotamitis et Capadocibus meis, linguæ loquebantur, atque ex omni gente, quæ sub cælo est, Judæis, illic (si cui sic cogitare placet) congregatis, operæ-pretium fuerit videre, tum quinam hi erant, tum cujus captivitatis. Nam illa ægyptiaca et babylonica, præterquam quod circumscripta et certo loco definita erat, jam etiam olim per captivorum reditum soluta fuerat. Illa autem romana, qua temeritatis et audaciæ adversus salutis auctorem pœna expetebatur, nondum acciderat, sed imminebat. Relinquitur igitur, ut hanc captivitatem antiochicam esse censeamus, iis temporibus non multo antiquiorem. Quod si cui hæc expositio minus probatur, ut curiosius alieniusque petita; (neque enim captivitatem hanc veterem esse, neque in multas orbis partes diffusam;) ac probabiliorē quærit, illud fortasse rectius fuerit existimare, quod cum sæpe atque a multis, hæc natio exilii causa solum vertere coacta sit, quemadmodum Esdras litterarum monumentis prodidit, aliæ quidem Tribus in patriam restitutæ fuerint, aliæ vero in exilio relictæ; quibus, ut verisimile est, in multas nationes dispersis, tum temporis quidam affuerint, et Spiritus miraculi participes extiterint.

XVIII. Atque hæc a nobis perpensa et considerata sint, quæ etiam ejusmodi esse arbitramur, ut doctrinæ studiosi, ea pro superfluis supervacaneisque nequaquam habituri sint. Quod si quis aliud quidpiam ad hujus diei solemnitatem contulerit, nobis quoque id collegerit. Sed jam concio quidem solvenda est; (satis enim longe se porrexit oratio;) festi autem celebratio nunquam abrumpenda.

Quin potius festum agendum est, nunc quidem corporeo quoque modo, paulo post autem omnino spirituali; illic nimirum, ubi rationes harum rerum purius apertiusque cognoscemus, in ipso Verbo, et Deo, et Domino nostro Jesu Christo, vero eorum, qui salutem consequuntur, festo et exultatione; cum quo gloria et veneratio Patri cum sancto Spiritu, nunc et in sæcula sæculorum. Amen.

ORATIO XLII¹.

*Supremum Vale, coram centum quinquaginta
episcopis (16).*

ARGUMENTUM.

I. *Concilii patres modeste compellat Gregorius. — Gregorius suæ administrationis rationem reddere paratus. — Fidei doctrina inter pastores et cum pastoribus conferenda.* II. *Tristis Constantinopolitanæ Ecclesiæ, hæreticis florentibus, imago. — Constantinopolitanæ Ecclesiæ grex, exiguus et pastore carens. — Hæreticorum tempestate jactatus.* III. *A Deo fere derelictus. — A Juliano Apostata obtritus. — A Valente imperatore probro et contumeliis affectus.* IV. *Seges olim parva. — Dei tamen oculis magna et copiosa.* V. *Dei benedictione adaucta et multiplicata. — Quemadmodum Joseph in Ægypto multiplicatus, sic Gregorii grex Constantinopoli.* VI. *Ad perfectionem quotidianis incrementis progrediens. — Spiritus vitæ ossibus aridis datus.* VII. *Deus in*

¹ Alias xxxii, quæ autem xlii erat, nunc est xlv. Habita Constantinopoli labente junio 331.

ira percutit, in misericordia glorificat. — Præstantior est fides sub dio degens, quam copiosa ac magnifica impietas. VIII. Impius multitudinem numerat, Deus vasa electionis. — Pietas, communes Christianorum divitiæ. IX. Deus electos suos, Angelorum ministerio, conservat ac protegit. X. Concilii patribus electum gregem offert Gregorius. — Constantinopolitana civitas commune fidei emporium. XI. Constantinopolitanæ Ecclesiæ disciplina. Presbyteri. Diaconi. Lectores. XII. Gregorius curis omnibus gregem suum excoluit. XIII. Spiritus sanctus, Gregorii ministerio, adversarias linguas compressit. — Fidei detrimento, non est paci studendum. — Lex pastoribus præscripta. XIV. Fidei et doctrinæ suæ rationem reddit Gregorius. — Tria pastorum genera. XV. Breve Gregorii doctrinæ argumentum, plebs ab eo instituta. — Doctrina de Trinitate. — Trium personarum una natura. XVI. Catholica fides inter Sabellii et Arii errores medium tenet. — Tribus hypostasibus aut tribus Personis, idem significatur. XVII. Deus non est creatura. — Quidquid creatum est, Deus non est. XVIII. Dei generatio et processio non curiose inquirenda. — Discendum prius quam docendum. XIX. Gregorius purum ac incorruptum sacerdotium Constantinopoli servavit. — Nec honores, nec imperatoris aulam sectatus. XX. Discedendi facultatem pro laborum præmio postulat. — Qualem successorem exoptet. — Inimicus occultus aperto hoste molestior. XXI. Dissidia inter sacerdotes et episcopos ferre non potest Gregorius. XXII. Ecclesiæ dissidia circorum et theatrorum certaminibus comparata. — Non decent senectutem puerorum ludi. — Quæ aliis voluptatem Gregorio mæstiliam gignunt. XXIII. Præteritas Ecclesiæ persecutiones breviter recenset Gregorius, velut crimina sibi objecta. — Gregorii mansuetudo et lenitas. XXIV.

Tenuis Gregorii victus et vestitus vitio vertitur. — Gregorius aliis splendorem et magnificentiam relinquens, sibi solitudinem et Deum eligit. XXV. Enixius discedendi licentiam obtestatur. — Dimissionis libellum ab episcopis postulat. XXVI. Supremum Vale dicit parvæ Anastasiæ, in qua primum fides pene extincta se surrexit: magno sanctæ Sophiæ templo: sacris aliis ædibus: Apostolis: pontificali cathedræ: monachis, virginibus, mulieribus, viduis, orphanis, pauperibus: imperatoribus et aulicis: XXVII. Magnæ civitati: Orienti et Occidenti: Angelis Ecclesiæ tutoribus. — Valedicit demum sanctissimæ Trinitati, quam exorat, ut plebem in fidem servet ac corroboret.

I. Quo pacto res nostræ vobis se habere videntur¹, o chari pastores et collegæ; quorum et «Speciosi pedes sunt, » annuntiantium pacem et bona², » quibuscum huc venistis; et, quantum ad nos attinet, speciosi, utpote, ad quos opportune vos contulistis, non ut errantem ovem in viam reducat, verum ut Pastorem peregrinum invisatis? Quo pacto peregrinatio nostra iudicio vestro se habet? Et quis «Hujus fructus³, vel, ut rectius loquar, Spiritus in nobis » habitantis⁴, quo et semper movemur⁵, » et nunc moti sumus, nihil proprium habere cupientes, nec fortasse habentes? Utrum tandem per vosmetipsos intelligitis, et percipitis, ac benigniores rerum nostrarum censores estis? An contra nobis faciendum est, ut, quemadmodum qui militaris imperii, aut gubernationis popularis, aut pecuniarum administrationis rationem expescuntur, sic nos quoque eorum, quæ a nobis administrata sunt, rationes

¹ Vide D. Guillon, tom. vi, p. 306-317. — ² Isaï. lxi, 7; Nahum. i, 15, et Rem. x, 15. — ³ Galat. v, 22. — ⁴ 2 Tim. i, 14. — ⁵ Act. xvii, 28.

publice vobis reddamus? Nec enim subire iudicium erubescimus, quandoquidem etiam vicissim iudicamus, atque utrumque cum pari charitate. Vetus autem hæc lex est. Nam etiam Paulus « Evangelium cum Apostolis communicabat¹; non ut ambitiose se ostentaret; procul enim ab omni gloriæ cupiditate remotus est Spiritus; sed ut, vel confirmaretur quod recte et cum laude gerebat, vel corrigeretur quod officio deerat; si quid tamen huiusmodi erat in iis, quæ ab eo dicebantur, vel agebantur, quemadmodum ipse ostendit, cum de se ipso ad hunc modum scribit: « Quoniam et Spiritus Prophetarum Prophetis subiunguntur², » juxta constitutum Spiritus ordinem, qui omnia recte dispensat, et dividit. Quod si ille quidem privatim et apud quosdam, ego autem publice et apud omnes iudicium subeo, ne id vobis mirandum accidat. Nam ego ea, quæ ex libera reprehensione percipitur, utilitate magis opus habeo, quam ille, si qua in re officii partes deseruisse videar, « Ne alioqui frustra curram, aut cucurrerim³. » Nec vero aliter defensionis munus recte suscipi potest, quam si apud eos, quibus administrationis meæ ratio cognita est, sermo habeatur.

II. Quæ igitur est nostra defensio? Ac siquidem falsa, coarguite; si autem vera, testimonio vestro confirmate, vos, inquam, quorum causa, et apud quos hæc habetur oratio. « Vos enim mihi estis defensio, et testes, et gloriæ corona⁴, » ut ego quoque ex Apostoli verbis aliquid audacter usurpem. Hic grex exiguus quondam erat et imperfectus, quantum quidem oculorum sensu iudicari poterat, ac ne grex quidem, sed parvum quoddam et tenue gregis vestigium, aut reliquiæ, incompositus, pastore carens, nullis terminis inclusus, nec pascui liberi jus habens, nec caula cinctus, « Oberrans in montibus, in speluncis et ca-

¹ Galat. II, 2. — ² I Cor. XIV, 32. — ³ Galat. II, 2. — ⁴ I Thess. II, 19.

» vernis terræ⁴, » huc illuc dispersus atque disiectus, eo-
que redactus, ut, qua quamque ovem sors tulisset, con-
tingeretur ac pabularetur, præclareque secum agi duceret,
si salutem suam surriperet; non secus videlicet ac grex
ille, quem leones expulerunt, aut tempestas dissolvit, aut
caligo dissipavit; quem et Prophetæ lugent, populi Israë-
litici gentibus traditi calamitatem adumbrantes; et nos
etiam luximus, quædiu luctuoso statu res nostræ fuerunt.
Nam ipsi quoque revera expulsi et projecti fuimus, atque
in montes omnes et colles ob pastoris inepiam dispersi;
ac dira quædam tempestas Ecclesiam invasit, et horrendæ
belluæ in nos impetum fecerunt, quæ ne nunc quidem,
reddita serenitate, nobis parcunt; verum, quæ sunt impu-
dentia, potentiores etiam et atrociores, quam tempus
ferat, se præbent: atque tristis quædam caligo cuncta oc-
cupavit et contextit, multo sane « Nona illa Ægyptiorum
» plaga⁵, » hoc est, palpabilibus tenebris, gravior, præ qua
pene nec alii alios videre potuimus.

III. Atque, ut aliquid, quod majorem commiseratio-
nem redoleat, dicam, eo scilicet, qui nos afflixit, tanquam
parente, fretus: « Abraham nescivit nos, et Israël igno-
» ravit nos: at tu Pater noster es¹: » in te oculos confici-
mus: præter te alium non novimus: nomen tuum invoca-
mus. « Propterea causam dicam, inquit Jeremias, cæte-
» rum judicia loquar ad te⁴. » Facti sumus ut a principio,
» cum non imperares nobis⁶, » et oblitus es testamenti
sancti tui, ac misericordias tuas nobis occlusisti. Propte-
rea opprobrium facti sumus dilecto tuo; nos, inquam,
Trinitatis adoratores, perfecti perfectæ Divinitatis clientes et
supplices; nec eo audaciæ prorumpentes, ut quidquam
eorum, quæ supra nos sunt, ad nos detrahamus et deji-

¹ Hebr. xi, 38. — ² Exod. x, 21. — ³ Isaï, lxiii, 16. — ⁴ Jerem.
xii, 1. — ⁵ Isaï, lxiii, 19.

ciamus; nec ita superbi et arrogantes, ut, quod impia
linguæ ac Deitatis hostes faciunt, dominium in servilem
ordinem nobiscum redigamus: sed scilicet propter alla
scelera nostra, et quia non, ut mandatis tuis dignum erat,
vitæ nostræ rationes instituimus; verum post pravam nos-
tram mentem et cogitationem ambulavimus. Quenam enim
alia causa proferri potest, cur hominibus iniquissimis, at-
que omnium, quos terra fert, sceleratissimis dediti su-
mus? Primus Nabuchodonosor nos obtrivit, ille, inquam,
qui post Christum adversus Christum furore flagravat, at-
que ob eam causam Christum invisum habuit, quia per
eum salutem consecutus fuerat; ac sacros libros cum im-
piis sacrificiis commutavit. « Devoravit me, in partes dis-
» traxit me¹; contexerunt me tenebræ tenues², » ut ne
lucens quidem, a verbis Scripturæ recedam. « Nisi quia
» Dominus adjuvit me³, » atque ipsum, (qualia Dei judi-
cia!) in Persidem ejectum, iniquorum manibus, ut me-
reberatur, tradidisset, imo sceleratus cruor in ultionem
innocentis sanguinis justo effusus fuisset, (hic solum justitia
quidem longanimitate uti non sustinuit,) « propemodum
» habitasset in inferno anima mea⁴. » Secundus nihilo hu-
manior illo fuit, imo eo etiam acerbior, quod Christi no-
men ferens, pseud-christus erat, Christianisque onus
simul et dedecus, quibus et facere impium, et pati inglo-
rium erat; quod ne injuriam quidem accipere viderentur,
nec illustre martyrii nomen cruciatibus accederet; verum
hic quoque fucus veritati fieret, ut qui tanquam Christiani
patiebantur, tanquam impii cruciata afficerentur. Heu me!
quia in malis divites et copiosi extitimus, « Quia ignis spe-
» ciosa terræ comedit. Residuum erucæ comedit locusta,
» et residuum locustæ comedit rubigo⁵; » tum bruchus,

¹ Jerem. LI, 34. — ² Psal. LIV, 6. — ³ Id. XCIII, 17. — ⁴ Ibid. — ⁵ Joel,
I, 4, et 19.

ac postea nescio quod aliud atque aliud malum subinde exoriens. Quid autem omnia illius temporis mala tragica oratione prosequi attinet, eamque, quæ tum nos invasit, sive pœnam dicere convenit, sive explorationem ac purgationem? Cæterum « Transivimus per ignem et aquam¹, » ac benigna Salvatoris voluntate in refrigerium prodimus.

IV. Enimvero, ut eo se, unde digressa est, oratio referat : hæc seges parva quondam et inops erat, ac non modo Deo, qui pulchris pietatis seminibus et doctrinis totum orbem terrarum excoluit, atque excolit, sed ne paupere quidem, ac tenui homunculo digna, ut quidem videbatur : imo nec seges omnino, nec horreis, nec area fortasse, nec falce digna : nec etiam acervi, nec manipuli, aut certe parvi et immaturi, et quales sunt tectorum, nec messoris manum implentes, nec eorum, qui pertranseunt, benedictionem illicientes². Talis seges, tantilla messis nostra erat; magna tamen, et spicis copiosa, et pinguis apud eum, qui abscondita intuetur, et tali Agricola digna habebatur illa, quam animarum valles multiplicant, cum recta doctrina excoluntur; quamvis nec in vulgus nota esset, nec in unum cogeretur, sed paulatim « Colligeretur, non secus ac stipula in messe, et racemulus in vindemia, cum nullus est botrus³. » Quin illa quoque, et quidem admodum tempestive, mihi videor adjecturus : « Ut sicum præmaturam in deserto Israël inveni⁴, » et ut unum aut alterum acinum in immaturo botromaturum, « Domini quidem benedictione servatum⁵, » ac primitiis consecratum, adhuc tamen parvum et rarum, nec os comedentis implentem : atque etiam, ut « Signiferum lignum in colle, et malum navis in monte⁶, » aut

¹ Psal. Lxv, 12. — ² Id. Cxxviii, 6, et seqq. — ³ Mich. vii, 1. — ⁴ Osec. ix, 10. — ⁵ Isai. Lxv, 8. — ⁶ Id. xxx, 17.

si quid aliud est singulare, nec multis conspicuum. Atque hæc quidem pristina nostra paupertas et mœstitia fuit.

V. Ex quo autem tempore Deus, « Qui pauperem facit » et ditat, qui mortificat et vivificat, qui sola voluntate » omnia facit atque immutat, qui ex nocte diem facit, ex » hyeme ver, ex tempestate tranquillitatem, ex siccitate » pluviam¹; » idque plerumque unius justī, diuturna persecutione vexatī precibus permotus; qui denique « Manusuetos in altum suscipit, ac peccatores usque ad terram » humiliat², » illud secum dixit: « Videns vidi afflictionem » Israël³: » nec luto, nec laterum conficiendorum labore diutius opprimuntur: ac locutus visitavit, et visitans salutem attulit, « Populumque suum eduxit in manu potenti » et brachio excelso, in manu Moysis et Aaron⁴ » electorum suorum. Quid sit, et quid mirum perpetratur? Ea nimirum, quæ memoriæ prodita, et Litterarum monumertis commendata circumferuntur. Nam, ut miracula in via edita, magnumque illum strepitum taceam, ac rem uno verbo complectar, « Joseph unus in Ægyptum proficiscitur⁵, » ac « Sexcenta hominum millia » non multo post ex Ægypto excedunt⁶. Quid hoc admirabilius aut illustrius divinæ magnificentiae argumentum, cum ex rebus perditis ac deploratis, iter secundis aperire voluerit? Promissionis terra per unum hominem odio habitum sorte distribuitur, atque is, qui venditus fuerat, gentes sedibus pellit, ipseque in gentem magnam constituitur, ac parva illa propago, « Vineam lata et palmitibus abundans » efficitur, in camquo magnitudinem evadit, ut et « Supra fluvios ascendat, et » usque ad mare extendatur, et a sinibus ad fines dilatetur, » et gloriæ sublimitate montes operiat, et cedrorum magni-

¹ 1 Reg. ii, 6, et seqq.; Amos. v, 8, et 3 Reg. xviii, 45. — ² Psal. cxlvi, 6. — ³ Exod. iii, 7. — ⁴ Psal. cxxxv, 11, et seqq., et cxxvi, 21. — ⁵ Gen. xxxvii, 28. — ⁶ Exod. xii, 37.

» tudinem superet, et quidem cedros Dei⁴, » quicumque tandem montes illi, et quaecumque cedri existimandæ sunt.

VI. Talis quondam hic grex erat, talisque rursum nunc, tamque succulentus, lateque se porrigens; ac si nondum perfectionem assecutus, ad eam tamen quotidianis incrementis progrediens, atque etiam, ut auguror, progressurus. Hoc mihi prædicit Spiritus sanctus, si quid vaticinandi arte valeo, futuraque prospicio. Ac simul ex iis, quæ præcesserunt, spem non dubiam concipio, atque ratiocinatione id percipio, utpote rationis alumnus. Multo enim mirabilius est, quod ex tantillo ad tantam magnitudinem pervenerit, quam ut ex eo statu, quo nunc est, ad summum splendoris gloriæque gradum provehatur. Posteaquam enim semel ab eo, qui mortuos ad vitam revocat, ossa cum ossibus, et commissuræ cum commissuris jungi cœperunt, « Ac aridis ossibus Spiritus vitæ⁵ » et regenerationis datus est, resurrectionem perfecte expleri necesse est: ac proinde, « Qui exasperant, non exaltentur in semetipsis⁶; » nec umbram, aut « Somnium exurgentium⁷, » aut auram perflantem, aut navis vestigia aquis impressa tenentes, quidquam se habere existiment. « Ululet pinus, quia cecidit cedrus⁸ (17). » Ex aliorum malis documentum sibi capiant, ac discant, « Pauperem nequam in finem usque oblivioni fore⁹; » nec Divinitatem sese diutius cohibituram, quin « Procerum capita⁷, » ut Habacuc loquitur, cum stupore dissecet, utpote quæ ipsa quoque dissecta sit, et male divisa in id quod præest, et quod subest; ut sic maxime, et Deitas contumelia afficiatur, in creaturarum ordinem redacta, et res creatæ graventur, Deitati honore adæquatæ.

⁴ Psal. lxxxix, 9, et seqq. — ⁵ Ezech. xxxvii, 7 et 10. — ⁶ Psal. xxv, 7. — ⁷ Id. lxxii, 20. — ⁸ Zach. xi, 2. — ⁹ Psal. ix, 19. — ⁷ Habac. iii, 13, et seqq.

VII. Quin illam quoque ejus, qui contritos colligit, et oppressos ad se recipit, vocem mihi audire videor; « Di-
lata adhuc locum funiculorum tuorum: extende ad dex-
tram et ad sinistram: sige, atriis ne parcas¹. » Ego tra-
didi te, et ego auxiliabor tibi. In parva ira percussi te, in
sempiterna autem misericordia glorificabo te. Major est
mensura benignitatis, quam mensura correptionis. Priora
illa, propter flagitia; hæc, propter Trinitatem adoratam.
Illa, ob purgationem; hæc, ob gloriam meam; utpote qui
« Glorificabo glorificantes me, et ad iram provoco pro-
vocantes me. Ecce hæc signata sunt apud me², » atque
hæc remunerationis inviolabilis lex est. At tu parletes, et
tabulas, et scite atque eleganter incisos lapides, et longas
porticus et ambulacra avide complectebaris, atque auro
fulgebas, et collucebas, illudque partim aquæ instar spar-
gebas, partim quasi arenam aggerebas; nimirum ignorans
præstantiorem esse fidem sub dio degentem, quam copio-
sam et magnificam impietatem, « Ac tres in nomine Do-
mini congregatos³, » plures apud Deum censi, quam
multos Divinitatem abnegantes. An tu universos etiam Chā-
nanæos Abrahamo uni antepones? An Sodomitas uni Lot⁴?
An Madianitas Moysi⁵? Peregrinis, inquam, his et hospiti-
tibus? Quid? « An trecentos illos viros⁶, » qui cum Ge-
deone lamberunt, tot hominum millibus, qui terga verte-
runt, inferiores esse contendes? « An Abrahæ vernaculos⁷, »
numero haud multo plures, multis illis regibus atque
innumerabilibus copiis, quas, quamvis ipsi pauci essent,
persecuti tamen sunt, atque fugarunt? Illud autem quo-
modo intelligendum esse censes: « Si fuerit numerus
filiorum Israël ut arena maris, reliquæ salvæ fient⁸? »

¹ Isai. LIV, 2, 3. — ² 1 Reg. II, 30; Deut. XXXII, 21 et 34. — ³ Matth. XVIII, 20. — ⁴ Gen. XII, 6, et seqq. — ⁵ Exod. II, 15. — ⁶ Judic. VII, 5. — ⁷ Gen. XIV, 14. — ⁸ Isai. X, 22, et Rom. IX, 27.

Quo item modo illud : « Reliqui mihi septem millia viro-
rum, qui non flexerunt genu ante Baal¹ ? » Non est ita,
non, inquam, ita est. « Non in pluribus beneplacitum est
Deo². »

VIII. Tu quidem myriades numeras, at Deus eos, qui
salutem consequuntur; tu infinitum pulverem, ego electio-
nis vasa. Nihil enim apud Deum ita amplum et magnifi-
cum est, ut doctrina perpurgata, et anima veritatis dog-
matibus instructa atque perfecta. Etenim Deo quidem,
« Qui omnia creavit, et a quo omnia, et in quem omnia³, »
nullum satis dignum munus offerri potest; non modo si
unius hominis opus et divitiæ in eam rem impendantur,
sed neque si, omnibus omnium hominum operibus et fa-
cultatibus in unum cumulatis, eum quispiam honore affi-
cere velit. « Nonne cælum et terram ego impleo, dicit
Dominus⁴ ? » Et, « Qualem domum ædificabitis mihi ?
Aut quis locus requietis meæ⁵ ? » Quoniam autem infra
ipsius dignitatem nobis necessario subsistendum est, quod
secundum est, pietatem a vobis postulo, communes illas
apud me, ac æquales divitias, quibus etiam fortasse splen-
didissimum quemque superabit, qui gravi inopia premitur,
si animi magnitudine præstet. Voluntatis enim est hæc li-
beralitas et munificentia, non opum et copiarum. Acci-
piam quidem hæc quoque, ne dubitetis, de manibus vestris.
« Calcare aulam meam non adjicietis, sed calcabunt eam
pedes mansuetorum⁶, » qui recte atque sincere me ag-
noverunt, Verbumque meum Unigenitum, et Spiritum
sanctum. Quousque montem sanctum meum hæreditate
possidebitis? Quousque arca apud Philistæos? Nunc au-
tem aliquantulum adhuc in alienis luxuriate, ac libidinem
vestram explete. Quemadmodum enim me repellendi con-

¹ 3 Reg. xix, 18, et Rom. xi, 4. — ² Psal. cxlvi, 10. — ³ 1 Cor. viii, 6.
— ⁴ Jerem. xxiii, 24. — ⁵ Isai. lxi, 1. — ⁶ Id. xvi, 10, et xxvi, 6.

silium cepistis, « Sic ego quoque vos repellam ⁴, » dicit Dominus omnipotens.

IX. Hæc, et loquentem audire, et facientem sentire mihi videbar; atque insuper ad populum clamantem, ad hunc, inquam, ex parvo magnum jam et copiosum, et ex disperso satis jam coadunatum, et ex miserabili fortassis invidiosum: « Incedite per portas meas, et dilatamini ². » An vos in perpetua ærumna versari oportet, in tentoriis commemorantes, eosque, qui vos opprimunt, immodica lætitia efferri? Tum etiam ad Angelos, quibus hujus urbis cura commissæ est, his verbis utentem: (nec enim mihi dubium est, quin alii « Aliarum Ecclesiarum ³, » Præsides ac patroni sint, quemadmodum in Apocalypsi Joannes me docet:) « Sternite viam populo meo, lapidesque e via projicite ⁴, » ne quod offendiculum aut impedimentum existat, quod divinum populi mei iter atque ingressum removeretur; nunc quidem ad manufacta templa (18), paulo post autem ad supernam Jerusalem, atque illa Sancta Sanctorum, quæ ærumnarum hujus vitæ contentionisque animi finem esse scio, iis, qui rectum iter tenent. « Quo » in numero vos quoque estis vocati sancti, populus eximius, » regale sacerdotium ⁵, » funiculus Domini fortissimus, a gutta fluvius integer a scintilla flamma sublimis, et in cœlum tendens, « A sinapis grano ⁶ » arbor, avium requies.

X. Hos vobis largimur, chari pastores, hos offerimus, his amicos nostros et hospites ac peregrinationis socios excipimus. His nihil pulchrius et illustrius habemus, quod vobis offeramus, cum id, quod in bonis nostris præstantissimum est, exquisiissemus; ut intelligatis nos, licet externos ac peregrinos, inopia tamen minime laborare; « Verum pauperes quidem esse, sed multos locupletare ⁷. »

¹ Osee. iv, 6. — ² Isai. lxii, 10. — ³ Apoc. ii, 1, et seqq. — ⁴ Isai. lxii, 10, et lvii, 14. — ⁵ Rom. i, 6, et i Petr. ii, 9. — ⁶ Matth. xiii, 31. — ⁷ 2 Cor. vi, 10.

Quæ si parva nulloque in pretio habenda sunt, lubens sane audierim quænam majora sint, atque amplioris pretii. Etenim, si civitatem, orbis oculum, terra marique potentissimam, orientalis atque occiduae oræ velut nodum et vinculum, ad quam extremi totius terræ fines concurrunt, et a qua, velut a communi fidei emporio incipiunt; si hanc, inquam, civitatem salutifera doctrina fulciisse ac firmasse haud magnam atque amplum censi debet, idque cum tot linguis omni ex parte agigaretur, vix certe aliud quidquam magnum ac studio dignum videri poterit. Si autem præclarum ac laudabile existimandum est, (liceat mihi quoque per vos nonnihil hoc nomini gloriari,) aliquam ipsi quoque partem his, quæ videtis, contulimus.

XI. Tolle per circuitum oculos tuos, et vide, quisquis es, qui doctrinæ nostræ censuram facis. Vide textam hanc gloriæ coronam, « Pro mercenariis Ephraim et corona » contumeliæ ¹. » Vide presbyterorum concilium, canities et prudentia ornatorum, diaconorum modestiam, non procul ab eodem Spiritu remotorum, lectorum concinnitatem, plebis dicendi studium, tam in viris, quam in fœminis; virtutis honore paribus: ac rursus virorum, tam in philosophis, quam in simplicioribus, omnibus divinarum rerum sapientia præditis; tam in præfectis, quam in subditis, hic videlicet omnibus recte subjectis; tam in militibus, quam in nobilibus, ac studiosis et litteratis, omnibus Dei militibus, cætera quidem placidis et mansuetis, pro Spiritu autem bellicosus, omnibus superiorem senatum honore afficientibus; (ad quem non vilis et abjecta littera, sed vivificans Spiritus aditum, aperit,) omnibus vere doctis et eruditis, ac Verbi cultoribus; tum etiam fœminis, tam quæ in matrimonii jugo Deo magis quam carni astrictæ sunt, quam quæ nuptiarum expertes et liberæ, Deo sua omnia conse-

¹ Isai. xxviii, 1.

cratunt; ac denique tam in juvenibus, quam in senibus, quorum alii ad senectutem præclare gradiuntur, alii vim adhibentes ad comparandam immortalitatem, per meliores spes animo conceptas renovantur.

XII. Hujus coronæ, (quod loquor, non secundum Dominum loquor, sed tamen loquar,) textoribus nonnihil ipse quoque adjumento fui. Horum quispiam sermonum quoque nostrorum opus est; non eorum, quos temere jactavimus, sed quos amore complexi sumus; nec meretriciorum, (ut quidam nos proscindens dixit, homo, et sermone, et moribus meretriciis,) verum admodum etiam gravium et pudicorum. Horum quispiam mei quoque Spiritus fœtus ac fructus est, quemadmodum Spiritus eos, qui animum a corpore abduxerunt, gignere consuevit. Hujus rei non dubito quin candidissimos quosque vestrum testes habiturus sim, aut etiam omnes, quandoquidem labore nostro omnes exculti estis; et Trinitatis confessio, sola est merces quam a vobis expeto. Non enim aliud quidquam quærimus, aut quæsimus. Virtutem enim mercedis expertem esse oportet, ut virtus maneat, nihil sibi præter bonum ipsum proponens.

XIII. Vultis juvenilius aliquid adjiciamus? Videtis-ne adversarias linguas mitescentes, atque eos, qui Divinitati bellum indixerunt, nihil jam turbarum nobis facescentes? Id quoque Spiritus, id quoque agriculturæ nostræ est. Non enim sine disciplina docemus, nec adversarios contumeliis et conviciis incessimus, quemadmodum plerique faciunt, non cum sermone, sed cum loquentibus confligentes, ac rationum et argumentorum infirmitatem maledictis interdum obtegentes; non aliter ac sepias atramentum ante se vomere aiunt, ut piscatores effugiant, aut ipsæ latendo venentur. Verum nos pro Christo bellum gerere hoc argumento planum facimus, quod secundum Christum, « Qui

» mitis ac pacatus est, atque infirmitates nostras portavit¹, »
 diuicamus. Nec enim, veræ doctrinæ detrimento, paci
 studemus, nonnihil remittentes, ut facilitatis et mansuetu-
 dinis famam colligamus; non enim quod bonum est male
 aucupamur: et rursum pacem colimus, legitime pugnan-
 tes, atque intra limites nostros Spiritusque regulam nosmet
 continentes. Ac de his quidem ita sentio, cunctisque ani-
 marum dispensatoribus rectæque doctrinæ arbitris legem
 statuo; ut nec per duritiam hominum animos exasperent,
 nec per submissionem elatos et insolentes efficiant; sed ut
 prudenter et consulte in fidei causa se gerant, nec in ho-
 rum alterutro mediocritatem excedant.

XIV. Sed jam fortasse operæ-pretium est ipsius quo-
 que fidei doctrinam, quæcumque tandem illa apud nos est,
 cupientibus vobis indicare. Nam, et ipse per commemo-
 rationis assiduitatem sanctitate afficiat: et populus hic
 utilitatem consequetur, ex huiusmodi sermonibus, si qua
 alia ex re, mirificam voluptatem capiens: et vos agnos-
 cetis, annon frustra nobis inuideatur, dum in manifes-
 tanda veritate, illos quidem æquare, alios vero antevertere
 contendimus. Quemadmodum enim subterraneæ aquæ,
 partim in imo prorsus occultantur; partim in angustias
 redactæ ebulliunt, atque eruptionem jamjam quidem au-
 ribus pollicentur, cæterum adhuc morantur; partim deni-
 que in altum erumpunt: ad eundem modum eorum, qui
 de Deo philosophantur, (ut eos, qui omnino improbi ac
 perfidi sunt, missos faciam,) alii abditam omnino atque
 occultam sibi ipsis pietatem habent; alii a partus dolori-
 bus non longe absunt, ii nimirum, qui impietatem quidem
 fugiunt, sed pietatem libero atque intrepido animo mi-
 nime prædicant, sive consilio quodam in fidei doctrina
 utentes, sive ob metum atque ignaviam eo confugientes;

¹ sã. LIII, 4, et Matt. XI, 29.

verum animo quidem et mente sani sunt, ut affirmant, cæterum plebis sanitati minime consulunt, perinde atque ipsi sese, non item alios, suæ curæ ac fidei commissos habeant; alii vero thesaurum quoque in medium proferunt, pietatis fœtum, parturientium instar, retinere nequeunt, nec, quod soli ipsi salutem consequantur, salutem existimantes, nisi in alios quoque bonum hoc redundet. Quo in numero utinam ipsi collocer, ac si qui mecum laudabili audacia præditi, et piam doctrinam profiteri non verentur.

XV. Atque unum quidem, idque breve, doctrinæ nostræ argumentum, ac velut in columna insculptum, omnibusque notum, est hic populus, adeo verus ac sincerus Trinitatis adorator, ut ab hac potius vita divelli se passurus sit, quam ut trium horum aliquid a Divinitate disjungat: eadem omnes fidei sententia præditi, eodem zelo flagrantes, una et eadem fidei doctrina, et inter se, et nobiscum, et cum Trinitate conjuncti atque connexi. Ut autem brevī singula percurram, quod principii expers est, et principium, et id quod cum principio est, unus est Deus. Nec vero, principio carere, ejus, quod principio caret, natura est; aut etiam ingenitum esse. Nullius enim rei natura ex eo declaratur, quod dicamus, quid non sit, sed quid sit. Est enim ejus, quod est, positio; non autem ejus, quod non est, sublatio: nec principium, eo quod principium est, ab eo, quod principio caret, dirimitur; non enim principium ipsi natura est; quemadmodum nec illi, quod principii expers sit. Circa naturam enim hæc considerantur, non autem natura ipsa sunt. Eodem modo id, quod cum principii experte, et cum principio est, nihil omnino est aliud, quam quod illa. Nomen autem principii experti, Pater: principio, Filius: ei autem, quod cum principio est, Spiritus sanctus. Una autem his tribus

natura Deus est. Unio vero est Pater, ex quo, et ad quem ea, quæ deinceps sequuntur, referuntur; non ut confundantur ac permisceantur, sed ut cohæreant; utpote quæ, nec tempore, nec voluntate, nec potentia secernantur ac distinguantur. Hæc enim tria, ut multa simus, effecerunt, singulis nempe, et secum, et cum aliis, dissidentibus. At quibus et simplex natura, et eadem essentia est, his proprie quoque unius vox convenit.

XVI. Ac contentiosas quidem et pertinaces fidei in alterutram partem deflexiones, et compensationes valere sinamus; nec per unum, ut Sabellius, tria convellentes, et per nefariam contractionem, divisionem tollentes; nec rursus per tria, Arii instar, unum oppugnantes, ac per improbam divisionem, unum evertentes. Neque enim id a nobis quæritur, ut malum malo permutemus, sed ut a bono minime aberremus. Nam profecto diaboli ludi hæc sunt, perniciose res nostras ponderantis. Nos vero media et regia incedentes via, in qua virtutes quoque, ut harum peritis placet, sitæ sunt, credimus in Patrem, et Filium, et Spiritum sanctum, ejusdem substantiæ et gloriæ; in quibus et baptismo sua perfectio constat, tam in nominibus, quam in rebus; (hæc non ignoras, quisquis eo initiatus es;) quippe quod impietatis abjuratio, et Divinitatis confessio sit, atque ita perficimur; unum quidem, quoad essentiam ac divisionis omnis expertem adorationem, credentes; tria autem, quantum ad Hypostases, siye Personas, ut nonnulli malunt. Desinant enim, qui de his inter se contendunt, ineptire, perinde ac si fidei nostræ pietas in nominibus, non in rebus, consistat. Quid enim dicitis, qui tres Hypostases assertis? An hoc eo dicitis, quod tres essentias existimetis? Non est apud me dubium, quin adversus eos, qui ita existimant, ingentem clamorem excitaturi sitis. Unam enim et eandem horum trium essentiam

profitemini. Quid vos, qui Personas dicitis? Num unum, velut quiddam compositum, animo fingitis, ac tres facies, aut humanam omnino formam habens? Absit, ipsi quoque inclamabitis, nec faciem quidem Dei, quæcumque tandem illa est, unquam ille videat, qui ita sentit. Quid igitur, ut interrogare pergam, vobis Hypostases volunt, aut vobis Personæ? Nimirum tria esse, quæ dividantur, non naturis, sed proprietatibus. Optime. An fieri potest, ut quidam magis inter se concordent, atque idem dicant, quam cum ita sentiunt, tametsi alioqui syllabis discrepent? Videte qualem vobis pacificatorem me præbeam, a littera ad mentem traducens, quemadmodum si quis Vetus Testamentum et Novum componat et conciliet.

XVII. Sed eo, unde digressi sumus, redeundum est. Ingenitus quidem, et Genitus, et Procedens, dicantur sane et intelligantur, si cui nomina fingere libeat: non enim verebimur, ne ea, quæ corpore carent, corporeo modo intelligantur, quemadmodum iis placet, qui Deitati calumniam inferunt. At creatura, Dei quidem dicatur; nam id quoque nobis amplum et honorificum est: Deus autem, nequaquam. Alioqui, tum Deum creaturam esse admit- tam, cum ipse quoque proprie Deus fuero. Sic enim se res habet. Si Deus est, creatura non est; creatura enim nobiscum est, qui Dii non sumus. Si autem creatura est, utique Deus non est; temporis enim ratione ortum habuit. Quod autem ortum habuit, aliquando non erat. Quod vero in ea causa est, ut id, quod non erat, eo antiquius sit, hoc certe proprie non est. Quod autem proprie non est, quo tandem modo Deus esse queat? Ergo nec quidquam horum trium creatura est; nec, quod eo deterius, propter me creatum est. Alioqui non modo creatura esset, sed etiam nobis abjectior atque contemptior. Nam si ego ad Dei gloriam conditus sum, hoc autem propter me, (forceps

utique propter currum efficitur, aut sera propter januam,) sequitur profecto, ut respectu causæ sim superior. Quanto enim Deus rebus creatis est sublimior, tanto id, quod mea causa creatum est, me, qui propter Deum effectus sum, vilius atque ignobilius est.

XVIII. Propterea, Moabitis quidem et Ammonitis nec aditus ad Ecclesiam Dei pateat, hoc est, dialecticis et impiis sermonibus, qui Dei generationem ac processionem, quæ nullis verbis explicari potest, curiosius scrutantes, adversus Divinitatem temere insurgunt; perinde scilicet, ac si ea, quæ vim omnem et facultatem verborum superant, ab ipsis solis percipi posse oporteat; vel omnino non esse, quoniam ipsi ea intellectu assequi nequeant. Nos autem Scripturæ divinæ vestigiis hærentes, atque obscura loca, quæ cæcutientibus molestiam exhibent, submoven-tes, consertis manibus salutem retinebimus, priusque omnia audacter perferemus, quam ut adversus Deum temere atque arroganter aliquid aggrediamur. Et quidem Scripturæ testimonia aliis relinquemus, cum a multis jam sæpe litteris mandata, tum etiam a nobis haud perfunctorie et negligenter. Ac simul, mea quidem sententia, turpe admodum fuerit, nunc earum rerum, quæ jampridem certo exploratæ sunt, argumenta colligere. Neque enim optimus ordo est prius docere, ac postea discere; non dicam divina, et usque adeo magna et sublimia, sed ne aliud quidem quidquam parvum et contemnendum. Offendicula etiam e Scripturis objecta solvere, et explanare, non est præsentis temporis, sed majoris et perfectionis studii atque operæ, quam pro præsentis instituto. At fidei quidem nostræ doctrina, ut summatim complectar, talis est. Atque etiam hæc ipsa non eo commemoravi, ut cum adversariis confligerem; (jam enim sæpe confliximus, etsi moderate;) verum ut doctrinæ meæ formam vobis osten-

derem, annon vestrorum dogmatum propugnator ego sim, atque adversus eosdem, et pro iisdem in acie stem.

XIX. Habetis, o viri, nostri in hanc urbem adventus apologiam: quæ siquidem laudem meretur, Dec, et vobis, quorum accitu huc veni, gratiam habeo; sin autem spem vestram minus implevi, sic quoque gratiam habeo. Non enim omnino vituperanda est, ut mihi persuadeo, ac vobis id affirmantibus fidem haud abrogo. Numquid populum hunc per avaritiam circumvenimus? Numquid privatis utilitatibus consulimus, quemadmodum multos facere video? Numquid Ecclesiam molestia affecimus? Alios quidem fortasse, quibus, cum se indicta causa victoriam adversum nos obtinuisse arbitrarentur, sermonem nostrum objecimus: at vos nihil profecto, quantum quidem mihi conscius sum. « Non bovem vestrum accepi, ait magnus » Samuël, cum Israël propter regem contendens: non » animarumstrarum piaculum, testis inter vos Deus¹: » non hoc atque aliud, plura commemorans, ne singulis enumerandis longius orationem producam; verum purum minimeque adulterinum sacerdotium custodivi. Quod si principatus, aut sublimium thronorum studio ductus sum, aut imperatorum aulas calcare appetii, nunquam aliud quidquam splendoris consequi mihi contingat, aut, si consecutus fuero, statim illud projiciam atque amittam.

XX. Quid igitur est, quod dico? Non enim gratuitus virtutis sum cultor, nec in eam virtutis magnitudinem perveni. Laborum præmium mihi date. Quod tandem? Non quod nonnulli fortasse ex iis, qui ad quidvis suspicandum facile adducuntur, existimarint; sed quod mihi tuto postulare licet. Diuturnis laboribus nos levate, ac recreate. Moveat vos hæc canities; sit apud vos honori nostra peregrinatio. Alium subrogate, qui pro vobis vexetur, qui puris

¹ 1 Reg. xii, 2, et seqq.

sit manibus, qui voce non inerudita, qui omnibus in rebus vobis obsequi, curasque ecclesiasticas simul perferre possit (19); quandoquidem tales præsertim hoc tempus flagitat. At mihi cernitis quo modo corpus etiam hoc se habeat, nimirum et tempore, et morbo, et labore confectum. Quid vobis timido et ignavo sene opus est, atque in dies singulos, ut ita loquar, non corpore tantum, sed etiam curis moriente? Qui vix hæc quoque ad vos loquor? Ne magistri voci fidem denegetis; neque enim unquam dene-gastis. Lassus sum, dum toties mansuetudo crimini vertitur. Lassus sum, dum, et cum sermone, et cum invidia, et cum hostibus, et cum nostris pugno. Illi pectora feriunt, et minus, quod cupiunt, assequuntur; nam qui apertas inimicitias gerit, facile caveri potest. Hi autem terga observant, et magis molesti sunt; nam qui minime suspectus est, letalius vulnus infert. Quod si etiam nauclerus, et quidem peritissimus essem: atque hinc effusum mare in nos sæviret, ac circum navem æstuareret: hinc vero gravi seditione vectores laborarent, alique de alia re contenderent, atque, et sibi ipsis mutuo, et fluctibus obstreperent, quandiu tandem ipse obluctari possem ad gubernacula sedens, ut simul, et cum mari, et cum vectoribus pugna-rem, atque ex duplici tempestate navem sine periculo eriperem? Quibus etenim omni ratione connitentibus et adjuvantibus, salutem tamen consequi difficile esset, iisdem inter se dissidentibus et confligentibus, qui tandem fieri posset, ut navis pessum non iret?

XXI. Quid alia commemorare attinet? Quo tandem modo sacrum hoc bellum feram? Dicatur enim etiam quoddam bellum sacrum (20), quemadmodum et barbaricum. Quomodo hos adversis thronis insidentes, atque adversas in pascendo grege partes foventes connectam, atque in unum adducam, populumque simul cum ipsis

abruptum, studiisque contrariis distractum; quemadmodum in iis hiatibus, qui ex terræ motibus accidunt, vicinæ et propinquæ partes simul moveri solent; aut in pestiferis morbis famuli ac domestici simul abripiuntur, morbo nimirum ab aliis ad alios facile dimanante. Nec populum solum, sed etiam orbis terræ segmenta, eodem cum dissidentibus affectu commota, ita ut jam in duas contrarias partes Oriens et Occidens secreti atque divisi sint, nec jam minus animorum et voluntatum, quam finium segmenta esse videantur? Quousque enim hæc audientur, Meus et tuus, antiquus et novus, facundior aut spiritualior, nobilior aut ignobilior, multitudine opulentior aut tenuior? Erubescerem canitiem meam, si, a Christo salvatus, ab aliis nomen ducerem.

XXII. Non fero circos vestros, et theatra, atque æmulum hunc tam in sumptibus, quam in animorum studiis, furorem. Equos transjungimus, contra jungimus, certatim fremimus, propemodum etiam aërem ipsum verberamus, ut illi, pulveremque in cælum tanquam insani jacimus; ac sub alienis personis contentiones nostras explemus; malique ambitionis et munificentiae arbitri efficimur, atque iniqui et absurdi rerum iudices. Idem enim homines hodie pari nobiscum sacrorum fideique commercio communicantes, si ita nos duces et antistites nostri tulerint; cras contrariæ sedis et sententiæ sunt, si ventus reflaverit. Odium atque amicitiam nomina comitantur; nec, quod gravissimum est, apud eosdem auditores contraria loqui erubescimus; nec nobis ipsis constamus, cum subinde nos contentio immutet. Dicas Euripos quosdam esse, nunc exundantes, nunc reciproco fluctu subsidentes. Quemadmodum igitur si adolescentuli in medio foro lusitarent, turpe admodum esset, nobisque indignum relictis nostris studiis, vitæque institutis, cum illis ludere; (neque enim puero-

rum ludi senectutem decent;) eodem modo nec si, aliis mihi tuo sese versantibus atque jactantibus, melius quiddam ipse quam vulgus sentiam, unus eorum esse malim, quam, ut sum, cum obscuritate liber. Ac præterea ita quodammodo afficior, ut non admodum mihi cum vulgo conveniat, nec eandem viam ingredi sustineam; rusticius id quidem fortasse atque imperitius, sed tamen ita afficior. Ea, quæ aliis voluptatem gignunt, mihi molesta sunt; quæ autem aliis tristia et injucunda videntur, ea animum meum oblectant. Quocirca, ne hoc quidem mihi mirum fuerit, si vinculis etiam astringar, ut incommodus et morosus, ac plerisque desipere videar, quemadmodum ethnico cuidam philosopho accidit, cui prudentia quasi insania vitio vertebatur, quoniam omnia irridebat, risu videlicet ea digna esse perspicuens, quæ a multis summo studio expetuntur: aut etiam musto plenus esse censear, ut postea Christi Discipuli, cum linguis loquerentur¹; ignorante scilicet multitudine id Spiritus vi et facultate fieri, non mentis aberratione.

XXIII. Jam crimina quoque nostra, quæso, expendite. Tanto jam tempore, inquit, Ecclesiæ præses, temporis auxilio fultus, atque Imperatoris favore, tanta re, ac tanti momenti. Ecquod mutationis signum nobis affulsit? Quot homines contumeliis nos prius affecerunt? Quid non acerbitatis passi sumus? Annon injurias? Annon minas? Annon exilia? Annon pecuniarum direptiones? Annon bonorum proscriptiones? Annon presbyteri in medio mari combusti (21)? Annon templa Sanctorum cruore contaminata, et ex templis in sepulcra immutata? Annon publicas senum episcoporum, aut, ut aptiore verbo utar, Patriarcharum cædes? Annon illud, ut piis solis inivius omnis locus esset? Annon denique quidquid calamitatis ullis verbis quisquam consequi possit? Quorum quidnam iis, qui

¹ Act. II, 4, et seqq.

hæc fecerunt, rependimus? Quandoquidem versis, ut par erat, rerum vicibus, rependendi potestas nobis facta est, atque eos, a quibus per summam contumeliam vexati fueramus, castigari oportebat. Et, ut omissis aliis, nostra, ne dicam tua, commemoremus, nonne persecutionem passi sumus? Nonne contumeliis omnibus affecti? Nonne Ecclesiis, domibus, et quod acerbissimum est, solitudinibus ipsis pulsi sumus? Nonne furentem populum tulimus? Contumeliosos præfectos? Imperatores simul cum edictis suis contumeliose spreto? Quid postea? Fortiores extitimus, et persecutores nostri pœnam effugerunt. Ita sane est, inquam. Mihi enim adversus eos, qui injuriam intulerunt, satis gravis pœna est, referendæ injuriæ potestas. At istis aliter videtur; perquam enim exacti ac justis sunt ad ulciscendum; atque idcirco ea, quæ temporis sunt, exigunt. Quis præfectus mulctatus est, inquit? Quis populus castigatus? Qui plebis inflammatores? Quem nostri terrorem adversariis in posterum injecimus?

XXIV. Quin hæc quoque fortasse nobis exprobraverint; (jam enim exprobrarunt;) quod nec lauta et opipara mensa, nec magnifica veste utimur, nec splendide in publicum prodimus, nec eos, qui nos adeunt, graviter ac fastuose excipimus. Nesciebam scilicet, nobis cum consulibus, et præfectis, clarissimisque bellî ducibus, qui tot opibus copiisque circumfluunt, ut, quo sua projiciant, non habeant, æmulationem et certamen esse; illudque oportere, ut et nobis, pauperum bonis ad luxum et delicias abutentibus, venter undique comprimatur, et necessaria in res superfluas effundantur, atque altaria ipsa ruitibus nostris contaminentur. Nesciebam nos equis insignibus et lascivis ferri, sellisque et curribus magnifice attolli, ac cum fastu et pompa deduci, velutque blanda manu demulceri oportere, atque omnes nobis, perinde

ac belluis, de via decedere, et in utramque viam partem scindi ac distrahi, aut etiam tantam præeuntium turbam esse, ut procul incessus noster magnificus appareat. Si hæc gravia vobis et acerba fuere, præterierunt : hanc injuriam mihi condonate. Antistitem alium, qui multitudini placeat, create : mihi autem date solitudinem, et rusticitatem, et Deum, cui soli etiam per tenuem victum cultumque placebimus. At grave est concionibus, et cæstibus, et publicis conventibus, et plausibus his, a quibus quasi pennis in sublime ferimur, et familiaribus, et amicis, et honoribus, et urbis pulcritudine ac magnitudine, et hoc denique fulgore, qui eos, qui hæc intuentur, nec oculorum aciem intro collectam habent, circumfundit et illuminat, privari. Verum hoc mihi minus grave fuerit, quam si diutius in tumultu verser, ac civilis vitæ turbis et fervoribus commaculer, atque ad vulgi mores me ipsum inflectere necesse habeam. Non enim sacerdotes, sed rhetores quærunť; nec animarum dispensatores, sed pecuniarum custodes; nec puros sacrificos, sed fortes ac robustos defensores. Nonnihil eos excusabo : sic eos erudivimus, « Qui omnibus omnia efficimur¹, » haud scio utrum, ut omnes salvos faciamus, an ut perdamus.

XXV. Quid dicitis? Num vos his verbis permovemus, ac victoriam obtinuimus? An potius ad vestros animos inflectendos validior nobis adhibenda est oratio? Vos ergo per trinitatem ipsam, quam nos colimus, et vos colitis, per communem nostram spem, atque hujus populi coagulationem obtestor : hoc mihi beneficium date : cum precibus me dimittite : hoc mihi sit dimicationis præconium : missionis libellum mihi date, quemadmodum imperatores militibus solent; ac, si quidem vestra voluntas tulerit, cum fausto et præclaro elogio et testimonio, ut

¹ 1. Cor. ix, 22.

honori meo consulatur; sin minus, utcumque vobis collibuerit: nihil ea re altercabor, quandiu Deus rerum nostrarum statum inspectabit. Dicit aliquis: Quom igitur tibi substituemus? Videbit sibi Dominus pastorem ad præfecturam, quemadmodum ovem vidit ad holocaustum. Hoc unum requiro, ut talis sit, qui æmulationem, non miserationem provocoet; qui non in omnibus rebus cunctis obsequatur, sed qui in quibusdam etiam ob recti studium in hominum offensionem incurrat. Alterum enim in præsens jucundissimum est; alterum in posterum utilissimum. At vos quidem orationes discessui meo congruentes parate; ego autem his verbis extremum vos salutabo.

XXVL Vale, Anastasia, nomen a pietate habens. Tu enim nobis fidei doctrinam, quæ adhuc contemptui erat, excitasti. Vale, inquam, communis victoriæ sedes, « Nova » Silo¹, in qua primum arcam fiximus, quadraginta annis in deserto circumactam incertisque sedibus vagantem. Vale tu quoque, o magnum hoc et nobile templum, nova hæreditas, quod magnitudinem, quam nunc habes, a Verbo suscepisti, quodque nos, cum prius Jebus esses, Jerusalem effecimus. Valetate vos etiam aliæ sacræ ados, huic dignitate proximæ, alia aliam quamdam orbis partem complectentes, quasi vincula quædam et compages, propinqua etiam loca connectentes; quas cum hac corporis imbecillitate, « Non nos, sed Dei gratia nobiscum², » qui pro perditis ac desperatis habeamur, implevit. Valetate, Apostoli, præclara colonia, centurionis mei magistri, et si minus sæpe festa vestra celebravi, fortasse « Pauli vestri » Salanani³ ad utilitatem meam in corpore circumferens, ob quem nunc a vobis abscedo. Vale, Cathedra, invidiosum hoc et periculosum fastigium, pontificum concilium, sacerdotum non minus majestate quam potestate.

¹ Josué. XVIII, 1. — ² 1 Cor. XV, 10. — ³ 2 Cor. XII, 7. c.

et quicumque tandem alii circa sacrosanctam mensam Deo ministratis, atque ad appropinquantem Deum appropinquatis. Valeto, Nazaræorum chori, Psalmodiarum concentus, nocturnæ stationes, virginum sanctimonia, mulierum modestia, viduarum et orphanorum cœtus, pauperum oculi, in Deum, et in nos intuentes. Valete, domus hospitales, et Christi amantes, infirmitatisque meæ adjutrices. Valete, sermonum meorum amatores, et cursus, et concursiones, et styli, tam perspicui, quam occulti, atque hujus suggesti cancelli, a multitudine compressi hominum, audiendi studio sese mutuo protrudentium. Valete, imperatores, et palatia, omnesque imperatoris famuli et cubicularii: si quidem imperatori fideles, haudquaquam certum habeo; Deo autem magna ex parte infidi. Manibus plaudite, acute clamate, rhetorem vestrum in sublime tollite. Siluit vobis improba et loquax lingua; nec tamen omnino silebit. Pugnabit enim manu et atramento. Cæterum in præsentia consiluimus.

XXVII. Vale, civitas magna, et Christi amore prædita; (vera enim testabor, etsi « Non secundum scientiam hic » zelus est¹; » benigniores nos disjunctio reddidit.) Ad veritatem accedite; ad meliorem frugem tandem aliquando vos convertite. Deum, amplius quam consuevistis, colite. Non turpé est sententiam mutare; sed in malo perseverare, funestum et exitiosum. Vale, Oriens et Occidens, pro quibus et a quibus oppugnamur; testis ille est, qui pacatos vos reddet, si nonnulli secessionem meam imitentur. Non enim Dei quoque jacturam facient, qui thronis cesserint; sed supernam cathedram habebunt, his multo sublimiorem et tutiorem. Præter omnia, et ante omnia, clamabo: Valete, Angeli, hujus Ecclesiæ præsides, meæque præsentiae ac peregrinationis, si modo in manu Dei res

¹ Rom. I, 2.

nostræ sunt. Vale, Trinitas, meditatio mea, et decus meum. His velim serveris, et hos serves, meum hunc populum; (meus enim est, etiamsi aliter gubernemur;) atque audiam te quotidie, tum sermone, tum vita et moribus augeri, et in sublime attolli. Filioli, « Depositum, » quæso, custodite¹: memores estote lapidationum mearum². » Gratia Domini nostri Jesu Christi sit cum omnibus vobis. Amen.

ORATIO XLIII¹.

Funebris oratio in laudem Basilii Magni Cæsareæ in Cappadocia episcopi.

ARGUMENTUM.

I. *Basilii vita ab orationibus celebranda. — Basilii encomium, opus ipsis oratoribus arduum. — Viris virtute præditiis debetur laudis tributum.* II. *Postulat Gregorius ut sibi ignoscatur, quod tam sero istud tributum Basilio persolverit. — Nec negligentia, nec contemptu istud amicitiae officium prætermisit. — In vere doctrinæ periclitantis negotio occupatus.* III. *Basilii genus laudatur. — Basiliius paterno et materno genere celeberrimus.* IV. *Insignis majorem Basilii pietas.* V. *Maximinii persecutio, omnium persecutionum acerbissima.* VI. *In*

¹ 2 Tim. vi, 20. — ² Coloss. iv, 18. — ³ Alias xx, quæ autem xliii erat, nunc est xlii. Habita Cæsareæ circa mensem augustum, vel septembrem anni 381.

persecutionibus, nec ultro ad certamen accedendum, nec ab illo detrectandum, cum præsens est. — Quidam nobiles, persecutionis tempore, ad montes et sylvas se recipiunt. VII. Omnibus vitæ deliciis privati, murmuratores Israëlitas non imitantur. — Prodigia Israëlitis præstita recensent. — Nova miracula in eorum gratiam operatur Deus VIII. Quantum Dei miracula discrepent ab insulis ethnicorum fabulis. IX. Parentum Basilii in liberis felicitas. X. Basilii parentes pietate celeberrimi. — Omnis honor, lege divina, parentibus debetur. XI. Doctrina inter humana bona primis tenet. — Non ideo contemnenda doctrina, quia pravi homines ea abutuntur. — Cur doctrinam nonnulli improbent. XII. Prima Basilii institutio. — Liberales artes docetur, et ad Dei cultum excolitur. — Parentum virtutes assecatur. XIII. Cæsaream Cappadociæ litteris celeberrimam contendit. — Magistros æquat, æquales superat. XIV. Byzantium et mox Athenas proficiscitur. — Mutua Gregorii et Basilii amicitia Athenis conflata. XV. Communia utriusque studia. — Insinum Athenis adolescentium erga sophistas studium. XVI. Attica consuetudo circa tyrones. — Basilii a communi tyronum lege solvitur. XVII. Armeniorum mores. — Armenii Basilio invident. — Armenis in disputationem favet Gregorius. — Agnita Armeniorum nequitia, Basilii partes suscipit Gregorius, eique victoriam asserit. XVIII. Victi Armenii Gregorio irascuntur. — Luget Basilius, quod res opinione sua essent inferiores. XIX. Arcissima inter Basilium et Gregorium amicitia. — Instabiles corporum amores. — Pudici amores stabiles. XX. Nulla inter Gregorium et Basilium de doctrina rivalitas. — Empedocles et Anaxagoras. — Unum opus et studium utrique virtus erat. XXI. Basilius et Gregorius festa, spectacula et convivia respuunt.

XXII. *Basilii et Gregorius per totam Græciam celeberrimi.* XXIII. *Eximie Basilii dotes. — Basilii excellit in rhetorica, in grammatica, in philosophia, in astronomia et geometria, in medicina, quam morbi docuerunt.* — *Basilii virtus et doctrina.* XXIV. *Basilii et Gregorius Athenas relinquere et perfectionem vitam aggredi statuunt. — Sodales obsistunt. — Discedendi facultas Basilio conceditur, negatur Gregorio. — Gregorius Athenas relinquit.* XXV. *Basilii Cæsaream reversus, quasdam peregrinationes suscipit. — Gregorius in patriam apud seniles parentes retinetur. — Basilii sacro presbyterorum ordini ascribitur.* XXVI. *Sacerdotii ordo legi nauticæ et militari ordini comparatus. — Sacerdotii ordo violatus.* XXVII. *Basilii virtutum omnium exemplar.* XXVIII. *Eusebii similitudo erga Basilium. — Monachi Basilio adherentes, ab Ecclesiæ corpore sese abrumperè constituunt.* XXIX. *Basilii se in Pontum cum Gregorio recipiens, monasteria moderatur.* XXX. *Valens imperator Ecclesias vastat. — In Trinitate tria sunt quoad proprietates, unum quoad essentiam.* XXXI. *Valens, improbis Ecclesiarum ministris stipatus, impetum facit. — Basilii, relicta eremo, ad fidei subsidium currit.* XXXII. *Alacriter ac strenue pro fide dimicat.* XXXIII. *Basilii cum Eusebio in gratiam redit. — Basilii etsi cathedra inferior, Ecclesiæ tamen imperium obtinet.* XXXIV. *Alia Basilii præclara merita in Cæsarienses. — Spirituality et corporea beneficia. — Languenti fame civitati opem fert Basilii. — Qui frumentum abscondit, execrabilis est.* XXXV. *Basilii pauperes alit. — Locupletum horrea orationibus et cohortationibus suis aperit.* XXXVI. *Basilii Iosepho comparatus. — Pauperes cibis et sermone pascit.* XXXVII. *Basilii, mortuo Eusebio, Cæsariensis episcopus eligitur.*

XXXVIII. *Basiliius in episcopali sede virtutum omnium specimina præbet.* XXXIX. *Episcopale munus Basilio contigit, non humano favore, sed Dei beneficio.* XL. *Basilius adversarios sibi conciliat.* XLI. *Basilius totum christianum orbem pacare aggreditur.* XLII. *Publici commodi procurator.* XLIII. *Scriptis et sermonibus refellit hæreticos.* XLIV. *Alter Valentis impetus.* XLV. *Valentis imperatoris cum Xerxe Persarum rege similitudo.* XLVI. *Valentis in Orthodoxos crudelitas.* XLVII. *Valens Cæsarienses frustra oppugnat.* XLVIII. *Modesti præfecti cum Basilio congressus.* XLIX. *Præfectus Basilio irascitur.* L. *Præfectus Basilii sermone obstupefactus.* LI. *Se victum fatetur.* — *Basilii constantiam Valens miratur.* LII. *Valens templum ingressus, vertigine corripitur.* LIII. *Basilii cum imperatore congressus.* LIV. *Exilium adversus Basilium decernitur.* — *Deus Valentis filium percutit.* — *Valens ad Basilii fidem confugit.* — *Præfectus morbo correptus Basilium accessit.* — *Eusebius Ponti præfectus Basilium calumniis inurit.* LVI. *Audax ac prudens mulieris cujusdam consilium.* — *Mulieris causam tuetur Basilius.* — *Judicis in Basilium furor.* LVII. *Tumultus adversus judicem exoritur.* — *Judex demissus ac supplex, Basilii præsentia, a pericula liberatur.* LVIII. *Episcoporum odia et simultates in Basilium.* — *Anthimi et Basilii contentio.* — *Perniciosa episcoporum dissidia.* LIX. *Basiliius in Ecclesiæ utilitatem dissidia convertit.* — *Plures constituit episcopos.* — *Gregorius Sasimorum episcopus.* LX. *Basilius omni virtutum genere excelluit.* — *Paupertatem coluit.* — *Cratetis dictum.* LXI. *Continentiam dilexit.* — *Luxum sprexit.* LXII. *Virginitatem in pretio habuit.* — *Vitam solitariam cum cænobitica conciliavit.* LXIII. *Pauperibus et ægrotis opem tulit.* — *Nihil cum hospitali domo a*

*Basilio constructa comparari potest. — Tristis leproso-
rum imago. — Leprosos, ut fratres, amplectebatur Ba-
silius. LXIV. Nullo inani fastu inflatur. — Vitia virtu-
tibus finitima. LXV. Basilii eloquentia. — In explananda
divina Scriptura sublimior. LXVI. Basilii doctrina
per totum orbem insonuit. — Una et maxima oblectatio,
Basilii scripta. LXVII. Basilii Hexaëmeron. — Scripta
adversus hæreticos. — De Spiritu sancto. — Scriptura-
rum interpretationes. — Panegyricæ orationes. — Mora-
les. LXVIII. Basilius pro vera doctrina plurima mala
tolerat. — Exilio damnatur. — Sermones cum judicio
disponit. — Spiritus sancti Divinitatem, vocibus a Scrip-
tura petitis, adversus hæreticos asserit. LXIX. Palam
et privatim cum amicis de Spiritus sancti Divinitate
loquitur. — Basilius obtrectatorum invidia sublimior.
LXX. Basilii cum clarissimis viris collatio. — Adam.
Enos. Enoch. Noë. LXXI. Abraham. Isaac. Jacob.
LXXII. Joseph. Job. Moyses. Aaron. Josué. LXXIII.
Samuël. David. Salomon. LXXIV. Elias. Elisæus. Tres
pueri. Jonas. Daniel. Machabæi. LXXV. Joannes Bap-
tista. LXXVI. Petrus et Paulus. Jacobus et Joannes.
Stephanus. LXXVII. Tanta erat de Basilio existimatio,
ut quidam honori ducerent ipsius etiam naturæ nævos
imitari. LXXVIII. Basilius moriens fidissimis discipulis
manum imponit. LXXIX. Basilii mors. LXXX. Basilii
funus. — Basilius in cælis sacrificia pro vivis offert. —
Nocturnis visionibus Gregorium admonet. LXXXI.
Omnes civitatis ordines compellat orator. LXXXII. Ba-
siliium alloquitur. — Basilium invocat.*

I. Hoc profecto supererat¹, ut, cum Magnus ille

¹ Vide D. Guillon, tom. vi, p. 461-530.

Basilius multa nobis orationum argumenta proposuisset, (sic enim meis orationibus gloriabatur, ut nemo unquam, omnium perinde suis,) se ipsum nunc nobis proponeret, argumentum certaminum omnium maximum, iis, qui litteris et eloquentiæ operam dederunt. Nam existimo, si quis suam in dicendo facultatem experiri, eamque postea velut ad normam exigere vellet, materiam unam ex omnibus sibi proponens, quemadmodum pictores eas tabulas, ex quibus exempla petunt, eum, hac sola submeta, velut oratoriam omnem vim superante, cæterarum primam quamque delecturum. Tam arduum opus est hujus viri encomium, non nobis solum, qui jam olim omne gloriæ studium deposuimus; verumetiam illis, quibus vita est oratio, quique etiam in id unum operam suam contulerunt, ut hujusmodi argumentis, nominis sui famam celebrent. Hac de re quidem sic existimo, et, ut mihi persuadeo, admodum recte. Cæterum nescio, qua tandem alia in re sermonibus uti queam, si nunc iis minime usus fuero; aut quid ipse gratius facere possim, vel mihi, vel iis qui virtutem laudibus efferunt, vel ipsis denique sermonibus, quam si hujus viri laudes prædicem. Ita enim me primum ipse velut ære quodam alieno utcumque liberavero. Debetur quippe, ut si quid aliud, viris, cum cætera egregiis, tum in dicendo copiosis, oratio. Deinde, illos simul, et voluptate afficiet hic sermo, et ad virtutis studium extimulabit. Quarum enim rerum laudes novi, earum quoque haud dubie incrementa explorata habeo; nec quidquam omnino est, quod non hac ratione augeatur. Postremo, quod ad sermones attinet, utrovīs modo res præclare se habitura est. Nam si ad ipsius dignitatem et meritum propius accesserint, vim suam et facultatem ostendent; sin autem ab illius præstantia longe abfuerint, (quod omnino iis, qui eum laudare instituerint, accidere

necesse est,) re ipsa se succubuisse declarabunt, eumque de cujus laudibus agitur, omnem vim orationis superare.

II. Hæc quidem sunt, quæ me ad dicendum, et ad suscipiendum hoc certamen impulerunt. Quod si multo serius, quam tempus postulabat, ac post tot alios, qui res illius privatim publiceque laudibus ornarunt, ad hoc munus accessi, nemini mirum videatur. Verum ignoscat mihi, velim, divina anima, mihiq; et nunc, et ante veneranda. Quemadmodum autem omnino, cum apud nos ageret, multa mea errata pro amicitiae jure ac præstantiori lege corrigebat; (non enim dicere vereor, quod cunctis esset lex et norma virtutis;) sic nunc quoque supra nos positus, facilem se mihi ac exorabilem præbebit. Ignoscant etiam, quæso, quicumque ex vobis ferventiores illius laudatores sunt; si qui tamen alii aliis ferventiores sunt, ac non potius omnes hac una in re, hoc est, in ipsius laude et prædicatione, pares sumus. Non enim negligentia et contemptu officium prætermisimus; absit enim, ut aut virtutem, aut amicitiae officium usque adeo negligamus, nec quod hoc laudationis munus cuiquam alii potius, quam nobis convenire arbitremur. Sed primum, ut verum fatear, sermonem habere detrectabam, quemadmodum qui ad sacra accedunt, prius quam vocem animumque perpurgassent. Deinde, tametsi enim id non ignoretis, in memoriam tamen vobis revocabo, in veræ doctrinæ periclitantis negotio interim occupati fuimus, pulchre coacti, nec sine Dei numine fortasse peregre profecti, nec præter voluntatem ac consilium eximii illius veritatis propugnatoris, quique nihil unquam aliud quam piam orbique universo salutarem doctrinam spiravit. Nam de corporis mei imbecillitate forsitan ne sermonem quidem facere audendum est, ad strenuum virum, corporeque, etiam ante quam hinc migraret; sublimiorem, ac illud

asserentem, nihil ex animæ bonis a vinculo impediri. Atque hic excusatio nostra finem habeat. Neque enim longiore alia mihi opus fore arbitror, cum sim duntaxat apud eum, cæterosque, quibus res nostræ probe cognitæ sunt et exploratæ, locuturus. Jam igitur ad laudationem nobis accedendum est, illius Deum orationi nostræ præficientibus; ne nostris laudibus huic viro dedecus inferamus, ab iisque, qui jam in hoc argumento versati sunt, longo intervalla prætereamur; quanquam fortasse omnes ab illo pari intervallo distemus, non secus atque a cælo solisque radiis, qui ea contuentur.

III. Enimvero si eum genere, ac generis splendore gloriari perspicerem, aut ulla re ex iis, quæ omnino parvæ sunt, et quibus ii, qui humi defixos oculos habent, efferrī solent, alius utique Heroum catalogus appareret. Quanta a maioribus illius ad eum ornandum accipere possemus? Nec historiis quidem quidquam hac parte cederemus; hoc certe nomine superiores futuri, quod non commentitiis fictisque narrationibus, sed rebus ipsis, quarum multi testes sunt, ornaremur. Multa enim nobis narratu digna ex paterno latere Pontus suppeditat, et quidem priscis suis prodigiis, quibus, et historicorum, et poetarum volumina plena sunt, neutiquam inferiora: multa etiam veneranda hæc mea patria Cappadocia, non minus juvenum, quam equorum bona nutrix. Unde paterno generi materni generis splendorem opponimus. Quorumnam autem et militaria imperia, et populorum gubernationes, et in imperatorum aulis potentia et auctoritas; ac præterea, opes, et excelsi throni, et publici honores, ac sermonum splendores, vel plures, vel majores extiterunt? Quæ nobis, si arbitrato nostro commemorare liceret, nihil essent Pelopidæ, nec Cecropidæ, nec Alcæones, nec Æacidæ, nec Heraclidæ, nec alii quibus nihil est sublimius; qui

quidem, cum nihil proprium habeant, quod aperte prædicent, ad obscura confugiunt, dæmones videlicet quosdam, et deos, ac fabulas, majoribus suis attribuentes; quorum ea est ratio, ut quod in ipsis maxime speciosum et illustre est, fide careat; quod autem creditur, probrum et contumelia sit.

IV. Quoniam autem de eo viro mihi oratio instituta est, qui nobilitatem viritim expendi vult, nec, cum formæ atque colores, et equi, tam nobilissimi, quam abjectissimi ex se ipsis explorari soleant, nos contra per ea, quæ extra nos posita sunt, depingi, posteaquam unum aut alterum ex iis, quæ a majoribus ipse habuit, quæque, et ipsius vitæ conveniunt, et maximam ei, si commemorentur, voluptatem allatura sunt, exposuero, ad ipsum confestim me convertam. Aliarum quidem familiarum, vel etiam sigillatim cujuslibet hominis, alia sunt insignia, et narrationes, vel majores, vel minores, quæ, instar paternæ cujusdam hæreditatis, vel longinquius, vel propinquius exorsæ, ad posteros devolvuntur: huic autem utriusque generis decus pietas fuit, quemadmodum nunc oratio declarabit.

V. Persecutio erat, et quidem persecutionum omnium atrocissima maximeque horrenda; iis loquor, quibus Maximini persecutio nota est, qui, cum post multos, qui paulo ante extiterant, ingruisset, hoc effecit, ut omnes humani ac faciles fuisse viderentur, ingenti nimirum ipse audacia furens, atque impietatis principatum consequi summo studio contendens. Hunc Athletarum quidem nostrorum permulti superarunt, et ad mortem usque decertantes, et pene usque ad mortem; hactenus videlicet relictī, ut victoriæ suæ superstites essent, nec cum ipsis certaminibus abscederent, sed aliis virtutis Aliptæ, (22) vivi Martyres, spirantes columnæ, tacitaque præconia relinque-

rentur, cum multis autem aliis, et quidem celeberrimis, paterni etiam illius avi, quibus, cum omne pietatis genus coluissent, eximiam tempestas illa coronidem invexit. Etenim illi quidem animo ita constituti et comparati erant, ut ea omnia facile perpessuri, ob quæ Christus eos, qui ipsius certamen nostra causa susceptum imitantur, corona donat.

VI. Verum quoniam certamen quoque legitimum ipsis esse oportebat; (lex autem martyrii hæc est, ut, nec nos ultro ad certamen accedamus, hac nimirum ratione tum persecutoribus, tum imbecillioribus athletis consulentes, nec, cum præsentibus sumus, certamen detrectemus; illud quippe temerarii ac præcipitis est animi, hoc timidi et ignavi; in hac quoque re legislatorem honore afficientes;) quid moliantur? Vel potius, quonam a divina Providentia, quæ omnia eorum gubernabat, feruntur? Ad quamdam Ponticorum montium sylvam, (illic autem permultæ sunt et profundæ ac longe se porrigentes,) cum paucis admodum, tam fugæ comitibus, quam cibi ministris, confugiant. Admirentur hic quidem alii temporis diuturnitatem; (nam in annum pene septimum, atque aliquando amplius, protractum aliis exilium fuisse narrant;) et vivendi rationem corporibus generosis angustam et insolentem, ut verisimile est; illudque item, quod sub dio agentes, algoribus, caloribus, pluviis divexarentur; ac denique amicis, atque hominum commercio et societate destitutam solitudinem; quæ res, quam gravis et ærumnosa iis fuisse putanda est, qui a multis stipari atque honore affici solebant? Ego autem quod his majus et admirabilius est exponam; nec mihi quisquam fidem abrogabit, nisi qui nihil magnum esse existimarit persecutiones et pericula Christi causa suscepta prave utique et admodum periculose judicans.

VII. Suaviores quædam epulas egregii viri exoptabant,

ut qui temporis longinquitate laborarent, ac necessariorum ciborum fastidium contraxissent. Nec idcirco tamen Iraë-
litarum sermonibus utebantur; (non enim queruli et
murmuratores erant, ut illi, cum, post fugam ex Ægypto¹,
ærumnis in deserto premerentur; nimirum solitudine me-
liorem sibi atque optabiliorem Ægyptum esse rati, ut qui
amplissimam ollarum et carniarum, aliarumque omnium re-
rum, quas illie reliquerant, copiam ipsis subministraret;
nec enim jam, qua dementia erant, gravis ipsis laterum
confectio et lutum esse videbatur;) verum alia, quæ ma-
jorem pietatem ac fidem redolebant, loquebantur. Quid
enim, aiebant, fieri-ne hoc nequit, ut Deus ille miracu-
lorum, qui peregrinum et fugitivum populum adeo large
et copiose « In deserto aluit², » ut et panem, et aves tan-
quam ex fonte profunderet, non solum necessariis, sed
etiam superfluis cibis eum nutriens; « Qui mare scidit,
» solis cursum compressit, fluvium inhibuit³, » aliaque
deinde subjungentes, quæcumque ab eo gesta fuerant,
(solet enim in hujusmodi rebus animus veteres historias
libenter persequi, ac Dei gloriam ex multis miraculis cele-
brare;) idem ipse Deus, inferebant, nos quoque pietatis
Athletas hodierno die lautioribus obsoniis pascat? Multæ
feræ divitum mensis, quales quondam nobis erant, fuga
elapsæ in his montibus delitescunt; multæ esculentæ aves
supra nos, qui eas expetimus, volitant; quorum quid om-
nino est, quod te, vel solum annuente, non facile capi pos-
sit? Hæc eorum verba erant: ac præda verborum comes
erat, obsonium ultro ohlatum, convivium nullo labore
instructum, cervi e tumulis repente apparentes. Quam
proceri! Quam pingues! Quam ad cædem prompti et ala-
cres! Propemodum eos conjiceres, quod non citius vocati

¹ Exod. xvi, 2, et seqq. — ² Ibid. 13. — ³ Id. xiv, 21, et Josue. iii, 16, et 2, 22.

essent, moleste ferre. Illi caput nutu alliciebant, hi sequebantur. Quo insectante, et cogente? Nemine. Quibus equis? Quibus canibus? Quo latratu, aut clamore, aut juvenum studio, viarum exitus, ut venationis leges ferunt, occupantium? Orationis tantum justæque petitionis vinculo constricti. Quis, vel nostra, vel omnium, qui unquam fuerunt, memoria talem venationem ac prædam cognovit?

VIII. O rem admirandam! Ipsi prædæ suæ arbitri erant. Quidquid placebat, voluntate tantum tenebatur; quod supererat, ad sylvas in secundam mensam relegabatur. Cui extemporales, cœna exquisita, convivæ grati, præsens miraculum tanquam præludium quoddam rerum in spe positarum habentes. Ex quo etiam ad eam dimicationem, ob quam hæc illis præsto erant, alacriores reddebantur. Ac talia quidem sunt, quæ narranda suscepæram. Tu vero Dianæ tuas, et Oriones, et Actæones, infelices illos venatores, mihi narra; tu, inquam, qui me persequeris, fabulasque admiraris, ac cervam virgini substitutam; si quid tantum ad laudem et gloriam tibi suppetit, ut interim narrationem hanc minime fabulosam esse donemus. Quæ deinceps sequuntur, quam turpia sunt! Quæ enim huius commutationis utilitas, si ea de causa virginem e periculo extrahat, ut hospitibus necem afferre doceatur, et humanitatem pro humanitate rependere condiscat? Atque hoc hactenus, ex multis unum, ac pro multis, mea quidem sententia. Quod etiam ipsum non eo commemoravi, ut ei cumulum aliquem gloriæ asseram; (nam nec mare fluviis, qui in ipsum influunt, opus habet, etiamsi plurimi maximeque influant: nec is, quem nunc laudamus, his, qui ad ipsius encomium aliquid erogent;) verum, ut ostendam, quibus ille ortus majoribus, in quos velut in exemplar respiciens, quanto longius jaculatus sit. Nam si aliis magnum est aliquid a majoribus ad gloriam accepisse, majus pro-

fecto ipsi est majoribus suis laudis cumulum ex se adjecisse, velut fluctu reciprocante.

IX. Quanquam autem conjugii parentum ipsius, quod non minus virtutis, quam corporum erat, multa quoque alia insignia sunt, nimirum, pauperum alendorum, atque hospitem excipiendorum studium, animæ purgatio per continentiam, bonorum portio Deo consecrata, (quæ res non dum tunc multis studio erat, ut nunc ex primis exemplis adaucta et culta est,) aliaque omnia, quæ inter Pontum et Cappadoces divisa, multorum auribus implendis suffecerunt; mihi tamen maximum et clarissimum esse videtur felicitas in liberis. Nam qui simul et multos, et probos atque honestos filios habuerint in fabulis fortasse reperias: hos autem experientia ipsa nobis exhibuit, ut qui tales quidem ipsi fuerint, ut, etiamsi talium liberorum parentes haudquaquam extitissent, sibi ipsis tamen ad nominis claritatem sufficere potuissent; rursus autem ejusmodi filios in lucem extulerint, ut, etiamsi ipsi non tanta virtute fuissent, omnes tamen sobolis felicitate superaturi essent. Nam cum unus aut duo cum laude vivunt, id tale est, ut naturæ ascribi queat; at undique perfecta et ad summum provecta omnium virtus, iis plane, a quibus editi et educati sunt, assignari debet. Quod quidem liquido demonstrat ille felicitatis nomine prædicandus sacerdotum et virginum numerus, eorumque, qui in matrimonio eam vim sibi adhibuerunt, ut nihil impedimento esset, quominus parem virtutis gloriam assequerentur; atque illud effecerunt, ut hæc generum vitæ potius, quam rationis vivendi electiones essent.

X. Eccui Basilii, Basilii nostri pater, incognitus est, vir magni apud omnes nominis, qui paterni voti compos factus est, si quis unquam alius, ne dicam solus? Cum enim reliquos omnes virtute superarit, a solo filio primas

obtinere prohibetur. Eccui Emmelia, quæ id prius appellata est, quod postea fuit; aut id fuit, quod prius nuncupata fuerat; illa, inquam, merito Εμμελίας, id est, *concinnitatis*, nomen ferens, quæ, ut uno verbo dicam, hoc inter mulieres fuit, quod ille inter viros; ut, si quidem eum, cujus laudes illustrandas suscepimus, ad servitutem naturæ obeundam, mortalibus dari oportebat, velut quempiam ex priscis illis viris, qui ad publicam utilitatem divino beneficio concessi sunt, neque huic ex aliis potius, quam ex his gigni conveniret, neque illis rursus cujusquam alterius potius, quam hujus parentes nominari. Quæ duæ res percommode concurrerunt. Posteaquam autem legi divinæ obtemperantes, quæ honorem omnem parentibus haberi jubet, iis, quorum mentionem fecimus, primitias laudum persolvimus, ad ipsum jam orationem conferamus, hoc tantum præfati, quod neminem fore puto, qui non verissime a me dici existimet, qui modo illum noverit, nobis in eo laudando atque ornando sola ipsius voce opus esse. Idem enim ipse, et splendida est materia iis, qui laudationis munus aggrediuntur, et solus pro eximia sua dicendi facultate huic materiæ par. At pulchritudinis quidem, et roboris, et magnitudinis laudem, quibus plerosque delectari conspicio, volentibus relinquemus; non quod in his etiam quoquam eorum, qui res parvas in pretio habent, et circa corpus volutantur, inferior esset, cum adhuc ætate floreret, ac nondum philosophia carnem domuisset; sed ne idem nobis, quod imperitioribus athleticis, usuveniat, qui, profusis in vana minimeque necessaria colluctatione viribus, in seriis postea certaminibus, quibus victoria comparatur, ac præconis voce cuiquam corona tribuitur, inferiores reperiuntur. Ea vero, quæ nec dictu superflua, nec ab orationis scopo aliena fore videntur, laudanda suscipiam.

XI. Illud autem inter omnes sanæ mentis homines constare arbitror, eruditionem inter humana bona principem locum tenere; non de hac nostra solum ac nobiliore loquor, quæ; contempto omni sermonis lepore atque ornatu, saluti uni, atque earum rerum, quæ ratione atque animo intelliguntur, pulchritudini arctissime hæret; sed etiam de externa, quam plerique Christiani, pravo quodam judicio, ut insidiosam et periculosam, ac procul a Deo avertentem, aspernantur. Quemadmodum enim cælum, terram, aërem, ac quæque eorum complexu coercentur, non ideo contemnere debemus, quia nonnulli scelerate acceperunt, pro Deo ea, quæ Dei sunt venerantes; quin potius, quidquid, tum ad vitam, tum ad animi oblectationem usui est, decerpentes, quidquid periculosum est, fugimus; non res creatas adversus Creatorem, ut stulti faciunt, concitantes, sed, « Ex rebus conditis Conditorem » agnoscentes ¹, atque omnem intellectum, ut Apostoli » verbis utar, Christo captivum submittentes ²: » Quemadmodum insuper, nec cibus, nec ferrum, nec res ulla alia suapte natura, vel maxime utilis est, vel maxime noxia, verum ut iis, qui utuntur, placet; atque adeo e reptilibus bestiis quasdam interdum salutaribus medicamentis admiscemus: eodem nos quoque modo ex litteris illis et disciplinis, id sane, quod in inquirenda rerum natura et contemplatione versatur, suscepimus; quidquid autem ad dæmones, et errorem, et exitii voraginem ducit, respuimus. Imo etiam ab eo ad Dei cultum adjuti sumus, nimirum ex deteriori, id, quod præstantius est, cognoscentes, atque doctrinam nostram illorum imbecillitate fulcientes. Quamobrem, non idcirco eruditio contemnenda est, quod ita quibusdam videatur; quin potius, stulti, atque imperiti habendi sunt, qui hoc existimant, quique omnes sui si-

¹ Sap. xliii, 5. — ² 2 Cor. x, 5.

miles esse cupiant, ut privata eorum inscitia sub communi deliteat, nec quisquam ipsorum imperitiam prodat et coarquat. Hoc igitur posito atque pro confesso habito, æge, Basilii vitam contemplemur.

XII. Prima igitur ætate sub magno patre, quem communem virtutis magistrum eo tempore Pontus proponebat, velut fasciis involvitur, atque optimo illo purissimoque figmento, quod David diurnum pulchre vocat¹, nocturnoque oppositum, effingitur. Sub hoc igitur, et vita simul, et sermone pariter augescentibus, atque in altum assurgentibus, egregius adolescens eruditur; non thessalicum et montanum quoddam antrum, quasi virtutis scholam et officinam, jactans, nec arrogantem quemdam Centaurum, heroum sui temporis præceptorem, nec ab eo artem percipit, qua lepores sagittis configat, vel hinnulos cursu insequatur, vel cervos venetur, vel in rebus bellicis excellat, vel feroces equos optime domet, eodem videlicet et equo utens, et magistro, nec fabulosis cervorum ac leonum medullis nutritur; sed liberales artes docetur, atque ad Dei cultum excolitur, et, ut uno verbo complectar, per primas ac pueriles disciplinas ad futuram perfectionem ducitur. Nam, qui vel solos mores, vel solam doctrinam consecuti sunt, ab altera vero deseruntur, ii mihi nihil a luscis differre videntur, quibus cum magnum detrimentum sit, tum vero major turpitudine, sive alios cernant, sive ab aliis cernantur. At quibus utraque laude excellere, ac velut ambidextris esse contigit, hi nimirum omnibus numeris absoluti sunt, ac cum alterius vitæ beatitudine vitam agunt. Quod quidem illi, ut par erat, contigit, quippe qui domesticum haberet virtutis exemplar, in quod oculorum aciem intendens, statim optimus erat. Et quemadmodum equorum pullos, ac vitulos, simul atque

¹ Psal. cxxxviii, 16.

in lucem prodierunt, matribus suis assultare videmus; sic ille patrem cum equino et generoso impetu e propinquo assectabatur, nec a summis virtutis illius agitationibus longo intervallo distabat; aut, si mavis, in ipsa quoque virtutis adumbratione, futuræ virtutis pulchritudinem subindicabat, atque accuratioris vitæ notas ante accuratioris vitæ tempus præferebat.

XIII. Illic porro cum satis uberem doctrinam collegisset, nec rei cujusquam honestæ ignarum et expertem eum esse oporteret, nec ab apicula, quæ ex quibuscumque floribus utilissima quæque decerpit, labore ac diligentia superari, Cæsaream, ut scholarum urbis illius particeps esset, contendit; hanc, inquam, illustrem civitatem, et nostram, (nam meorum quoque studiorum dux et magistra extitit,) non minus litterarum atque doctrinæ, quam urbium, quibus præcellit et dominatur, metropolim; quam si quis doctrinæ palma spoliaverit, rem omnium pulcherrimam ipsique maxime propriam eripuerit. Nam cum aliæ civitates aliis ornamentis, vel antiquis, vel novis gloriantur, prout, opinor, vel historiis, vel rebus quibusdam visendis ornatae sunt; hanc contra, ut arma vel tragædias notæ quædam atque insignia, sic litterarum gloria nobilitat, illustremque reddit. Jam quæ sequuntur, ii exponant, qui et eum apud se erudierunt, et fructum ex ipsius eruditione ceperunt; quantus videlicet magistris, quantus æqualibus esset, illos nimirum æquans, hos omni doctrinæ genere superans; quantam apud omnes tum plebeios, tum civitatis primarios gloriam brevi tempore assecutus fuerit; majorem quidem, quam illa ætas ferebat, eruditionem, majorem rursus eruditione morum constantiam et gravitatem ostendens: rhetor inter rhetores, etiam ante sophisticam exhedram: philosophus inter philosophos, etiam mihi arduum aliquid hic sermo. Huc enim oratione pro-

ante philosophiæ decreta : et, quod maximum est, sacerdos Christianis, etiam ante initum sacerdotium. Tantum ipsi omnes in omnibus rebus concedebant. Ipsi porro eloquentiæ studium, accessionis duntaxat, ac velut corollarii cujusdam rationem habebat, hoc tantum scilicet ex ipsa fructus decerpenti, quantum auxilii, ut ea ad nostram philosophiam uteretur; quandoquidem ad explicandanda animi sensa ipsius vis ac facultas requiritur. Mens enim, quæ id, quod sentit, verbis exprimere nequit, hominum torpore laborantium incessui haudquaquam dissimilis est. At vero serium et præcipuum illius studium in eo versabatur, ut veræ philosophiæ operam daret, seseque a mundi contagione abrumperet, Deoque adjungeret, ac per terrena, supera lucraretur, et per fluxa et fragilia, ea, quæ firma et æterna sunt, compararet.

XIV. Hinc Byzantium, urbem totius Orientis principatum tenentem, venit; (excellentissimis enim oratoribus philosophisque florebat, quorum brevi optima quæque ingenii celeritate ac magnitudine collegit;) atque inde Athenas, hoc est, litterarum sedem ac domicilium, a Deo, atque inexplebili simul et præclara doctrinæ cupiditate mittitur; Athenas, inquam, mihi vere aureas, ac, si cuiquam aliî, bonorum procuratrices. Nam illæ mihi hominem, non illum quidem ante ignotum, sed tamen plenius noscendum præbuerunt: ac doctrinam exquirens, beatitudinem reperi; mihi que dispari modo idem quod Sæuli accidit, « Qui patris asinas quærens, regnum invenit ¹. » plusque in ea re, quam obiter agebat, quam in ea, quæ præcipue ipsi curæ erat, lucrifecit. Jam nobis quidem hactenus plana, et facili ac vere regia laudum illius via prosperum cursum oratio tenuit: nunc autem quam dicendi rationem sequar, aut, quo me vertam, nescio; habet enim

¹ Reg. ix, 3, et seqq.

gressus, atque hanc occasionem nactus, rerum etiam mearum aliquid adjungere, paululumque in hac narratione immorari gestio, atque unde, et quo modo, ac quibus ex initiis conflata inter nos amicitia, sive, ut congruentius loquar, animorum conspiratio et naturæ conjunctio fuerit, explicare. Quemadmodum enim oculi a jucundis spectaculis non facile recedunt, ac si quis per vim eos retrahat, eodem rursus feruntur; sic nec sermo a rerum suavissimarum commemoratione. Sed in hoc conatu metuendam mihi difficultatem esse conspicio. Annitar itaque, ut, quam parcellime potero, id faciam. Quod si nos forte amoris et cupiditatis æstus modum excedere coëgerit, affectui nostro, quæso, ignoscite, affectuum omnium justissimo, et quo non affici, damnum ac detrimentum est, iis quidem certe, qui sana atque integræ mente sunt.

XV. Habebant nos Athenæ, velut fluxum quemdam fluminis, ex eodem patriæ fonte in diversas regiones doctrinæ cupiditate dissectos, rursumque, velut ex composito, Deo videlicet ita impellente, coëuntes. Ac me quidem aliquanto ante habebant; illum autem hand multo post, et quidem cum mirifica et luculenta spe expectatum. Et enim in multorum linguis versabatur, antequam advenisset; nec quisquam erat, qui non præclare secum agi putaret, si id, quod summo studio expetebat, prior occurreret. Nec vero alienum erit narratiunculam unam, condimenti cujusdam vice, orationi adjungere, ut scientibus quidem memoriam renovet, ignorantibus autem documento sit. Insano quodam erga Sophistas studio Athenis tenentur quam plurimi et stolidissimi adolescentes; non modo ignobiles et obscuro, sed nobiles etiam et illustres, ut qui miscellanea quædam multitudo sint, et juvenes, et ita effecti, ut eorum impetus vix reprimi possint. Quod igitur in equestribus certaminibus iis accidere videmus,

qui equis et spectaculis oblectantur; exiliunt enim, clamant, pulverem in cælum mittunt, sedentos habenas moderantur, aërem verberant, equos digitis, quasi scuticis, in alterum atque alterum latus subinde jungunt, cum nihil horum in ipsorum potestate situm sit: facile inter se aurigas, equos, equorum stationes, certaminis duces permutant; idque quinam tandem? Pauperes plerumque atque inopia laborantes, et quibus ne in unum quidem diem victus suppetit: hoc ipsis quoque plane circa præceptores suos, aliosque ejusdem artis professores, eorumque æmulos accidit; in hoc nimirum elaborantibus, ut et plures ipsi sint, et illos opera sua locupletiores efficiant. Atque ea res vehementer absurda et prodigiosa est. Præoccupantur urbes, viæ, portus, montium cacumina, campi, solitudines omnes denique Atticæ ac reliquæ Græciæ partes, atque adeo incolarum maxima pars; nam et illos in partes ac studia distractos habent.

XVI. Cum autem juvenis quispiam accessorit, atque in eorum, a quibus captus est, manus et potestatem venerit; (venit autem, vel sponte, vel coactus;) tum Attica hæc illis consuetudo est, ludusque rei seriæ admixtus. Primum, apud eorum aliquem, qui priores ipsum arripuerint, hospitio accipitur, vel amicorum, vel propinquorum, vel qui ejusdem sunt patriæ, vel qui sophisticæ artem apprime callent ac lucra magistris conciliant, eoque nomine apud eos summo honore ac pretio sunt; quandoquidem illis mercedis loco est, habere qui ipsorum commodis studeant. Deinde, a quolibet cavillis lacessitur; quod quidem, ni fallor, eo faciunt, ut eorum, qui nuper advenerunt, fastum reprimant, atque a principio ipsos in potestate redigant. Lacessitur autem: ab aliis, audacius; ab aliis, urbanius, prout ille, vel repticis et ineptis est moribus, vel urbanitate præditus. Atque id ignaris qui-

dem horrendum valde et inhumanum videtur, iis autem perquam jucundum et suave, qui hoc prius norunt. Amplior enim hæc est minarum ostentatio, quam res ipsa. Tum per forum ad balneum cum pompa deducitur. Pompa autem hoc modo se habet. Qui deducendi juvenis munere funguntur, ordine collocati, atque æquis spatiis distincti, bini eum ad balneum antecedunt. Cum autem propius accesserint, quasi fanatico furore correpti, clamorem ingentem cum saltitatione tollentes; (hic autem clamor, ne ulterius progrediantur, vetat, sed ut insistant, tanquam eos balneum minime admittat;) simulque pulsatis januis, cum per strepitum juveni metum incusserint, postea concesso ingressu, ita demum eum in libertatem asserunt, atque a balneo redeuntem deinceps ut æqualem ac sodalem accipiunt; atque hoc ipsis est totius hujusce cærimonie jucundissimum, nimirum celerrima vexantium discessio ac cætus solutio. Tunc igitur meum magnumque Basilium, non ipse solum veneratione prosequabar, quod illius tum in moribus gravitatem, tum in sermonibus maturitatem et prudentiam conspicerem; sed aliis etiam, quibus non perinde cognitus erat, ut idem facerent, persuadebam. Nam apud multos statim in veneratione erat, ut qui fama et auditione jam eum præcepissent. Ex quo quid contigit? Ipse solus fere ex omnibus, qui studiorum causa Athenas veniebant, communi lege solutus est, majorem utique honorem, quam tyronis conditio ferre videbatur, consecutus.

XVII. Hoc nobis amicitie præludium: hinc necessitudinis igniculus: sic mutuo amore sanciat sumus. Postea hujusmodi quoque quiddam accidit; nam ne hoc quidem prætermitti debet. Haud simplicem et apertam nationem Armenios esse invenio, quin potius, admodum tectam et simulatam. Tum ergo nonnulli jam olim cum ipso familia-

ritate et amicitia conjuncti, tum adhuc ex patre, tum ex veteri sodalitie, (nam in illa schola instituti fuerant,) ad ipsum per amicitiae speciem accedentes, (invidia autem, non benevolentia ducebantur,) contentiosis potius, quam doctis et argutis quaestionibus eum urgebant, ac primo impetu sibi subicere conabantur, tum quod egregiam ipsius indolem jampridem nossent, tum quod honorem tunc ipsi praestitutum permoleste ferrent. Grave enim minimeque ferendum esse judicabant, eos, qui philosophica pallia priores induissent, atque in funditandis verbis operam ante posuissent, extero et tyroni nequaquam anteferri. Ego autem, ille Athenarum amans ac stultus, non enim invidiam senseram, frontis involucro fidem habens, Athenarum gloriam in ipsis oppressam et celerrime contemptam indigno animo ferens, succumbentes jam adolescentos, et terga vertentes, reducta disputatione suffulciebam, atque auxilii mei momentum ipsis largiens, (in hujusmodi porro rebus vel perexigua accessio quidvis potest,) « Aequalia, ut ille ait, praelii capita constitui¹. » At ubi disputationis arcanum intellexi, quod jam ne contineri quidem poterat, sed perspicue sese praebebat, repente mutatus, remigationem ad puppim converti, ab illius partibus stans, ambiguanque victoriam reddidi. Qua ex re, ut erat ingenio imprimis acuto, magnam statim voluptatem cepit, atque alacritate perfusus, ut cum Homericis verbis omnino describam, strenuos illos juvenes disputatione perturbatos insectabatur; nec ante argumentationibus eos ferire destitit, quam prorsus in fugam convertisset, victoriamque haud dubiam adeptus fuisset. Haec altera nobis amicitiae, non jam scintilla, sed fax clara et sublimis accenditur.

XVIII. Atque illi quidem sic infecto negotio discesse.

¹ Homer. Iliad. xi, vers. 72.

serunt, tum suam temeritatem multam incensantes, tum insidiarum nomine tantam in me indignationem concipientes, ut etiam apertas mihi inimicitias indicerent, ac proditionem objicerent, non modo eorum, sed ipsarum quoque Athenarum; quoniam primo impetu ab uno homine confutati atque ignominia affecti fuerant, et quidem ejusmodi, qui ne fiduciæ etiam tempus habebat. Ipse contra, (humanus enim affectus est, cum, magnis quibusdam rebus spe conceptis, in eas subito incidimus, opinione nostra inferiores eas videre,) ipse ejusdem quoque affectus periculum faciens, mœrebat, angebatur, non habebat quod sibi de adventu suo gratularetur. Quærebat quod spe sibi effllexerat; inanem felicitatem Athenas nominabat. Hæc quidem ille: ego autem maximam mœroris partem ipsi adimebam, tum argumentis congrediens, tum rationibus eum mulcens; cum, ut res erat, nec hominis mores statim, sed diuturno tempore, ac perfectissima familiaritate, vitæque consuetudine, percipi, nec eruditionem iis, qui periculum ipsius faciunt; ex paucis argumentis ac brevi agnosci, dicerem. Hinc eum ad animi tranquillitatem revocavi, ac benevolentiae specimen simul præbens et accipiens, arctioribus vinculis mecum astrinxi.

XIX. Ut autem temporis progressu desiderium nostrum mutuo inter nos confessi sumus, ac philosophiam id esse quod a nobis expeteretur, tum vero jam uterque alteri quidvis eramus, contubernales, convictores, concordcs, unum idemque spectantes, ferventius quotidie ac firmitus desiderium nobis invicem colligentes. Etenim corporum amores, quia rerum fluxarum sunt, fluunt quoque ipsi, non secus ac veris flores. Nam nec flamma, consumpta materia, sed una cum ea extinguitur, nec desiderium, marcescente fomite, subsistit. At pudici et Deo grati amores quandoquidem rei

stabilis et firmæ sunt, propterea diuturniores etiam sunt; quantoque major pulchritudinis species ipsis objicitur, tanto etiam arctius et secum, et inter se, earundem rerum amatores devinciunt. Hæc quippe superni amoris lex est. Equidem me, extra tempus, et extra modum, præcipientem ferri sentio; nec, quonam modo in hos sermones incidam, scio; nec rursus quonam pacto me ipsum ab huiusmodi narratione reprimere queam. Mihi enim, id quod prætermissum est, necessarium semper videtur, præstantiusque eo quod prius arripui. Quod si quis me vi abducere tontet, ne ulterius progrediar, idem mihi quod polypis accidet, quorum acetabulis, cum e cubilibus extrahuntur, petrae adhærescunt, nec prius divelluntur, quam ex illa vi quidpiam utrinque acceprint. Proinde si quis mihi hoc concesserit, habeo quod quæro; sin minus, a me ipso accipiam.

XX. Cum igitur hoc inter nos animo essemus, talesque « Valido thalamo, ut est apud Pindarum, aureas columnas » subjecissemus¹, » ita demum porro progrediebamur. Deo et desiderio adjutoribus utentes. Heu! Quomodo harum rerum mentionem sine lacrymis faciam? Par spes doctrinæ, hoc est, rei omnium invidiosissimæ, nos ducebat; et tamen aberat invidia, æmulatio autem in pretio habebatur. Hoc utrique certamen, non uter primas ferret, sed uter alteri eas concederet; uterque enim alterius gloriam pro sua ducebat. Una utriusque anima videbatur, duo corpora ferens. Quod si fides iis minime habenda est, « Qui omnia » in omnibus sita esse dicunt; » at nobis certe credendum est, quod uterque in altero et apud alterum siti eramus. Unum utrique opus et studium, virtus erat, et ad futuras spes vivere, nosque ita comparare, ut, ante discessum ex hac vita, hinc migraremus. Quod quidem nobis ob oculos ponentes,

¹ Pind. Olymp. Od. vi, vers. 1.

vitam actionesque omnes nostras dirigebamur, tum divini præcepti ductum sequentes, tum alter alteri virtutis studium exacuentes; atque nisi hoc arrogantius dicere videar, qua uterque alteri norma et amussis eramus, rectum a pravo discernitur. Non enim cum sodalium nostrorum petulantissimis et impudicissimis, sed cum castissimis consuetudinem habebamus; nec cum pugnacissimis, sed cum pacatissimis, iisque, quorum consuetudo maximos fructus afferebat; illud nimirum exploratum habentes, facilius esse vitium contrahere, quam virtutem impertiri; quemadmodum etiam facilius esse morbo alieno infici, quam sanitatem largiri. Disciplinis porro, non tam jucundissimis, quam optimis oblectabamur; nam hinc quoque vel ad virtutem, vel ad vitium, juvenes informantur.

XXI. Duæ nobis viæ notæ erant: altera prima et præstantior; secunda altera, et inferioris pretii: illa quidem ad sacras aedes nostras, et ad doctores, qui illic erant, ferebat; hæc autem ad externos præceptores. Cæteras omnes, quæ ad festa, spectacula, celebres conventus, epulas, ducebant, æquo ac libenti animo aliis reliqueramus. Nihil enim, mea quidem sententia, magni faciendum est, quod ad recte honesteque vivendum nihil affert, nec sui studiosos meliores reddit. Jam cum aliis alia quædam cognomenta sint, vel a parentibus accepta, vel ex se ipsis, hoc est, ex propriis vitæ studiis institutisque comparata: nobis contra, magna res et magnum nomen erat, Christianos et esse, et nominari; atque ea re magis efferebamur, quam Gyges palæ annuli conversione, siquidem hoc fabulosum non esset, per quam Lydiorum tyrannidem occupavit: aut Midas auro, quod ipsi interitum accersivit, cum voti sui compos factus, nihil præter aurum possideret? quæ et ipsa Phrygia est fabula. Nam quid Hyperborei Abaridis sagittam, aut Argivum Pegasus dicam, quibus non tantum

erat per aërem ferri, quantum nobis mutua opera et simul ad Deum attolli? Atque, ut rem in pauca contraham, pestiferæ quidem aliis, quantum ad animæ salutem attinet, Athenæ sunt; (nec enim id a piis viris temere existimatur;) malis namque opibus, hoc est idolis, supra reliquam omnem Græciam affluunt, difficileque factum est, non simul cum eorum laudatoribus et patronis in errorem abripi; nobis autem nihi detrimenti ab iis allatum est, utpote qui animo communiti et obsepti eramus. Quin potius, quod vix credibile est, hinc ad fidem confirmati sumus, ipsorum fraudem et imposturam agnoscentes, atque illic dæmones contemnentes, ubi dæmones admiratione afficiuntur. Quod si quis est, aut esse creditur, fluvius, per mare dulcis fluens; aut animal in igne, quo omnia consumuntur, saliens, hoc ipsi inter omnes æquales ac cōstaneos eramus.

XXII. Illud autem præclarissimum, quod circa nos quoddam non ignobile sodalitium erat, præceptorem illum habens ac ducem sequens, iisdemque rebus gaudens, quamvis alioqui pedites, ut vetus habet proverbium, ad Lydium currum, hoc est, illius cursum et mores, curremus; ex quo id nobis contigit, ut, non solum apud præceptores et socios, sed etiam apud universam Græciam, ac præsertim clarissimos quosque Græciæ viros, clari atque illustres essemus. Quinetiam, ultra Græciæ fines processimus, ut ex multis hæc commemorantibus perspicuum factum est. Nam præceptores quidem nostri apud tot homines celebres erant, apud quot Athenæ: ac nos item, apud quot homines de præceptoribus nostris, apud totidem de nobis etiam, et audiebatur, et prædicabatur; ac par quoddam non obscurum et incelebre apud eos, et eramus, et dicebamus. Nec vero quidquam ejusmodi apud eos erant Orestes et Pylades; nec Molionidæ

illi, Homérico versu celebrati, quos calamitatum societas, atque ars egregie aurigandi nobilitavit, eodem tempore habenas et flagrum inter se partientes. At enim imprudens ipse in meas laudes prolapsus sum, quas ne ab alio quidem unquam prædicari sustinui. Nec mirum videri debet, si hic quoque fructum aliquem ex illius amicitia obiter cepi; nam quemadmodum, cum viveret, ad virtutem, ita, cum vita excessit, ad laudem et commendationem mihi prodest. Verum ad metam rursus nobis reducenda est oratio.

XXIII. Quis prudentia perinde canus erat, etiam ante canitiem? Quandoquidem hac re senectutem Salomon quoque definivit¹. Quis, vel senibus, vel juvenibus æque venerabilis, non de nostræ tantum memoriæ viris loquor, sed de iis etiam, qui longo ante tempore vixerunt? Quis doctrina propter mores minus eguit? Quis tamen uberio-rem doctrinam cum moribus conjunxit? Quod disciplinæ genus est, in quo versatus non sit; atque ita eximie versatus, quasi in eo solo elaborasset? Sic nimirum omnia complexus, ut ne unum quidem quisquam; singula rursus ita ad summum, quasi nihil aliud præterea didicisset. Ad ingenii enim solertiam studium accedebat, ex quibus imperium scientiis et artibus comparatur. Qui cum celeritate naturæ propter laborem et contentionem minime opus haberet, quemadmodum nec labore propter ingenii magnitudinem; sic tamen utrumque conjunxerat, ut non satis liqueret, utro nomine admirabilior esset. Quis in rhetorica, illa, inquam, vim ignis spirante, cum eo comparandus, tametsi illius mores a rhetorum moribus dissiderent? Quis in grammatica, quæ linguam ad græcismum format, historias colligit, metris præest, carminibus leges præscribit? Quis in philosophia, excelsa procul dubio scientia, et sur-

¹ Sap. 17, 8.

sum gradiente, sive eam partem spectes, quæ in actione et speculatione posita est, sive eam, quæ in logicis demonstrationibus aut oppositionibus et concertationibus versatur, quam *Dialecticam* vocant; in qua adeo excelluit, ut iis, qui cum eo disputabant, facilius esset e Labyrinthis sese extricare, quam argumentorum ejus laqueos effugere, si quando res ita postuleret? Jamvero astronomiam, geometriam, numerorum proportionem hactenus didicisse contentus, ut non ab iis, qui in hujusmodi rebus sciti et eruditi sunt exagitaretur; quidquid supererat, ut pietatis cultoribus infrugiferum, contempsit; adeo ut, et quod elegit, magis admirari ac prædicare liceat, quam quod reliquit; et rursus, id quod reliquit, majori laude efferre, quam quod elegit. Nam medicinam, quæ philosophiæ et laboris atque industriæ fructus est, corporis morbus, ac morbi curatio, necessariam ipsi reddiderat; unde exorsus, ad artis habitum tandem pervenit. Eam porro artis partem intelligo, non quæ circa perspicua oculisque subjecta et humilia versatur, sed quæ in doctrina et philosophia consistit. Sed quid hæc, tametsi magna et præclara, si cum morum illius doctrina conferantur? Qui virtutis ipsius periculum fecerunt, Minoem illum ac Rhadamanthum pronugis habent, quos pratis asphodelo refertis, et campis Elysiis Græci donandos duxerunt, paradisi videlicet nostri speciem quamdam animo intuentes, atque ex Mosaïcis, ut opinor, nostrisque libris, tametsi in nomine nonnihil discreparint, aliis tamen vocabulis hoc ipsum indicantes.

XXIV. Atque hæc ita se habebant, eratque doctrinæ mercibus onusta navis, quantum quidem humanæ naturæ assequi datur; neque enim ultra Gades transmeare cuiquam concessum est; ac jam faciendum nobis erat, ut in patriam rediremus, perfectiusque vitæ genus ordiremur, resque spe conceptas, atque inter nos compactas, arriperemus.

Aderat discessus dies, et quidquid ad discessum pertinebat, extremæ allocutiones, prosecutiones, revocationes, gemitus, complexus, lacrymæ. Nihil enim cuiquam perinde molestum et acerbum est, ut iis, qui illic simul educati sunt, et ab Athenis, et inter se divelli. Tum igitur triste et miserum ac commemoratione dignum spectaculum accidit. Circumstare nos sodalium et æqualium, nonnullorumque etiam magistrorum chorus, prorsus negare se nobis abeundi potestatem facturos, obsecrare, cogere, hortari, omnia denique ea, tum facere, tum dicere, quæ verisimile est eos, qui in dolore versantur. Hoc loco faciam, ut et me ipsum, et divinam illam ac irreprehensibilem animam, licet hoc audacius aliquanto videri possit, nonnihil accusem. Ille enim, cum causas exposuisset, cur de reditu suo tam obnixe contenderet, iis, qui eum retinere conabantur, superior extitit; et quanquam ægre, abeundi tamen facultatem impetravit. Ego autem Athenis relictus sum; partim, ut vere loquar, amicorum precibus emollitus; partim ab ipso quadam ex parte proditus, ut qui eo se adduci passus sit, ut dimitteret non dimittentem, iisque, a quibus trahebar, manus daret. Res profecto, antequam contigisset, incredibilis! Fit enim quasi unius corporis in duas partes sectio, atque utriusque interemptio; aut boum, qui simul nutriti sunt, atque idem jugum traxerunt, disjunctio, lugubre quiddam utriusque causa mugientium, dissidiumque permoleste ferentium. Nec tamen in longum mihi producta est hæc calamitas; neque enim diutius miser conspici, nostræque disjunctionis rationem omnibus reddere, sustinui; sed non ita multo tempore Athenis postea commoratus, ut præ animi desiderio equum illum Homericum imitor, perfractisque eorum, a quibus retinebar, vinculis, campos pedihus pulso, atque ad sodalem meum impetu feror.

XXV. Domum autem reversi, cum modo ac scem nonnihil inserviissemus, hactenus scilicet, ut permultorum desiderio utcumque satisfaceremus; nam ipsi quidem ab ambitione ac theatra ingenii ostentatione abhorrebamus; juris nostri quamprimum efficimur, atque ex imbecilibus inter viros censemur, fortius ac virilius ad philosophiam accedentes; non quidem jam corpore, (haud enim sinebat livor,) sed desiderio et amore conjuncti. Ille enim a Cæsariensi civitate, ut alter quispiam conditor et conservator, retinetur; ac deinde, quoniam me carebat, necessarias quasdam peregrinationes, minimeque a proposito sibi philosophiæ scopo alienas, iniit. At me et pietas erga parentes, et senilis ætatis cura, et incursantes calamitates, ab illius consortio abstractum tenuerunt; haud recte id quidem fortasse, nec juste, sed tamen tenuerunt. Atque haud scio, an mihi hinc quoque omnis vitæ difficultas asperitasque orta sit, ac salebrosum ad philosophiam iter fuerit, nec cupiditate mea et animi instituto satis dignum. Sed res quidem nostræ, ut Dei voluntas tulerit, ferantur; atque utinam per illius deprecationem melius ferantur. Hunc vero, multiplex Dei benignitas, atque erga genus nostrum cura et dispensatio, in multis ante muneribus exploratum, ac quotidie clariorem illustrioremque comperitum, in sacrum interea presbyterorum ordinem ascribit, ac splendidam et celebrem Ecclesiæ faciem proponit, atque, per unam Cæsariensem civitatem, universo terrarum orbi prælucet. Quonam autem id modo? Sic nempe, ut eum non subito ad hunc gradum subveheret, nec simul eum, et ablueret, et sapientia instrueret, quemadmodum plerosque eorum, qui nunc antistitum munus appetunt; verum ordine, ac spiritualis progressionis lege, hoc eum honore afficeret.

XXVI. Nec enim mihi perturbatio illa temeritasque pro-

batur, quæ apud nos nonnunquam, et in nonnullis Ecclesiæ præsidibus existit. Non enim eo audaciæ progrediar, ut omnes accusem; inique enim facerem. Verum nauticam legem laudo, quæ gubernatori futuro primum remos tradit, deinde ad proram eum collocat, sicque prioribus muneribus ipsi commissis, tandem eum, post diuturnam remigationem ac ventorum observationem, ad gubernacula constituit. Eadem rei militaris est ratio: miles primum, deinde centurio, tum imperator. Hic optimus ordo est, iisque, qui subsunt, imprimis conducibilis. Quam præclare nobiscum ageretur, si idem esset rerum nostrarum status! Nunc autem periculum est, ne ordo omnium sanctissimus sit quoque omnium maxime ridiculus. Non enim virtute magis, quam maleficio et scelere, sacerdotium paratur; nec digniorum, sed potentiorum throni sunt. Samuël inter Prophetas, ille, inquam, futura prospiciens; sed et Saül, vilis ille et rejiciendus. Roboam Salomonis filius inter reges; sed et Jeroboam, servus et apostata. Cumque, nec medici, nec pictoris nomen quisquam obtineat, nisi prius morborum naturas considerarit, aut multos colores miscuerit, variasque formas penicillo expresserit; antistes contra facile invenitur, non elaboratus, sed recens, quantum ad dignitatem, simul satus et editus, quemadmodum poëtæ Gigantes finxerunt. Uno die sanctos fingimus, eosque sapientes et eruditos esse jubemus, qui nihil didicerunt, nec ad sacerdotium quidquam prius contulerunt, præter *Kelle*. Atque ille quidem inferiori sede acquiescit, humilisque stat, qui sublimem promeretur, atque et multum diuque in divinorum Sermonum meditatione versatus est; et multum diuque carni leges sanxit ad Spiritui parendum; hic contra superbe et arroganter præsidet, superciliumque adversus meliores attollit, nec thronis intremiscit, nec oculi aspecta horrorem conipit, hominem continentie studiosi

sum infra se videns ; verum simul cum imperio, sapientiorum quoque se esse existimat ; prave utique sentiens, atque a potentia et auctoritate de mente deturbatus.

XXVII. At non ita magnus et insignis Basilius ; verum ut aliarum omnium virtutum, sic etiam in his rebus ordinis et disciplinæ exemplar aliis se præbet. Nam cum prius sacros Libros populo lectitasset, ipse eorum interpretes, nec illud lectoris officium se indignum duxisset, ita demum presbyterorum, ac deinde in episcoporum cathedra Dominum laudat, non hanc potestatem furatus, nec ea per vim potitus, nec honorem prosecutus, sed ab honore quæsitus, nec humano favore, sed divinitus ac Dei gratia sacerdotium consecutus. Verum de sedis principatu hoc loco nos expectet oratio ; atque in ea, quæ ad inferiorem dignitatis locum pertinet, nonnihil immoremur. Quale enim hoc quoque mihi pene effluxit, in medio eorum, quæ a nobis commemorata sunt, jacens !

XXVIII. Cum Basilio simultatem quamdam is, qui ante ipsum Ecclesiæ præfuit, exercebat ; (quibus autem de causis, aut quomodo, silentio dissimulare satius est, cæterum exercebat ;) vir cætera quidem fortis, ac mirabili pietate præditus, ut illius temporis persecutio, et acris adversus eum suscepta contentio perspicue declaravit, sed tamen in Basilio aliquid humani passus. Neque enim vulgares tantum homines, sed etiam præstantissimos quoque viros Momus attingit, ut solius Dei sit omni peccato vacare, atque ab animi perturbatione immunem esse. Ac propterea adversus eum Ecclesiæ pars selectior et sapientior concitatur ; si modo sapientiores ii habendi sunt, quam plerique, qui se ipsos a mundo sejunxerunt, ac vitam suam Deo consecrarunt. Nazaræos nostrates dico, atque in huiusmodi rebus maximum studium atque operamponentes ; qui cum grave atque indignum esse duxissent,

pati, ut is, qui principatum inter eos obtinebat, contumelia et probro afficeretur et rejiceretur, periculosissimum facinus aggrediuntur. A magno et a seditione alieno Ecclesiæ corpore deficere, seseque abrumpere constituunt, non exiguam quoque plebis partem amputantes, tam eorum, qui inferioris ordinis erant, quam qui dignitates gerebant. Id autem tribus de causis, iisque firmissimis, perfacile erat. Primum enim Basilius tanta apud omnes veneratione erat, quanta haud scio an quisquam nostræ ætatis philosophorum, eamque vim habebat, ut tumultuanti parti, si voluisset, animos ac fiduciam afferre potuisset. Deinde, qui molestiam ipsi exhibebat, ob eum tumultum, qui in ipsius electione acciderat, civitati suspectus erat, ut qui non tam legitime atque ex canonum præscripto, quam per vim præfecturam accepisset. Postremo aderant episcopi quidam ex Occidente, (23) qui orthodoxos omnes ad suas partes pertrahebant.

XXIX. Quid igitur egregius ille vir, et pacifici discipulus¹? (Nec enim iis, qui contumelia ipsum affecerant, aut qui ipsi studebant, obluctari poterat; nec illius erat dimicare, aut Ecclesiæ corpus lacerare, quæ etiam alioqui ab hæreticis, qui tum potentiam atque imperium obtinebant, oppugnabatur, ac periculose affecta erat.) Simul etiam nobis hac in re consultoribus, ac sinceris monitoribus usus, nobiscum hinc in Pontum profugit, ac pietatis gymnasia, quæ illic erant, moderatur; quodque commemoratione dignum est, ipse cum Elia et Joanne, summis philosophis, solitudinem amplectitur; conducibilis id sibi esse existimans, quam in præsentī negotio cogitationem quamdam philosophia sua indignam suscipere, ac consilii et prudentiæ clavum, quem in tranquillitate tenuerat, in tempestate perdere. Quamvis autem adeo philosophica et

¹ Matth. xi, 29.

admirabilis illius secessio fuerit, præstantiorem tamen et admirabiliorem ipsius reditum fuisse reperimus. Sic enim se habuit.

XXX. Cum in his studiis versaremur, ingruit subito nubes grandinis plena, et exitiose stridens, quæ obrivit Ecclesias omnes, in quas cecidit, et quascumque invasit; imperatorem dico, auri amantissimum et Christi inimicissimum, ac duobus his gravissimis morbis, inexplibili nimirum avaritia et blasphemia, laborantem; qui post persecutorem, persecutor extitit, post Apostatam, non quidem apostata, sed nihilo tamen melior Christianis, vel, ut rectius loquar, Christianorum piissimæ et purissimæ parti, ac Trinitatis cultrici, quam quidem solam pietatem ac salutarem doctrinam appello. Non enim Divinitatem velut ad libram expendimus, nec unam et inaccessibilem naturam per alienas disjunctiones a se ipsa separamus, nec malum malo curamus, impiam Sabellii contractionem per magis impiam divisionem et sectionem dissolventes; quo morbo correptus ille, a furore nomen habens Arius, magnam Ecclesiæ partem concussit, et labefactavit. Nam nec Patrem honoravit, et ea, quæ ex ipso sunt, dedecore affecit, dum inæquales Divinitatis gradus invexit. Verum unam quidem Patris gloriam esse agnoscimus, Unigeniti æqualitatem: unam autem Filii, Spiritus sancti adæquationem. Ac si quid horum trium infra collocemus, ita existimamus, totam Trinitatem a nobis everti ac deleri; tria quidem quoad proprietates, unum autem quoad Divinitatem, venerantes et agnoscentes. Quorum cum ille nihil animadvertet, nec sursum cernere posset, verum ab iis, qui eum ducebant, deprimeretur, secum etiam Divinitatis naturam deprimeri non dubitavit; atque improbam creaturam se præbuit, dominationem nempe in servitutem detrahens.

naturamque increatam et tempore sublimiorem inter res creatas constituens.

XXXI. Hoc illè quidem animo, ut cum huiusmodi impietate, adversum nos expeditionem suscipit. Nec enim aliud quiddam ea res existimanda est, quam barbarica incursio, non muros evertens, non urbes, non domos, aut alia quadam parva et manufacta, et quæ rursum refici atque instaurari possint, sed animas ipsas disturbans. Impetum quoque una cum eo facit exercitus ipso dignus, improbi Ecclesiarum gubernatores, avari atque inmanes orbis illius, qui insuper imperio et ditioni subjectus erat, tetrarchæ. Qui cum ex Ecclesiis alias iam tenerent, alias oppugnarent, alias ob imperatoris opem ac manum, quæ partim adhibebatur, partim denuntiabatur, in potestatem venturas sperarent, huc quoque, ut nostram in ditionem suam redigerent, venerunt, nulla re perinde freti atque subnixi, ut eorum, de quibus paulo ante locuti sumus, simultate, atque illius, qui tum nobis præsidebat, imperitia, ac morbis etiam, qui apud nos grassabantur. Magnam ergo certamen propositum erat; non ignava tamen militum alacritas, sed infirma erat acies, utpote quæ propugnatore, ac perito defensore in sermonis et Spiritus virtute careret. Quid igitur generosa illa et excolta anima, Christi que amore vere prædita? Ne multis quidem sermonibus ad hoc opus habuit, ut nobis præsto esset, ac suppetias ferret; verum simul atque nos legationem obstantem vidit, (erat enim utrique nostrum commune hoc certamen, ut qui fidei propugnatores designati essemus,) statim legationi cessit; ac spiritualibus rationibus secum optate sapientissimeque distinguens, aliud simultatis tempus esse, (si quid etiam eiusmodi affectui indulgendum esset,) nempe securitatis et tranquillitatis; aliud autem longanimitatis ac patientiæ, nempe necessitatis et periculorum

tempus; hoc, inquam, secum reputans, confestim e Ponto nobiscum excedit, ac pro periclitante veritate zelo afficitur, ultroque et sponte belli socium se præbet, totumque se matri Ecclesiæ tradit.

XXXII. At fortasse alacriter quidem hanc rem suscepit, verum nequaquam, ut illa animi alacritate dignum erat, dimicavit: aut strenue ille quidem dimicavit, sed non consulte ac prudenter: aut ita prudenter, ut tamen sine periculo: aut hæc quidem omnia perfecte, ac supra quam dici queat, præstitit, cæterum in illius animo veteris similitudinis reliquiæ quædam residebant? Minime gentium. Omnia quippe simul præstat: inimicitias deponit, consilium agitat, aciem instruit; scandala et offendicula, quæ in medio erant, ac cætera omnia, quorum fiducia, illi nos bello lacesseandos putaverant, submovet. Alios assumit, alios retinet, alios propulsat. « Aliis murus firmus et vallum effici- » tur¹; aliis securis petram scindens², aut ignis in spi- » nis³, » ut divina Scriptura loquitur, sarmentitios homines, et in Divinitatem contumeliosos, facile absumens. Quod si quid auxilii Barnabas, qui hæc loquitur ac scribit, Paulo decertanti tulit, Paulo habenda est gratia, qui illum elegit, ac certaminis socium adhibuit.

XXXIII. Atque illi sane sic infectis rebus discesserunt, mali male tum primum pudefacti et superati, atque edocti, etiam si alios omnes homines, Cappadoces tamen non ita temere contemnere ac pro nihilo putare; quorum nihil tam proprium est, quam fidei firmitas, atque erga Trinitatem fides animique sinceritas; cujus etiam beneficio hoc habent, quod animis conjuncti sunt, atque concordēs, viribusque pollent, eadem videlicet auxilia, quæ Divinitati ferunt, accipientes, imo, multo etiam præstantiora et fir- miora. Proximum autem Basilio negotium ac studium hoc

¹ Jerem. 1, 18. — ² Id. XXIII, 29. — ³ Psal. CXVII, 12.

fuit, antistitem colere atque observare, suspicionem extinguere, mortalibus omnibus persuadere, molestiam eam, quam acceperat, tentationem quamdam et luctam pravi illius fuisse, honestæ ac laudabili concordie invidentis; cæterum non ignarum se esse, quid obedientie ordinisque spiritualis leges postularent: ac proinde adesse, docere, dicto audientem se præbere, monere, quidvis denique illi esse, monitor probus, opitulator commodus, divinorum oraculorum interpres, rerum agendarum præmonstrator, senectutis subsidium, fidei adminiculum, domesticorum fidelissimus, externorum ad res gerendas aptissimus; verbo dicam, tantus ad benevolentiam, quantus prius ad inimicitiam esse putabatur. Ex quo factum est, ut etiamsi cathedra inferior esset, Ecclesie tamen imperium obtineret. Etenim pro benevolentia, quam afferebat, auctoritatem recipiebat; ac mirus quidem erat concentus nexusque potestatis. Ille plebem ducebat, hic ductorem; ac velut quidam leonum curator erat, arte demulcens eum, qui principatum tenebat; quippe, ut nuper in cathedra collocatus, ac mundanæ materiæ aliquid adhuc spirans, nondumque in his, quæ Spiritus erant, instructus, ac præterea ingenti tempestate undique æstuante, aque imminentibus Ecclesie hostibus, opus habebat homine, a quo velut porrecta manu duceretur, et fulciretur. Quamobrem ipsius auxilium amplectebatur, eoque victore, se ipse victorem putabat.

XXXIV. Jamvero ipsius erga Ecclesiam curæ ac præsidii, multa alia quidem indicia sunt: nimirum, dicendi libertas apud præsides, cum alios, tum potentissimos quosque civitatis; controversiarum diremptiones nequaquam suspectæ, sed ab ejus voce formatæ, et ratione modi, legum instar adhibitæ; egentium patrocinia, plura quidem spiritualia, sed tamen corporea non pauca; (nam

id quoque sæpenumero ad animam tendit, per benevolentiam subigens, ac velut in servitutem trahens:) erga pauperes alendos, hospites excipiendos, curandas virgines studium; monasticarum legum institutiones, tum scripto, tum voce traditæ; precum descriptiones, cleri ordines et officia, ea denique omnia, quibus quispiam vere Dei homo, ac Deo adjunctus, plebi prodesse queat. Istud autem unum, maximum est et celeberrimum. Fames erat, et quidem post hominum memoriam atrocissima. Languabat civitas, nec ulla ex parte auxilium afferebatur, nec ulla erat calamitatis medicina. Nam maritimæ quidem urbes ejusmodi rerum penuriam facile perferunt, dantes nimirum ea, quibus affluunt, ac vicissim ea, quibus carent, a mari accipientes; at nos, qui procul a mari degimus, nec ex iis, quibus redundamus, utilitatem ullam capimus, nec ea, quibus egemus, ulla arte comparare possumus, utpote qui, nec quæ habemus, exportare, nec ea, quibus caremus, importare queamus. Sed in hujusmodi malis nihil gravius est, quam crudelitas ac inexplebilis eorum, qui frumentum habent, cupiditas. Observant enim temporum difficultates, et penuriam in quæstam vertunt, atque ex aliorum calamitatibus messem faciunt; nec illud audientes: Eum, qui pauperum miseretur, Domino fœnerari¹: » nec rursus illud: « Eum, qui frumentum abscondit, plebi execrabilem esse²: » nec denique quidquam aliud eorum, quæ vel benignis ac mansuetis hominibus pollicetur Scriptura, vel duris et inhumanis comminatur. Verum ad rem avidiores sunt, quam par sit, maleque sibi consulunt; quemadmodum scilicet aliis sua, ita sibi ipsius Dei, cujus ope magis se indigere nesciunt, quam alii ipsorum auxilio egeant, viscera præcludentes. Atque hæc quidem frumenti emptores et caupones faciunt, qui nec

¹ Prov. xix, 17. — ² Id. xi, 26.

cognitionis jure commoventur, nec Deo, cujus beneficio ipsi frumentum habent, cum alii opprimantur, gratias referunt.

XXXV. At Basilius, nec precibus quidem panem e cœlo fundere¹, nec fugitivum populum in deserto alere poterat, nec indeficientem alimoniam e vasculis, fontis instar, scaturire, quæ, res mira! ipsomet vacuo replebantur, ut nutricem suam in hospitalitatis præmium aleret²; nec demum quinque panibus multa hominum millia pascere, quorum reliquæ quoque ipsæ tales erant, ut pluribus aliis mensis sufficerent³. Hæc enim Moyseis erant, et Eliæ, et Dei mei, a quo ad eos quoque hujusmodi potestas manaverat. Fortasse etiam temporibus illis, atque huic rerum statui conveniebant; quandoquidem « Signa infidelibus, non fidelibus dantur⁴. » Verum quæ his consentanea sunt, et eodem tendunt, ea cum pari fide cogitavit atque perfecit. Aperiens enim verbo et cohortationibus suis locupletum horrea, facit quod est in Scriptura, « Cibus esurientibus frangit, panibusque pauperes saturat, alitque eos in fame, atque esurientes animas implet bonis⁵. » Quo tandem modo? Neque enim hoc ad laudis cumulum parvi momenti est. In unum etenim cogens, quos fames vulnerat, et nonnullos etiam, qui spiritum ægre trahebant, viros, fœminas, pueros, senes, miserabilem omnem ætatem, omnia interim ciborum genera, quibus fames depelli solet, corrogans, atque ollas leguminum, falsique nostratis obsonii, et ad levandam pauperum famem accommodati, plenas proponens; ipse deinde Christi, qui, linteo præcinctus, Discipulorum pedes abluere minime grave duxerat, ministerium imitans, simul-

¹ Exod. xvi, 15, et Psal. lxxvii, 24. — ² 3 Reg. xvi, 14. — ³ Matth. xiv, 19; Luc. ix, 16, et Joan. vi, 11. — ⁴ 1 Cor. xiv, 22. — ⁵ Psal. lxxiii, 7; Psal. xxxii, 19, et Luc. i, 53.

que puerorum, sive conservorum suorum, ad eam rem opera utens, pauperum corpora et animas curabat, honorem nempe cum necessario alimento connectens, atque ipsorum calamitatem utrinque leniens.

XXXVI. Talis erat novus noster procurator, et secundus Joseph: imo etiam majus aliquid dicere possumus. Ille enim ex fame quæstum captat, ac benignitate « Ægyptum emit¹, » ubertatis tempus ad famis tempus disponens et administrans, atque aliorum somniis ad eam rem ordinatus. Hic autem gratuito benignus erat, neque in hoc tribuendi frumenti auxilio lucrum ullum captabat, id unum spectans, ut misericordia misericordiam sibi compararet, ac præsentis annonæ largitione futura bona consequeretur. Accedebat insuper sermonis alimonia, et perfectius beneficium, ac largitio vere cœlestis et sublimis; siquidem Angelorum panis sermo est, quo aluntur atque irrigantur animæ Dei fame laborantes, ac cibum, non fluentem et abeuntem, sed perpetuo manentem expetentes; cujus ipse dispensator erat, et quidem perquam locuples, homo alioqui omnium, quos novi, pauperrimus et egentissimus, non panis famem aut sitim aquæ sanans, sed famem verbi illius, quod vere vitale est, ac vim alendi habet, eumque, qui recte nutritur, ad spiritualis ætatis incrementum ducit.

XXXVII. Ob hæc igitur, ac tanta, (quid enim omnia recensendo diutius immorari necesse est?) Basilius, cum is, qui nomen a pietate apposite ducebat, ex hac vita migrasset, atque in ipsius manibus animam libenter exhalasset, ad excelsum episcopatus thronum evehitur; non id quidem citra laborem, ac citra invidiam et dimicationem, tum eorum, qui patriæ præsidebant, tum perditissimorum quorumque urbis civium, qui ad eorum partes

¹ Gen. xli, 1, et seqq.

sese adjunxerant. Verum fieri aliter non poterat, quin Spiritus sanctus vinceret; atque adeo abunde vicit. Nam ad eum ungendum viros pietate claros, ac zelo flagrantés, ab exteris regionibus excitavit (24), et cum iis novum Abrahamum et patriarcham nostrum, parentem, inquam, meum, cui miranda etiam res quædam accidit. Nam quamvis non solum senectute confectus, sed etiam morbo fractus ac debilitatus esset, animamque ageret, iter tamen aggredi non dubitavit, ut calculo suo electionem juvaret, Spiritus videlicet ope atque auxilio fretus. Atque ut rem in pauca conferam, vehiculo, non secus ac mortuus ferebro, impositus, juvenis redit, firmus ac valens, oculos erectos habens, a manuum impositione et unctione, addo etiam, et ab illius, qui ungebatur, capite roboratus. Hoc igitur ad priscas narrationes accedat, quod labor sanitatem affert, et animi alacritas mortuos excitat, et exilit senectus Spiritu delibuta.

XXXVIII. Cum autem primariæ sedis honore ita affectus fuisset, ut par erat eos, qui ita vixerant, eamque gratiam consecuti fuerant, ac talem apud homines existimationem obtinebant; minime commisit, ut ulla in re postea, vel philosophiæ suæ, vel eorum, qui hoc munus ipsi crediderant, spei, dedecori esset. Quin potius, quantum alios prius, tantum quotidie se ipsum vincebat, optime utique ac sapientissime de his rebus sentiens. Sic enim existimabat, privati quidem hominis virtutem in eo consistere, ut vitio careat, aut quoquo modo probitatem colat; principem autem et antistitem, ac præsertim huiusmodi imperium gerentem, improbitatis notam effugere non posse, nisi multum antecellat, ac melior in dies existat, paremque dignitati suæ ac throno virtutem asserat. Vix enim esse, ut in summo positus, medium assequatur, ac per exuberantem virtutis amplitudinem, vulgus ad

mediocritatem pertrahat. Imovero, ut rectius de his rebus disseram, quod ego in Salvatore prospicio, (atque etiam, ut opinor, sapientiorum quilibet,) quo tempore nobiscum extitit, secundum id quod supra nos, et nostrum erat, formatus, hoc quoque hic contigisse animadverto. « Pro-
 » ficiebat enim, inquit, ut ætate, ita etiam sapientia et
 » gratia¹; » non quod hæc in illo incrementum caperent; quid enim eo, quod a principio perfectum erat, perfectius esse possit? Sed quod hæc paulatim detegerentur et elucerent. Eodem modo Basilii virtutem eo tempore, non incrementum, sed majorem operationem accepisse arbitror, cum ipsi nimirum potestas uberiores materiam suppeditaret.

XXXIX. Ac primum quidem illud omnibus perspicuum facit, munus id, quo affectus fuerat, non humano favore, sed divino beneficio ipsi contigisse. Id autem ex nobis quoque liquido constabit. Qualia enim mecum circa illud tempus philosophabatur? Nam cum aliis omnibus dubium non esset, quin, cum id contigisset, statim accederem, maximaque animi voluptate perfunderer, (id quod fortasse alius quispiam fecisset,) ac cum eo imperium potius pariter, quam supparem auctoritatem ac potentiam haberem, idque ex amicitia nostra conjectarent; ego tamen, cum in omnibus rebus arrogantiae suspicionem, ut si quis alius, fugiens, ac simul temporis illius invidiam vitans, præsertim cum res ejus nondum pacatæ essent, ac adhuc turbarentur, desiderio meo frenum injeci, domique me continui. Quo nomine mecum quidem ille expostulavit, cæterum veniam dedit. Ac postea, cum ad eum venissem, atque eadem de causa cathedræ honorem, insignioremque inter presbyteros honoris locum recusassem, non modo meum hoc factum non incusavit, sed etiam, ut debuit, compro-

¹ Luc. II, 1.

havit; atque a nonnullis, qui rationis ipsius ignari erant, fastus insimulari maluit, quam aliquid facere, quod rationi consiliisque suis adversaretur. At certe, quonam modo luculentius specimen edere potuisset animi ab omni adulatione et assentatione alieni, solamque honesti legem inuenientis, quam ita de nobis, quos in præcipuorum amicorum et familiarium loco numeroque habuit, constituens?

XL. Deinde eos, qui ab ipso dissidebant, emollit, ac sublimis et excelsæ medicinæ rationibus curat. Non enim adulatorie ac serviliter, sed perquam fortiter et magnificè hoc facit, ut qui non præsentis solum temporis rationem haberet, sed etiam futuram obedientiam procuraret. Nam cum perspiceret subditorum animos mollitiæ enervari, et nimia austeritate asperos atque contumaces reddi, utrique malo per alterum medetur; duritiam nimirum mansuetudine et facilitate, mollitiem autem gravitate atque animi firmitate temperans; sermone ad animarum curationem haud multum indigens, opere quam plurima perficiens; non callido artificio homines subigens, sed benevolentia sibi concilians; nec imperii potestate utens, sed per indulgentiam, quam in potestate adhibebat, eos alliciens. Quod autem maximi momenti est, omnes mentis acumine ipsi cedebant, eamque ipsius virtutem esse norant, ut ad eam nemo aspirare posset; atque unam hanc demum sibi salutem esse arbitrabantur, si cum ipso, et sub ipso, sese collocarent, unum vero et certissimum periculum, si in ipsius offensionem incurrerent; ab eo etiam disjungi, nihil aliud esse iudicabant, quam a Deo abalienari: sic ultrocesserunt, ac manus dederunt, et quasi ad tonitruum sonum sese submiserunt, alius alium ad ipsi satisfaciendum advertentes, conceptamque prius adversus ipsum odii vim, in non minorem benevolentiae vim, ac virtutis incrementum, (quam quidem unam firmissimam ipsi satisfaciendi

rationem inveniebant,) commutantes ; præterquam si quis ob deploratam improbitatem neglectus ac projectus est, ut ipse in se ipso conteretur atque consumeretur, non secus ac rubigo simul cum ferro consumi solet.

XLI. Postquam autem res ipsius domesticæ ex animi sententia constitutæ sunt, et quemadmodum nemo fide carens, virtutisque illius ignarus, unquam arbitratus esset, majus quidpiam et sublimius animo agitare incipit. Nam cum alii omnes id tantummodo, quod ante pedes est, videant, suæque ut in tuto sint, laborent, (si tamen id satis tutum esse potest,) nec ulterius progrediantur, nec magni aliquid et strenui, vel cogitatione complecti, vel efficere queant ; ipse contra, tametsi cæteris in rebus moderatus esset, in his tamen modum haudquaquam tenet ; verum sublato in altum capite, mentisque oculis quoquoersum jactatis, omnes eas orbis partes, quas salutifera Christi doctrina pervagata est, comprehendit. Cum autem videret magnam illam Dei hæreditatem, ipsiusque doctrina et legibus, atque cruciatibus acquisitam, « Gentem illam » sanctam, regium illud sacerdotium ¹, » male se habere, atque in sexcentas opiniones et errores distractum esse : atque « Vineam illam, quæ ex Ægypto, hoc est, ex impia » et caliginosa ignorantia, translata et transplantata fuerat ², » quæque ad tam immensam pulchritudinem et magnitudinem perveniat, ut terram universam operiret, ac supra montes et cedros assurgeret ; hanc, inquam, a pravo et agresti apro, id est, a diabolo, labefactatam et pervastatam ; haudquaquam satis esse judicavit, si hanc calamitatem tacito deploraret, manusque ad Deum duntaxat tolleretur, ab eoque, ut urgentia mala depelleret, precibus contenderet, ipse vero interea dormiret ; verum faciendum sibi

¹ 1 Petr. 11, 9. — ² Psal. LXXIX, 9.

quoque potavit, ut opem quandam afferret, ac de suo aliquid erogaret.

XLII. Quid enim hac calamitate tristis, cum satissimè esset, ut is, qui sursum spectat, operam in rem publicam conferret? Uno etenim homine recte aut male se gerente, nihil hinc reipublicæ portendi; at republica hoc aut illo modo se habente, singulos etiam eodem modo affici necesse esse. Hæc igitur ille publici commodi procurator et antistes secum reputans atque perpendens; (quandoquidem « Tinea ossium est cor sensu præditum¹, » ut Salomoni et veritati placet; atque ut indolentia læta est et hilaris, ita commiseratio tristis et acerba, pectusque conficit diuturna cogitatio;) idcirco mœrebat, angebatur, convulnebatur, idem ipsi, quod Jonæ², quod Davidi, usuveniebat animum despondebat, nec, aut « Somnum oculis, aut » dormitationem palpebris concedebat³; » quidquid carni supererat, curis absumebat, quoad huic malo remedium invenisset; divinam et humanam opem, quæ publicum incendium comprimeret, offusamque nobis caliginem discuteret, implorabat.

XLIII. Atque illud quidem unum valde salutiferum excogitat. Nam cum se ipsum, quantum fieri poterat, collegisset, et cum Spiritu conclusisset, atque et omnes humanos sensus excitasset, et altissima quæque Scripturæ loca pervolvisset, piam doctrinam litteris consignat, adversariisque collutationibus et præliis ingentem hæreticorum audaciam frangit, ac propulsat; eos quidem, qui manus conferre ausi fuerant, armis linguæ cominus contundens; eos autem, qui procul ab eo dissiti erant, sagittis ex atramento confectis feriens, nihilo inferiore iis litteris, quæ in tabulis insculptæ sunt: nec uni tantum et exiguæ Judæorum nationi de cibis, et potionibus⁴, et caducis sacrificiis, car-

¹ Prov. xiv, 30. — ² Jon. iv, 9. — ³ Psal. cxxxii, 4. — ⁴ Hebr. ix, 9.

nisque purgationibus; sed omnibus hominibus, atque omnibus orbis partibus, de veritatis doctrina, ex qua salus comparatur, leges statuente. Deinde, quoniam æque imperfecta res est, actio sermone destituta, et sermo ab actione remotus, idcirco actionis subsidium sermoni adjungebat, alios nimirum adiens, ad alios legationem mittens; alios accersens, « Admonens, arguens, increpans¹, » minis insectans, probris incessens, pro gentibus, pro urbibus, pro singulis etiam hominibus certamen suscipiens, omne salutis genus excogitans, undecumque medicinam morbo adhibens; Beseleel ille, ille, inquam, divini fabricator tabernaculi², materiam omnem et artem ad opificium accommodans, atque omnia contexens, ad eximiam quamdam unius operis pulchritudinem et concinnitatem.

XLIV. Quid alia dicere necesse est? Verum enimvero Christi hostis imperator, et fidei tyrannus, cum majori impietate, ac ferventiori acie, ut pote cum potentiori adversario rem habiturus, ad nos iterum venit, impuri ac pravi illius Spiritus in modum, qui « Ex hominis corpore » pulsus³, » diuque vagatus, ad eundem rursus cum majori spirituum agmine habitaturus redit, quemadmodum in Evangelio habetur. Hujus ille imitorem se præbet, tum ut cladem prius acceptam sarciret, tum ut prioribus palæstris aliquid adderet. Indignum enim et miserum esse existimabat, cum multas gentes imperio teneret, magnamque gloriam consecutus esset, ac finitimos omnes impietatis robore atque potentia domuisset, ditionique suæ, quidquid obvium habuerat, subjecisset, ab uno homine, unaque civitate superari, nec solum impietatis patronis, a quibus ducebatur, sed etiam omnibus mortalibus, ut ipsius opinio ferebat, risui esse.

XLV. Persarum quidem regem narrant, cum infinitam

¹ 2 Tim. iv, 2. — ² Exod. xxxi, 2, et seqq. — ³ Luc. xi, 24, et seqq.

quondam hominum cujusvis nationis multitudinem secum ducens, atque iracundia et audacia fervens, in Graciam expeditionem faceret, non eo tantum nominis superbia elatum et in modum immodicum fuisse: sed, ut majorem illi terrorem incuteret, per ea etiam, quæ novo et inusitato modo adversus elementa designabat, formidabilem sese reddidisse. Nova quædam terra et novum mare audiebatur novi illius opificis, et exercitus in continenti navigans, ac rursum pedibus mare peragrans, abreptæ item insulæ, et mare verberibus cæsum, cæteraque omnia, quæ vesani exercitus ducisque haud dubium argumentum erant ignavioribus quidem formidabilia, fortioribus autem ac firmiori animo præditis stulta et ridicula. Hic vero nihil quidem ulla hujusmodi re opus habebat, cum bellum adversum nos compararet; verum, quod his pejus et perniciosius erat, hoc et facere, et dicere ferebatur. « Posuit in cælum os suum, blasphemiam in excelsis loquens, et lingua ejus transivit in terra ». Polebrq enim David eum ante nos confixit; illum, inquam, qui cælum in terram inclinabat, ac in rerum creatarum numerum cogebat naturam mundo sublimiorem, quam se capere quidem res ulla creata potest, tametia, ob nostri amorem, aliquantisper nobiscum versata sit, ut nos humi jacentes ad se ipsam attraheret.

XLVI. Porro cum illustria quidem prima illius facinora fuerint, tum vero illustriora fuere ea certissima, quæ postrema adversum nos habuit. Quænam autem prima dico? Exilia, fugæ, bonorum proscriptiones, insidiae, tam apertæ, quam obscuræ; sermonum illecebriæ; ubi occasiq se offerebat; vis, ubi verberum blanditiæ locus non erat. Alii quidem ab ecclesiis extrudebantur, qui scilicet ad se orthodoxam ac nostram profitebantur. Alii autem inter-

¹ Psal. cxxii, 9.

ducebantur, nempe qui pestiferam et exitialem imperatoris doctrinam tenebant, qui impietatis chirographa exigebant, qui his adhuc graviora scribebant. Presbyteri in medio mari combusti; impii belli duces, non Persas superantes, non Scythas in potestatem redigentes, non aliam quamdam barbaricam gentem debellantes; verum ecclesiis bellum inferentes, in altaribus saltitantes, hominum et victimarum sanguine incruenta sacrificia contaminantes, ac virginum pudorem probro afficientes. Idque quam tandem ob causam? Nimirum, ut Jacob (25) Patriarcha expelleretur, ipsique Esau ille, « Ante etiam, quam in lucem prodiret, odio habitus » subrogaretur. Habetis primorum ipsius facinorum historiam, quorum ipsa quoque commensuratio et auditio multis etiamnum lacrymas movet.

XLVII. Ut vero, peragratis omnibus oppidis, ad hanc firmam et inoffensam ecclesiarum matrem se contulit, ut eam in potestatem redigeret, ac vitalem illum veritatis igniculum, qui solus supererat, extingueret; tum primum se malum consilium iniisse sensit. Nam, ut sagitta in durius ac solidius corpus incidens, repulsus est, et rudentis instar effractus, cessit. In talem Ecclesiae antistitem incidit: in tantum scopulum impactus sese infregit ac dissolvit. Atque alia quidem ex eorum, qui tunc periculum fecerunt, sermone ac commemoratione accipere licet; nemo autem est, qui non hæc memorie prodat. Verum ii demum admiratione afficiuntur, quibus cognita sunt temporis illius certamina, insultus, pollicitationes, minæ; illi ex iudicum classe, qui ad eum mittebantur, eumque flectere ac permovere conabantur; illi ex militari ordine; illi ex gymneo; illi inter fœminas viri, et inter viros fœminæ, nec virile quidquam præter impietatem habentes; qui cum naturali modo libidini operam dare nequeant, quod unum

possunt, lingua scortantur; ille denique Nabuzardan, co-
 quorum praefectus, artis suae gladios minitans, atque ad
 ignem sibi congruentem transmissus. Ego vero id, quod ex
 omnibus ejus laudibus summe admiror, et quod, ne si cur-
 piam quidem, praeterire queam, breviter, quoad ejus fieri
 poterit, exponam.

XLVIII. Eccui tandem incognitus ille est, qui tunc
 apud nos praefecti munere fungebatur, tum suapte audacia
 adversus nos praesertim inflammatus; (nam ab illis
 quoque baptismatiza qua tinctus, vel potius, submersus
 fuerat;) tum etiam amplius, quam necesse esset, imperato-
 ri subserviens, atque ex eo quod illi omnibus in rebus
 obsequeretur, diuturnius imperium sibi conservans? Ad
 hunc, adversus Ecclesiam frementem, leonisque speciem
 praeseferentem, ac leonis more rugientem, atque ejus-
 modi, ut a multis ne adiri quidem posset, vir fortis addu-
 citur; imovero, ingreditur perinde ac si non ad iudicium,
 sed ad festum vocaretur. Quonam autem modo, vel praefecti
 audaciam, vel Basilii virtutem et sapientiam, eam,
 inquam, qua ei restitit, satis digna oratione complectar?
 » Quae tua est, inquit, ratio, heus tu, nomine illum com-
 » pellans; (nondum enim eum episcopum vocare digna-
 » batur;) ut tanto imperatori obsistere audeas, solosque
 » omnium contumaciter te geras? Quorsum, respondit Ba-
 » silius, haec oratio spectat, et quænam haec contumacia et
 » arrogantia? Nondum enim id satis intelligo. Quoniam,
 » inquit ille, imperatoris religionem minime colis, omni-
 » bus aliis jam inclinatis ac superatis. Non enim, inquit
 » Basilius, haec vult imperator meus; nec rem ullam crea-
 » tam adorare sustineo, cum et ipse a Deo creatus sim, et
 » Deus esse jubear. Nos vero, inquit ille, quid tandem tibi
 » videmur? Nihil-ne sumus qui haec jubemus? Quid igitur?
 » Non magnum et honorificum existimas ad nostras partes

» adjungi, sociosque nos habere? » Ad hæc Basilius : « Vos
 » quidem præfecti estis, et quidem illustres, non inficias eo;
 » minime tamen Deo præstantiores. Socios autem vos ha-
 » bere mihi quidem amplum et honorificum fuerit; (quidni
 » enim? ipsi quoque Dei creaturæ estis;) sed ut alios quos-
 » dam ex his, qui nobis subjecti sunt. Non enim personarum
 » dignitate, sed fide christianismus insignitur. »

XLIX. Hac oratione commotus præfectus, ac majori
 ira succensus, de subsellio surrexit, atque asperioribus
 verbis cum eo agere perrexit. « Quid? Potestatem hanc non
 » pertimescis? Cur vero pertimescerem, inquit Basilius?
 » Quid fiet? Quid patiar? quid patieris, intulit ille? Unum
 » e tam multis, quæ meæ sunt potestatis. Quenam hæc;
 » subjunxit Basilius? Fac enim intelligamus. Bonorum, in-
 » quit ille, proscriptionem, exilium, cruciatus, mortem. »
 Tum Basilius : « Si quid aliud habes, id nobis minitare.
 » Horum enim, quæ adhuc commemorasti, nihil nos attin-
 » git. Quoniam modo, inquit ille? Quoniam, inquit Basilius,
 » bonorum proscriptioni obnoxius non est, qui nihil habet;
 » nisi forte laceris et detritis hisce pannis indiges ac paucis
 » libellis, in quibus omnes mihi facultates et copie sunt.
 » Exilium autem haud cognosco, qui nullo loco circum-
 » scriptus sum; ac neque terram hanc, quam nunc incolō,
 » meam habeo, et eam omnem, in quam projectus fuero,
 » pro mea duco; imo, ut rectius loquar, universam terram
 » Dei esse scio, cujus advena ego sum et peregrinus. Jam
 » tormenta quid accipere queant, cum corpus desit, nisi
 » forte primam plagam dixeris? Hujus enim solius potes-
 » te arbitrium et potestas est. Mors porro beneficii mihi
 » loco erit; citius enim me ad Deum transmittet, cui vivē,
 » et servio, maximaque ex parte mortem obli, et ad quem
 » jam pridem propero. »

L. Quo sermone obstupefactus præfectus : « Nemo, in-

»quit, me, (nomenque suum adjunxit,) ad hunc usque
 »diem, ita, nec pari verborum libertate, est allocutus.
 »Neque enim, ait Basilides, fortasse in episcopum incidisti.
 »Alioquin hoc prorsus inodo disseruisset, pro hujusmodi
 »rebus in certamen veniens. Nam cæteris quidem in rebus,
 »o præfecte, mansueti et placidi sumus, atque omnium
 »abjectissimi, quemadmodum hoc nobis lege præscriptum
 »est; ac non dicam adversus tantum imperatorem, sed ne
 »adversus plebeum quidem quemquam et infimi ordinis
 »hominem supercilium attollimus. Verum ubi Deus nobis
 »periclitatur, ac proponitur, tum demum alia omnia pro
 »nihilò putantes, ipsum solum intuemur. Ignis autem, et
 »gladius, et bestię, et ungulę carnem lacérantes, volup-
 »tati nobis ac deliciis potius sunt, quam terrori. Proinde
 »contumellis nos affice, comminare, fac igitur quicquid
 »collibuerit, potestate tua frueri. Audiat hæc etiam impe-
 »rator; nequaquam profecto nos vinctes, nec efficias, ut
 »impie doctrinę assentiāmur, ne si his quidem atrociora
 »miniteris. »

LI. Hæc postquam præfectus dixit, atque audiit, ipsius-
 que contentionem animi eam esse cognovit, ut nulla via
 eum perterrefacere ac superare posset, ipsum quidem foras
 misit, atque ablegavit, non jam cum iisdem minis, sed
 cum quadam reverentia et submissione. Ipse autem, quam
 celerrime potuit, imperatorem adiens: «Imperator, inquit,
 »ab hujus Ecclesię Antistite victi sumus. Minis superior
 »est, sermonibus firmitor, verborum blanditiis fortior.
 »Ignaviorum alius quispiam tentandus est; huic autem,
 »aut vis aperte inferenda, aut non expectandum, ut minis
 »cedat.» Qua de causa, factum suum improbens impera-
 tor, Basilique laudibus victus, (virtus enim hosti quoque
 admirationi est,) vim ipsi adhiberi vetuit: idemque ipsi
 accidit, quod ferro solet, quod quamvis igni emolliatur,

ferri tamen naturam retinet; minisque in admirationem conversis, illius quidem societatem haudquaquam amplexus est, quod mutationem erubesceret, cæterum rationem quæsit, qua honestissime ipsi satisfaceret, quam etiam oratio declarabit.

LII. Etenim, cum in templum, universa satellitum manu stipatus, ingressus fuisset; (erat autem Epiphaniæ dies, cœtusque amplissimus;) ac inter laicos locum habuisset, ita se gessit, ut ipsius communionis quodam modo participes esse videretur. At ne id quidem prætermittendum est. Postquam enim intus fuit, atque ipsius aures Psalmorum cantu, non secus ac tonitruo quodam personuerunt, plebisque pelagus vidit, omnemque ordinem et concinnitatem, quæ tam in sacrario, quam prope sacrarium erat, angelicam potius quam humanam: atque ipsum quidem ante populum recto corpore stantem, qualem Scriptura Samuëlem describit¹, nec corpore, nec oculis, nec animo, perinde ac si nihil novi contigisset, ullam in partem se moventem, sed, in cippi modum, ut ita dicam, Deo et altari affixum; eos autem, a quibus cingebatur, cum timore quodam ac reverentia stantes: hæc, inquam, simul atque perspexit, (nec enim simile quidquam unquam viderat,) humanum quiddam passus est, ejusque oculi et anima vertigine ac tenebris præ timore replentur. Atque id plerisque adhuc obscurum erat et incognitum. Verum cum dona, quorum ipsemet opifex erat, divinæ mensæ offerenda essent, nec quisquam, ut mos ferebat, simul ea caperet, utpote incertum, an ea Basilius accepturus esset, tum manifeste se affectus prodidit. Ita enim titubare cœpit, ut nisi quispiam ex sacrarii ministris vacillantem supposita manu retinuisset, misere utique et luctuose prolapsurus fuerit. Atque hæc ita.

LIII. Jamvero quæ ad ipsum imperatorem, et quanta

¹ 1 Reg. xix, 20.

cum sapientia prolocutus est; (cum quidem ille, nescio quo pacto, rursus nobiscum in Ecclesiam se contulisset, et intra velum extitisset, atque in illius conspectum colloquiumque, quod jampridem expetebat, venisset;) quidnam aliud dicendum est, nisi Dei voces eas fuisse, quas, et qui cum imperatore erant, et nos, qui simul ingressi fueramus, audivimus? Hæc est imperatoriæ erga nos humanitatis origo, ac prima rerum in meliorem statum compositio; hæc occasio maximam impressionis illius, qua tum vexabamur, partem, non secus ac fluctus quosdam, fregit ac dissolvit.

LIV. Sequitur alia narratio, superioribus haudquaquam inferior. Vincebant improbi, atque adversus Basilium exilium decernitur; nec quidquam eorum, quæ ad eam rem attinebant, desiderabatur. Nox aderat, in promptu currus, in plausu hostes, in luctu pii, nos parati atque alacris viatoris latus cingebamus; nihil denique, quod ad præclaram ignominiam spectaret, requirebatur. Sed quid accidit? Exilii decretum Deus rescindit. Nam qui Ægypti, adversus Israëlitas sævientis, « Primogenitos percusserat¹, » idem imperatoris quoque filium morbi plaga afficit. Et quidem qua celeritate? Illinc exilii tabulæ, hinc morbi decretum: ac scelerati scriptoris manus inhibetur, et Sanctus periculo liberatur, fitque vir pius febris donum, qua imperatoris audacia coërcetur. Quid hoc Dei iudicio, vel æquius, vel celerius excogitari potest? Deinde imperatoris filius ægrotabat, afflictoque corpore erat; pater etiam, utpote pater, simul ægro animo urgebatur, remedium undecumque morbo conquirens, atque optimos quosque medicos seligens, ac precibus, ut si alias unquam, incumbens humique provolutus. Nam reges quoque humiles et abjectos reddit calamitas: nec mirum, cum Davidem etiam prius ob filii

¹ Exod. xii, 29.

morbum eodem modo affectum fuisse Scriptura testatur¹. Cum autem huic malo medicinam nullam inveniret, ad Basilii fidem confugit: et quoniam, ob contumelliam feceris ipsi illatam, eum suo nomine accersere præ pudore non auderet, aliis, quos arctissima familiaritate et benevolentia devinctos habebat, hanc legationem committit. Ille vero nihil cunctatus, nec, quod fortasse alius fecisset, adversus tempus insultans, confestim affuit, atque ad ejus adventum statim levior fit morbus, ac meliorem spem pater animo concipit; et certe, nisi salsam aquam dulci admiscuisset, simul videlicet et ipsum advocans, et hæreticis credens, sanum quoque et incolumem filium fortasse recepisset. Id namque pro certo et indubitato habebant, qui tunc aderant, calamitatisque participes erant.

LV. Idem autem et ipsi præfecto non multo post acedisse narrant. Nam hunc quoque morbus quispiam obortus, viri sancti manibus substernit. Et quidem præfecto plaga cordatis hominibus doctrina efficitur, ac plerumque prospero rerum successu potior ac præstabilior est afflictio. Ægro corpore erat, illacrynabat, distorquebatur, Basilium accersebat, obsecrabat. « Satisfactionem habes, » clamabat: da salutem. » Et quidem hanc consecutus est, ut et ipse fatebatur, et multis hujus rei ignaris persuadebat; neque enim illius virtutes admirari ac prædicare designabat. At hujusmodi quidem fortasse ea, quæ cum illis egit, fuerunt, eumque finem habuerunt; cæterum verò cum aliis alio modo se gessit, aut parvis de rebus, aut parum egregie dimicavit, aut non ita magnam exhibuit constantiam, nec ut hominum commemorationem, aut certe insignem laudem, mereretur? Minime sane. Verum is, « Qui nefarium illum Adad adversus Israël olim provocavit², » idem contra hunc quoque Ponticæ provinciæ

¹ 2 Reg. xii, 16. — ² 3 Reg. xi, 14.

præfectum excitavit¹; hoc quidem prætextu, quasi mulierculæ cujusdam causa stomacharetur, sed revera impietatis defensionem suscipiens, ac pietatem oppugnans. Mitto alias omnes contumelias, quibus Basilium vexavit, quod perinde est, ac si Deum dicerem, adversus quem, et cujus causa bellum gerebatur. Quod autem, et eum, qui contumeliam inferebat, maxima ignominia affecit, et pugilem nostrum summopere extulit, (si modo magnum quiddam et excelsum existimandum est philosophia, et hujus laude vulgus anteire,) id oratione prosequar.

LVI. Mulieri cuidam amplissimo loco natæ, cujus maritus haud pridem extreme vitæ die functus erat, judicii assessor vim afferebat, invitamque ad nuptias petrahebat. Illa autem, cum nulla ratione hanc vim effugere posset, consilium capit, non majoris audaciæ, quam prudentiæ plenum. Ad sacram etenim mensam confugit, Deumque adversus hanc injuriam propugnatorem sibi adoptat. Quid igitur, per Trinitatem ipsam! ut forensi quoque dicendi genere nonnihil inter laudes utar, faciendum fuit, non dico Magno Basilio, qui his de rebus leges quoque omnibus statuerat, sed alii culpam longe illo inferiori, modo tamen sit sacerdotio præditus? Quid aliud, nisi ut eam assereret, retineret, omni cura tueretur, Dei clementiæ, et legi, quas altaribus honorem haberi jubet, manum porrigeret, omnia denique prius faceret et pateretur, quam ut inhumanius ullum adversus eam consilium iniret, sicque et mensam sacrosanctam, et fidem etiam illam, cum qua supplicem erat, contumelia afficeret? « Nequaquam, inquit superbus » judex; sed omnes imperio meo cedere, ac Christianos » leges suas prodere oportet. » Ille igitur supplicem deposcebat; hic omni vi retinebat. Ille rursus furore concitatur, ac magistratus quosdam mittit, qui sancti viri cubi-

¹ Is Ponti præfectus erat Eusebius, qui calumnias Basilium inurebat.

culum perscrutarentur, ignominiae causa potius id faciens, quam quod ejusmodi quidquam necesse esset. Quid ais? Domum-ne illius, qui ab omni libidinis motu liber est, quem Angeli complectuntur, quem vel solum intueri sceminae reformidant? Nec eo contentus, ipsum insuper adesse, et causam dicere jubet, neque id placide et humane, sed quasi unum ex iis, qui capite-damnati sunt. Atque ipse quidem aderat. Ille autem ira et arrogantia plenus pro tribunali sedebat. Stabat Basilius, quemadmodum Jesus meus, Pilato judicante. Cunctabantur porro fulmina, Deique gladius adhuc exacuebatur, et differebatur; arcus quoque ita contendebatur, ut tamen retineretur, poenitentiae videlicet tempus ac locum aperiens. Hoc enim apud Deum in more atque usu positum est.

LVII. Age vero, alterum persecutoris et Athletae certamen specta. Ille pallium detrahi et lacerari jubebat: iste, « Exuam praeterea, si ita lubet, etiam tunicam. » Ille eum, qui carnis expers erat, verberaturum se minabatur: iste corpus submittebat. Ille, se ungulis laceraturum: at iste, » Hujusmodi laniatione, inquit, medicinam hepati afferes, » magnopere, ut vides, me prementi. » Atque hi quidem in his erant. Civitas autem, simul atque hujusmodi malum ac commune periculum rescivit, (periculum enim suum quisque ipsius contumeliam esse existimabat,) tota furore corripitur, atque incenditur; ac, velut fumo apum examen movente, certatim omnes cujuslibet generis atque ætatis excitantur et exurgunt, ac praesertim armosam opifices, imperatoriique textores. Nam hi in hujusmodi rebus ferventiores sunt, atque, ob libertatem ac licentiam qua fruuntur, ad audendum paratiores. Unicuique porro teli loco erat, vel quod ars offerebat, vel quod in re praesenti tumultuarie confecerat. Faces in manibus, saxa, fustes in promptu, unus omnium cursus, unus clamor, com-

Annis animorum alacritas : furor , miles vehemens , imo belli dux. Ne mulieres quidem tunc temporis inermes erant , hac nimirum occasione animos earum exacuate ; radii autem ipsis hastarum loco erant ; imo , nec mulieres jam manchant , quippe quas zelus roborasset , atque ad virilem fortitudinem animique magnitudinem traduxisset. Quid plura ? Pietatem omnes ita demum inter se partituros censebant , si ipsum dividerent ac discerpereut ; atque is majorem apud eos pietatis laudem habiturus videbatur , qui primus in eum , qui tantum facinus aggressus esset , manum iniecisset. Quid igitur audax ille et insolens iudex ? Supplex erat , miserabilis , calamitosus , quovis homine dejectior , quoad in conspectum prodiens ille incruentus martyr , et sine plagis coronatus , ac populum pudore victum vi retinens , supplicem suum et vexatorem a periculo vindicavit. Hæc sanctorum Deus , qui omnia facit , atque in melius commutat , « Qui superbis resistit , et humilibus » gratiam abundanter tribuit ⁴. » Quidni autem is , qui mare scidit , et fluminis cursum inhibuit , et elementis vim attulit , et manuum extensione trophæum erexit , ut fugitivo populo saluti esset , hunc etiam a periculis extraheret ?

LVIII. Hic quidem mundanum bellum finem accepit , exitumque habuit , Deo favente , lætum atque felicem , qualemque illius fides merebatur. Hinc vero jam initium submit episcoporum , et eorum , qui socios se ipsis adjunxerant , bellum ; bellum , inquam , tum per se admodum turpe et ignominiosum , tum subditis ipsis magis perniciosum. Quis enim alios ad modestiam inducere queat , cum ipsi præsules sic se affectos præbeant ? Ac tres quidem erant causæ , cur multi etiã pridem parum leni erga eum animo essent. Prima , quod in fidei negotio cum eo minime consentiebant , nisi quantum id ipsis , cogente multitudine ,

⁴ Jacob. iv. 6.

necessario faciendum erat. Altera, quod dolorem, ex ipsius electione conceptum, nondum omnino ex animis eiecerant. Postrema, quod se longe multumque ab eo gloria superari acerbissime ferrent, tametsi id confiteri turpissimum esset. Orta est et alia quædam simultas, quæ hæc omnia redulceravit. Nam cum patria nostra in duas provincias et metropoles divisa esset, ac multa ex priori novæ metropoli adjungerentur, ea de causa inter illos dissidium excitatum est. Ille enim æquum esse dicebat, ut, cum publicis diocæsis, nostræ quoque simul dividerentur; ob eamque causam eas parœcias, quæ novæ provinciæ nuper adjunctæ fuerant, ut jam ad se attinentes, atque ab illo distractas, vindicabat. Hic contra veteri consuetudini, atque huic divisioni, quæ olim a patribus facta fuerat, inhærebat. Atque hac contentione permulta mala, partim jam contingebant, partim impendebant. Subtrahebantur conventus a novo metropolita, proventus diripiebantur; Ecclesiarum presbyteri, alii quidem sermonum blanditiis affliciebantur, alii vero immutabantur. Ex quo illud contingebat, ut Ecclesiarum negotia deterius se haberent, utpote quæ in partes ac studia scinderentur. Homines quippe novarum rerum studio quodam modo delectantur, ac libenti animo noxas suas obiter elucrantur; faciliusque est constituta labefactare, quam labefactata in pristinum statum reducere. Quod autem illum magis in furorem agebat, Taurici reditus erant, qui ab ipso quidem in transitu cernebantur, ad Cæsariensem vero devehebantur, ac sancti Orestis proventus colligere, magni æstimabat: adeo ut ipsius etiam iter facientis mulos aliquando corripuerit, ac, ne ultra progredierentur, cum prædatoria manu prohibuerit. Et quam speciosus his rebus prætextus adhibebatur? « Filii spirituales, et animæ, et fidei doctrina, » cæteraque hujusmodi cupiditatis inexplibilis integumenta, res

invenitu perfacilis;) itemque illud: «Tributum hæreticis pendendum non esse:» quisquis enim molestiam exhibebat, in hæreticorum numero habebatur.

LIX. Nec tamen ille Dei sanctus, ac supernæ Jerusalem vere metropolites, aut cum iis, qui errabant, abductus est, aut hoc dissimulare ac negligere sustinuit, aut parvum hujus mali remedium excogitavit. Sed perspiciamus, quæso, quam magnum et admirandum, et illius, quid enim aliud dicam, anima dignum. Etenim dissidium hoc in Ecclesiæ commodum et incrementum convertit, atque hanc calamitatem quam pulcherrime constituit, patria nimirum pluribus episcopis communita. Ex quo tres præclarissimæ res secutæ sunt. Nam et animarum cura major suscepta est: et quælibet civitas proventus suos habuit: et bellum hac ratione compressum et extinctum est. Hujus consilii vereor ne velut appendix quædam ipse fuerim. Neque enim honestius ac speciosius verbum, quo utar, occurrit. Nam cum cætera omnia hujus viri facta, supra quam dici queat, admirer, unum hoc laudare nequeo; (dolorem enim confitebor, alioqui nec multis incognitum,) eam nimirum, quam in nos adhibuit, novationem ac perfidiam, cujus mœrorem ne tempus quidem adhuc exhaustire potuit. Hinc enim mihi omnis vitæ inconstantia et perturbatio manavit, quodque philosophari nequiverim, aut certe non existimer, tametsi de posteriori non magnopere laborem; nisi quis tamen hoc a me pro illius apologia accipiat, quod sublimiora, quam pro hominis conditione, sentiens, atque hinc, prius etiam quam vita excederet, digressus, omnia ad Spiritum referebat; atque amicitiae officia, quæ alioqui sancto colebat, hic solum aspernabatur, ubi Deum anteponi, atque res in se positas, quam fragiles et caducas, pluris facere oportebat.

LX. Equidem mihi verendum esse video, ne, dum apud

eos, qui omnes illius laudes requirunt, negligentiae culpam vitare cupio, in immodicæ prolixitatis crimen apud eos incidam, qui mediocritatem laudant, quam nec ille contemnebat, utpote qui sententiam hanc, « Modus omnis » optimus, » imprimis laudaverit, ac per omnem vitæ cursum observaverit. Ego tamen, utriusque perpensis, nempe et iis, qui brevitatis nimirum studiosi sunt, et iis, qui nulla oratione saturari possunt, hunc fere dicendi modum tenebo. Alii alio quodam virtutis officio funguntur. Nonnulli etiam ex pluribus virtutis generibus quædam assequuntur. Nemo autem est, qui per omnia ad summum usque grassatus sit, eorum quidem certe, qui nobis noti sunt. Verum is apud nos præstantissimus est, qui, vel quamplurima præstiterit, vel unum quam maxime et præstantissime. At Basilius ita omnia peragravit, ut in eo gloriæ materiam quæsisisse natura videatur. Id autem sic perspiciamus. Laudat quispiam possessionem penuriam, vitamque supellectilis expertem, et supervacaneis rebus vacuam? Illi vero quid unquam fuit, præter corpus, ac necessaria carnis integumenta? Divitiæ autem illi erant nihil habere, et crux, cum qua sola ipsius vita versabatur, et quam majori in pretio habebat, quam ingentes pecuniæ acervos. Neque enim quemquam, etiamsi maxime cupiat, omnia adipisci posse; posse autem omnia contemnere, sicque omnibus rebus præstantiorem se præbere. Hac porro mente præditus, atque ita comparatus, ara quidem opus non habuit, nec inani gloria, nec publico illo præconio: « Crates Cratetem Thebanum libertate donat. » Non enim optimus videri, sed esse, studebat. Nec vero in dolio, atque in medio foro habitabat, ut apud omnes luxum ac delicias sibi compararet, inopiam in rerum copiam novo modo convertens: verum ab omni gloriæ cupiditate alienus, pauper erat et incultus; atque omnibus facultatibus,

quas unquam habuerat, æquo animo projectis, leviter facileque vitæ pelagus trans mittebat.

LXI. Admiranda res, continentia, et parvo contentum vivere, nec a voluptatibus superari, nec a ventre, tanquam a sævo et sordido domino, gubernari! Quis unquam tanta inedia fuit, pene etiam dixerim, quis tam carnis expertus? Nam voracitates et saturitates ad eos abjecerat, qui ad brutorum naturam propius accedunt, quorumque servilis atque in terram prona vita est. Ipse autem nihil eorum, quæ post guttur pari deinceps honore sunt, magnum esse censebat; verum necessariis tantum cibis, quandiu licuit, vitam tolerabat, atque hunc solum luxum norat, nempe a luxu abstinere, nec ob eam causam pluribus rebus indigere; sed lilia et aves, quibus simplex atque artificii expertus pulchritudo est, et victus facilis atque ex tempore quæsitus¹, ob oculos habere, quemadmodum Christus meus monet, qui carnis paupertatem nostra causa subiit, ut nos ipsius Divinitate locupletemur. Hinc illi tunica una, et pallium unum, et stratus humi lectulus, et vigiliæ, et illuvies, (illa ejus decora et ornamenta,) et suavissima cæna et obsonium, panis et sal, novum, inquam, illud condimentum, et potio sobria et uberrima, quam nobis nihil laborantibus fontes profundunt. Ex quibus, imo cum quibus, morborum curationes ac medicationes promanarunt, quod commune utriusque nostrum studium fuit. Oportebat enim me, cum in aliis rebus inferior essem, calamitatem saltem æquam partem habere.

LXII. Magna res, virginitas, et cœlibatus, atque in Angelorum, naturæque singularis ordine censi, vereor enim dicere Christi, qui, cum propter nos genitos nasci vellet, ex Virgine gignitur, virginitatem velut lata lege sanciens, ut hinc abducentem ac mundum conscindentem;

¹ Matth. vi, 26, et seqq.

vel potius, mundum ad mundum transmittentem, præsertim nimirum ad futurum. Quis igitur magis quam ille, aut virginitatem in pretio habuit, aut carni leges imposuit, idque, non suo tantum exemplo, sed etiam per ea quibus operam dedit? Cujus sunt virginum cœnobîa, ac præcepta illa litteris mandata, quibus, et omnes sensus coercerat, et membra omnia componebat, ac vere virginitatem colere admonebat, pulchritudinem, ab iis rebus, quæ aspectu sentiuntur, ad ea, quæ oculorum obtutum fugiunt, convertens; atque id quidem, quod externum est, debilitans, flammæque materiam subtrahens, quod autem internum et occultum est, Deo, qui solus est purarum animarum sponsus, atque insomnes animas, si modo cum claris lampadibus et copiosa olei alimonia obviam ipsi prodierint, secum introducit, spectandum offerens? Cum igitur solitaria vita, et ea, quæ societate gaudet, ut plurimum inter se dissiderent, ac pugnarent, neutraque omnino, vel commoda, vel incommoda sua pura et immixta haberet; verum illa magis quidem tranquilla et sedata esset, ac Deo animos copularet, cæterum ob eam causam fastu non careret, quod virtus non exploraretur, nec in comparisonem veniret; hæc autem magis quidem actiuosa et utilis esset, verum a tumultibus minus libera, eas præclare inter se reconciliavit ac permiscuit, pietatis nimirum gymnasia et monasteria extruens, non tamen longo intervallo ab iis, qui in sodalitiis vivunt, remota, nec, velut muro quopiam interjecto, ea distinguens atque a se invicem separans, verum prope conjungens ac dirimens: ut nec contemplatio communicationis expers esset, nec actio contemplatione careret; sed quemadmodum terra et mare, ita etiam hæ duæ vitæ commoda sua inter se communicantes, ad unicam Dei gloriam concurrerent.

LXIII. Quid præterea? Pulchra res benignitas, et pau-

perum alendorum studium, atque humanæ infirmitati opem ferre. Paululum extra civitatem pedem effer, ac novam civitatem conspice (26), illud pietatis promptuarium, illud commune locupletum ærarium, in quod, non modo redundantes ac superflue opes, sed jam necessariae quoque facultates per illius cohortationes reconduntur, tinea excutientes, fures non oblectantes, invidiæ certamen, et temporis corruptionem effugientes; in quo morbus æquo animo toleratur, et calamitas beata consetur, et misericordia exploratur. Quid cum hoc opere comparem Thebas septem portas habentes, et Ægyptias illas, et muros Babylonicos, et Caricum Mausoli sepulcrum, et pyramides, et colossi æs immensum, et delubra mira magnitudine atque eleganti arte confecta, jam eversa et prostrata, ceteraque omnia, quæ homines admirantur, atque historiis prodiderunt (27); ex quibus omnibus, præter inanem quamdam et exiguam gloriam, nulla prorsus utilitas ad extractores rediit? Mihi vero nulla res perinde admirabilis videtur, atque compendiaria hæc ad salutem via, hic facilis in cælum ascensus. Non jam oculis nostris triste et miserandum spectaculum proponitur, homines antea mortem vita functi ac pluribus corporis membris mortui, civitatibus, domibus, foro, aquis, hominibus etiam sibi charissimis expulsi, nominibus potius quam corporum lineamentis agnoscendi: nec in publicis cœtibus et conventibus per sodalitia et contubernia offerantur, non jam misericordiam ob morbum, sed odium sui concitantes, miserabilium cantionum artifices, si quibus tamen vox quoque ipsa superest. Quid res nostras omnes tragicis verbis prosequar, cum nulla oratio huic calamitati per inveniri queat? At ille omnium maxime nobis persuasit, ut, cum homines simus, homines ne contempnamus, nec per nostram in illos crudelitatem, Christum, unum omnium caput, ignis

minia afficiamus; sed in alienis calamitatibus nobis ipsis optime consulamus, Deoque misericordiam, qua ipsi egemus, fœneremur. Quocirca ne labra quidem vir nobilis, et nobilibus ortus, gloriaque clarissimus, ægrotis admoveere gravabatur; verum ut fratres amplectebatur, non, ut quispiam fortasse existimaverit, inanem gloriam captans; (quis enim ab hoc affectu remotior?) verum per philosophiam suam hoc aliis præscribens, ut ad ægrorum corporum curationem accedere non vererentur. Ita, non modo loquendo, sed etiam tacendo, monitoris partes obibat. Nec vero civitas quidem ad hunc modum se gerebat, regio autem atque externa loca non item: quin potius, omnibus populi præsulibus commune benignitatis erga pauperes et munificentiae certamen proposuit. Et aliorum quidem coqui, et lautæ mensæ, et cupediariorum lenocinia et scitamenta, et elegantes currus, et vestes molles lateque diffuentes: Basilii autem, ægroti, et vulnerum curationes, et Christi imitatio, non quidem sermone, sed opere lepram purgantis.

LXIV. Quid ad hæc nobis dicturi sunt, qui homini fastum superciliumque objiciunt? Iniqui sane et acerbi rerum hujusmodi judices, eosque, qui regulæ non sunt, ad regulam admoventes. An vero fieri potest, ut qui leprosos deosculetur, et huc usque se demittat, adversus sanos et valentes supercilium attollat? Qui carnes continentia et inedia conficiat, inani animi fastu infletur? Qui Pharisæum damnet, atque illius ex arrogantia depressio nem commemoret, et Christum sciat ad formam usque servilem sese demisisse, et cum publicanis comedisse, et Discipulorum pedes abluisse, nec crucem recusasse, ut peccatum meum affligeret; (quanquam quid hoc mirabilius, Deum, qui capi atque expugnari nequit, ac perpeccatione omni sublimior est, pendentem, et quidem cum la-

tronibus, ac prætereuntium ludibrio expositum intueri;) idem tamen supra nubes sese efferat, atque omnibus anteponat, quemadmodum iis videtur, qui ipsius virtuti invident? Verum illi fastus nomen, ut opinor, morum firmitati et innocentiae imposuerunt. At iidem homines facile quoque mihi facturi videntur, ut et sortem, temerarium appellent; et prudentem ac circumspectum, timidam; et temperantem, agrestem et inhumanum; et justum, illiberalem et sordidum. Neque enim hoc quidam male tradiderunt, « Virtutibus finitima et quodam modo vicina esse » vitia; » nihilque facilius esse, quam ut ab illis, qui huiusmodi rerum scientiam non tenent, res quædam aliud esse judicetur, quam revera sit. Quis enim magis aut virtutem coluit, aut vitium coërcuit, vel officio probe functis benigniorem ac suaviorem, aut peccantibus severiorem se præbuit; utpote cuius vel pertenuis risus sæpe laudatio esset, et silentium increpatio, in propria nimirum cuiusque conscientia culpam explorans ac puniens? Quod si non lepidus quispiam et facetus erat, nec circumforaneus, nec ex eo quod omnibus omnia fieret, plerisque gratus et acceptus, quid tum? Nonne laudem potius quam reprehensionem hoc nomine meretur, saltem apud mente præditos? Nisi quis leonem etiam accusandum putet, quod non simiæ vultum, sed torvum quemdam et horrificum ac regium præferat, cuius ipse quoque saltationes fortes et generosæ sunt, et cum admiratione jucundæ; atque etiam histriones, ut suaves et humanitatis plenos, admiretur, quoniam populi voluptatibus inserviunt, colaphosque sibi invicem in malam impingendo, strepitumque ciendo, risum ei movent. Quanquam etiam, si hoc quæramus, quis in cœtibus adeo jucundus, quantum quidem ipse cognosco, qui ipsius maxime periculum feci? Quis in narrando festivior? Quis in jocando argutior? Quis in objurgando lenior?

Sic ut neque increpatio in temeritatem, neque indulgentia in molliem recideret, sed utriusque excessum fugeret, utroque congruenter et tempestive utens, juxta Salomonis leges, qui omnibus rebus tempus constituit¹.

LXV. Sed quid ista sunt, præ illius dicendi facultate, palmaque doctrinæ, qua extremas orbis partes inter se conciliavit? Adhuc in montis radicibus versamur, a vertice remoti: adhuc fretum trajicimus, relicto magno et profundo Oceano, existimo enim, si quæ unquam tuba fuit, vel futura est, in aërem quam longissime penetrans, aut vox Dei totum orbem comprehendens, aut universæ terræ motus novo quodam et mirando modo exortus, hæc omnia vocem illius ac mentem fuisse, tantum omnes a tergo relinquentem atque infra se collocantem, quantum nos brutorum naturam superamus. Quis se ipsum magis Spiritui purgavit, atque ita se comparavit, ut dignus esset, qui oracula divina explanaret? Quis rursum majori scientiæ luce collustratus est, atque in profunda Spiritus prospexit, ac cum Deo, quæ Dei sunt, exquisivit? Quis porro sermonem habuit animi sensa melius exponentem, ita ut neutra parte, ut plerique, claudicaret, nempe, vel mente sermone destituta, vel sermone qui ad mentis intelligentiam non assurgat: verum parem in utraque re laudem obtineret, parque ipse sibi haud dubie esset, ac vere integer et perfectus. Ac quædam Scriptura hoc Spiritui sancto tribuit, quod « Omnia scrutetur, etiam profunda Dei², » non ut ignorans, sed ut ex eorum contemplatione summam voluptatem capiens. Basilius autem omnia, quæ Spiritus sunt, perscrutatus est, ex eoque mores omnes erudit, ac sublimiter loqui docuit, hominumque animos a rebus præsentibus abstractos ad futura traduxit.

LXVI. Laudatur apud Davidem solis pulchritudo, et

¹ Eccle. iii, 1, et seqq. — ² 1 Cor. ii, 10,

magnitudo, et cursus celeritas, et vis ac facultas; quippe qui sponsum splendore, gigantem magnitudine referat¹, ac longe lateque progrediendo, tantam vim habeat, ut ab extremis extrema æque collustret, nec locorum interval-
lis ipsius calor ullò modo minuat. Basilio autem pulchritudo, virtus fuit; magnitudo, theologia; cursus, perpetua mentis agitatio, per quotidianos ascensus ad Deum ferens; potentia, doctrinæ semen ac distributio. Itaque ne hoc quidem mihi dicere verendum est, « In omnem terram » sonum illius exiisse, atque in fines orbis terræ vim illius » verborum²; » quod de Apostolis Paulus dixit, a Davide mutuatus. Quænam hodie alia ullius conventus lætitia? Quæ conviviorum voluptas? Quæ fori? Quæ Ecclesiarum? Quæ principum et privatorum deliciæ? Quæ monachorum, aut eorum qui societate gaudent? Quæ eorum, qui se a negotiis removerunt, vel eorum qui in rebus gerendis versantur? Quæ eorum qui profanæ, vel eorum qui nostræ disciplinæ studium profitentur? Una, et per omnia, et maxima oblectatio, illius volumina et lucubrationes. Nec scriptoribus materia ulla alia et copia post eum, præter ipsius scripta, suppetit. Silentur vetera, quæcumque in divinorum Oraculorum explanatione a quibusdam elaborata sunt: nova prædicantur; atque is apud nos eruditissimus habetur, qui libros ipsius quam maxime intelligit, ac lingua versat, auribusque instillat. Unus enim, omnium loco, studiosis ad eruditionem comparandam sufficit.

LXVII. Hoc tantum de eo dicam. Cum Hexæmeron illius in manus sumo, atque in ore habeo, cum Creatore conjungor, ac creationis rationes cognosco, Creatoremque magis admiror ac suspicio, quam prius solebam, cum solo aspectu magistro uterer. Cum libros eos, quibus hæ-

¹ Psal. xviii, 6. — ² Ibid. 5, et Rom. x, 18,

reticorum scripta refutat, lego, Sodomiticum ignem cerno¹, quo improbæ ac sceleratæ linguæ in cinerem rediguntur, aut Chalanæ terrim², ut male constructam, ita recte interruptam atque deletam. Cum ea, quæ de Spiritu sancto scripsit, evolvo, Deum, quem habeo, nanciscor, veritatem libero et fidenti animo prædico, illius videlicet theologiæ atque contemplationi insistens. Cum alias ejus enarrationes perlego, quas iis, qui hebetiori ingenio sunt, explicat, trifariam in solidis cordis sui tabulis describens, eo adducor, ut non in externo litteræ cortice pedem figam, nec verborum tantum superficiem spectem, sed ulterius progrediar, atque ex profundo in profundum transeam, « Abyssum per abyssum invocans³. » ac per lumen lumen inveniens, quoad usque ad summum tandem verticem pervenero. Cum Martyrum encomia lego, corpus contemno, et cum iis, qui laudibus effèruntur, animo versor, atque ad certamen excitor. Cum orationes eas, quas de moribus ac bene vivendi ratione scripsit, in manus accipio, animo et corpore purgor, templumque Dei capax efficior, atque instrumentum musicum a Spiritu pulsatum, divinamque gloriam et potentiam canens; ipsius afflatu corripior et concinnor, atque divina quadam immutatione alius ex alio efficior.

LXVIII. Quoniam autem theologiæ mentionem feci, ejusque in dicendo sublimitatis, qua ille in eo potissimum argumenti genere usus est, hoc adhuc superioribus adjungam. Simplicibus enim et imperitis utilissimum est providere, ne damno afficiantur male et sinistre de ipso existimantes. Mihi vero ad improbos et malignos oratio est, qui ex eo quod alios calumniis incessunt, vitiis suis opem ferre molliuntur. Ille etenim pro recta doctrina, sanctæque Trinitatis conjunctione et condeitate, aut ne-

¹ G. n. xix, 24. — ² Id. xi, 4, et seqq. — ³ Psal. xli, 8.

cio quo magis proprio et perspicuo verbo res ea notari potest, non modo de throno, ad quem ne ab initio quidem cupide prosiliit, exturbari ac dejici, sed etiam exilio, et morte, atque ante mortem variis cruciatibus affici, prompto alacrique animo tulisset, ac lucro potius quam periculo deputasset. Hoc vero ita esse aperte declarant ea, quæ et fecit, et passus est: ut qui etiam ob veritatis defensionem exilio mulctatus, nihil aliud negotii susceperit, quam uni ex asseclis, ut se acceptis pugillaribus sequeretur, imperreret. Cæterum, « Sermones cum judicio disponere¹, » de Davidis consilio et sententia, necessarium esse judicabat, ac belli tempus, et hæreticorum principatum aliquantisper tolerare, quoad libertatis ac serenitatis tempus successisset, linguæque libertatem ac licentiam attulisset. Illi enim nudam et apertam vocem de Spiritu sancto, quod Deus esset, arripere studebant; (quod quidem, tametsi verum erat, impium tamen illis, atque improbo impietatis antistiti videbatur;) ut eum quidem cum theologica lingua civitate pellerent, ipsi autem Ecclesiam occuparent, eamque sceleris sui propugnaculum efficerent, atque hinc deinde, velut ex arce quadam, id omne, quod reliquum erat, popularentur. At ille, in aliis quidem vocibus e Scriptura petitis, testimoniisque minime dubiis, eandem vim habentibus, necessariisque argumentis, adversarios ita comprimebat, ut nullo modo repugnare ac contraniti possent, sed, quæ maxima sermonis virtus et prudentia est, propriis vocibus constringerentur. Id autem perspicue ostendet is liber, quem hoc argumento edidit, in quo calamum quasi ex Spiritus pyxide movet; interim tamen propriam vocem usurpare differebat, tum ab ipso met spiritu, tum a sinceris ipsius propugnatoribus illud in gratiæ loco petens, ne hoc suo consilio offenderentur (28):

¹ Psal. cxl, 5.

nec committerent, ut, dum unam voculam mordicus retinere conarentur, propter inexplebilem cupiditatem omnia perderent, turbulento nimirum tempore convulsa ac distracta pietate. Ipsos enim nihil ex eo incommodi ac detrimenti accepturos, si vocabula paululum immutarentur, modo aliis verbis eadem docerentur; neque enim salutem nostram in verbis potius, quam in rebus consistere; quippe cum ne Judæi quidem rejiciendi sint, si ad aliquod tempus pro *Christi* voce, vocem *Uncti* sibi concedi postulantes, in nostrum numerum atque ordinem ascribi velint; at reipublicæ non posse majorem perniciem ac pestem afferri, quam si Ecclesia ab hæreticis occuparetur.

LXIX. Nam quod alioqui melius quam quivis alii, Spiritum sanctum Deum agnosceret, cum ex eo perspicue constat, quod et hoc sæpe palam, quoad per tempus licebat, prædicavit, et privatim apud eos, a quibus interrogabatur, haud cunctanter confessus est; tum vero in suis ad me sermonibus apertius id demonstravit; (neque enim quidquam unquam, cum de his rebus mecum colloqueretur, animo tectum occultumque habuit;) non simpliciter hoc affirmans, sed, quod antea ipsi perraro acciderat, sibi rem omnium maxime horrendam imprecatus, nempè, ut ab ipso Spiritu excideret, nisi cum Patre et Filio Spiritum, ut consubstantialem et honore parem, veneraretur. Quod si quis me in tantis quoque rebus illius socium admiserit, aliquid, quod plerisque incognitum ante fuit, evulgabo. Nam cum tempus in summas angustias nos redigeret, hanc ipse rationem inibat, ut sibi quidem dispensationem, nobis autem, quos, ob nominis obscuritatem, nemo in judicium adducturus, patriæque ejecturus esset, loquendi libertatem committeret. Atque ita Evangelium nostrum firmum et validum erat, utriusque præsidio suffultum, Nec vero hæc eo a me commemorata sunt,

ut illius existimationem oratione mea defenderem; præstantior enim est, quam ut accusatoribus, si qui tamen sunt, in ipsius famam quidquam liceat; sed ne quidam, pietatis normam ac regulam solas eas voces, quæ in illius libris reperiuntur, esse existimantes, imbecilliores fidem habeant, eamque de Divinitate disserendi rationem, quam ei tempus illud, non sine Spiritus numine, afferebat, in pravitatis suæ confirmationem trahant; verum eorum, quæ ab eo scripta sunt, sensum ac scòpum, quem sibi, dum hæc scriberet, proponebat, expendentes, tum ad veritatem magis accedant, tum iis, qui in impietate versantur, os obstruant. Mihi quidem, omnibusque, quibus charus sum, utinam adsit illius theologia. Atque adeo, hujusce viri, quantum ad hanc rem attinet, puritati usque adeo confido, ut, præter alia omnia, hoc quoque cum eo commune habere non recusem; ita ut ille mea, mihi vicissim illius omnia, et apud Deum, et apud candidissimos quosque homines, ascribantur. Nam neque Evangelistas idcirco inter se pugnare dixerimus, quoniam alii in exponenda Christi humanitate plus operæ posuerunt, alii ad explicandam Divinitatis materiam se contulerunt; atque alii ab his rebus, quæ ad intelligentiam nostram sese accommodant, alii ab iis, quæ captum nostrum superant, auspicati sunt; sic videlicet prædicationem inter se parliti; ut eorum, qui eam excipiebant, utilitas ferebat, atque ita informati et edocti a Spiritu, qui in ipsorum animis erat.

LXX. Age igitur, cum multi viri, tum in Veteri, tum in Novo Testamento pietate clari et illustres fuerint, legislatores, militares duces, Prophetæ, doctores, fortes usque ad sanguinis profusionem cum illis Basilium nostrum conferamus, atque hinc, qualis fuerit, agnoscamus. Adam Dei manu, ac deliciarum paradisi, et prima lege dignus

habitus est¹; ille tamen, ne quid debitæ parenti nostro reverentiæ contumeliosum dicam, præceptum minime servavit: hic autem, et illud accepit, et servavit, nec ex scientiæ ligno incommodi quidquam accepit; nec dubito, quin flammeum gladium prætergressus, ad paradisum pervenerit. Enos primus spe adductus est, ut Dominum invocaret²: hic autem, non solum invocavit, sed, quod invocatione multo præstantius est, aliis quoque prædicavit. Henoch translatus est³, exiguæ pietatis præmium, (fides enim adhuc in umbris erat,) hac translatione consecutus, vitæque sequentis periculum effugit: hujus autem vita omnis nihil aliud quam translatio erat, quippe qui perfecte in vita perfecta probatus et exploratus fuerit. Noë arcam fidei suæ commissam accepit, et secundi mundi semina parvo ligno credita, atque inter undas conservata: hic autem impietatis diluvium effugit⁴ suamque civitatem arcam salutis effecit, in hæreticorum undis facile et leviter supernatantem, atque ex eo universum orbem recuperavit.

LXXI. Magnus Abraham, et Patriarcha, et novæ victimæ mactator, eum, quem ex promissione acceperat, beneficii Auctori offerens, victimam promptam et alacrem, atque ad cædem properantem⁵. At nec parva Basilii laus est, qui se ipsum Deo obtulit, nec quidquam in ejus locum, tanquam ipsi par, (quidnam enim illud esset?) substitutum est, sed plene perfecteque litatum. Isaac etiam, antequam in lucem ederetur, promissus est: hic autem sponte se ipsum promisit, ac Rebeccam, hoc est, Ecclesiam, non procul quæsitam⁶, sed e propinquo assumptam, uxorem duxit, nec per servorum legationem, sed divino beneficio concessam atque commissam; nec in filiorum prælatione

¹ Gen. 1, 27, et seqq. — ² Id. iv, 26. — ³ Id. v, 21, et seqq. — ⁴ Id. vi, 13, et seqq. — ⁵ Id. xii, 1, et seqq. — ⁶ Id. xviii, 10; xxi, 3, et seqq.

circumventus est, sed unicuique, quod promerebatur, cum Spiritus iudicio et delectu, sine ulla fraude ac circumscriptione, tribuit. Jamvero Jacobi scalam et columnam eam laudo, quam Deo unxit, ejusque etiam cum eo colluctationem, quæcumque tandem illa erat¹; est quidem, ut ipse opinor, humani moduli cum divina sublimitate comparatio et contentio, unde etiam procreatæ naturæ devictæ notas gerit. Illius quoque circa ovium greges artificium et felicitatem, et duodecim ex eo natos Patriarchas, et benedictionum partitionem cum egregia futurarum rerum prædictione conjunctam, laudibus eveho. At hujus etiam, non conspectam tantum, sed et transitam, et per quotidianos virtutum gradus conscensam scalam laudo, et columnam, quam Deo, non quidem unxit, sed erexit, impiorum dogmata ad infamiæ sempiternæ notam inusta continentem, eamque dimicationem, quam, non adversus Deum, sed pro Deo suscepit, hæreticorum dogmata dejicientem ac prosternentem; ac præterea pastorem illius artem, ex qua locupletatus est, plures oves insignitas, quam signi expertes adeptus; elegantem item et numerosam sobolem secundum Deum progenitam, ac denique benedictionem, qua multos suffulcivit.

LXXII. Joseph frumenti distributor fuit², sed Ægypti duntaxat, neque id sæpius, nec nisi corporeo modo. At hic, et omnium, et semper, et spirituali modo: quod quidem illa frumenti distributione, mea quidem sententia, longe præstantius augustiusque censendum est. Cum Job Ausita, et tentatus est, et superior discessit³, confectisque certaminibus, illustri præconio victor pronuntiatus est: ut qui nullo incursantium acerbitatum, quæ multæ fuerunt, impetu concussus et labefactatus fuisset, sed tentatorem

¹ Gen. xxviii, 12, et seqq. — ² Id. xli, 40, et seqq. — ³ Job. i, 1, et seqq.

abunde superasset, atque amicorum calamitatis arcanum ignorantium stultitiam ac temeritatem repressisset. « Moyses et Aaron in sacerdotibus ejus ¹ » Et magnus quidem Moyses, qui Ægyptum vexavit, populum in signis multis prodigiisque servavit ², intra nubem processit, duplicem legem sanxit, litteralem nimirum externe, spirituales interne. Aaron autem, Moysis, et corpore, et spiritu frater ³, pro salute populi preces et sacrificia ad Deum adhibens, magni illius et sacrosancti tabernaculi mystes, « Quod » fixit Dominus, ac non homo ⁴. » Utriusque horum ille æmulus fuit, hæreticam et ægyptiam nationem, non corporeis, sed spiritualibus plagis excrucians; « Populum autem acquisitionis, bonorum operum sectatorem ⁵ » ad promissionis terram ducens, et tabulis, quæ non perfringuntur, sed conservantur, leges, non jam obscuras et abumbratas, sed omni ex parte spirituales, inscribens; atque adeo in Sancta Sanctorum, non semel quotannis, sed sæpius, et, ut ita dicam, quotidie ingrediens, atque hinc nobis sanctam Trinitatem detegens, ac postremo, non per fluxas et caducas aspersiones, sed per æternas purificationes, populi labes eluens. Quid pulcherrimum habuit Josué ⁶? Militare imperium, et portionum distributionem, terræque sanctæ possessionem. Iste vero, nonne imperator? Nonne Dux eorum, qui salutem per fidem assequuntur? Nonne diversarum hæreditatum ac mansionum, quæ apud Deum sunt, assignator, quas militibus suis distribuit? Adeo ut hac quoque voce ipse uti possit: « Funes ceciderunt mihi in præclaris ⁷. » Et rursus: « In manibus tuis » sortes meæ ⁸; » sortes utique iis, quæ humi serpunt, ac diripi possunt, multo præstantiores.

¹ Psal. xcviij, 5. — ² Exod. vii, 8, et seqq. — ³ Id. xxix, 4, et seqq. — ⁴ Hebr. viii, 2. — ⁵ Tit. ii, 14. — ⁶ Josué. i, 2, et seqq. — ⁷ Psal. xlv, 6. — ⁸ Id. xxx, 16.

LXXIII. Atque, ut iudices, et iudicium clarissimos quosque prætereamus, « Samuël inter eos, qui invocant nomen ejus¹, » et ante nativitatem donatus, et post nativitatem confestim sacer, ac cornu suo reges et sacerdotes ungens². Quid Basilius? Nonne ab infantia, et ab ipsa matrice, Deo consecratus, ac cum diploide altari oblatus est, et cœlestia perspiciebat, et unctus Domini erat, et unctor eorum, qui ex Spiritu perficiebantur? David inter reges clarus et celebris³, ejus multæ quidem de hostibus victoriæ ac triumphî historiis proditi sunt, et præcipuum decus ac ornamentum est mansuetudo⁴, et ante regiam dignitatem vis citharæ malum Spiritum incantans. Salomon cordis latitudinem a Deo postulavit, et obtinuit, eoque sapientiæ et contemplationis progressus est, ut omnes ætatis suæ mortales nominis celebritate superaret⁵. Basilius autem, nisi me opinio fallit, nec illi lenitatis, nec huic sapientiæ laude quidquam, aut minimum certe concedit; adeo ut imperatorum quoque, qui dæmonum intemperis agitabantur, furorem emolliret; nec regina tantum Austriæ, aut quidam duntaxat homines, sapientiæ ipsius fama commoti, et finibus terræ ad eum se conferrent, sed omnibus orbis finibus sapientia ipsius nota esset. Ac, quæ de Salomone sequuntur, silentio præteribo; sunt autem ea cunctis conspicua et explorata, etiamsi nos dicere super-sedeamus.

LXXIV. Eliæ loquendi libertatem, quam adversus tyrannos adhibuit, ipsiusque per ignem raptum laudas⁶? Laudas etiam pulchram Elisæi hæreditatem, illam nimirum melotem, quam Eliæ Spiritus comitatus est⁷? Hujus quoque vitam lauda, in igne traductam, id est, in tenta-

¹ Psal. xcviii, 6. — ² 1 Reg. i, 20, et xvi, 13. — ³ 2 Reg. v, 1, et seqq. — ⁴ Psal. cxxxi, 1. — ⁵ 3 Reg. iv, 29, et seqq. — ⁶ 4 Reg. i, 1, et seqq. — ⁷ Id. ii, 2, et seqq.

tionum agmine, ac salutem per ignem partam, urentem quidem illum, sed non perurentem, quod est rubi miraculum ¹, sublimitusque illi concessam pellem, nimirum virginitatem. Mitto rore perfusos in flammis adolescentes ²; et fugitivum Prophetam, in ventre ceti precantem, atque ex bestię præcordiis, quasi e thalamo, prodeuntem ³; et Justum illum, leonum furorem in lacu vincientem ⁴. Mitto septem Machabæorum dimicationem, qui cum sacerdote et matre in sanguine, atque omnis generis tormentis consummati sunt ⁵. Quorum ille tolerantiam æmulatus, gloriam quoque retulit.

LXXXV. Transeo jam ad Novum Testamentum, ac iis, qui hic laude atque gloria floruerunt ⁶, ipsius vitam conferens, ex magistris Discipulum ornabo. Quis præcursor Jesu? Joannes, ut vox Verbi, et ut lucerna luminis, qui coram ipso et in ventre exiliit, et ad inferos per Herodis furorem transmissus est, ut illic quoque mox venturum prædicaret. Quod si cui audacior forte videatur hic sermo, illud prius cogitet, me in hac comparatione non id agere, ut ei, qui inter natos mulierum omnes superavit, Basilium, vel anteponam, vel exæquem; sed ut, eum ipsius imitatore fuisse, atque ex ejus forma et caractere nonnihil in se ipso gessisse, ostendam. Non enim probis viris exiguam laudem affert summorum virorum vel parva imitatio. Annon enim philosophiæ illius simulacrum perspicue in se ipso expressit? Ipse quoque in deserto habitavit. Ipse quoque noctu, ut lateret, hominumque fugeret notitiam, aspera veste tectus est. Ipse quoque idem cibi genus adamavit, Deo videlicet per continentiam se purgans. Ipse quoque dignus etiam habitus est, qui Christi præco fieret, etiamsi non præcursor; atque ad eum egrediebatur, non solum

¹ Exod. iiii, 2. — ² Dan. vii, 5, et seqq. — ³ Jon. ii, 1, et seqq. — ⁴ Dan. xiv, 28, et seqq. — ⁵ 2 Mach. vii, 1, et seqq. — ⁶ Luc. iii, 4.

omnis finitima regio, sed etiam externa et longe dissita. Ipse quoque inter duo Testamenta medius, illius videlicet litteram evertens, hujus autem Spiritum in publicum effrens; ac per externæ et visibilis legis eversionem, occultam legem implens.

LXXVI. Imitatus est Petri zelum, Pauli constantiam et firmitatem, ac utriusque, tum nomine, tum nominis mutatione clarissimi, fidem ¹: filiorum Zebedæi grandiloquentiam: Discipulorum omnium frugalitatem et superfluarum rerum contemptum. Propterea « Claves etiam regni » cœlorum ipsi committuntur ²; » nec « Ab Jerosolyma » tantum usque ad Illyricum ³, » sed majorem circulum Evangelio comprehendit; et filius tonitruï, non quidem nominatur, sed efficitur; atque ad Jesu pectus positus; illinc vim dicendi et sententiarum profunditatem haurit. Nam Stephanus fieri, quanquam id parato esset animo, prohibitus est ⁴; pudore nimirum ac reverentia compresso lapidantium impetu. Atque etiam, ne singula persequar, de his rebus brevius adhuc et compendiosius loqui possum. Ille enim bonorum, alia quidem invenit, alia æmulatus est, alia superavit. In quantum autem per omne virtutis genus grassatus est, omnibus nostræ memoriæ hominibus palmam præripuit. Unum ad omnia adjiciam, idque breve.

LXXVII. Tanta ipsius virtus gloriæque præstantia fuit, ut multa etiam ex parvis illius virtutibus, atque adeo ex corporeis defectibus, ab aliis ad gloriam nominisque claritatem parandam, excogitata sint. Cujus generis sunt, pallor, barba, certus incedendi modus, tum etiam ad loquendum minime promptum esse, sed ut plurimum cogitandum atque intro collectum; id quod multi non recte

¹ Act. iv, 8, et seqq. — ² Matth. xvi, 1. — ³ Rom. xv, 1. — ⁴ Act. vii, 58.

imitantes, nec animadvertentes, in odiosam quamdam tris-
titiā inciderunt. Vestis etiam genus, et lectuli species,
et cibi sumendi modus; quorum nihil ille studiose adhi-
buit, sed simpliciter, et prout congruebat. Ac multos jam
Basiliōs specie tenus videre licet, statuas nimirum in um-
bris; multum enim fuerit si repetitam Echus vocem esse
dixero. Nam illa, quamvis postremam duntaxat vocis par-
tem, expressius tamen effingit: hi autem longius ab eo
distant, quam quantum accedere concupiscunt. Illud vero
non jam parvi, sed maximi etiam momenti ad gloriam
haud immerito existimatur, consuetudinem cum eo ali-
quando habuisse, aut eum coluisse, aut quidpiam ab eo
joco vel serio dictum aut factum, monimenti loco ferre;
quemadmodum dum ipse quoque me hoc nomine sæpe
gloriatum esse scio: quoniam quæ ab illo velut obiter fie-
bant, multo præstantiora atque illustriora erant, quam ea
in quibus alii elaborant.

LXXVIII. Cum autem « Cursu consummato, ac fide
» servata, dissolutionis desiderio teneretur ¹, » tempusque
coronarum instaret, atque illud quidem non audivisset:
« Ascende montem, et morere ²; » verum, « Morere, at-
» que ad nos ascende ³: » hic quoque miraculum edit, su-
perioribus haudquaquam inferius. Nam cum ferme mortuus
et exanimis esset, maximaque ex parte vita perfunctus,
circa extremos sermones robustior fit, ut cum pietatis ver-
bis abscederet; ac fidelissimis suis cultoribus ad eccle-
siasticos gradus provehendis manum et Spiritum præberet;
ut ne sacrario fraudarentur (29), quos discipulos atque in
sacerdotio adiutores habuerat. Ad ea, quæ sequuntur, gra-
vatim quidem, sed tamen se conferet oratio, licet aliis po-
tius quam nobis hic sermo conveniat. Nec enim in dolore
philosophari queo, etsi, ut philosopharer, vehementer con-

¹ 2 Tim. iv. 7. — ² Philip. i. 23. — ³ Deut. xxxii. 49.

tenderim, dum mihi in animo versatur commune detrimentum, et calamitas ea, quæ universum terrarum orbem invasit.

LXXIX. Jacebat ille extremos Spiritus ducens, atque a celesti choro, ad quem jampridem oculorum aciem intendebat, expelitus. Effusa autem circum eum erat tota civitas, jacturam hanc ægerrimè ferens, ac discessum, perinde ut tyrannidem, accusans, ejusque animam, non secus ac si retineri, atque vel manibus, vel precibus cogi posset, arripere studens. Dementes enim eos dolor reddebatur; nec quisquam erat, qui non aliquam vitæ suæ partem, si fieri posset, illius vitæ addere, paratus esset. Ut autem cessere, (oportebat enim eum mortalem deprehendi,) ipse tandem hæc verba proferens : « In manus tuas commendo Spiritum meum ¹, » inter Angelos, a quibus abducendus erat, animam lætus exhalavit; non ante tamen quam sacro-sancta doctrina eos, qui aderant, nonnihil instruxisset, extremisque alloquiis meliores effecisset. Tum vero miraculum omnium, quæ unquam fuerunt, celeberrimum designatur.

LXXX. Efferebatur vir sanctus, sanctorum virorum manibus elatus : unusquisque autem operam dabat, alius ut simbram ², alius ut umbram ³, alius ut sacrificium lectulum arriperet, ac vel solum attingeret; (quid enim illo corpore sanctius et purius?) alius ut propius ad eos, qui corpus ferebant, accederet, alius ut aspectu solo fruereetur, tanquam eo quoque utilitatis aliquid afferente. Plena erant fora, porticus, duplicia et triplicia tabulata, hominum deducentium, præeuntium, prosequentium, assectantium, sese invicem prementium; multa millia omnis generis et ætatis ante eum diem incognita. Psalmodiæ gemitibus cedebant, et animi constantia doloris magnitudine frangebatur.

¹ Psal. xxx, 6. — ² Luc. viii, 44. — ³ Act. v, 15.

tur. Certabant nostri cum exteris, cum ethnicis, Judæis, advenis; iique vicissim nobiscum, utris uberiores lacrymæ uberiorem utilitatem asferrent. Denique dolor ille in periculum desiit. Multæ enim animæ ex vi protrusionis et compressionis una cum eo excesserunt; quæ hujus finis nomine felices prædicatæ sunt, ut discessus ipsius sociæ, atque, ut ferventiorum quispiam dixerit, funebres victimæ. Cum autem corpus vix rapientium manus effugisset, ac prosequentes superasset, in parentum sepulcro conditur, ac sacerdotibus sacerdotum princeps, prædicatoribus magna vox, meisque auribus insonans, martyribus martyr adjungitur. At nunc ille quidem in cœlis est, illic etiam, ni fallor, sacrificia pro nobis offerens, et pro populo preces fundens; neque enim ita nos reliquit, ut prorsus reliquerit. At ego media ex parte mortuus et dissectus Gregorius, (utpote a magno illo socio abruptus, atque acerbam et miseram vitam trahens, ut consentaneum est eum, qui ab eo disjunctus sit,) haud scio, quemnam post illius disciplinam finem nanciscar; a quo nunc quoque per nocturnas visiones admoneor, et castigor, si quando ab officio recessero. Nec vero ego quidem luctus laudibus adjungo, atque illius vitam oratione pingo, ac tempori communem virtutis tabulam, salutiferumque omnibus ecclesiis, omnibusque animabus exemplum propono; in quod, velut in vivam quamdam legem, intuentes, vitam nostram dirigemus: vobis autem, qui ab ipso doctrina sacra imbuti estis, quidquam aliud suaserim, quam ut eum semper spectetis, ac, tanquam ipse, et vos videat, et a vobis videatur, Spiritu instruamini.

LXXXI. Adeste jam, ac me circumsistite, omnis illius chorus, tam qui sacrarii estis, quam qui inferioris ordinis; tam qui ex nostris, quam qui ex exteris; encomium mecum conficite, alius aliam quampiam illius virtutem ex-

ponentes, et conquirentes : qui thronis insidetis, legislatores ; qui rompublicam geritis, civitatis principem, ac velut conditorem ; plebei, moderatorem ; litterarum studiosi, præceptorem ; virgines, pronubum ; conjugatæ, pudicitiae magistrum ; solitarii, eum qui vobis pennas addebat ; cœnobiaci, judicem ; simplices, itineris ducem ; speculationis amantes, theologum ; hilares, frenum ; calamitosi, solatium ; senes, baculum ; juvenes, prædagogum ; pauperes, largitorem ; locupletes, dispensatorem. Quin mihi quoque videntur et viduæ patronum suum laudaturæ, et orphani patrem, et pauperes pauperum amatorem, et peregrini hospitem, et fratres fratrum amatorem, et ægrotantes medicum, cujuscumque volueris morbi et medicinæ, et sani sanitatis custodem ; omnes denique eum, qui omnibus omnia factus est, ut omnes, aut certe quamplurimos, lucrificeret.

LXXXII. Habes hæc a nobis, Basili, hoc est, a lingua quondam tibi suavissima, atque honore et ætate æquali. Quæ si ad virtutis tuæ meritum prope accesserint, beneficium id tuum est ; te enim fretus, hanc orationem institui. Sin autem longe infra dignitatem et spem tuam substiterint, quid facerem, homo et senectute, et morbo, et tui desiderio confectus ? Quanquam Deo quoque gratum est, quod pro viribus efficitur. Tu vero, sacrum et divinum caput, e cœlo nos, quæso, inspice, carnisque stimulum, a Deo nobis ad disciplinam datum, aut precibus tuis siste, aut certe, ut cum forti animo perferamus, persuade : atque omnem nostram vitam ad id, quod maxime condicibile est, dirige : nosque, posteaquam ex hac vita migraverimus, illic quoque tabernaculis tuis excipe ; ut simul viventes, et sanctam ac beatam Trinitatem, cujus nunc exiguam speciem et imaginem accepimus, purius pleniusque cernentes, desideriis nostris finem statuamus, ac bel-

lorum eorum, quæ intulimus, vel pertulimus, hoc præmium referamus. Atque hanc quidem a nobis orationem habes: nos autem, vitam post te cum morte commutantes, quis laudaturus est? si quid tamen laude dignum habeamus, quod orationi suppeditare possimus, in Christo Jesu Domino nostro, cui gloria in sæcula. Amen.

ORATIO, XLIV¹.

In novam dominicam.

ARGUMENTUM.

I. *Lex vetus de Encæniis honorandis constituta, et Scripturarum testimoniis confirmata.* II. *Encæniorum sollemnitas, sacrarum ædium cordisque innovationem complectitur.* III. *Deus lumen primum et inaccessibile. — Angeli secundum lumen, seu, radii primi luminis. — Tertium lumen, sol visibilis.* IV. *Primitivum lumen, incorporeum, nec a sole productum. — Cur homo postremus a Deo creatus. — Cur Deus homo factus.* V. *Nova dominica, dominicæ resurrectionis encænium.* VI. *Deposito veteri homine, in vitæ novitate ambulandum.* VII. *Totius desiderii viribus ad Deum contendendum. — Colenda misericordiæ opera.* VIII. *Gregorius leges constituit conjugatis, virginibus, etc.* X. *Elegans Veris*

¹ Alias XLIII, quæ autem XLV erat, nunc est XLI. Habita 16 aprilis anni 383, in Ecclesia S. Mamantis prope Nazianzum,

descriptio. XI. Admirabilis apum solertia. XII. Martyrum certamina, in illorum festivitatis, Christianis proposita.

I. DE ENCÆNIIS (30) honorandis lex vetus est, eaque præclare constituta; vel potius, de rebus novis per Encænia honore complectendis; idque non semel, verum sæpius, nimirum qualibet anni conversione diem eundem adveniente, ne alioqui res pulchræ progressu temporis evanescant, atque oblivionis gurgite obscuratæ dilabantur. « Innovantur quidem ad Deum insulæ¹, » quomododum apud Isaiam legimus, quæcumque tandem illæ insulæ existimandæ sunt; ut autem ipse opinor, gentium Ecclesiæ recens constitutæ, atque ex falsa et amara infidelitate emergentes, ac firmitatem accipientes, Dei incessibus aptam et congruentem. Innovatur etiam, apud alium Prophetam, « Murus æreus²; » hoc est, ni fallor, anima firma et aurea, recensque ad pietatem compacta. Præterea, « Canticum novum Domino canere³ » jubemur, tam qui in Babylonem pravamque confusionem a peccato pertracti, ac deinde in Jerusalem incolumes reversi sumus; (atque illic quidem, ut « In terra aliena⁴, » canticum divinum canere minime poteramus, hic autem novam cantionem, vitæque rationem instituimus;) quam qui in virtute perstitimus, novosque subinde in ea progressus facimus; cuius virtutis muneribus, sancti et innovatoris Spiritus ope, jam perfuncti sumus, ac etiam nunc fungimur.

II. Tum etiam « Tabernaculum testimonii » innovatur, et quidem magnificis sumptibus, quod Deus ostendit, et Beseleel confecit, et Moyses fixit⁵. Jam regnum quoque

¹ Isai. xli, 1. — ² Jerem. i, 18. — ³ Psal. cxlix, 1. — ⁴ Id. cxxxvi, 4. — ⁵ Exod. xxxi, 7, et xxxv, 30, et seqq.

Davidi innovatum est, neque id semel, sed prius « Cum » ungeretur, ac postea, cum rex salutaretur¹. Facta sunt etiam Encænïa Jerosolymis, et hyems erat², » nimirum infidelitatis, Jesusque aderat, Deus et templum, Deus tempori omni antiquior, et templum recens factum, uno eodemque die solutum, ac tertio post die excitatum, atque in sæcula manens, ut ipse salutem consequar, atque a veteri lapsu revocer, ac per huiusmodi beneficium instauratus, nova creatura efficiar, quin divinus quoque David « Cor mundum in se creari, ac spiritum rectum in visceribus innovari³ » postulat, non quod non habeat; (quis enim habere possit, si tantus vir eo careat?) sed quod pro novo id ducat quod nunc quotidie accrescit. Sed quid mihi plura Encænïa colligere necesse est, cum præsentia declarare promptum sit, eaque, quæ hodierno die, vitæ post mortem adjuncti, celebramus? Encænïa, Encænïa, hoc festum est, fratres. Identidem enim hoc verbum præ voluptate repetatur. Et quænam illa? qui scitis, docete: qui nescitis, auribus innovemini.

III. Lumen erat inaccessibile, ac successioni minime obnoxium, Deus, nec principium habens, nec finem habiturum, nec in dimensionem cadens, perpetuo fulgore rutilans, trino splendore micans, atque ejusmodi, ut paucis, imo ne paucis quidem; perspicua sit ipsius magnitudo. Secunda autem lumina, primique Luminis radii, Virtutes ipsum circumstantes, atque administri Spiritus. At nostrum lumen, non modo serius ortum habuit, sed etiam nocte scinditur, noctemque vicissim æquis partibus secat, oculis conceditum, ac per aërem fustum, atque id, quod dat, accipiens. Nam oculis liberam cernendi facultatem præbet, et primum ab oculis cernitur, rebusque iis, quæ sub aspectu cadunt, circumfustum, fiduciam affert. Nam cum

¹ 1 Paral. xi, 3, et seqq. — ² Joan. x, 22, — ³ Psal. l, 12.

Deus hunc ex visibilibus et invisibilibus rebus constantem mundum, hunc, inquam, magnum et admirabilem majestatis suæ præconem, fingere ac construere voluisset, *Æternis* quidem nullum aliud lumen quam se ipsum præbuit. Quid enim secundo lumine opus iis erat, qui maximum habebant? Inferioribus autem atque humanis primam hujus luminis vim protulit. Conveniebat quippe magno Lumini, opificium suum a lumine auspiciari, quo tenebras, vastamque illam rerum congeriem et confusionem omnia occupantem, solvit ac depellit.

IV. Nec vero id organicum a principio, nec, mea quidem sententia, solare protulit, verum incorporeum, nec a sole productum; sed postea ad orbem terrarum illustrationum soli traditum est. Nam cum in aliis rebus hanc rationem tenuisset, ut materiam prius conderet, ac deinde eam forma convestiret, ordine videlicet, figura, ac magnitudine unicuique rei impositis, hic, ut majoris cujusdam miraculi specimen ederet, formam materia priorem protulit; (forma enim solis, lumen est;) ac postea materiam induxit, solem hunc nimirum, diei oculum, fabricatus. Ita procreato lumine, primum quiddam inter dies numeratur, et secundum, et tertium, ac sic deinceps usque ad septimum operumque cessationis diem, quibus ea, quæ creata sunt, dividuntur ac distinguuntur, arcanis rationibus ordinata et constituta, nec confertim in rerum naturam ab omnipotenti illo Verbo producta, cujus solâ etiam cogitatio, vel solus sermo, confectum opus repræsentat. Quod si homo postremus creatus est, idque cum Dei manu atque imagine ornatus sit, nemini mirum videri debet. Construendum enim prius, tanquam regi, palatium erat, atque ita rex introducendus, omni jam suo satellitio stipatus. Quod si, quod eramus, permansissemus, ac præcepto paruissemus, effecti utique fuisset, quod non

eramus, atque ad lignum vitæ post scientiæ lignum accessissemus. Quid autem effecti? Immortales ac Deo propius adjuncti. Quoniam autem diaboli invidia mors in mundum intravit, hominemque per fraudem illexit ac circumvenit, idcirco Deus passione nostra patitur, nimirum homo factus, eoque paupertatis sese dejicit, ut caro compingatur, quo nos ejus paupertate ditemur. Hinc mors, et sepultura, resurrectio. Hinc nova creatura, et festum festo succedens, ac rursus ego festum diem agito, salutis meæ Encæniam celebrans.

V. Quid igitur, dixerit quispiam? Nonne prima Dominica Encænium erat, ea, inquam, quæ sacro-sanctam illam noctem, et luminum gestationem excepit? Quid igitur hodiernæ Dominicæ hoc tribuis, o festorum amans, et permulta festorum gaudia comminiscens? Respondeo. Illa salutifera erat, hæc salutis Natale: illa erat sepultura et resurrectionis confinium, hæc secundæ omnino creationis est; ut, quemadmodum prima creatio initium a Dominica die accepit; (id quod ex eo perspicue liquet, quod septimus ab ea dies Sabbatum efficitur, quod ab operibus requiem affert;) sic etiam rursus secunda ab eadem Dominica incipiat, ut quæ prima sit earum, quæ ipsam sequuntur, atque octava ab iis diebus, qui ante fluxerunt, sublimi utique sublimior, et admirabili admirabilior. At supernæ siquidem vitæ statum spectat; quem etiam mihi divinus ille Salomon designasse videtur, cum præscriberet, ut partem septem daremus, id est, huic vitæ¹; atque etiam octo, hoc est, futuro ævo. Id porro fiet, si et hic honestis actionibus incubuerimus, et in altero sæculo velut in integrum restituti fuerimus. Quin magnus etiam ille David eidem diei Psalmos « De octava² » accinere videtur, quemadmodum et huic Encæniorum diei Psalmum

¹ Eccle. xi, 2. — ² Psal. vi, xi, etc.

aliud nuncupat, « Innovationem quamdam domus¹ » nominans : quæ quidem domus ipsi sumus, qui Dei templum, et esse, et dici, atque adeo fieri, digni habiti sumus.

VI. Encæniorum rationem habetis. At vos innovemini, ac, « Deposito veteri homine, in novitate vitæ² » rationes vestras institute, omnibus rebus, ex quibus mors oritur, frenum injicientes, omnia membra coërcentes, pravam omnem ligni manducationem detestantes, aut etiam evomentes, atque ob id solum vetera memoria tenentes, ut ea fugiatis. Pulcher erat ad aspectum, et bonus ad esum fructus ille, qui mihi mortem intulit; proinde colorum nitorem fugiamus, ad nos ipsos oculos convertamus. Cave, ne te pulchræ atque eximiæ formæ cupiditas superet, neque tuis abripiaris palpebris, ne quidem, si fieri potest, ad tenuem furtivumque contuitum; quod quidem assequeris, si Evam tibi animo proposueris, dulcem illam illecebram, charum venenum. Quonam enim modo aliena facile huic saluti erit, quem sua perdidit? Ne dulcedine perfundantur fauces tuæ, in quas volvitur quidquid porrigitur: et quod, antequam accipiatur, in pretio est; idem acceptum, vilescit et contemnitur. Odoratus te effœminavit? Odorum suavitates fuge. Tactu emollitus es? Lævitati omni ac mollitiei nuntium remitte. Auditus in fraudem te induxit? Fraudulentis, et curiosis, ac supervacaneis sermonibus ostium claudere. Verbo Dei os tuum aperi, « Ut » Spiritum attrahas³, » non autem mortem haurias. Cum quidpiam eorum, quæ interdicta sunt, te illicit, in mentem tibi veniat, quinam eras, et unde perieris. Si vel tantillum a ratione deflexeris, ad te ipsum redi, prius quam penitus excidas, et in mortem proruas; atque ex veteri novus efficere, animæque Encænium celebra.

VII. Ira tibi adversus serpentem solum existat, per

¹ Psal. xxix. — ² Ephes. iv, 22, et Rom, vi, 4. — ³ Psal. cxviii, 131.

quem excidisti. Omne desiderium tuum ad Deum tendatur, non ad aliud quidquam insidiosum ac periculosum. Ratio omnibus præsit; neque id, quod excellentius est, ab inferiori deorsum trahatur. Fratrem tuum, et quidem immerentem, odio ne habeas, pro quo Christus mortem obiit, ac frater tuus, cum Deus ac Dominus esset, effectus est. Recte et ex virtute aliquid gerenti ne invid eas, qui ex invidia laborasti, atque animum induxisti, ut tibi invideri crederes, eamque ob causam corruisti. Lacrymam ne asperneris, qui multis lacrymis digna perpressus es, ac postea misericordiam consecutus. Pauperem ne repellas, qui Deitatis opes accepisti; sin minus, at certe in pauperis detrimentum ne dives sis. Nam id quoque ab hominibus inexplebili cupiditate correptis impetrare, permultum est. Peregrinum ne contemnas, pro quo Christus, cujus nos omnes hospites et advenæ sumus, peregrinatus est, ne a paradiso, ut prius, peregrineris. Egenti tectum, cibum, vestem impertiaris, qui in his deliciaris, etiam ultra necessitatem. Divitias ne ames, nisi pauperibus opem ferant. Remitte, cum tibi remissum sit : miserere, cum misericordiam consecutus sis : benignitate, dum licet, benignitatem compara : cura, ut omnis tibi vita, omnisque studiorum ac disciplinæ ratio innovetur.

VIII. Quæ sub jugo estis, Deo quoque nonnihil date : jam enim aliis obstrictæ estis. Virgines, omnia Deo offerite : solutæ quippe estis. Servam voluptatem ne suffuremini, libertate mulctatæ, ex eo quod cum iis habitetis, qui mariti quidem non sunt, sed tamen viri. Ut quispiam assiduis voluptatis monumentis prematur, haud sustineo; eam quoque familiaritatem, quæ per aërem contrahitur, odi ac detestor. Proceres, potentio rem timete : qui sublimibus soliis insidetis, sublimiorem. Ne quid admireris, quod non permaneat : ne contemnas, quod certum et sta-

bile sit : ne quidquam arctius constringas, quod, cum manibus tenetur, effluit : ne quid ex iis, quæ non in invidia, sed in odio sunt, expetas : ne magnopere te efferas, ut ne profundius dejiciaris : ne animos hinc attollas, quod malis præstantior appareas ; verum id tibi molestiam pariat, quod a probis supereris. Proximi tui lapsum ne ride ; verum tu, quam poteris tutissime, transi, atque interim humi jacenti manum porrige. Nec, cum mœrore afficeris, secundarum rerum spem abjice ; nec, cum prosperis rebus frueris, mœroren. Annus unus quatuor partes vehit, atque unicum temporis momentum multas rerum mutationes. Fac, ut et sollicitudo voluptatem, et spes melior tristitiam reprimat. Sic innovatur homo : sic Encæniorum dies celebratur, hujusmodi deliciis, hujusmodi epulis. « Non apparebis, inquit, in conspectu meo vacuus¹ ; » verum si quid pulchri habes, tecum feres. Nunc vero novus, moribus alius, totus in virum alterum mutatus, appareas. « Vetera transierunt : ecce facta sunt omnia nova². » Hoc festo, muneris loco, præclaram mutationem offer, ac ne sic quidem magnifice de te sentias ; verum dic cum Davide : « Hæc mutatio dexteræ Excelsi³, a quo promanat, quidquid ab hominibus recte et cum laude geritur. Non vult sermo, ut in eodem semper statu maneas, sed ut perpetuo ac laudabili motu agiteris, ac nova prorsus creatura sis ; quod quidem assequeris, si, vel in peccatum lapsus, ad bonam frugem te referas ; vel, cum ex virtute aliquid geris, cursum adurgeas.

IX. Heri ad temporis arbitrium fidem tuam accommodabas ; hodie Dei fidem cognosce. Quousque utroque poplite claudicabis ? Quousque dispones ? Tandem aliquando alacriter ædifica. Heri alicujus pretii haberi, magni ducebas ; hodie reipsa esse pluris facito. Usquequo insomnia ?

¹ Deut. xvi, 16. — ² 2 Cor. v, 17. — ³ Psal. lxxvi, 41.

Sit quoque tibi aliquando curæ veritas. Heri spectaculorum studio flagrabas; hodie contemplationis studiosum te præbe. Heri conviciator, petulans eras; hodie placidus laudator. Heri comessator eras; hodie gravitatis et temperantiæ magister. Hodie temulentus; cras abstemius. Hodie in lectis eburneis lasciviens, ac primariis unguentis delibutus; cras humum pro lecto habens, atque insomnem noctem ducens; pro scurra et faceto, cogitabundus; pro ornato, et vestium elegantiam nimium ambitiose consectante, pannis indutus; pro superbo et arrogante, vilis, quantum ad externam speciem; pro laqueâribus aureis, anguste habitans; pro sublimi, ac cervicem attollente, humi vultum demittens. Hoc si animo fueris, atque ita feceris, « Cælum » tibi novum erit, et terra nova¹, » nimirum, ut alia, ita horum etiam rationem intelligenti.

X. Sed jam ad ea, quæ temporis sunt, celebranda, nos conferamus. Commodum enim omnia ad hoc festum concurrunt, simulque lætantur. Vide enim qualia sint, quæ oculis offeruntur. Princeps anni pars principi dierum pompam peragit, ac quidquid pulcherrimum et suavissimum habet, a se ipsa tribuit. Nunc cælum splendidius; nunc sol sublimior, aureoque nitore rutilantior; nunc lunæ orbis clarior, et siderum chòrus purior. Nunc, et fluctus cum littoribus, et nubes cum sole, et venti cum aëre, et terra cum stirpibus, et stirpes cum oculis, in gratiam redeunt. Nunc fontes limpidius fluunt, nunc flumina uberius, nimirum hybernis vinculis soluta. Nunc, et pratum suaviter olet, et plantæ pullulant, et herba detondetur, et in virentibus arvis agni saltitant. Nunc navis cum celestibus, iisque ut plurimum piis ac religiosis, e portu solvit, veloque, tanquam pennis, cingitur; ac per gyrum assultat etiam delphinus, jucundissimum quiddam insuf-

¹ Isai, LXV, 17.

flans, seseque in altum evehens, et gaudio gestiens, vectores prosequitur. Nunc aratrum agricola compingit, oculos in altum tollens, frugumque datorem invocans, ac bovi aratori jugum innectit; dulcemque sulcum proscindit, ac spes lætas fovet. Nunc pastor ei bubulcus fistula aptant, ac pastorale carmen inspirant, atque inter plantas et petras vernal tempus transigunt. Nunc plantarum cultor plantam curat, et aucups calamos construit, ac ramos suspectat, et pennam avium studioso explorat. Nunc piscator profundum aquæ perspicit, ac rete suum repurgat, et petris insidet.

XI. Nunc sedulæ apes, solutis pennis, et relictis alvearibus, sapientiæ suæ documentum præbent, atque ad præta convolant, floresque diripiunt: et aliæ quidem cellulas elaborant, sexangulas et inter se oppositas fistulas attexentes, rectasque lineas angularibus alternantes, non minus ad operis elegantiam, quam ad securitatem: aliæ vero mel in horrea recondunt, atque hospiti suo dulcem fructum et inaratum proferunt. Utinam nos quoque, qui Christi aspiarium sumus, ac tale tum sapientiæ, tum industriæ et laboris exemplum accepimus, eas imitemur. Jam avis nidum construit, atque alia quidem redit, alia immigrat, alia circumvolat, ac nemus cantu suo implet, hominemque garritu demulcet. Omnia Deum laudant, et vocibus mutis concelebrant. Propter omnia enim gratiæ Deo per me habentur; atque ita illorum laudatio, mea efficitur nimirum a quibus ego laudis argumentum capio. Nunc quidem omne animantium genus ridet, atque omnibus sensibus pascimur. Nunc etiam superbus equus, et jubam arrigens, stabulum fastidit, ac, perfractis vinculis, per campos lascivius fertur, atque in fluminibus gestit, seseque ostentat.

XII. Quid cætera commemorem? Nunc Martyres sub

dio populum retinent, ac pompam agunt, splendidisque sedibus piam plebem et Christi amantem convocant, ac certamina sua in publicum proponunt. Quo e numero unus quoque est meus ille laureatus, (meus enim, etsi non apud me, facessat invidia, scientibus loquor,) Mamas ille insignis, et pastor, et martyr; qui prius quidem cervas mulgebat, ad sanctum virum novo et inusitato lacte alendum certatim properantes; nunc autem metropolis plebem pascit, hodieque multis hominum millibus undecumque accurrentibus ver innovat, tum virtutis pulchritudine varium, tum pastoribus dignum, tum sermonibus in ipsius triumpho laudem consecratis. Atque ut paucioribus adhuc verbis rem complectar, nunc ver mundanum, ver spirituale, ver animis, ver corporibus, ver visibile, ver invisibile: quo utinam in altero ævo participes efficiamur, præclare in hac vita mutati, ac novi ad novam vitam transmittamur in Christo Jesu Domino nostro, cui gloria, honor et imperium cum sancto Spiritu, ad gloriam Dei Patris. Amen.

ORATIO XLV¹.

In sanctum Pascha.

ARGUMENTUM.

I. Gregorius, ut alter Habacuc, speculatur. II. Pascha, festivitatum festivitas.—Pascha, Christi resurrectionem,

¹ Alias XLII, quæ autem XLV erat, nunc est Epistola CCLXIII. Habita Arianzi anno circiter 385.

non in spe positam, sed jam ortam indicat. — Pascha, dies omnium maximus. X. Pascha litterali ac spirituali sensu consideratum. XI. Universa lex vetus futurorum umbra fuit; quamvis difficile sit cuique figuræ allegoriam excogitare. — Deus a mortali natura leviter concipitur. XII. In allegoriis media quædam via tenenda est. — Homo Dei misericordia a peccato revocatus. — Planta incurva non facile erigitur. — Lex, adjumenti causa, hominibus data. XIII. Lex scripta, et varia hujus legis sacrificia. — Qualis agnus legalis, utpote Christi figura. Perfectus. Masculus. Anniculus. Immaculatus. XIV. Allegoriarum series circa agnum legalem. — Cur hædus in sacrificiis legalibus deligatur. XV. Sacra Paschatis nocte, primigenæ tenebræ depelluntur. — Agnus mactatur, et ostiorum postes sanguine signantur. — Mors primogenitorum, ultima Ægypti plaga. XVI. Agnus paschalis ad vesperam comedendus. — Non elixus, sed tostus. — Totus vorabitur. — Nec quidquam ex eo in posterum diem recondetur. — Quidquid osseum est igne absumetur. XVII. Modus, quo paschalis agnus est comedendus. Festinanter. Cum lactucis agrestibus. — Lex nova cum veteri comparata. XVIII. Lumbi zona castitatis sunt præcingendi. — Zona militaris. — Quid sit lumbos cum veritate succingi. XIX. Calceamenta solvenda. — Baculus duplex. XX. Vasa aurea ab Ægyptiis petenda. XXI. Idola surripienda ac delenda. XXII. Christi sanguis, pretium nostræ redemptionis. — Deo Patri a Christo oblatus. — Certa consilii ratione et dispensatione Pater Christi sacrificium accipit. — Serpens æneus, non Christi typus, sed antitypus. — Crucis victoria. XXIII. Pascha in veteri lege, figura erat figuræ obscurior. — Legis participes simus, non littera, sed spiritu. — Sacrificium laudis Deo immolandum. — Hæmi-

liter in Sancta Sanctorum prospiciendum. XXIV. Christus in cruce adorandus. — In morte, funebribus unguentis unguendus. — In resurrectione, celebrandus. XXV. In ascensione, glorificandus. XXVI. Christus pro hæreticis gratis mortuus est. — Humilitas ad exaltationem ducit. XXVII. Christus, missus ut homo, sitiit, esurivit, flevit. — Hæretici, animi perversitate Judæos; dæmones incredulitate superant, XXVIII. Homo creatus, mandatum accipit. — Ob mandati transgressionem labitur. — Christi morte sublevatur. XXIX. Varia, Christo moriente, miracula. XXX. Sacrum Paschæ totius mundi piaculum.

I. « SUPER custodiam meam stabo ¹, » inquit admirandus Habacuc ². Ego quoque cum ipso hodie, data mihi per Spiritum sanctum potestate ac contemplatione, quasi è specula diligenter observabo, et mecum ipse considerabo quidnam mihi spectandum proponetur, et quid dicetur. Et steti, ac speculatus sum : et ecce vir sedens super nubes, atque hic perquam sublimis; et facies ejus, ut facies Angeli; et amictus ejus, « Ut splendor fulguris discurrentis ³; » et extulit manum suam ad Orientem, et clamavit voce magna. Vox ejus, ut vox buccinæ; et in circuitu ejus, quasi multitudo cœlestis exercitus, et dixit : Hodie salus mundo, tam visibili, quam invisibili. Christus ex mortuis; simul surgite. Christus ad sese; redite. Christus ex sepulcro; peccati vinculis solvamini. Portæ inferi aperiantur, et mors opprimatur, et vetus Adam deponatur, et novus perficitur; si quæ nova in Christo creatura, renovemini. Hæc quidem ipse dicebat : illi autem idem canē-

¹ Habac. II, 1. — ² Vide D. Gaillon, tom. VI, p. 365-368. — ³ Nahum. II, 4.

bant, quod anto, cum Christus nobis per terrenam natiuitatem apparuit : « Gloria in altissimis Deo, et in terra pax, in hominibus bona voluntas ¹. » Cum quibus ipse quoque inter vos hæc loquor; atque utinam vocem angelicæ parem accipiam, omnesque orbis terræ fines circumspiciantem.

II. Pascha Domini, Pascha, iterumque Pascha dicam, in honorem Trinitatis. Hæc nobis festivitatum festiuitas, et celebritatum celebritas, tanto cæteris omnibus, non solum humanis et e terra ortis, sed iis etiam, quæ ipsius Christi sunt, ac propter ipsum celebrantur, superior, quanto sol stellas antecellit. Præclara quidem nobis quoque fuit hesternæ candidæ vestis ac luminum gestatio, (quam privatim iuxta publiceque peregrimus, omne genus hominum ferme, atque omnes magistratu et dignitate insignes, largo igne noctem collustrantes), magnumque illud lumen referens, quod, vel cælum orbem universum siderum suorum pulchritudine illustrans, superne nobis trajicit, vel supercæleste est, tum in Angelis, quæ prima post primam lucida natura est; (nam illinc splendorem trahunt;) tum in ipsa Trinitate, a qua lumen omne productum est, ab indivisibili lumine divisum atque honoratum. At hodierna præclarior et excellentior. Nam hesternum lumen magni illius luminis exurgentis prænuntium erat, ac veluti profesta quædam animorum voluptas. Hodie autem ipsam resurrectionem celebramus, non jam in spe positam, sed jam ortam, mundumque totum sibi conciliantem. Enimvero alius aliud quiddam huic tempori donet, ac munus festivum offerat, vel parvum vel magnum, modo spirituale, Deoque gratum, unusquisque pro virium suarum ratione. Nam dignum munus offerre vix ipsi quoque Angeli possint, illi, inquam, primi, et intelligentes, et puri,

¹ Luc. ii, 14.

supernæque gloriæ spectatores, ac testes; si tamen his quoque omnibus numeris absoluta Dei laudatio concessa est. Nos autem sermonem, quo nec pulchrius quidquam habemus, nec præstantius, conferemus; præsertim Verbum laudantes, ob beneficium, quod ab eo ad naturam ratione utentem profectum est. Hinc autem exordiar. Facere enim nequeo, quin de magna victima, et die omnium dierum maximo, sermones, victimæ cujusdam instar, offerens, ad Deum excurram, atque illinc exordium ducam. Ac vos, et mentem, et aures, et intellectum perpurgate, qui in hujusmodi rebus delicias positas habetis; (quandoquidem de Deo, ac divina est hæc oratio;) ut veris deliciis, non autem evanescentibus expleti, discatis. Erit autem oratio nostra simul et plenissima, et contractissima; ut nec ob defectum molesta sit, nec ob saturitatem tædium afferat.

A num. III-X. vide orationem XXXVIII. N. VII-XIV. ubi eadem iisdem verbis concepta reperies.

X. Sed quorsum hæc, dicturus est fortasse quispiam ex his, qui majore erga festum studio ducuntur, fervidiorique animo præditi sunt? Equum ad metam stimula; de iisque, quæ hujus festi sunt, et ob quæ hic assidemus, orationem ad nos habe. Ita vero faciam, etsi paulo altius exorsus sum, sic nimirum et ratione et amore perpellentibus. Nec vero abs re, ut opinor, fuerit, studiosis et honesti cupidis hominibus de nomine ipso Paschæ quædam præfari. Id enim non contemnendum additamentum aurius fuerit. Hoc Pascha, hoc, inquam, magnum et venerandum, Pascha ab Hebræis juxta eorum linguam nomi-

natur; quæ vox Transitum sonat¹, historica quidem ratione, propter Israëlitarum ex Ægypto in Chananæam regionem fugam et migrationem: sin autem spirituales sensum spectemus, propter nostram ex his inferioribus ad superiora, atque ad promissionis terram progressionem et ascensum. Quod vero in permultis Scripturæ locis accidisse comperimus, ut vocabula quædam ab obscuriori sensu ad apertiore, atque ab duriori sono ad elegantiorum immutata sint, idem hic quoque contigisse animadvertimus. Quidam enim salutiferæ passionis nomen hoc esse arbitrati, ac deinde per litteræ φ in π, et x in χ mutationem, hanc vocem ad linguam græcam accommodantes, hunc diem Pascha nominarunt. Atque hæc vox postea consuetudine atque usu confirmata est, multitudine videlicet hoc verbum, ut magis pium, calculo suo comprobante.

XI. Enimvero legem universam, futurorum, atque eorum, quæ animo et ratione intelliguntur, umbram fuisse, divinus Apostolus ante nos pronuntiavit². Ac Deus etiam, qui Moysi ante oracula edidit, cum de his rebus leges illi præscriberet: «Vide, inquit, ut omnia facias juxta exemplar, quod tibi in monte ostensum est³;» ea nimirum, quæ aspectu sentiuntur, quasi adumbrationem quamdam, et delineationem earum rerum, quæ oculorum sensum fugiunt, esse ostendens. Atque illud persuasum habeo, nihil temere, nec inconsiderate, nihil humiliter atque abjecte, nihil denique Deo legislatore ac ministro Moyse parum dignum, indictum atque constitutum esse; tametsi difficile factu sit, ut suam cuique umbræ ac figuræ allegoriam excogitemus, minutatim ad singula descendentes, quæ tum de arca ipsa, et mensuris, et materia, et Levitis ac ministris eam gestantibus; tum etiam de sacrificiis et

¹ Exod. xii, 11. — ² Coloss. ii, 17. — ³ Exod. xxv, 40, et seqq.

lustrationibus atque oblationibus lege sancita sunt : quæ quidem his solis conspicua sunt, qui virtute Moysem referunt, vel ad ejus eruditionem proxime accedunt. Nam in ipso quoque monte Deus hominibus apparet, partim de specula sua ipse nonnihil descendens, partim nos ex terrena depressione in altum evehens, ut a mortali natura leviter saltem, et quatenus tutum est, incomprehensibilis ille concipiatur. Neque enim aliter terreni corporis ac mentis vincæ crassities Deum concipere potest, nisi divinitus adjuvetur. Tunc igitur, non eodem statu atque ordine omnes dignos habitos fuisse constat; verum hunc alio, illum alio, unumquemque, ut opinor, pro purgationis suæ modo ac ratione. Quidam etiam prorsus arcebantur, ipsisque vocis ex alto duntaxat audiendæ potestas fiebat, nimirum iis, qui belluinis erant moribus, divinisque mysteriis indigni.

XII. Nos tamen media quadam via inter eos, qui crassiore omnino ingenio sunt, et eos, qui nimio contemplationis et anagogiæ studio ducuntur, incedentes, ut nec prorsus inertes ac torpidi maneamus, nec rursus curiosiores simus, quam par sit, atque a proposito argumento excidamus et evagemur; (alterum enim judaicum quodam modo et abjectum, alterum ineptum et somniorum conjectore dignum est, ac utrumque parem reprehensionem mereatur;) ad hunc modum de his rebus, pro virium nostrarum modulo, non nimis absurde nec ridicule disseremus. Ita enim existimamus : quandoquidem nos per peccatum ab initio lapsi, atque voluptatis illecebra usque ad idolorum cultum ac nefarios cruores surrepti fueramus, per viscera misericordiæ Dei Patris nostri, qui hominis, tanti mantus suæ opificii, jacturam facere non sustinuit, revocari ac in pristinum statum restitui oportebat. Quonam igitur pacto illum reformari, quidve fieri? Negligi quidem

acriorem medicinam, utpote ad persuadendum minus idoneam, et quæ, ob diuturniorem animi tumorem, excæcare possit, leni autem ac benigno medicamine procurari, ut erigeretur. Neque enim plantam incurvam, subitam inflexionem, manusque erigentis violentiam ferre; sic enim potius fore, ut lædatur atque infringatur, quam ut erigatur; nec equum præferocem, ac jam ætate aliquanto proveciorem, freni tyrannidem perferre, nisi blanda quadam et adulabunda manu permulceatur. Propterea nobis, adjumenti causa, Lex datur, velut maceria quædam, inter Deum atque idola interjecta, ab his quidem nos abducens, ad illum autem revocans. Ac paululum quiddam primo indulget, ut majus accipiat. Sacrificia ad tempus concedit, ut Deum in nobis inserat; ac postea, cum commodum fuerit, ipsa quoque sacrificia de medio tollat, mira sapientia per tacitas subtractiones animos nostros sensim immutans, atque ad Evangelium traducens, jam ad obediendum exercitatos et assuefactos.

XIII. Sic igitur atque his de causis, Lex scripta introducta est, ad Christum nos deducens: atque hæc, ut mea fert sententia, sacrificiorum est ratio. Ut autem sapientiæ Dei profunditatem, atque impervestigabilium ipsius judiciorum divitias intelligas, ne quidem mysterii prorsus expertia et inutilia, et in nudo ac simplici sanguine defixa reliquit: verum magna illa, et, quantum ad primam naturam, immaculabilis, ut ita loquar, victima, legalibus sacrificiis immixta est; illa, inquam, non exigua cujusdam partis orbis terrarum, nec ad exiguum tempus, sed totius mundi nunquam intermōritura expiatio. Proinde agnus quidem accipitur, propter innocentiam veterisque nuditatis indumentum. Talis enim est victima illa pro nobis cæsa, quæ incorruptionis indumentum, ut revera est, appellatur.

Perfectus autem ¹, non modo propter Divinitatem, qua nihil perfectius, sed etiam propter humanitatem Divinitate unctam, idemque effectam, quod id a quo uncta est, atque, ut audacter loquar, ὁμόθεν « Simul Deum. » Masculus autem, ut qui pro Adamo potissimum offeratur, verum illo firmo firmior, cum ille primus in peccatum lapsus sit; atque imprimis quod nihil muliebri, nihil molle atque effœminatum gestet; verum et virgineis et maternis vinculis pro potestate ac vi eruperit, et « Masculus, ut annuntiat » Isaias, ex Prophetissa natus sit ². » Anniculus porro, ut sol justitiæ, vel e cœlo progrediens, vel, quantum ad partem eam, quæ oculis cernitur, circumscriptus ac definitus, et ad se ipsum rediens: atque item ut « Benignitatis corona benedicta ³, » omnique ex parte sibi similis et æqualis: ac præterea ut virtutum, quæ amicitiae ordinisque lege leniter placideque inter se conjunguntur, et commisceantur, orbem progignens. Immaculatus insuper et incorruptus, ut qui nævos, et vitia, et sordes a peccato manantes, curet. Quamvis enim « Peccata nostra suscepit ⁴, » et morbos portaverit, ipse tamen nihil eorum, quæ curationis indigent, perpessus est. « Tentatus est » enim per omnia pro similitudine nostra, cæterum absque » peccato ⁵. » Ille enim, qui « Lucem in tenebris lucentem ⁶ » persecutus est, eam haudquaquam comprehendit.

XIV. Quid præterea? Mensis quidem primus ⁷, vel mensium potius principium inducitur; sive quispiam ab initio apud Hebræos id fuerit, sive ex ea re postea factus sit, atque hoc mysterio hoc acceperit, ut princeps esset. « Decima autem mensis: » quia hic numerus omnium absolutissimus, nimirum ex unitatibus unitas prima perfecta, et perfectionis parens. Asservatur porro in quintum diem,

¹ Exod. xii, 5, et seqq. — ² Isai. viii, 3. — ³ Psal. lxxiv, 12. — ⁴ Isai. liii, 4. — ⁵ Hebr. iv, 15. — ⁶ Joan. i, 5. — ⁷ Exod. xii, 2, et seqq.

fortasse quia victima mea id habet, ut sensus expurget, a a quibus peccatum oritur, et circa quos bellum committitur, utpote peccati aculeum admittentes. Deligitur autem, non solum ex agnis ¹, sed etiam ex deteriori genere, ex hœdis scilicet, qui sinistra mauu sunt ²; quia non pro justis duntaxat, sed etiam pro peccatoribus mactatur; ac fortasse ipsorum potius causa, quandoquidem majcri misericordia opus habemus. Illud autem minime mirandum est, quod maxime quidem per singulas domos ovis requiritur; sin minus, at certe per domos familiarum ob paupertatem erogatus: quandoquidem optimum est, potissimum quidem sibi quemque ad perfectionem sufficere, seseque hostiam sanctam viventem vocanti Deo offerre, atque ejusmodi, quæ semper, et per omnia consecratur: sin id non datur, eorum saltem opera et adjumento ad eam rem uti, qui virtute nobis consanguinei sunt, moribusque persimiles. Hoc enim mihi significare videtur, quod vicinos sacrificii participes fieri Deus præcipit, si ita opus fuerit.

XV. Hinc sacra nox, noctisque hujus, qua præsens vita suffunditur, inimica, in qua primigenæ tenebræ depelluntur, atque omnia in lucem et ordinem formamque prodeunt, ac confusio ea, quæ prius vigeat, ornatum accipit. Hinc Ægyptum fugimus, hoc est, triste nosque persequens peccatum, ac Pharaonem invisibilem tyrannum, et sævos operum præfectos, ad supernum mundum migrantes: ac luto et conficiendorum laterum labore liberamur, paleari nimirum et instabili carnis hujus constitutione, quæ ne acerosis quidem rationibus in multis validior est. Hinc agnus mactatur, atque actio et contemplatio, seu habitus et actus, pretioso sanguine signantur; nam hi ostiorum nostrorum postes sunt, hoc est, mentis agitationum et dog-

¹ Exod. xii, 5. — ² Matth. xxv, 33.

matum, quæ ex contemplatione recte aperiuntur atque clauduntur, quandoquidem comprehensionum quoque modus quidam est. Hinc postrema et persecutoribus gravissima plaga, nocteque profecto digna: ac cogitationum suarum actionumque primogenita luget Ægyptus, (quod et « Semen Chaldaicum » sublatum atque oppressum Scriptura vocat ¹, et « Puerulos Babylonios ad petram allisos ² » et solutos,) atque clamore et luciferatione apud Ægyptios omnia personant: ac tum a nobis illorum exterminator secedet, unctionis metu ac reverentia. Hinc « Fermentum » septem dierum spatio ³ » submovetur; (hic enim numerus omnium maxime mysticus, atque huic mundo consociatus;) hoc est, vetus et acida pravitas; (non enim illud, quod panem efficit ac vitale est;) ut ne quod Ægyptiacæ conspersiois viaticum ⁴, nec ullas pharisaicæ ⁵ et impiæ doctrinæ reliquias nobis paremus.

XVI. Atque illi quidem lugeant: nos autem agnum comedamus; ad vesperam quidem ⁶, quoniam in sæculorum fine Christi passio contigit; siquidem vespere quandoque, peccati videlicet caliginem discutiens, Discipulis sacramentum impertitur. Non elixum autem, sed tostum ⁷; ut ne quid speculationis expers atque aquosum nobis fidei doctrina habeat, nec ejusmodi, ut facile dissolvi queat, sed tota densa et solida, atque igne purgante explorata, et ab omni crassiore ac superflua materia pura et libera sit, utque bonis illis carbonibus, intellectum nostrum accendentibus, et purgantibus, ab eo adjuvemur, qui idcirco « In terram venit ⁸, » ut ad improbas animi habitudines absumendas « Ignem mitteret, » ejusque accensionem adurgeret. Quidquid porro carneum ⁹ et esculentum habet

¹ Judith. v, 6. — ² Psal. cxxxvi, 8, et seq. — ³ Exod. xii, 15. — ⁴ Ibid. 19. — ⁵ Matth. xvi, 6. — ⁶ Exod. xii, 18. — ⁷ Ibid. 9. — ⁸ Luc. xii, 49. — ⁹ Exod. xii, 8, et seqq.

doctrina cum intestinis abditisque mentis partibus comedetur et absumetur, atque ad spiritualem concoctionem digeretur, ad caput usque ac pedes, hoc est, primas de Divinitate contemplationes, et postremas Incarnationis meditationes. Nec vero quidquam efferemus, nec « Usque » ad mane relinquemus¹, quoniam nec ad externos magna nostrorum mysteriorum pars efferenda est, nec ultra hanc noctem purgatio ulla superest, nec in iis, qui Verbi participes fiunt, procrastinatio laudem habet. Quemadmodum enim præclarum ac Deo gratum est, ut ira per omnem diei cursum minime duret, verum « Ante solem occidat², » sive id temporali modo, sive anagogico intelligas; (nec enim nobis irascentibus justitiæ Solem occumbere tutum est;) ita nec huiusmodi escam pernoctare, nec in posterum diem abscondi expedit. Quidquid autem osseum minimeque ad edendum aptum est³, hancque rationem habet, ut difficillime intelligi queat, id nec confringetur, hoc est, male dividetur atque intelligetur; (mitto enim dicere, quod, « Nec, quantum ad historicum sensum, os Jesu » confractum est⁴, » idque cum carnifices ipsius mortem ob Sabbatum adurgerent; nec projicietur et raptabitur, « Ne sancta canibus dentur⁵, » ac sceleratis Verbi disceptoribus, quemadmodum « Nec porcis, » quod in Verbo splendidum et gemmeum est, verum igne absumetur, quo et holocausta, a Spiritu omnia scrutante et sciente attenuata et servata, non autem in aquis pereuntia, nec dispersa; quemadmodum vituli illius ab Israël tumultuarie confecti caput a Moyse in diuritiae illius probrum sparsum est⁶).

XVII. Ne modus quidem manducationis prætereundus est, cum nec lex ipsa eum prætermiserit, sed contempla-

¹ Exod. xii, 10. — ² Ephes. iv, 26. — ³ Exod. xii, 16. — ⁴ Joan. xix, 33. — ⁵ Matth. vii, 6. — ⁶ Exod. xxxii, 19, et seqq.

tionem in verbis et littera eosque elaboraverit. « Victimam » enim festinanter absumemus, et azymos panes cum lactucis agrestibus comedentes, et lumbis accincti, et calceamentis instructi, ac denique sonum more, baculum » gestantes ¹. » Festinanter quidem, ne in eam culpam incidamus, a qua Lot divino interdicto avocabatur; ne circumspiciamus, ne stemus in omni circumjacente regione; in montem, salutis causa, confugiamus, ne « Sodomitico » illo et inusitato igne ² » simul involvamus, nec propter nostram in deterius conversionem, quæ ex cunctatione nasci solet, in salis statuam concrescamus ³. Cum lactucis autem agrestibus ⁴, quoniam vita divinæ legi consentanea, iis præsertim qui incipiunt, acerba et ardua est, voluptatibusque sublimior. Nam etsi novum « Jugum suave est, et » onus leve ⁵, » ut ex Scriptura audis; id tamen propter spem sit ac mercedem, hujus vitæ molestiis et ærumnis longe uberiorem: alioqui enim quis non Evangelium legalibus præceptis multo laboriosius atque ærumnosius esse dixerit? Nam cum lex peccatorum duntaxat fines prohibeat, nobis ipsæ etiam causæ, propemodum ut actiones, crimini vertuntur. « Non adulterium committes ⁶, » inquit Lex: at tu, « Ne concupisces ⁷ » quidem, ex curioso ac studioso contuitu animi affectum incendens. « Non occides ⁸, » ait illa: at tu, « Ne si feriaris quidem, referies ⁹, » quin potius percutienti te ipsum expones. Quanto tandem hæc illis sapientiora? « Non pejerabis, » inquit illa: at tu, « Penitus » nec jurabis, nec parvum, nec magnum; » quod scilicet ex juramento perjurium nascatur. « Non junges domum » cum domo, ait illa, nec agrum cum agro ¹⁰, » tyrannide pauperem opprimens: at tu, libenti animo, iustis etiam

¹ Exod. xii, 3, et seqq. — ² Gen. xix, 24. — ³ Ibid. 26. — ⁴ Exod. xii, 8. — ⁵ Matth. xi, 20. — ⁶ Exod. xx, 14. — ⁷ Matth. v, 28. — ⁸ Exod. xx, 15. — ⁹ Matth. v, 39. — ¹⁰ Isai. v, 8.

rationibus quæsitæ opes excuties, atque in pauperum subsidium spoliaberis¹, ut leviter crucem tollas divitiasque ab aspectu remotas assequaris.

XVIII. Jam lumbi, multis quidem animantibus remissi ac soluti sint²: neque enim illis inest ratio, quæ voluptatibus imperet; quanquam hæc quoque motus naturalis libidinisque modum norunt. Tibi autem per zonam ac temperantiam restringatur pars illa, quæ libidine æstuat, ac velut hinnitum edit³; (nam hoc verbo Scriptura, hujus affectus turpitudinem exagitans, utitur;) ut, « Mortificatis membris, quæ sunt super terram⁴, » Pascha pure comedas, solitarii illius Joannis et præcursoris, magnique veritatis præconis, præcinctionem imitans⁵. Sed et aliam zonam novi, nimirum militarem et virilem, juxta quam « Euzoni Syriæ et Monozeni » quidam nominantur⁶; ac Deus ipse Jobum alloquens: « Nequaquam, inquit, verum accinge ut vir lumbos tuos⁷, » et da responsum virile; quibus etiam viribus beneficio divino « Accinctum » se esse » David gloriatur⁸, ac Deum quoque ipsum « Potentia indutum atque accinctum⁹, » inducit, nempe adversus impios: nisi tamen malit quispiam potentiæ exuberantiam ac veluti restrictionem his verbis significari: quo etiam sensa, « Lumine, sicut vestimento¹⁰, » amictus dicitur. Insuperabilem enim potentiæ ipsius ac luminis vim quis sustinebit? Quæro quid lumbis cum veritate commune sit, et quæ Pauli mens fuerit, cum diceret: « State igitur succincti lumbos vestros in veritate¹¹? » Num forte quod speculatio concupiscentiam coërceat, nec aliorum ferri sinat? Nec enim fieri potest, ut qui rei cuiuspiam amore flagrat, parem ad alias voluptates vim habeat.

¹ Matth. xix, 21. — ² Exod. xxi, 11. — ³ Jerem. v, 8. — ⁴ Coloss. iii, 5. — ⁵ Matth. iii, 4. — ⁶ 4 Reg. v, 2. — ⁷ Job. xxxviii, 3. — ⁸ Psal. xvii, 33. — ⁹ Id. xcii, 1. — ¹⁰ Id. ciii, 2. — ¹¹ Ephes. vi, 14.

XIX. Jam qui terram sanctam ac divinis vestigiis impressam contacturus est, « Calceamenta solvat¹, » quemadmodum et Moyses ille in monte, ut nihil mortuum ferat, nec inter Deum atque homines intermedium. Consimilimodosi quis Discipulus « Ad prædicandum Evangelium » mittitur², frugalitati ac simplicitati studeat: quippe quem, præter id quod nec æs, nec baculum, nec duplicem tunicam habeat, etiam nudis pedibus iter facere oporteat, ut « Pulchri pedes evangelizantium pacem³, » et quodlibet aliud bonum, appareant. At vero qui Ægyptum ac res Ægypti fugit, calceos sumat⁴, ut tutus sit, cum ab aliis rebus, tum a scorpiis et serpentibus, quos permultos Ægyptus alit, ut ab iis, qui calcaneum observant, et quos calcare jussimus, minime vulneretur⁵. Jam de baculo atque ejus significatione ita sentio⁶. Nam cum alter fulciendi vim habeat, alter pastoris et doctoris proprius sit, atque oves ratione præditas convertat, in viamque reducat; hic lex fulcientem baculum tibi præscribit, necubi animo titubes, dum Dei sanguinem, et passionem, et mortem audis, ac dum Dei patronus atque defensor videri cupis, impie corruas. Quin potius, sine pudore ac dubitatione corpus ede, sanguinem bibe, si modo vitæ desiderio teneris, nec sermonibus de carne fidem abrogans, nec ad eos, qui de passione habentur, impingens. Innixus sta, firmus et stabilis, atque ita comparatus, ut nulla in requatariis ab adversariis, nec verborum lepore atque illecebris abripiaris. In fastigio tuo sta, « In atriis Jerusalem » pedes statue⁷, in petra suffulci, ut tui secundum Deum gressus non moveantur.

XX. Quid ais? Ita-ne fixum ac decretum est, ut ex

¹ Exod. iii, 5. — ² Luc. x, 3, et seqq. — ³ Isai. lvi, 7. — ⁴ Exod. xii, 11. — ⁵ Luc. x, 19. — ⁶ Exod. xii, 11. — ⁷ Psal. cxxi, 2.

Ægypto, hoc est, « Ex fornace ferrea¹, » excedas, impiūque deorum multorum cultum illic vigentem relinquant, atque a Moyse, ipsiusque legibus ac militari imperio ducaris? Consilium quoddam tibi porrigo, nequaquam meum, imo admodum quoque meum, si rem spiritaliter expendis, « Vasa aurea et argentea² » *Ægyptiis* commodato pete: cum his te itineri committe: ex alienis facultatibus viaticum tibi para, imo ex tuis potius. Servitutis enim ac confectorum laterum merces tibi debetur. Callide tu quoque aliquid circa mercedis flagitionem comministere: pulchre fraudas. Esto sane, gravibus hic laboribus vexatus es, cum luto colluctans, id est, cum ærumnoso et impuro corpore, ac domos alienas et caducas extruens, quarum memoria cum sonitu perit. Quid? gratis-ne et absque pretio egredieris? Quid? An *Ægyptiis* et adversariis potestatibus ea relinques, quæ male adepti sunt, ac pejus consumunt? Nullum jus in ea habent; sacrilegio compilarunt, eripuerunt ei, qui dixit: « Meum est argentum, et meum » est aurum, daboque ei, cui voluero³. » Heri illa possidebant; sic enim permittebatur. Hodie ea tibi Dominus offert ac tradit, honeste et ad salutem usuro. « Amicos » nobis de mammona iniquitatis⁴ » comparemus, ut, cum defecerimus, in iudicii tempore recipiamus.

XXI. Si Rachel quædam es, aut Lia, hoc est, patriarchica et magna anima, patris quoque tui idola, quæcumque inveneris⁵, surripe, non ut serves, sed ut deleas. Si autem sapiens Israëlitis, ad terram promissionis transfer, eoque nomine disruciatur persecutor, atque ex fraude sibi facta hoc intelligat, quod tyrannide ac servitute meliores frustra opprimebat. Hoc si feceris, atque ita ex *Ægypto* excesseris, ignis, mihi crede, ac nubis columna

¹ Deut. 10, 20. — ² Exod. 25, 2. — ³ Agg. 11, 9, 2, et Dan. 10, 14. —

⁴ Luc. xvi, 9. — ⁵ Gen. xxxi, 19.

tibi die ac nocte iter præmonstrabit ¹, desertum mitigabitur, mare tibi scindetur, Pharao demergetur, panis pluet, petra scaturiet, Amalec opprimetur; non armis tantum, sed etiam hostilibus justorum manibus, precationem simul atque insuperabile crucis trophæum signantibus: fluminis cursus inhibebitur ², sol sistetur, lunæ cursus reprimetur, muri, nullis etiam machinis admotis, corruent, crabrones præcurrent, viam Israël munientes, atque alienigenas arcentes; reliqua etiam omnia, quæ post hæc, et simul cum his, memoriæ prodita sunt, ne nimis longum sermonem producam, Dei beneficio tibi concedentur. Ac tale est festum, quod hodierno die agitas; tali epulo, tum natalitio, tum funebri, quantum in te est, accipias, ob eum, qui, tua causa, et natus, et passus est; tale tibi Paschatis mysterium. Hæc lex adumbravit; hæc Christus perfecit, ille, inquam, litteræ abrogator, ille Spiritus initiator, qui, ut ex eo, quod passus est, ad patiendum nos erudit, ita ex eo, quod glorificatus est, hoc nobis affert, ut simul glorificemur.

XXII. Enimvero alienum non fuerit, rem ac doctrinam inquirere, a multis quidem neglectam, meo autem iudicio, studiose perquirendam. Eccui enim ille pro nobis sanguis, et quam ob causam fusus est, ille, inquam, magnus et nobilis Dei, tum pontificis, tum victimæ sanguis? Nos enim a diabolo detinebamur, utpote qui venundati essemus sub peccato, ac vitium cum voluptate commutassemus. Quod si redemptionis pretium non alii ulli, quam ei, qui captivos tenet, persolvitur, quæro cui tandem oblatum est, et quam ob causam? Si prævo illi, o gravem contumeliam! si non a Deo solum, sed Deum quoque ipsum pro redemptionis pretio latro accipit, adeoque insigne et excellens tyrannidis suæ præmium, cujus causa

Exod. xiii, 12, et seqq. — 2 Josué. xiii, 15, et seqq.

nobis quoque parci æquum erat : si autem Patri, primum quomodo id factum est ? Nec enim ab ipso tenebamur. Deinde, quæ ratio afferri potest, ut Unigeniti sanguine Pater oblectetur, qui ne Isaac quidem a patre oblatum, acceperit, sed ariete, in rationalis victimæ locum substituto, sacrificium permutarit ? Perspicuum utique est Patrem quidem accepisse, non tamen quod petierit, aut eo opus habuerit, verum certa consilii ratione et dispensatione, et quia, per humanitatem a Deo assumptam, homini sanctitatem afferri oportebat ; ut, tyranno per vim superato, nos liberaret, atque ad se per mediatorem Filium reduceret, hoc, ad Patris honorem, cui in omnibus rebus cedere perspicitur, dispensantem. Ac de Christo hæc nobis dicta sint, aliaque multo plura silentii honore afficiantur. At vero, serpens æneus adversus serpentum morsus suspenditur¹, non tamen ut Christi pro nobis passi typus, verum ut antypus (31) : atque iis, qui ipsum intuentur, salutem affert, dum non vita frui, sed mortuus esse, ac subditas sibi potestates secum interimere creditur, oppressus nimirum et extinctus, sicut merebatur. Et quod tandem illi congruens epitaphium canemus ? « Ubi est, mors, stimulus tuus ? » Ubi tua, inferne, victoria² ? » Crux te prostravit, vitæ auctor tibi necem attulit. Exanimis es, mortuus, immobilis, iners, serpentis licet figuram serves, in sublimi loco ignominiose pendes.

XXIII. Jamvero Paschatis participes erimus, nunc quidem adhuc typice, tametsi apertius, quam in veteri lege ; (legale siquidem Pascha, nec enim dicere verebor, figura erat figuræ obscurior ;) aliquanto post autem perfectius et purius, tum videlicet cum « Verbum novum illud » nobiscum in regno Patris bibet³, » patefaciens ac docens,

¹ Num. xxi, 8, et seqq. — ² Osee. xiii, 14, et 1 Cor. xv, 55. — ³ Matth. xxvi, 29.

quæ nunc minus plene demonstravit. Novum enim illud semper est, quod nunc intelligitur. Quænam autem illa sit potio atque perceptio, discere nostrum est, illius docere, Discipulisque suis hanc doctrinam impertiri. Doctrina enim, ejus quoque, qui alit, cibus est. Age vero, nos quoque legis participes efficiamur, verum evangelice non literaliter, perfecte non imperfecte, sempiternæ non temporarie. Caput nobis efficiamus, non terrenam Jerusalem, sed cœlestem metropolim; non eam, inquam, quæ nunc ab exercitibus calcatur, sed quæ ab Angelis laude et prædicatione effertur. Mactemus, non « vitulos novellos, nec agnos » nos cornua producentes et ungulas ¹, quæ magna ex parte mortua sunt, ac sensu carent; verum Deo in superno altari cum cœlestibus choris « Sacrificium laudis immolemus » ². Penetremus primum velamen, ad secundum accedamus, in Sancta Sanctorum prospiciamus. Atque, ut majus aliquid dicam, immolemus nos Deo; imo, singulis diebus nosmetipsos motusque omnes immolemus. Omnia pro Verbo excipiamus, per passiones passionem imitemur, per sanguinem sanguinem honoremus, crucem alacres conscendamus. Dulces sunt clavi, tametsi valde acerbi. Præstat cum Christo, et pro Christo pati, quam cum aliis in deliciis versari.

XXIV. Si Simon Cyrenæus sis, crucem tolle, ac sequere ³. Si, ut latro, cruci simul affixus fueris, ut vir probus, « Deum agnosce » ⁴: si ille quoque propter te tuumque peccatum « Cum iniquis reputatus sit » ⁵, tu propter illum justus fias. Adora tua causa suspensum; et pendens ipse, lucri aliquid ex ipsa quoque improbitate collige: morte salutem eme: cum Jesu paradisum ingredi, ut intelligas, quibus bonis excideras. Pulchritudines illas

¹ Psal. LVIII, 32. — ² Id. XLIX, 14. — ³ Luc. XXIII, 26. — ⁴ Ibid. 40.
— ⁵ Isai. LIII, 12.

contemplare : murmuratorem cum sua blasphemia foris mori sine. Si Joseph Arimathæus sis, ab eo, qui cruci affixit ¹, corpus pete : tuum fiat mundi piaculum. Si Nicodemus sis, nocturnus ille Dei cultor, funebribus anguentis ipsum unge ². Si Maria quædam sis, si alia Maria, si Salome, si Joanna, dilucule lacrymas profunde. Fac, ut prima sublatum lapidem, Angelos etiam fortasse, atque adeo Jesum ipsum, videas ³. Nonnihil loquere ; vocem ausculta. Si audieris : « Noli me tangere ⁴, » procul sta, Verbum venerare, non autem mœre. Novit enim a quibus primum conspiciendus sit. Resurrectionis encænium celebra : Evæ succurre, quæ primum lapsa, prior quoque Christum salutavit, ac Discipulis indicavit. Petrum vel Joannem imitare, ad sepulcrum propera, « simul ac ceteri » tatim currens ⁵, » atque honesta æmulatione contendens. Quod si celeritate antevertaris, studio vince, non inclinato corpore in monumentum introspeciens, sed in ipsum ingrediens. Quod si, Thomæ instar, « a cœtu Discipulorum, » quibus apparuit Christus, abfueris ⁶, posteaquam videris, ne rei fidem abroges. Quod si id tibi fidem non facit, narrantibus saltem crede. Si ne his quidem, at certe clavorum impressionibus fidem habe. Si in infernum descendat, simul descende. Ea quoque mysteria cognosce, quæ Christus illic designavit, quod duplicis descensus consilium, quæ ratio fuerit : utram omnes sine ulla exceptione adventu suo salvos fecerit, an illic quoque ceteri duntaxat, qui crediderunt.

XXV. Si in cœlos ascendat, simul ascende : comitantibus vel excipientibus Angelis te adjuuge. Portis, ut attollantur ac sublimiores fiant, impera ⁷, quo a passione subfi-

¹ Luc. xxiii, 50, et seqq. — ² Joan. xix, 29. — ³ Marc. xvi, 1. — ⁴ Joan. xx, 17, et seqq. — ⁵ Ibid. 2. — ⁶ Ibid. 24, et seqq. — ⁷ Ibid. xxiii, 7.

inorem capiant. His, qui propter corpus et passionis signa, quæ in descensu non allata, secum ascendens tulit, mento dubia et ancipiti sunt, atque ideo percunctantur : « Quis est iste Rex gloriæ? » Responde : « Dominus fortis » et potens¹, » tum in iis omnibus, quæ semper fecit, et facit, tum in præsentī bello ac trophæo, pro humana natura erecto; ac duplici interrogationi responsum duplex repende. Quod si, secundum dramaticam illa apud Isaiam personarum loquentium inductionem, admiratione defixi, dixerint : « Quis est iste, qui de Edom, rebusque terrenis » venit²? » Aut, quomodo rubra sunt ejus, qui sanguinis ac corporis expers est, vestimenta, non secus ac vinitoris, qui torcular plenum calcaverit? Stolæ corporis passi pulchritudinem ex adverso profer, quod per passionem exornatum est, ac per Deitatem, qua nec amabilius quidquam, nec pulchrius, explenduit.

XXVI. Quid ad hæc nobis sycophantæ dicunt, acerbi, inquam, isti Divinitatis expensores, rerum honestarum et laudabilium reprehensores, circa lucem tenebrosi, circa sapientiam imperiti, pro quibus Christus gratis mortuus est, ingrata creaturæ, pravi illius figmenta? Siccine Deo beneficium crimini vertis? Eo-ne parvus est, quia propter te humilis, « Quia ad ovem errantem bonus ille Pastor » venit³, animam suam pro ovibus ponens, ad montes et colles, in quibus sacrificabas⁴, et errantem invenit, et inventam, iisdem humeris, quibus et crucis lignum, sustulit, et acceptam, ad supernam vitam reduxit, eoque subvectam eodem numero atque ordine collocavit, quo eas, quæ minime aberrarunt? « Quia lucernam, hoc est, » carnem suam accendit; et domum everrit⁵, » mundum scilicet a peccato repurgans, et drachmam, re-

¹ Psal. xxiii, 8. — ² Isai. lxi, 1, et seqq. — ³ Joan. x, 11. —

⁴ Osai. iv, 13. — ⁵ Luc. xv, 8.

giam videlicet imaginem sædis affectibus obrutam, conquistavit, atque amicas sibi virtutes ob repertam drachmam convocat, lætitiæque participes facit, quas incarnationis quoque conscias effecerat? Quia lucernam præviam Lux illa clarissima sequitur, et vocem Verbum, et pronubum sponsus, Domino populum eximium comparantem, atque ad Spiritum per aquam præpurgantem? Hæccine Deo obijcis? Et idcirco inferiorem eum esse censes, quia « Linteo » præcingitur, ac Discipulorum pedes abluit¹, » optimamque exaltationis viam ostendit, nimirum humilitatem? Quia propter inclinatam in terram animam se dejecit, ut peccati mole deorsum vergentem secum attollat? Quonam autem pacto illud quoque non reprehendis, quod cum publicanis, et apud publicanos comedit, et publicanos Discipulos efficit, ut ipse quoque aliquid lucretur? Quid tandem? Peccatorum salutem. Nisi quis forte eo nomine medicum accuset, quod ad corporis morbos se demittat, foetoremque perferat, ut sanitatem ægrotis largiatur: atque eum etiam, qui humanitate ac misericordia permotus, in foveam se ipsum inclinat, ut « Prolapsum jumentum², » quemadmodum lege sancitum est, servet.

XXVII. Missus quidem est, verum ut homo; nam duplex in eo natura erat; siquidem, juxta naturæ legem, et fatigatus est, et fame ac siti laboravit, et angore affectus est, et lacrymas fudit. Quod si etiam ut Deus, quid propterea? Missionem³, Patris beneplacitum interpretare, ad quem sua quoque refert, tum ut principium temporis expers honoret, tum ne Deo adversari videatur. Nam alioqui, ut traditus fuisse dicitur, ita « Se ipsum tradidisse scribitur⁴ » atque ut a Patre ad vitam revocatus, et susceptus fuisse, ita « Se ipsum quoque a morte exci-

¹ JoH. XIII, 4, et seqq. — ² Deut. XXII, 4. — ³ Galat. IV, 4. — ⁴ Act. X, 14.

⁊ tasse¹, rursusque in cœlum ascendisse prædicatur. Illa beneplaciti; hæc potestatis. At tu ea quidem, quæ minuunt, atque extenuant, profers; quæ autem efferunt, præteris: atque id quidem expendis, quod passus sit; quod autem sponte, non adjungis. Proh, qualia Verbum nunc quoque patitur! Ab aliis ut Deus honoratur et contrahitur: ab aliis, ut caro, contemnitur, ac separatur. Utris amplius irascetur? Vel potius, utris condonabit, iis-ne qui male, contrahunt, an qui scindunt? Nam et illos dividere, et hos contrahere oportebat; illos, inquam, numero, hos Deitate. Impingis ad carnem? et Judæi quoque ad eam impegerunt. Num Samaritanum etiam vocabis²? Nam quod sequitur, tacebo. Deitati fidem abrogas? Hoc ne Dæmones quidem ipsi fecerunt. Ita et judicii perversitate Judæos, et incredulitate dæmones superas. Illi enim Filii vocabulum, æqualitatis vocem esse censuerunt: hi autem eum, a quo fugabantur, Deum agnoverunt³; doloribus nimirum, quos sentiebant, fidem ipsis facientibus. At tu, nec æqualitatem admittis, nec Deitatem confiteris. Satiis tibi fuerat circumcisum esse, ac dæmonis intemperiiis agitari, ut ridicule aliquid dicam, quam in præputio, et incolumi valetudine, prave atque impie sentire. Sed bellum hoc, quod cum illis gerimus, vel comprimatur, si serius quidem, sed tamen aliquando, meliorem mentem induere velint; vel si id facere recusent, atque in sententia maneant, in tempus aliud differatur. Nec enim profecto quidquam extimescemus, pro Trinitate, et cum Trinitate dimicantes.

XXVIII. Nunc autem nobis faciendum est, ut orationem in summam ita colligamus. Creati sumus, ut beneficio afficeremur: beneficium accepimus, postquam creati sumus. Paradisus fidei nostræ commissus est, ut deliciis frueremur. Mandatum accepimus, ut, eo servato, gloriam

¹ Ephes. iv, 8, et seqq. — ² Joan. viii, 48. — ³ Marc. vi, 7,

assequeremur; non quod Deus id, quod futurum erat, ignoraret, sed quod arbitrio legem præscriberet. Decepti fuimus, quoniam commodis nostris invisum est. Excidimus, quoniam mandatum transgressi sumus. Jejunavimus, quoniam non jejunavimus, ligni nimirum scientiæ suavitatem deliniti ac devicti. Antiquum enim hæc mandatum erat, nobisque contemporanea quædam animæ disciplina, ac deliciarum castigatio: quod non abs re nobis indictum est, ut quod eo non servato perdidimus, servato recuperaremus. Opus habuimus Deo, qui carnem acciperet ac moretetur, ut vivamus. Commortui sumus, ut purgemur; simul resurreximus, quoniam simul mortui sumus; simul glorificati sumus, quoniam simul resurreximus.

XXIX. Quamvis autem permulta illius temporis miracula fuerint: Deus nempe in cruce pendens, sol obscuratus ac rursus inflammatus; (nam creaturas quoque Creatori condolere oportebat;) velum scissum, sanguis et aqua ex latere profluentes; alterum, ut hominis; alterum, ut humana conditione majoris; terra tremore concussa, petrae propter petram perruptæ, mortui ad fidem postremæ et communi resurrectioni asserendam resurgentes; signa partim ad sepulcrum, partim post sepulcrum edita, quæ, quis est, qui pro dignitate laudare queat? Nullum tamen cum salutis meæ miraculo conferendum est; in quo exiguæ cruoris guttæ orbem universum instaurarunt, atque idem, quod lacti coagulum, hominibus præstiterunt, in unum nos conjungentes et constringentes.

XXX. At, o Pascha, magnum, inquam, et sacrum Pascha, totiusque mundi piaculum! Te enim quasi vita præditum alloquar. O Verbum Dei, et lux, et vita, et sapientia, et potentia! Omnibus enim nominibus tuis oblector. O magnæ illius mentis soholes, et progressio, ac signaculum! O Verbum intellectile, et homo spectabilis,

qui omnia potentiae tuæ verbo devincta portas : hanc ~~ve-~~
lim orationem, non ut primitias, sed ut extremam fortasse
oblationem nostram habeas , quam tibi duplici nomine
offero , tum ut pro acceptis beneficiis tibi gratias agam ,
tum ut supplex rogem , ne ad sacras et necessarias curas ,
in quibus omnis vita nostra versata est , quidquam afflic-
tionis adjicias ; ac corporis in nos tyrannidem , (quæ
quanta sit, vides, Domine, quamque me curvet,) vel sen-
tentiam tuam , siquidem a te purgemur , sistas atque com-
primas. Quod si, qualem expetimus, vitæ finem nancisca-
mur , atque in cœlestia tabernacula recipiamur , illic
quoque tibi fortasse super altari tuo sancto grata sacrificia
offeremus , o Pater , et Verbum , et Spiritus sancte ; quia
tibi debetur omnis gloria , honor , et imperium , in sæcula
sæculorum. Amen.

ANNOTATIONES.

ANNOTATIO (1) pag. 48.

Musica in luctu, ait Sapiens, importuna narratio. Eccli. xxii, 6. Cum autem musica disciplinas omnes complecti, in hisque geometriam quoque tradatur ab harum rerum peritis, idcirco Gregorius Scripturæ consentiens, non convenire luctui Geometriam dicit. ET. CRETEUS.

ANNOTATIO (2) pag. 49.

Gregorius hic perstringit Eunomianos, qui, apud gentiles, quibus non licebat talia audire, de Deo arroganter et cum ostentatione disserebant, cum ipsi in deorum suorum patrocinium sermones etiam adhibere possent. Nam Eunomiani creatum esse Filium Dei, ortumque de nihilo contendebant, sicque eundem a Patre quasi dissectum separabant.

ANNOTATIO (3) pag. 53.

Platonis ideas. Id est, inquit Billius, *rerum quæ sunt exemplaria, seu, exemplares rerum formas.* In hoc erravit Plato, quod ideas extra Deum statuebat, aiebatque Deum, in hæc quasi exempla respicientem, res sensibiles condidisse. Præterea docebat idem Philosophus nostrum scire, nihil aliud esse, quam reminisci, quasi animus noster

imbutus esset hujusmodi cognitione ac scientia, antequam in corpus immigraret. Vulgavit etiam animarum in alia ex aliis corporibus migrationem. Hæc autem dogmata a Pythagora acceperat Plato.

ANNOTATIO (4) pag. 54.

Conjicimus difficultatis nodum solvi posse, si vox διαπαράγειν accipiat, non pro *a scopo, a recta via aberrare*, circa quæstiones, quæ in controversiam vocantur, quod semper periculosum est, sed pro, *spe frustrari*, circa eos, quibuscum disputationes aggredimur, qui in erroribus obstinate perseverant, licet tum verbo, tum scriptis illorum error invicte confutetur. Sic enim recte dicitur minime periculosum. Leuvenklaius hunc contextum sic reddidit: *Nam ut in his est utile præstare quod cupias, sic expectationi votoque animi non satisfacere, periculo caret.*

ANNOTATIO (5) pag. 59.

Plato hic intelligitur in Timæo, cujus verba Tullius in lib. de Universitate sic reddit: *Illum quidem quasi parentem hujus Universitatis invenire difficile est, et, cum jam invenaris, indicare in vulgus nefas.*

ANNOTATIO (6) pag. 60.

Nullum certe est dubium, quin Angeli Deum videant, eumque visuri sint homines, cum æternam beatitudinem adipiscentur.

ANNOTATIO (7) pag. 63.

Ex his fuit Aristoteles, qui præter quatuor rerum princi-

pia, seu elementa, quæ sunt *aqua, terra, ignis, aër*, quintum, nempe, *cælum*, e materia quadam efformatum, admittebat.

ANNOTATIO (8) pag. 75.

Vox est Jeremiæ xxiii, 18, cui subjungit Gregorius *καὶ οὕτως* explicationis causa, quasi vox illa *essentiam*, sive, *naturam Dei* significet, quod a vero sensu longius abest. Vox enim hebræa Jeremiæ *consilium* sonat. Hinc Vulgata recte reddit: *Quis enim affuit consilio Domini?* septuaginta et Theodotion interpretantur, *substantiam*, seu, *subsistentiam*; Aquila, *secretum*; et Symmachus, *sermonem*. Verum voces ὑποστῆμα et ὑποστάσις recte verti possunt, *statio* et *consessus*, sicque proprius accederent ad genuinum hebraicæ vocis sensum.

ANNOTATIO (9) pag. 76.

Mirum videri potest Joannem evangelistam, Verbi Præcursorem a Gregorio appellari. Elias hanc, inter alias, affert causam, nempe, *quod et interpret fuerit doctrinæ de Deo*. Billius vero putat Gregorium hic *memoriæ lapsu errasse, quod cum Verbi Præcursorem, et veritatis vocem* appellet, quem Tonitruum potius filium vocare debuerat. Addit etiam ita sensisse Maximum.

ANNOTATIO (10) pag. 78.

Immortalitas hic a Gregorio sumitur pro speciei perpetuitate, id est, pro perpetua morientium et nascentium hominum successione,

ANNOTATIO (11) pag. 89.

Vel certe non facile mobiles. Id refertur ad Luciferi lapsum. Nunc enim ad malum immobiles sunt Angeli per concessam ipsis constantiæ ac perseverantiæ gratiam.

ANNOTATIO (12) pag. 100.

Nunc ego mentior. Hoc problema ab Alexandro Aphrodisiaco soluitur.

ANNOTATIO (13) pag. 197.

Ecclesiæ definitionem ex multitudine deductam irridet Gregorius; non quod vera Christi Ecclesia, locorum et temporum universitate, ac membrorum multitudine, præ aliis societatibus, quæ Ecclesiæ titulo gloriantur, catholica non sit; sed quia Ariani veram se Constantinopolis Ecclesiam esse jactabant. Risu id magis, quam confutatione dignum erat, cum regiæ civitatis Orthodoxi, omni pene terrarum orbi ejusdem communionis et fidei societate jungerentur.

ANNOTATIO (14) pag. 201.

Putat Elias hunc senem esse Eusebium Samosatensem, qui ab ariana muliere, tegula in ejus caput e tecto coniecta, interfectus est. Is moriens jurejurando amicos obstrinxit, ut feminam, quæ tantum facinus perpetrarat, a pœna liberarent.

ANNOTATIO (15) pag. 203.

Alii, juxta Eliam, intelligunt domum summo sumptu

extructam atque ornatam, in qua equos aurigæ jungebant, ad quam certaminum equestrium studiosi crebro confluebant. Alii locum, *in quo dogmata sua hæretici disseminabant*, ut est in Schol. Εν αὐτῷ γὰρ πολλοὶ συνιόντες ἰδρυματιζόν. Unde per ironiam Gregorius vocat hunc locum *novam Jerusalem*. Alii denique celeberrimum Zeuppi balneum intelligunt.

ANNOTATIO (16) pag. 362.

Jam medio circiter maio anni 381, plerique Orientales episcopi, ad concilium a Theodosio imperatore vocati, Constantinopolim advenerant. Damnata primum in Synodo Maximi Cynici ordinatione, Gregorius, licet clamans et reluctans, unanimi Patrum suffragio, Constantinopolitanæ Ecclesiæ præficitur. Non multo post moritur Meletius Antiochenæ sedis antistes, vir sanctitate et doctrina conspicuus, qui paulo ante, concordiæ magis, quam propriæ utilitati consulens, Paulinum una secum in episcopali sede collocari permiserat, ea tamen lege, ut, extincto altero, alter solus Antiochenæ sedis episcopus agnosceretur. Verum post Meletii mortem, juniores præsules litem hac de re movere cœperunt, et de eligendo successore, magno cum tumultu in Synodo tractare aggressi sunt. Gregorius vero pacis et æquitatis studiosissimus, quique, defuncto Meletio, primas in concilio tenebat, ad sanio rem mentem blandis sermonibus turbarum artifices revocare conatur. Ob omnium oculos ponit, quanta Ecclesiæ mala pepererit præcedens Antiochenum schisma, cujus causa Orieps simul et Occidens in duas jam adversas partes miserabiliter scissi fuerant, et quam graviora adhuc imminerent, si præsul alter Meletii loco subrogaretur. Eos igitur amanter hortatur, ut Paulinum jam senio gravatum, solum absque

collega sedere sinant, ac deinde, cum iste e vita excesserit, alterum more majorum eligant. At irrita plane fuere illius vota; imo Gregorium obnixè rogant amici, ut cæteris assentiatur; quod perhorrescens Theologus, secum tandem abdicandi consilium iniit, ac de Synodo recessit. Interea Constantinopolim adveniunt Ægyptii ac Macedones episcopi, qui minus Gregorio, quam Orientalibus præsulibus infensi, ipsius electoribus negotium facessunt, quod, contra Ecclesiæ leges et canones, Gregorium jam Sasimorum episcopum Constantinopolitanæ Ecclesiæ præfecissent, aliaque permulta moventes, majus discordiarum incendium excitarunt. In tanta rerum confusione, Gregorius solitudinis amore flagrans, ac *veluti generosus quidam equus*, ut ipse loquitur, *vinculorum, quibus adhuc tenebatur, impatiens*, arrepta dissidiorum occasione, in mediam pro-siliens Synodum, plura, quæ carmine de vita sua intexuit, præfatus, sese, ut alter Jonas, ad sedandam tempestatem offert, ac discedendi facultatem exposcit. Turbatis ad tale propositum episcopis, quidve agerent incertis, licet nondum consentientibus, evasit Gregorius, eandem discedendi licentiam ab imperatore petiturus. Quam ubi obtinuit, hanc subinde præclarissimam ac celeberrimam orationem coram centum quinquaginta episcopis, universo clero ac toto fidelium grege habuit.

ANNOTATIO (17) pag. 370.

Uluet pinus, id est, prolapsis majoribus hæreticis, minores lugeant.

ANNOTATIO (18) pag. 373.

Tunc scilicet, ob edictum a Theodosio decima diei ja-

nuarii 381 promulgatum, Catholici, pulsatis hæreticis, Ecclesias occupabant.

ANNOTATIO (19) pag. 382.

Curas ecclesiasticas. Hæc videntur ironice dicta. Unde *Nicetas pecuniarias curas* interpretatur.

ANNOTATIO (20) ibid.

Alludit ad bellum Phocense, quod quidem, quia pro fano Delphico direpto et expilato gerebatur, *sacrum* est dictum. Istud autem *sacrum* est appellatum a Gregorio, quia ab episcopis et sacerdotibus de rebus sacris et divinis committebatur.

ANNOTATIO (21) pag. 384.

Alludit ad octoginta presbyteros, quos Valens imperator Nicomediæ navi impositos in medio mari crudeliter exussit.

ANNOTATIO (22) pag. 397.

Aliptæ, id est, *cohortatores*. Μοx Σιγῶντα κηρύγματα, *tacita præconia*, quia non sermonibus, sed membrorum lacerationibus pietatem prædicabant.

ANNOTATIO (23) pag. 421.

Episcopi quidam. Hi erant Lucifer et Eusebius apostolicæ sedis legati, qui ex Occidente, ad componendos motus Cæsareæ missi fuerant.

ANNOTATIO (24) pag. 429.

Intelligit Eusebium Samosatensem, qui cum Gregorio, Theologi nostri patre, Basilium consecravit.

ANNOTATIO (25) pag. 436.

Per *Jacob*, *Athanasium* intelligit : per *Esait*, *Georgium*, qui, ejecto Athanasio, in ejus locum subrogatus fuerat.

ANNOTATIO (26) pag. 451.

Intelligit hospitalem domum, quam Basilium, alendis pauperibus et fovendis ægrotis, extra Cæsaream construendam curaverat.

ANNOTATIO (27) *ibid.*

Septem mundi miracula hic a Gregorio intelliguntur; nempe, Thebæ in Bœotia septem portas habentes, et Thebæ in Ægypto centum portis cinctæ : muri Babylonii a Semiramide extracti : Mausoli sepulcrum in Caria ab Artemisia uxore conditum : Ægypti pyramides : Colossus Rhodius : Romæ Capitolium : Adriani templum apud Cyzinicos.

ANNOTATIO (28) pag. 457.

Quod scilicet expressis verbis Spiritum sanctum Deum non diceret; quamvis aliis vocibus, eandem vim habentibus, ejus Divinitatem prædicaret. Quæ quidem Basilii agendi ratio ab aliis culpata, Magno Athanasio probata fuit.

ANNOTATIO (29) pag. 466.

Ne sacrarium, id est, ordo sacerdotalis et clerus, iis defraudaretur, quos discipulos et sacerdotii adiutores habuisset.

ANNOTATIO (30) pag. 471.

Encænia. Hoc nomine significatur dedicatio cujuscunque rei; seu festum quo qualiscunque res innovatur, sive templum, sive domus, etc. Sacer erat apud Judæos dies Encæniorum, ob memoriam instaurati templi post captivitatem.

ANNOTATIO (31) pag. 497.

Gregorius, *inquit Nicetas*, serpentem æneum Christi typum haudquaquam esse censet; (neque fas est ac pium perversum spiritum Christi typum vocari;) verum anti-typum, id est, contrariam figuram. Etenim serpens a principio homini exitium attulit, Christus autem postea salutem.

FINIS TOMI QUINQUAGESIMI.

CONCORDANTIA

BIBLIOTHECÆ LATINÆ CUM GALLICA.

BIBLIOTHECA LATINA.

- Oratio xxv. In laudem Heroris philosophi, p. 3.
Oratio xxvi. In se ipsum, cum rure rediisset, post ea quæ a Maximo perpetrata fuerant, p. 24.
Oratio xxvii. Theologica i. Adversus Eunomianos, p. 44.
Oratio xxviii. Theologica ii. De Theologia, p. 54.
Oratio xxix. Theologica iii. De Filio, p. 91.
Oratio xxx. Theologica iv. De Filio, p. 114.
Oratio xxxi. Theologica v. De Spiritu sancto, p. 137.
Oratio xxxii. De moderatione in disputationibus servanda, p. 165.
Oratio xxxvi. De se ipso et de populi alacritate, p. 228.
Oratio xxxviii. In Theophania, sive, Natalitia Salvatoris, p. 260.
Oratio xxxix. In sancta Luth. p. 275.
Oratio xl. In sanctum Baptisma, p. 297.
Oratio xli. In Pentecosten, p. 344.
Oratio xlii. Supremum Vale, p. 362.
Oratio xliii. Funebris in laudem Basilii Magni, p. 389.
Oratio xlv. In sanctum Pascha, p. 482.

BIBLIOTHECA GALLICA.

- Ejusdem fragmenta, tom vi, p. 390-396.
Ejusdem fragmenta, p. 291-306.
Ejusdem fragmenta, p. 317-322.
Ejusdem fragmenta, p. 322-331.
Ejusdem fragmenta, p. 331-334.
Ejusdem fragmenta, p. 334-337.
Ejusdem fragmenta, p. 337-341.
Ejusdem fragmenta, p. 270-290.
Ejusdem fragmenta, p. 291.
Ejusdem fragmenta, p. 342-348.
Ejusdem fragmenta, p. 348-355.
Ejusdem fragmenta, p. 355-362.
Ejusdem fragmenta, p. 369-373.
Ejusdem fragmenta, p. 306-317.
Ejusdem fragmenta, p. 461-530.
Ejusdem fragmenta, p. 363-368.

INDEX


TOMI QUINQUAGESIMI.

	Pagin.
ORATIO XXV. In laudem Heronis philosophi.	3
— XXVI. In se ipsum, cum rure rediisset, post ea quæ a Maximo perpetrata fuerant.	24
— XXVII. Theologica I. Adversus Eunomianos prævia dissertatio.	44
— XXVIII. — II. De Theologia.	54
— XXIX. — III. De Filio.	91
— XXX. — IV. De Filio.	114
— XXXI. — V. De Spiritu sancto.	137
— XXXII. De moderatione in disputationibus servanda, et quod non sit cuiusvis hominis, nec cuiusvis temporis de Deo disputare.	165
— XXXIII. Adversus Arianos et de se ipso.	196
— XXXIV. In Ægyptiorum adventum.	212
— XXXV. De Martyribus, et adversus Arianos.	223
— XXXVI. De se ipso et ad eos, qui ipsum cathedram Constantino- politanam affectare dicebant, et de populi alacritate, quem erga eum ostenderat.	227
— XXXVII. In illud dictum Evangelii: <i>Cum consummasset Jesus hos sermones, etc.</i>	239
— XXXVIII. In Theophania, sive, Natalitia Salvatoris.	259
— XXXIX. In sancta Lumina.	275
— XL. In sanctum Baptisma.	294
— XLI. In Pentecosten.	344
— XLII. Supremum Vale, coram centum quinquaginta episcopis.	362
— XLIII. Oratio funebris in laudem A. Magni Cæsares in Cap- padocia episcopi.	389
— XLIV. In novam Dominicam.	470
— XLV. In sanctum Pascha.	480
ANNOTATIONES.	508
CONCORDANTIA.	515

EXPLICIT INDEX.







3 6105 008 434 560

5K6J

G6

1835

v. 2

DATE DUE

STANFORD UNIVERSITY LIBRARIES
STANFORD, CALIFORNIA
94305

